

Q. CURTII RUFII

HISTORIA

ALEXANDRI

MAGNI.

**ADIECTA SUNT
SUPPLEMENTA FREINSHEMII.**

**EDITIO STEREOTYPA
EX NOVA TABULARUM IMPRESSIONE
EMENDATISSIMA.**

^e
LIPSIÆ

**SUNTIBUS ET TYPIS CAROLI TAUCHNITII
1829.**

Tabularpreis 8 Groschen.

~~~~~

SUPPLEMENTI  
IN  
Q. CURTIUM RVFVM  
DE REBUS GESTIS  
ALEXANDRI MAGNI  
LIBER I.

**P**hilippus Macedo (qui primus omnium regum eius gentis, Macedoniae regnum, subacta tota Graecia, ad summam potentiam evexit) Amyntae, viri prudentissimi, omnibusque imperatoris virtutibus instructi, filius fuit. Is Amyntas ex Eurydice uxore tres filios susceperat: Alexandrum, Perdiccam, et Philipppum, Alexandri Magni patrem; atque filiam, Euryonem. Insidiis autem Eurydices uxoris, quae nuptias generi, mariti morte pacta, occidendum virum, regnumque adultero tradendum susceperat, oppressus fuisset, ni filia pellicatum matris, et sceleris consilia prodidisset. Post mortem Amyntae, Alexander, maior natu filius, regno potitus est. Qui inter initia regni, cogente sane durissimo necessitatis telo, bellum ab Illyriis pacto mercede, datoque Philippo fratre obside, redemit. Interiecto quoque tempore, per eundem obsidem cum Thebanis gratiam pacis reconciliat. Quae res Philippo ad maxima egregiae indolis incrementa profuit. S-

quidem tota custodiendi pueri cura, Epaminondae, strenuissimo Thebanorum duci, atque philosopho praestantissimo, hac conditione demandata est, ut commissum sibi puerum diligenter servaret, et summo studio in id iuxta incumberet, ut moribus principe dignis atque honestis disciplinis quam optime imbueretur. Fovebat ea tempestate laudatissimus princeps domi filio suo Epaminondae praeceptorem Pythagoricum, sub quo Philippus multum profecit. Interea temporis Alexander, insidiis matris Eurydices appetitus, occubuit: cui tamen antea Amyntas, in scelere deprehensae propter communes liberos, ignarus iisdem quandoque exitiosam fore, pepercerat. Frater quoque eius Perdicas, simili insidiarum fraude, relicto parvulo filio decipitur. Sub idem tempus, Philippus commodum e custodia elapsus, diu, non regem, sed tutorem pupilli egit. At ubi graviora bella imminuebant, serumque auxilium in exspectatione infantis erat, compulsus a populo, regnum Macedonicum male affectum, cum bellicis artibus, tum philosophiae praeceptis praemunitus, apprehendit, anno CCCC ab urbe condita, Olympiade CV. Circa prima itaque regni primordia, rerum infinita multitudine in diversas trahente partes, finitimis undique in Macedoniam irruentibus populis, bellisque veluti conspiratione quadam ad opprimendam Macedoniam, multarum gentium ex diversis locis, uno tempore confluentibus, rex Philippus cautius omnino agendum esse considerans, (omnibus enim par esse non poterat) alia interposita pactione composuit, alia redemit, facillimis aggressis, ut militum trepidos firmaret animos, et sibi hostium contemptum demeret. Primum illi cum Atheniensibus certamen fuit, quibus per insidias victis, metu gravioris belli, cum interficere posset, omnes incolumes sine pretio dimisit: quae res illi magnam et gratiam et auctoritatem conciliavit. Captis deinde Paeonibus,

bellum in Illyrios transtulit: ibi multis hostium millibus caesis, Larissaeam urbem nobilissimam cepit.

Hinc Thessalos, non cupiditate praedae, sed quod exercitui suo robur Thessalorum equitum adiungere gestiebat, nihil minus quam bellum metuentes, adoritur. Quibus ex improvise praecoccupatis, atque in potestatem redactis, iungendo equitum pedumque fortissimas turmas et copias, invictissimum fecit exercitum. Quibus rebus feliciter gestis, Olympiada, Neoptolemi regis Molossorum filiam, uxorem ducit, conciliante nuptias altore virginis Arisba rege Molossorum, qui sororem Olympiadis, Troadem, in matrimonio habebat: quae causa illi exitii malorumque omnium fuit. Nam, dum regni incrementa affinitate Philippi se acquisiturum sperat, proprio regno ab eodem privatus, in exsilio consenuit. Post nuptias autem Philippus per quietem visus est coniugis alvo insignem affixisse bullam, cuius sculptura, quemadmodum is existimaverat, leonis haberet imaginem. Quod vates ita sunt interpretati: Ipsam quidem esse gravidam, animosum quoque et leonis natura praeditum infantem parituram. Deinde, cum Philippus urbem Methonem expugnaret, iactu sagittae dextrum amisit oculum. Nihilominus tamen pacem deprecantibus dedit, mitisque etiam adversus victos fuit. Pegas etiam capiens, imperio suo adiecit. Triballorum quoque gentem, et quidquid praeterea terrarum in proximo erat, invadens omnia, uno velut impetu devicit. Debellatis finitimis, atque confirmato iam Macedoniae regno, cum domum rediisset, natus est ipsi Alexander filius ex Olympiade uxore, VIII Idus Aprilis, dicit Plutarchus: ab eo autem, qui illam in Latinum convertit, scribitur, circa Idus Augusti: quod sane, cuius sit error, dubium est. Porro Philippus, veluti e specula quadam, libertati omnium insidiatus, Graecorum civitates, quae dominandi libidine singulae imperare

cursum admisisset, tum calcibus usus est, ac molliter flexis habentis, cum equum reduxisset; descendens caput exosculatus pater, emissis lacrymis, Aliud, inquit, o fili, tibi par regnum quaere, quando te iam Macedonia non capit. Praesagii vir prudens, tam excelsae indoli non suffecturam paternam ditionem. Post haec Philippus toti Graeciae bellum inferre statuit, ad quod percommodum ratus, si Byzantium, nobilem et maritimam urbem, in potestatem redegisset; eandem sibi resistentem obsidione cinxit: relicto domi ad regni curam filio Alexandro, tum XVI annos nato. Haec urbs a Pausania Spartanorum rege condita, a Constantino postmodum gloria opibusque aucta, atque renovata, et a nomine suo Constantinopolis dicta, circiter MCL annos sacratissimi Imperii sedes totiusque Orientis caput fuit. Nunc tamen (proh dolor!) foedissimae atque impiissimae Turcarum gentis imperio subiacet. Sed, ut ad Philippum redeam: exhaustis in obsidione opibus, piraticam aggreditur, centumque septuaginta navium spolia rapuit, atque militibus suis distribuit. Ne autem in unius urbis obsidione tantus exercitus teneretur, profectus cum fortissimis, multas Chersonesi urbes expugnavit; filium deinde Alexandrum XVIII annos natum, virtutis et promptitudinis in rebus agendis manifestissimae, ut sub patris militia tirocinii rudimenta deponeret, ad se accersivit. Cum quo in Scythiam praedandi causa, more negotiantium, impensas belli alio bello refecturus, est profectus. Eaque expugnata, viginti millia puerorum ac feminarum capta, pecoris magna vis, auri argentique nihil, XX millia nobilium equarum ad genus faciendum in Macedoniam missa sunt. Sed revertenti a Scythia Philippo Triballi occurrunt, negantes se transitum daturus, ni portionem accipiant praedae. Hinc iurgium, mox et proelium, in quo ita in femore vulneratus est Philippus, ut per corpus eius equus inter-

ficretur. Cum omnes occisum putarent, praeda amissa est. Quam primum ex vulnere convaluit, diu dissimulatum bellum Atheniensibus infert. Cuius causa Thebani se iunxere, metuentes, ne victis Atheniensibus, veluti vicinum belli incendium, ad se transiret. Inita societate inter civitates paulo ante infestissimas, legationibus totam fatigant Graeciam, communem hostem communibus viribus summovendum putantes. Quaedam civitates motae, Atheniensibus sese iungunt: quasdam autem belli metus ad Philippum traxit. In hac pugna Philippus Alexandrum filium alteri cornu praefecit. Ubi laudatissimi herois virtus clarissime emicuit. Talem enim in eadem pugna se praestitit, ut non inferior patre, immo etiam nulli secundus existerit: postea quoque eam victoriam sibi invidia ac fraude patris praereptam fuisse conquestus sit. Commisso itaque apud Chaeroneam proelio, etsi Athenienses numero militum longe praestarent, a Macedonibus tamen, continuo ac diuturno bellandi usu exercitissimis, vincuntur. Non autem immemores pristinae gloriae cecidere. Hic dies universae Graeciae et gloriam dominationis, et vetustissimam libertatem finit. Ceterum cum Philippus semper erga Alexandrum optime affectus fuisset, tandem ex Cleopatra noverca, Olympiadi superinducta, discordia orta est. Causam adhibuit Attalus avunculus Cleopatrae: qui cum in nuptiis Macedones exhortaretur, deos orarent, ut ad regni successionem legitimus ex Philippo et Cleopatra crearetur heres; excandescens Alexander: O improbum caput! inquit, nos vero tibi nothi videmur? simulque in eum coniecit poculum. Insurgens inde pater contra Alexandrum, stricto eum petiit ferro; ictus tamen, inclinatione corporis ab Alexandro evitatus, inanis excidit. Tunc Alexander convitiis patrem adortus, receptam Olympiadem matrem secum in Epirum duxit. Eum tamen Philippus, exprobrata

sibi a Demarato Corinthio hac eorum discordia, paulo post multis precibus aegre revocavit. Inter haec nuptias Cleopatras filiae et Alexandri fratris Olympiadis, quem pulso Arisba regem Epiri fecerat, Philippus celebrat. Dies erat pro magnificentia duorum regum, et collocantis filiam, et uxorem ducentis, insignis. Sed nec ludorum celebritas deerat, ad quorum spectaculum Philippus, cum sine custodibus medius inter duos Alexandros, filium generumque, procederet, Pausanias, nobilis ex Macedonibus nemini suspectus adolescens, occupatum angustiis Philippum in transitu obruncavit, diemque laetitiae destinatum, foedum luctu funeris fecit. Hic puer stuprum per iniuriam passus ab Attalo fuerat, qui eum etiam postea, tanquam vile scortum, libidini convivarum subiecit. De quo Philippo conquestus, qui multum quidem ex rei turpitudine est motus, sed Attalo, ob magnam familiaritatem, et quod eius opera tunc uteretur, ut noceret induci haud potuit. Erat etiam Attalus, ob Cleopatram, proxime a rege in matrimonium acceptam, arctissima ei iunctus cognatione, copiarumque in Asiam praemissarum dux fuerat delectus; vir in rebus bellicis egregiae fortitudinis. Idcirco rex potius, ut Pausaniae animum iustissimo dolore incensum mulceret, est conatus: datisque ei magnis muneribus, loco insuper honestiori inter corporis sui custodes, honoravit. Sed ille implacabili ardens ira, decrevit, non tantum de eo, qui sibi iniuriam intulisset, sed et qui ulcisci illatam noluisset, poenam sumere. Vixit Philippus annos XLVII, regnavit XXV, Macedonum rex XXIII; cui maximae opes erant instrumenta bellorum; divitiarum quaestu quam custodia solertior: itaque inter quotidianas rapinas semper inops erat. Misericordia in eo et perfidia pari iure dilectae. Nulla apud eum turpis ratio vincendi: blandus pariter et insidiosus alloquio: qui plura promitteret, quam praestaret.

in seria et iocos artifex. Amicitias utilitate, non fide colebat. Gratiam fingere in odio, instruere inter concordantes odia, apud utrumque gratiam quaerere, solemnis illi consuetudo. Inter haec eloquentia, et insignis oratio, acuminis et solertiae plena, ut nec ornatui facilitas, nec facilitati inventionum deesset ornatu.

---

## S V P P L E M E N T I

### LIBER II.

**A**nno ab Urbe condita CCCCXXVI mortuo Philippo, Alexander filius, (ob magnitudinem rerum gestarum Magnus appellatus,) vigesimo aetatis anno, plenum invidia, et gravissimis odiis ac periculis undique circumseptum assecutus est imperium. Nec enim vicinae barbarorum provinciae et nationes modeste servitutum ferebant, avita vero dominia patriosque principatus affectabant. Primo-omnium autem, quotquot paternae caedis causa fuerant, gravibus affecit poenis. Deinde sepulturae eiusdem maximam impendit curam. Principatum vero multo melius, quam quisquam existimasset, confirmavit. Iuvenis enim, atque ob aetatem adhuc teneram ab aliquibus contemptui habitus, vulgus ipsam humanissimis sermonibus ita in sui benevolentiam traxit, ut et spem maximam omnibus faceret, et metum simul atque contemptum sui universis demeret. Macedonibus immunitatem cunctarum rerum, praeter militiae vacationem, dedit. Quo facto tantum sibi conciliavit favorem, ut alii corpus, non virtutem, alii vero nomen regis solum immutatum esse dicerent. Et cum initio tumultus undique contra ipsum exorti essent, audacia et animi constantia incredibili citissime motus omnes compressit. Profectus deinde Corinthum in Peloponnesum, generali



totius Graeciae concilio, contra Persas (quorum erat eo tempore summum in terris imperium, quique Graeciam saepe multis cladibus afflixerant) Imperator est designatus. Siquidem pater eius idem bellum inchoaverat, morte tamen praeventus, consummare haud potuerat. In huius belli apparatu nuntiatur, Athenienses, Thebanos, et Lacedaemonios, ab eo ad Persas defecisse, auctoremque eius defectionis, magno auri pondere a Persis corruptum, Demosthenem oratorem existisse. Quibus motibus occursurus, tanta celeritate, instructo paratoque exercitu, Graeciam oppressit, ut, quem venire non senserant, videre se vix crederent. In transitu hortatus Thessalos, beneficiorum patris commonefaciens, commemorata etiam veteri cognatione, quae sibi cum illis per Herculem esset, sermonibusque humanissimis, ut magna a se sperarent, persuasos induxit, ut communi totius Thessaliae decreto, universae gentis dux crearetur, omniaque vectigalia atque redditus suos ei traderent. Tanta autem in iuvene celeritas, tamque efficax in rebus agendis diligentia, omnes, qui per contemptum ab eo erant alienati, perterrefecit. Athenienses itaque sicuti primi defecerunt, ita etiam primi poenitere coeperunt; pueritiam Alexandri antea spreptam, supra virtutem veterum ducum extollentes: missisque legatis, bellum deprecabantur. Quibus auditis et graviter increpatis, bellum remisit. In ea legatione Demosthenem quoque fuisse ferunt, sed cum ceteris ad Alexandrum non pervenit: siquidem a Cytherone Athenas reversus est: sive correptus timore, quod frequenter Philippum cum suis vituperasset, atque in sua republica contra Macedones verba fecisset; sive ut regi Persarum (a quo magnam auri summam, ut Macedonum causam oppugnaret, accepisse dicebatur) omnem de se suspicionem eximeret. Hoc quoque ipsi ab Aeschine exprobratum aiunt; qui in oratione qua-

dam de acceptis muneribus ita dicit: In praesens sane regium aurum sumtus huic suppeditat; sed hoc deinceps haud sufficiet, cum nullae opes moribus improbis satis esse possint. Alexander sedatis motibus, qui in Graecia erant exorti, antequam in Asiam cum exercitu traiceret, per Thraciam iter faciens, Paeones, Triballos, Illyrios, aliosque finitimos petere instituit, quos novis rebus studere acceperat. Nam quod regno eius tum finitimi, tum maxime infidi erant, minime negligendos censuit, praesertim cum in tam longinquas a domo regiones cum exercitu profecturus esset. Ex Amphipoli igitur cum copiis profectus in Thraces, (quos Graeci *αυρονομους* vocant, nullius imperio, nullius legibus obnoxios) decem dierum itinere ad Haemum montem pervenit: ibi, circa aditus angustias, negotiatorum atque Thracum ingentem manum collectam obviam habuit. Insederant montis verticem, curribusque pro vallo, qua patebat aditus, utebantur; inde pugnaturi, si necessitas postulasset. Sin autem ex adversa montis parte peterentur, currus in Alexandri phalangem magno impetu erant immissuri, quod et fecerunt. Sed milites ab Alexandro edocti, alii laxatis ordinibus, alii corpora humi strata scutis contingentes, periculum omne devitarunt. Hinc alacriores facti, ingenti clamore in hostes feruntur, eosque uno impetu superavere. Alexander, protinus superato iugo, per Haemum montem in Triballos ad flumen Lygium profectus est. Syrmus Triballorum rex erat: is cognito Alexandri adventu, uxores ac pueros, ceteramque imbellem turbam, ad Danubium in insulam Peucam confestim misit, quo et Thraces Triballos finitimi se receperant. Nec multo post et ipse Syrmus eodem fugit. Reliqua Triballorum multitudo ad alteram insulam se contulerat, eo in loco, ex quo pridie Alexander moverat, sitam. Alexander Triballos repetens, hostes ex silvis in aperta provocat.

tos superat, tribus millibus caesis, reliquis in fugam coniectis, paucisque captis. Post hanc pugnam Alexander ad Danubium profectus, ad insulam, in quam Triballi ac Thraeces confugerant, contendit: cui tamen barbari summa vi restiterunt; quod erat iis facilius, quoniam et naves paucae erant, et insulae maxima pars praerupta ac praeceps, et fluminis cursus, utpote in angusto conclusus, concitator. Quapropter Alexander abductis inde navibus, trajecto noctu flumine, MCCCC equitibus, peditibusque IV millibus, Getas (quorum circiter IV millia equitum, peditumque supra X millia prohibendi animo in adversa ripa armatos viderat) petiit. Quo facto territi Getae, ne primum quidem impetum sustinuerunt. Res prorsus ingentis audaciae iis visa, Alexandrum tam facile unica nocte Danubium, omnium Europae fluminum amplissimum atque altissimum, nullo ponte iniecto, transisse. Confugientibus igitur illis in silvarum solitudines atque latebras, Rex urbem vacuum nactus, cepit, soloque aequavit. Huc loci venire legati a ceteris Danubii accolis, a Syro Triballorum rege, atque Germanis, ad Alexandrum, ut cum eo amicitiae foedus inirent. Quibus in fidem et amicitiam acceptis, e Germanis quaesivit, Quidnam in humanis rebus prae ceteris extimescerent? ratus nominis sui magnitudinem ante omnia ipsis formidolosam videri. Illi hoc se in primis timere responderunt, ne forte in sese aliquando coelum rueret. Alexander nihil motus responsi superbia, tantum adiecit, Germanos superbos esse, eosque domum remisit. Inde in Agrianos et Paeonas iter persequenti nuntiatum est, Clytum Bardiles ab eo defecisse, Glauciamque Taulantiorum regem se ei coniunxisse. Erant et qui nuntiarent fore, ut Autariatae ipsum in itinere adorirentur. Proinde negotio de Autariatis Lagaro, Agrianorum regi (qui patri Philippo admodum carus, Alexandro quo-

que perquam familiaris erat) commisso, insuper Cyna sorore, ubi Pellam revertisset, ultro in uxorem promissa, ipse ad Clytum Glauciamque magna celeritate contendit, eosque vario proclio vicit atque prostravit. Haec agenti superveniunt nuntii, multos in Graecia res novas meliri, civitatesque non paucas, et in primis Thebanos, ab eo defecisse. Qua re motus Alexander, in Macedoniam est reversus, ut factum in Graecia tumultum reprimeret. Thebanis autem, conantibus praesidium Macedonicum ex arce Thebana (quam Cadmeam vocant) depellere, ipsamque praecaltis fossis, et munitissimo vallo cinctam obsidentibus, rex cum exercitu magnis itineribus profectus, non longe a Thebis cum omnibus copiis insedit. Itaque Thebanorum duces, quoniam Alexander praeter spem omnium advenerat, ac incertum erat, utrum auxilia, sicuti a nonnullis civitatibus petierant, illis adventura essent, de belli ratione consultare coeperunt. Omnibus tandem consentientibus belli discrimen subire constituerunt. Sed rex suos continuit, illis spatium poenitendi mutandique consilii exhibens, nullo pacto futurum existimans, ut una civitas contra tantas copias esset pugnatura: Habebat enim ultra XXX millia peditum, equitumque ad III millia, omnes laboribus bellicis exercitatissimos, quorum virtuti confisus, Persicum bellum susceperat. Sane si Thebani, temporum fortunae cedentes, pacem petissent, rex eorum postulatis libentissime annuisset: nam tum mirifico studio ad Persas in Asiam transire properabat. Cum tamen armis, non precibus, uti decrevissent, Alexander Macedones ad proelium instruxit. A Thebanis, contra hostes numero longe superiores, summis viribus atque impigre decertatum est. Interim Macedonibus, qui custodiae Cadmeae arcis praecerant, a tergo invadentibus, circumventi Thebani in ipsa pugna ceciderunt. Capta civitas et direpta, urbs eversa funditus

praedicans; quod suarum virtutum praeconem Homerum invenisset, ad interiora Darii regis Persarum contendit. Hunc Darium, Arsani filium, qui decimus quartus a Cyro, totius Orientis monarchiam tenebat, hac potissimum causa aggredi voluit, quod a patre suo Philippo tributum requisierat. Darius autem, missa pritis superba, contumeliosa, atque imperiosissima legatione, se regem regum, ac consanguineum Deorum, Alexandrum vero famulum suum, appellans, satrapis suis id negotii dederat, ut insanientem istum Philippi adolescentulum, (sic enim eum per contentum appellabat) verberibus puerilibus graviter caesum, indutumque post veste purpurea, sibi vinctum traderent, navibusque una cum nautis submersis, omnes eius milites ad ulteriora maris rubri transportarent. Qui mandatum regis exsequi volentes, ad Granicum amnem (qui Troadem a Propontide disternit) magna manu, videlicet viginti millibus peditum, et pari equitum numero, confluerunt, et praeruptam fluminis ripam, qua Alexandro omnino traiciendum erat, obsederunt. Alexander, etiamsi praesentissimum periculum instare cerneret: quippe cum suis ex inferiore atque instabili loco (erat enim cum udus, tum coeno lubricus) utpote ex flumine adversus hostes in eminenti ripa stantes, dimicandum foret: suae tamen fortunae ac virtuti, simulque fortitudiniae militum confisus, amnem traiecit. Et primo quidem non spernenda difficultate pressus: tandem hostes, non tam sua arte, quam virtute Macedonum, vicit atque prostravit. In eo conflictu Persarum viginti millia peditum, et CCL equites, caesa; Macedonum non plus XXXIX interfecti sunt. Ea pugna magnum ad res Alexandri momentum peperit. Sardeis enim, maritimi barbarorum imperii propugnaculum, cepit, iisque ac ceteris Lydiae populis, ut legibus uterentur suis, concessit. Ephesum, quarto post pugnam die,

elapso inde prae metu praesidio, occupavit. Interim ex Magnesia et Trallibus legati venerunt, urbium suarum deditionem pollicentes; ad quas in fidem recipiendas Parmenionem cum duobus millibus et quingentis mercenariis, parique Macedonum numero, equitibus ex amicis circiter ducentis misit. Miletum deinde sibi resistentem oppugnavit: eaque petitus, versus Halicarnassum iter ingreditur. Omnibus interiacentibus oppidis primo impetu captis, Halicarnassum urbem pernuvitam obsedit, eamque non sine labore expugnatam, solo aequavit. Ingressus Cariam, Ada Cariae regina, (quae regno ab Orontobate, quem Darius miserat, pulsa, nihil quidquam in tota Caria, praeter Alinda, eius provinciae urbem munitissimam, tenebat,) Alexandro obviam profecta, Alindis urbe tradita, eum in filium adoptavit. Rex nec liberalitatem feminae, nec filii nomen aspernatus, urbem eidem custodiendam reliquit. Tota deinde Caria subacta, memor accepti beneficij, eam universam Adae imperio subiecit. Hinc in Lyciam et Pamphyliam tendit, eo consilio, ut ora maritima ad Phoeniciam et Ciliciam usque in potestatem redacta, navales copias hostibus inutiles redderet. Devictisque rebellibus Pisidiae populis, summo mentis ardore, nec minore alacritate, adversus Darium, quem cum multis militantium millibus adventare constabat, contendens, Phrygiam, per quam exercitus traducendus erat, est ingressus.

---

Q. CVRTII RVFI  
DE  
REBVS GESTIS  
ALEXANDRI MAGNI  
HISTORIARVM  
LIBER III.

---

ARGVMENTVM.

*Celaenarum urbe et arce recepta, primariam Phrygiae urbem Alexander ingreditur: in qua fatalem Gordii nodum solvit, ac deinde obviam Dario ire statuit, 1. Exercitus Persici lustratio. de quo cum Darii iussu Charidemus Atheniensis verum liberumque protulisset iudicium, capite multatus est, 2. Thymodes Pharnabazo, hic Memnoni succedit. Darii somnium, eiusque varia interpretatio. Pompae Persarum regum, orto sole demum procedentium, tum copiarum Alexandri descriptio, 3. Desertas ab Arsane, Darii praefecto, Ciliciae fauces Alexander opportune occupat, 4. Cum in Cydnum flumen abluendi corporis gratia intempestive descendisset, gravissimo morbo corripitur rex ipse, 5. Qui a fido sapientique medico*

*Philippo, cui a toto exorbitu ingentes gratiae habentur, pristinae valetudini mox restituitur, 6. Vegetior factus, Darium aggredi cogitat, Sisinemque Persam, imprudentia delinquentem, occidi iubet, 7. Darii ante pugnam consilia: tum exercitus Persici consternatio, proximae internecionis praesagium, 8. Utriusque exercitus membra praecipua et collatio, 9. Alexandri oratio ad milites, 10. Pugna cruenta, in qua centena millia peditum ac decem millia equitum Persarum occumbunt, reliquis fuis fugatisque, 11. Matris et uxoris Darii, nec non aliarum captivarum, luctum levat Alexander, 12. Darii gazam immensam, cum ingenti nobilium numero, Parmenioni proditorie Damasci praefectus tradit, 13.*

## CAPUT I.

Inter haec Alexander, ad conducendum ex Peloponneso militem, Cleandro cum pecunia misso, Lyciae Pamphylliaeque rebus compositis, ad urbem Celaenas exercitum admovit. Mediam illa tempestate interfluebat Marsyas annis, fabulosis Graecorum carminibus inclutus. Fons eius ex summo montis cacumine excurrrens, in subiectam petram magno strepitu aquarum cadit: inde diffusus, circumiectos rigat campos, liquidus, et suas dumtaxat undas trahens. Itaque color eius placido mari similis, locum poetarum mendacio fecit: quippe traditum est, *Nymphas amore amnis retentas, in illa rupe considerare.* Ceterum, quamdiu intra muros fluit, nomen suum retinet: at cum extra munimenta se evolvit, maiore vi ac mole agentem undas *Lycum* appellant. Alexander quidem urbem destitutam a suis intrat: arcem vero, in quam confugerant, oppugnare adortus, caduceatorem praemisit, qui denuntiaret, *ni dederent, ipsos ultima es-*



*se passuros.* Illi caduceatorem in turrim, et situ et opere multum editam, perductum, *quanta esset altitudo, intueri iubent, ac nuntiare Alexandro, non eadem ipsum et incolas aestimatione munimenta metiri: se scire inexpugnabiles esse; ad ultimum, pro fide morituros.* Ceterum ut circumsideri arcem, et omnia sibi in dies arctiora viderunt esse; *sexaginta dierum inducias pacti, ut, nisi intra eos auxilium Darius ipsis misisset, dederent urbem:* postquam nihil inde praesidii mittebatur, ad praestitutam diem permiscere se regi. Superveniunt deinde legati Atheniensium, petentes, *ut capti apud Granicum amnem redderentur sibi.* Ille non hos modo, sed etiam ceteros Graecos restitui suis iussurum respondit, *finito Persico bello.* Ceterum Dario imminens, quem nondum Euphratem superasse cognoverat, undique omnes copias contrahit, totis viribus tanti belli discrimen aditurus. Phrygia erat, per quam ducebatur exercitus; pluribus vicis, quam urbibus frequens. Tunc habebat quondam nobilem Midae regiam; *Gordium* nomen est urbi, quam Sangarius amnis interfluit, pari intervallo Pontico et Cilicio mari distantem. Inter haec maria angustissimum Asiae spatium esse comperimus, utroque in arctas fauces compellente terram. Quae quia continenti adhaeret, sed magna ex parte cingitur fluctibus, speciem insulae praebet; ac nisi tenue discrimen obiceret, maria, quae nunc dividit, committeret. Alexander, urbe in suam ditionem redacta, Iovis templum intrat. Vehiculum, quo Gordium Midae patrem vectum esse constabat, adspexit, cultu haud sane a vilioribus vulgatisque usu abhorrens. Notabile erat iugum adstrictum compluribus nodis in semetipsos implicatis, et celantibus nexus. Incolis deinde affirmantibus, *editam esse oracula sortem. Asiae potiturum, qui inexplicabile vinculum solvisset:* cupido

incessit animo sortis eius implendae. Circa regem erat et Phrygum turba, et Macedonum: illa expectatione suspensa, haec sollicita ex temeraria regis fiducia. Quippe series vinculorum ita adstricta, ut unde nexus inciperet, quo se conderet, nec ratione, nec visu percipi posset, solvere aggresso iniecerat curam, ne in omen verteretur irritum inceptum. Ille nequaquam diu luctatus cum latentibus nodis, *nihil, inquit, interest, quomodo solvantur*: gladioque ruptis omnibus loris, oraculi sortem vel elusit, vel implevit. Cum deinde Darium, ubicumque esset, occupare statuisset; ut a tergo tuta relinqueret, Amphoterum classi ad oram Hellesponti, copiis autem praefecit Hegelochum; Lesbum, et Chium, et Coë praesidiis hostium liberatos. His talenta ad belli usum quingenta attributa: ad Antipatrum, et eos, qui Graecas urbes tuebantur, sexcenta missa: ex foedere naves sociis imperatae, quae Hellesponto praesiderent. Nondum enim Memnonem vita excessisse cognoverat: in quem omnes intenderat curas, satis gnarus cuncta in expedito fore, si nihil ab eo moveretur. Iamque ad urbem Ancyram ventum erat, ubi numero copiarum inito, Paphlagoniam intrat; huic iuncti erant Eneti, unde quidam Venetos trahere originem credunt; omnisque haec regio paruit regi: datisque obsidibus, *tributum, quod ne Persis quidem tulissent, pendere ne cogerentur*, impetraverunt. Calas huic regioni praepositus est: ipse, assumtis qui ex Macedonia nuper advenerant, Cappadociam petiit.

CAP. II. At Darius, nuntiata Memnonis morte, haud secus quam par erat motus, omissa omni alia spe, statuit ipse decernere: quippe quae per duces suos acta erant, cuncta damnabat; ratus, pluribus curam, omnibus abfuisse fortunam. Igitur castris ad Babylonem positis, quo maiore animo capesseret bellum, universas vires in conspectum dedit: et circumdato

vallo, quod decem milliura armatorum multitudinem caperet, Xerxis exemplo numerum copiarum iniit. Orto sole ad noctem agmina, sicut descripta erant, intravere vallum. Inde occupaverunt emissa Mesopotamiae campos: equitum peditumque propemodum innumerabilis turba, maiorem quam pro numero speciem gerens. Persarum erant centum millia: in quibus eques triginta millia implebat. Medi decem equitum, quinquaginta millia peditum habebant. Barcanorum equitum duo millia fuerunt, armati bipennibus, levibusque scutis cetræ maxime speciem reddentibus: peditum decem millia pari armatu sequebantur. Armenii quadraginta millia miserant peditum, additis septem millibus equitum. Hyrcani egregii, ut inter illas gentes, sex millia expleverant, equis militatura. Derbices quadraginta millia peditum, armaverant: pluribus haerebant ferro praefixae hastae; quidam lignum igni duraverant. Hos quoque duo millia equitum ex eadem gente comitata sunt. A Caspio mari octo millium pedester exercitus venerat, ducenti equites. Cum his erant ignobiles Asiae gentes: duo millia peditum, equitum duplicem paraverant numerum. His copiis triginta millia Graecorum mercede conducta, egregiae iuventutis, adiecta sunt. Nam Bactrianos, et Sogdianos, et Indos, ceterosque rubri maris accolas, ignota etiam ipsi gentium nomina, festinatio prohibebat acciri. Nec quidquam illi minus, quam multitudo militum defuit. Cuius tum universae adspectu admodum laetus, purpuratis solita vanitate spem eius infantibus, conversus ad Charidemum Atheniensem, belli peritum, et ob exilium infestum Alexandro, (quippe Athenis iubente eo fuerat expulsus,) percontari coepit: *satisne ei videretur instructus ad obtinendum hostem?* At ille et suae sortis, et regiae superbiae oblitus, *Verum, inquit, et tu forsitan audire nolis; et ego, nisi nunc dixero, alias ne-*

quidquam confitebor. Hic tanti apparatus exercitus, haec tot gentium, et totius Orientis excita sedibus suis moles, finitimis potest esse terribilis: nitet purpura auroque, fulget armis et opulentia, quantam qui oculis non subiecere, animis concipere non possunt. Sed Macedonum acies torva sane et inculta, clypeis hastisque immobiles cuneos, et conserta robora virorum tegit. Ipsi phalangem vocant peditum stabile agmen. Vir viro, armis armam conserta sunt: ad nutum monentis intenti, sequi signa, ordines servare didicere. Quod impetratur, omnes exaudiunt: obsistere, circumire, discurrere in cornu, mutare pugnam, non duces magis, quam milites callent. Et ne auri argentique studio teneri putes, adhuc illa disciplina paupertate magistra stetit. Fatigatis huius cubile est: cibus, quem occupant, satiat: tempora somni arctiora, quam noctis sunt. Iam Thessali equites, et Aearnones, Aetolique, invicta bello manus, fundis credo, et hastis igne duratis repellentur? pari robore opus est. In illa terra, quae hos genuit, auxilia quaerenda sunt: argentum istud atque aurum ad conducendum militem mitte. Erat Dario mite ac tractabile ingenium, nisi suam naturam plerumque fortuna corrumpere. Itaque veritatis impatiens, hospitem ac supplicem, tunc maxime utilia suadentem, abstrahi iussit ad capitale supplicium. Ille ne tum quidem libertatis oblitus, habeo, inquit, paratum mortis meae ultorem: expetet poenas mei consilii spreto is ipse, contra quem tibi suasi. Tu quidem licentia regni tam subito mutatus, documentum eris posteris, homines, cum se permisere fortunae, etiam naturam dediscere. Haec vociferantem, quibus erat imperatum, ingulant. Sera deinde poenitentia subiit regem, ac vera dixisse confessus, curi sepeliri iussit.

CAP. III. Thymodes erat, Mentoris filius, impiger iuuenis: cui praeceptum est a rege, *ut omnes peregrinos milites, in quibus plurimum habebat spei, a Pharnabazo acciperet*, opera eorum usus in bello: ipsi Pharnabazo tradit imperium, quod ante Memnoni dederat. Anxium de instantibus curis, agitabant etiam per somnum species imminentium rerum; sive illas aegritudo, sive divinatio animi praesagientis arcessit. Castra Alexandri magno ignis fulgore collucere ei visa sunt: et paulo post Alexander adduci ad ipsum in eo vestis habitu, quo ipse fuisset: equo deinde per Babylonem vectus, subito cum ipso equo oculis esse subductus. Ad haec vates varia interpretatione curam distinxerant: alii *laetum id regi somnium esse dicebant; quod castra hostium arsisent, quod Alexandrum, deposita regia veste, in Persico et vulgari habitu perductum esse vidisset*. Quidam contra augurabantur: *quippe illustria Macedonum castra visa, fulgorem Alexandro portendere: quem regnum Asiae occupaturum esse, haud ambigere; quoniam in eodem habitu Darius fuisset, cum appellatus est rex*. Vetera quoque omina, ut fit, sollicitudo revocaverat: *Darium enim in principio imperii vaginam acinacis Persicam iussisse mutari in eam formam, qua Graeci uterentur, protinusque Chaldaeos interpretatos, imperium Persarum ad eos transiturum, quorum arma esset imitatus*. Ceterum ipse et vatum responso quod edebatur in vulgus, et specie quae per somnum oblata erat, admodum laetus, castra ad Euphratem moveri iubet. Patrio more Persarum traditum est, orto sole demum procedere. Die iam illustri, signum e tabernaculo regis buccina dabatur. Super tabernaculum, unde ab omnibus conspici posset, imago solis crystallo inclusa fulgebat. Ordo autem agminis erat talis. Ignis, quem ipsi *sacrum et aeternum* vocabant, argenteis

altaribus praeferebatur. Magi proximi patrium carmen canebant. Magos trecenti et sexaginta quinque iuvenes sequebantur, puniceis auniculis velati, diebus totius anni pares numero; quippe Persis quoque in totidem dies descriptus est annus. Currum deinde Iovi sacratum albentes vehebant equi: hos eximiae magnitudinis *equus*, quem *Solis* appellabant, sequebatur. Aureae virgae, et albae vestes, regentes equos adornabant. Haud procul erant vehicula decem, multo auro argentoque caelata. Sequebatur haec equitatus duodecim gentium variis armis et moribus. Proximi ibant quos Persae *Immortales* vocant, ad decem millia. Cultus opulentiae barbarae non alios magis honestabat: illi aureos torques, illi vestem auro distinctam habebant, manicatasque tunicas, gemmis etiam adornatas. Exiguo intervallo, quos *cognatos regis* appellant, decem et quinque millia hominum. Haec vero turba muliebriter propemodum culta, luxu magis quam decoris armis conspicua erat. *Doryphori* vocabantur proximum his agmen, soliti vestem excipere regalem. Hi currum regis anteibant, quo ipse eminens vehebatur. Utrumque currus latus Deorum simulacra ex auro argentoque expressa decorabant: distinguebant internitentes gemmae iugum; ex quo eminebant duo aurea simulacra cubitalia, quorum alterum Nini, alterum Beli gerebat effigiem. Inter haec auream aquilam pinnas extendenti similem sacraverant. Cultus regis inter omnia luxuria notabatur. Purpureae tunicae medium album intextum erat: pallam auro distinctam aurei accipitres, velut rostris inter se corruerent, adornabant; et zona aurea muliebriter cinctus acinacem suspenderat, cui ex gemma erat vagina. *Cidarim* Persae regium capitis vocabant insigne: hoc caerulea fascia albo distincta circumibat. Currum decem millia hastatorum sequebantur: hastas argento exornatas, spicula auro praefixa gestabant. Dextra laevaue regem

ducenti ferme nobilissimi propinquorum comitabantur. Horum agmen claudebatur trigiuta millibus pedatum, quos equi regis quadringenti sequebantur. Intervallo deinde unius stadii, matrem Darii Sysigambim currus vehebat; et in alio erat coniux. Turba feminarum reginas comitantium equis vectabatur. Quindecim inde, quas *armamaxas* appellant, sequebantur. In his erant liberi regis, et qui educabant eos, spadonumque grex, haud sane illis gentibus vilis. Tum regiae pellices trecentae sexaginta vehebantur, et ipsae regali cultu ornataeque. Post quas pecuniam regis sexcenti muli, et trecenti cameli vehebant, praesidio sagittariorum prosequente. Propinquorum amicorumque coniuges huic agmini proximae, lixarumque et calorum greges vehebantur. Ultimi erant cum suis quisque ducibus qui cogerent agmen, leviter armati. Contra si quis aciem Macedonum intueretur, dispar acies erat, equis virisque non auro, non discolori veste, sed ferro atque aere fulgentibus. Agmen et stare paratum, et sequi: nec turba; nec sarcinis praegrave: intentum ad ducis non signum modo, sed etiam nutum. Et castris locus, et exercitui commeatus suppetebant. Ergo Alexandro in acie miles non defuit: Darius, tantae multitudinis rex, loci, in quo pugnavit, angustiis redactus est ad paucitatem, quam in hoste contemserat.

CAP. IV. Interea Alexander, Abistamene Capadociae praeposito, Ciliciam petens cum omnibus copiis, regionem, quae *castra Cyri* appellatur, pervenerat. Stativa ibi habuerat Cyrus, cum adversum Croesum in Lydiam duceret. Aberat ea regio quinquaginta stadia ab aditu, quo Ciliciam intramus: *Pylas* incolae dicunt; arctissimas fauces, munimenta, quae manu ponimus, naturali situ imitante. Igitur Arsanes, qui Ciliciae praerat, reputans quid initio belli Memnon suasisset, quondam salubre consilium sero exsec-

qui statuit: igni ferroque Ciliciam vastat, ut hosti solitudinem faciat: quidquid usui esse potest, corrumpit; sterile ac nudum solum, quod tueri nequibat, relicturus. Sed longe utilius fuit angustias aditus, qui Ciliciam aperit, valido occupare praesidio, iugumque opportune itineri imminens obtinere; unde inultus subeuntem aut prohibere, aut opprimere hostem potuisset. Nunc paucis, qui callibus praesiderent, relictis, retro ipse concessit; populator terrae, quam a populationibus vindicare debuerat. Ergo qui relictis erant, proditos se rati, ne conspectum quidem hostis sustinere voluerunt, cum vel pauciores locum obtinere potuissent. Namque perpetuo iugo montis asperi ac praerupti Cilicia includitur; quod cum a mari surgat, velut sinu quodam flexuque curvatum, rursus altero cornu in diversum litus excurrit. Per hoc dorsum, qua maxime introrsum mari cedit, asperi tres aditus et perangusti sunt: quorum uno Cilicia intranda est. Campestris eadem, qua vergit ad mare, planitiem eius crebris distinguentibus rivis: Pyramus et Cydaus inclyti amnes fluunt. Cydaus non spatio aquarum, sed liquore memorabilis: quippe leni tractu e fontibus labens, puro solo excipitur: nec torrentes incurrunt, qui placide manantis alveum turbent. Itaque incorruptus, idemque frigidissimus, quippe multa riparum amoenitate inumbratus, ubique fontibus suis similis in mare evadit. Multa in ea regione monumenta, vulgata carminibus, vetustas exederat. Monstrabantur urbium sedes, Lyrnessi et Thebes; Typhonis quoque specus, et Corycium nemus, ubi crocum gignitur: ceteraque in quibus nihil praeter famam duraverat. Alexander fauces iugi, quae *Pylae* appellantur, intravit. Contemplatus locorum situs, non alias magis dicitur admiratus esse *felicitatem suam: obrui potuisse vel saxis* confitebatur, *si fuissent, qui in subeuntes propellerent.* Iter vix qua-



ternos capiebat armatos: dorsum montis imminebat viae, non angustae modo, sed plerumque praeruptae, crebris oberrantibus rivis, qui ex radicibus montium manant. Thracas tamen leviter armatos *praecedere* iusserat, *scrutarique calles, ne occultus hostis in subeuntes erumperet.* Sagittariorum quoque manus occupaverat iugum: intentos arcus habebant, moniti, *non iter ipsos inire, sed proelium.* Hoc modo agmen pervenit ad urbem Tarson, cui tum maxime Persae subiiciebant ignem, ne opulentum oppidum hostis invaderet. At ille, Parmenione ad inhibendum incendium cum expedita manu praemisso, postquam barbaros adventu suorum fugatos esse cognovit, urbem a se conservatam intrat.

CAP. V. Mediam Cydaus aënis, de quo paullo ante dictum est, interfluit; et tunc aestas erat, cuius calor non aliam magis quam Ciliciae oram vapore solis accendit: et diei fervidissimum tempus coeperat. Pulvere ac sudore simul perfusum regem invitavit liquor fluminis, ut validum adhuc corpus ablueret, itaque veste deposita in conspectu agrinis, (decorum quoque futurum ratus, si ostendisset suis levi ac parabili cultu corporis se esse contentum,) descendit in flumen. Vixque ingressi subito horrore artus rigere coeperunt: pallor deinde suffusus est, et totum prope modum corpus vitalis calor reliquit. Exspiranti similem ministri manu excipiunt, nec satis compotem mentis in tabernaculam deferunt. Ingens sollicitudo, et paene iam luctus, in castris erat. Flentes querebantur, *in tanto impetu cursuque rerum, omnis aetatis ac memoriae clarissimum regem non in acie saltem, non ab hoste deiectum; sed abluentem aqua corpus, ereptum esse et extinctum. Instare Darium, victorem antequam vidisset hostem. Sibi easdem terras, quas victores peragrassent, repetendas.*

*Omnia aut ipsos, aut hostes populos. Per vastas solitudines; etiamsi nemo insequi velit, cuntes, fame atque inopia debellari posse. Quem signum daturum fugientibus? quem ausurum Alexandro succedere? Iam ut ad Hellespontum fuga penetrarent; classem, qua transeant, quem praeparaturum? Rursus in ipsum regem misericordia versa, illum florem iuventae, illam vim animi, eundem regem et commilitonem, divelli a se et abrumpi, immemores sui querebantur. Inter haec liberius meare spiritus coeperat: allevabatque rex oculos, et paulatim redeunte animo circumstantes amicos agnoverat: laxataque vis morbi ob hoc solum videbatur, quia magnitudinem mali sentiebat. Animum autem aegritudo corporis urgebat; quippe *Darium quinto die in Ciliciam fore nuntiabatur. Vincitum ergo se tradi, et tantam victoriam eripi sibi e manibus, obscuraque et ignobili morte in tabernaculo suo extinguere se, querebatur. Admissisque amicis pariter et medicis, in quo me, inquit, articulo rerum mearum fortuna deprehenderit, cernitis. Strepitum hostilium armorum exaudire mihi videor, et qui ultro intuli bellum, iam provocor. Darius ergo cum tam superbas literas scriberet, fortunam meam in consilio habuit: sed nequidquam, si mihi arbitrio meo curari licet. Lenta remedia et segnes medicos non expetunt tempora mea: vel mori strenue, quam tarde convalescere mihi melius est. Proinde, si quid opis, si quid artis in medicis est, sciant, me non tam mortis, quam belli remedium quaerere. Ingentem omnibus incusserat curam tam praeceps temeritas eius. Ergo pro se quisque precari coepere, ne festinatione periculum auget, sed esset in potestate medentium: inexperta remedia haud iniuria ipsis esse suspecta, cum ad perniciem eius etiam a latere ipsius pecunia sollicitaret hostis**

(quippe Darius *mille talenta interfectori Alexandri daturum se pronuntiari iusserat*: ) *itaque ne ausurum quidem quemquam arbitrabantur experiri remedium; quod propter novitatem posset esse suspectum.*

CAP. VI. Erat inter nobiles medicos e Macedonia regem secutus Philippus, natione Acarnan, fidus admodum regi: puero comes et custos salutis datus, non ut regem modo, sed etiam ut alumnum, eximia caritate diligebat. *Is non praeceps se, sed strenuum remedium afferre, tantamque vim morbi potione medicata levaturum esse promisit.* Nulli promissum eius placebat, praeter ipsum, cuius periculo pollicebatur. Omnia quippe facilius, quam moram, perpeti poterat: arma et acies in oculis erant; et victoriam in eo positam esse arbitrabatur, si tantum ante signa stare potuisset: id ipsum, *quod post diem tertium medicamentum sumturus esset* (ita enim medicus praedixerat) aegre ferens. Inter haec a Parmenione, fidissimo purpuratorum, literas accipit, quibus ei denuntiabat, *ne salutem suam Philippo committeret. Mille talentis a Dario, et spe nuptiarum sororis eius esse corruptum.* Ingentem animo sollicitudinem literae incusserant; et quidquid in utramque partem aut metus, aut spes subiecerat, secreta aestimatione pensabat. *Bibere perseverem? ut, si venenum datum fuerit, ne immerito quidem, quidquid acciderit, evenisse videatur? Damnem medici fidem? in tabernaculo ergo me opprimi patiar? At satius est alieno me mori scelere, quam metu meo.* Diu animo in diversa versato, nulli, quid scriptum esset, enuntiat: epistolamque, sigillo annuli sui impressam, pulvino, cui incumbebat, subiecit. Inter has cogitationes biduo absorto, illuxit a medico destinatus dies: et ille cum poculo, in quo medicamentum diluerat,

intravit. Quo viso Alexander levato corpore in cubitum, epistolam a Parmenione missam sinistra manu tenens, accipit poculum, et haurit interritus; tum epistolam Philippum legere iubet: nec a vultu legentis movit oculos, ratus, aliquas conscientiae notas in ipso ore posse deprehendere. Ille, epistola perlecta, plus indignationis quam pavoris ostendit: proiectisque amiculo et literis ante lectum, *Rex*, inquit, *semper quidem spiritus meus ex te pependit, sed nunc vere, arbitror, sacro et venerabili ore trahitur. Crimen parricidii, quod mihi obiectum est, tua salus diluet. Servatus a me vitam mihi dederis, oro quaesoque; amissoque metu patere medicamentum concipi venis. Laxa paulisper animum, quem intempestiva sollicitudine amici sane fideles, sed moleste sedull turbant.* Non securum modo haec vox, sed etiam laetum regem, ac plenum bonae spei fecit. Itaque, *si Dii, inquit, Philippe, tibi permisissent, quo maxime modo animum velles experiri meum; alio profecto voluisses: sed certiore quam expertus es, ne optasses quidem. Hac epistola accepta, tamen quod dilueras bibi: et nunc credo, te non minus pro tua fide, quam pro mea salute esse sollicitum.* Haec elocutus dextram Philippo offert. Ceterum tanta vis medicaminis fuit, ut quae secuta sunt, criminationem Parmenionis adiuverint. Interclusus spiritus arcte meabat. Nec Philippus quidquam inexpertum omisit. Ille fomenta corpori admovit; ille torpentem nunc cibi, nunc vini odore excitavit. Atque ut primum mentis compotem esse sensit; modo *matris sororumque, modo tantae victoriae appropinquantis* admonere non destitit. Ut vero medicamentum se diffudit in venas, et sensim toto corpore salubritas percipi potuit; primo animus vigorem suum, deinde corpus quoque expectatione maturius recuperavit: quippe post tertium diem, quam in hoc statu fuerat, in con-

spectum militum venit. Nec avidius ipsum regem, quam Philippum, intuebatur exercitus: pro se quisque dextram eius amplexi grates habebant velut praesenti Deo. Namque haud facile dictu est, praeter ingentem illi genti erga reges suos venerationem, quantum huius quoque regis vel admirationi dediti fuerint, vel caritate flagraverint. Iam primum nihil nisi divina ope aggredi videbatur: nam cum esset praesto ubique fortuna, temeritas in gloriam cesserat. Aetas quoque vix tantis matura rebus, sed abunde sufficiens, omnia etiam eius opera honestabat. Et quae leviora haberi solent, plerumque in re militari gratiora vulgo sunt: exercitatio corporis inter ipsos; cultus habitusque paululum a privato abhorrens; militaris vigor: quis ille vel ingenii dotibus, vel animi artibus, ut pariter carus ac venerandus esset, effecerat.

CAP. VII. At Darius, nuntio de ~~diversa~~ *diversa* valetudine accepto, celeritate, quantum capere tam grave agmen poterat, ad Euphratem contendit: iunctoque eo pontibus, quinque tamen diebus traiecit exercitum, Ciliciam occupare festinans. Iamque Alexander viribus corporis receptis, ad urbem Solos pervenerat: cuius potitus, ducentis talentis nomine multae exactis, arci praesidium militum imposuit. Vota deinde pro salute suscepta per ludum atque otium reddens, ostendit, quanta fiducia Barbaros sperneret. Aesculapio et Minervae ludos celebravit. Spectanti nuntius laetus affertur ex Halicarnasso: *Persas acie a suis esse superatos: Myndios quoque, et Caunios, et pleraque tractus eius suae facta ditionis.* Igitur edito spectaculo ludicro, castrisque motis, et Pyramo amne ponte iuncto, ad urbem Mallon pervenit: inde alteris castris ad oppidum Castabalum. Ibi Parmenio regi occurrit, quem praemiserat ad explorandum iter saltus, per quem ad urbem *Isson* nomine penetrandum erat.

Atque ille angustiis eius occupatis, et praesidio medico relicto, Isson quoque desertam a Barbaris ceperat. Inde progressus, deturbatis, qui interiora montium obsidebant, praesidiis cuncta firmavit: occupatoque itinere, sicut paulo ante dictum est, idem evanctor et nuntius venit. Isson inde rex copias admovit: ubi consilio habito, *utrumne ultra progrediendum foret, an ibi opperendi essent milites novi, quos ex Macedonia adventare constabat; Parmenio non alium locum proelio aptiorem esse censebat. Quippe illic utriusque regis copias numero futuras pares, cum angustiae multitudinem non caperent: planitiem ipsis camposque esse vitandos, ubi circumiri, ubi anticipi acie opprimi possent. Timere, ne non virtute hostium, sed lassitudine sua vincerentur. Persae recentes subinde successuros, si laxius stare potuissent.* Facile ratio tam salubris consilii accepta est. Itaque inter angustias saltus hostem opperiri statuit. Erat in exercitu regis Sisines Perses: quondam a praetore Aegypti missus ad Philippum, donisque et omni honore cultus, exilium patria sede mutaverat: secutus deinde in Asiam Alexandrum, inter fideles socios habebatur. Huic epistolam Cretensis miles obsignatam annulo, cuius signum haud sane notum erat, tradidit. Nabarzanes praetor Darii miserat eam, hortabaturque Sisinem, *ut dignum aliquid nobilitate ac moribus suis ederet: magno id ei apud regem honori fore.* Has literas Sisines, utpote Innoxius, ad Alexandrum saepe deferre tentavit: sed cum tot curis apparatuque belli regem videret urgeri; aptius subinde tempus exspectans, suspicionem iniqui scelesti consilii praebuit. Namque epistola, priusquam ei redderetur, in manus Alexandri pervenerat, lectamque eam, ignoti annuli sigillo impresso, *Sisini dari* iusserat, ad aestimandam fidem barbari. Qui quia per complures dies non adierat regem; scelesto sou-

silio eam visus est suppressisse, et in agmine a Cro-  
tensibus, haud dubie iussu regis, occisus est.

CAP. VIII. Iam Graeci milites, quos Thymo-  
des a Pharnabazo acceperat, praecipua spes et propo-  
situm unica, ad Darium pervenerant. Hi magnopere  
suadebant, *ut retro abiret, spatiososque Mesopota-  
miae campos repeteret. Si id consilium damnaret;  
at ille divideret saltem copias innumerabiles, neu  
sub unum fortunae ictum totas vires regni cadere  
pateretur.* Minus hoc consilium regi, quam purpura-  
tis eius displicebat: *ancipitem fidem, et mercede ve-  
nalem prodicionem imminere; et dividi non ob  
aliud copias velle, quam ut ipsi in diversa digres-  
si, si quid commissum esset, traderent Alexandro.*  
*Nihil tutius esse, quam circumdatos eos exercitu  
toto obrui telis, documentum non inultae perfidiae  
futuros.* At Darius, ut erat sanctus et mitis, *se vero  
tantum facinus negat esse facturum, ut suam se-  
cutos fidem, suos milites iubeat trucidari. Quem  
deinde amplius nationum exterarum salutem  
suam crediturum sibi, si tot militum sanguine im-  
buisset manus? Neminem stolidum consilium ca-  
pite luere debere. Defuturos enim, qui suaderent, si  
suasisse periculum esset. Denique ipsos quotidie ad  
se vocari in consilium, variasque sententias dice-  
re; nec tamen melioris fidei haberi, qui prudentius  
suaserint.* Itaque Graecis nuntiari iubet: *ipsum  
quidem benevolentiae illorum gratias agere; cete-  
rum, si retro pergat, haud dubie regnum hosti-  
bus traditurum. Fama bella stare, et eum, qui re-  
cedat, fugere credi. Trahendi vero belli vix ullam  
esse rationem. Tanta enim multitudini, utique  
cum iam hiems instaret, in regione vasta, et invi-  
cem a suis atque hoste vexata, non suffectura  
alimenta. Ne dividi quidem copias posse servato  
more maiorum, qui universas vires semper disci-*

*mini bellorum obtulerint. Et hercule terribilem antea regem, et absentia sua ad vanam fiduciam elatum, posteaquam adventare se senserit, cautum pro temerario factum, delituisse inter angustias saltus ritu ignobilium ferarum, quae strepitu praetereuntium audito, silvarum latebris se occultuerunt. Iam etiam valetudinis simulatione frustrari suos milites. Sed non amplius ipsum esse passurum detrectare certamen. In illo specu, in quem pavidi recessissent, oppressurum esse cunctantes. Haec magnificentius iactata, quam verius. Ceterum pecunia omni rebusque pretiosissimis Damascum Syriae cum modico praesidio militum missis, reliquas copias in Ciliciam duxit, insequentibus more patrio agmen coniuge et matre. Virgines quoque cum parvo filio comitabantur patrem. Forte eadem nocte et Alexander ad fauces, quibus Syria aditur, et Darius ad eum locum, quem *Amanicas Pylas* vocant, pervenit. Nec dubitavere Persae, quin Isso relicta, quam ceperant, Macedones fugerent. Nam etiam sancii quidam et invalidi, qui agmen non poterant persequi, excepti erant. Quos omnes, instinctu purpuratorum, barbara feritate saevientium, praecisis adustisque manibus circumduci, ut copias suas noscerent; satisque omnibus spectatis, nuntiare quae vidissent regi suo, iussit. Motis ergo castris, superat Pinarum amnem, in tergis, ut credebat, fugientium haesurus. At illi, quorum amputaverat manus, ad castra Macedonum penetrant, *Darium* quam maximo cursu posset, sequi nuntiantes. Vix fides habebatur. Itaque speculatores in maritimas regiones praemissos explorare iubet, ipsene adesset, an praefectorum aliquis speciem praebuisset universi venientis exercitus. Sed cum speculatores reverterentur, procul ingens multitudo conspecta est. Ignes deinde totis campis collucere coeperunt, omniaque velut conti-*



nentí incendio ardere visa: cum incondita multitudo maxime propter iumenta laxius tenderet. Itaque *eo ipso loco metari suos castra* iusserat; laetus, quod omni expetiverat voto, in illis potissimum angustis discernendum esse. Ceterum, ut solét fieri, cum ultimi discriminis tempus adventat, in sollicitudinem versa fiducia est. Illam ipsam fortunam, qua adspirante res tam prospere gesserat, verebatur; nec iniuria, ex his, quae tribuisset sibi, quam mutabilis esset, reputabat. *Unam superesse noctem, quae tanti discriminis moraretur eventum.* Rursus occurrebat, *maiora periculis praemia: et sicut dubium esset, an vinceret; ita illud utique certum esse, honeste, et cum magna laude moriturum.* Itaque *corpora milites curare* iussit, *ac deinde tertia vigilia instructos et armatos esse.* Ipse in iugum editi montis adscendit, multisque collucentibus facibus patrio more sacrificium Diis praesidibus loci fecit. Iamque tertium, sicut praeceptum erat, signum tuba miles acceperat, itineri simul paratus et proelio: *strenueque iussi procedere*, oriente luce pervenerunt ad angustias, quas occupare decreverant. *Darium triginta inde stadia abesse* praemissi indicabant. Tunc *consistere agmen* iubet; armisque ipse sumtis, aciem ordinabat. Dario adventum hostium pavidi agrestes nuntiaverunt, vix credenti occurrere etiam, quos ut fugientes sequebatur. Ergo non mediocris omnium animos formido incenserat: quippe itineri quam proelio aptiores erant, raptimque arma capiebant, Sed ipsa festinatio discurrentium, suosque ad arma vocantium, maiorem metum incussit. Alii in iugum montis evaserant, ut hostium agmen inde prospicerent: equos plerique frenabant. Discors exercitus, nec ad unum intentus imperium, vario tumultu cuncta turbaverat. Darius initio montis iugum cum parte copiarum occupare statuit, et a fronte et a tergo circumiturus hostem: a mari quoque,

quo dextrum eius cornu tegebatur, alios obiecturus, ut undique urgeret. Praeter haec viginti millia praemissa cum sagittariorum manu, *Pinarum amnem*, qui duo agmina interfluebat, *transire, et obiiicere sese Macedonum copiis* iusserat: *si id praestare non possent, retrocedere in montes, et occulte circumire ultimos hostium*. Ceterum, destinata salubriter omni ratione potentior fortuna discussit: quippe alii prae metu imperium exsequi non audebant, alii frustra exsequebantur; quia, ubi partes labant, summa turbatur.

CAP. IX. Acies autem hoc modo stetit. *Nabarzanes* equitatu dextrum cornu tuebatur, additis funditorum sagittariorumque viginti fere millibus. In eodem *Thymodes* erat, Graecis peditibus mercede conductis triginta millibus praepositus. Hoc erat haud dubium robur exercitus, par Macedonicae phalangis acies. In laevo cornu *Aristomedes Thessalus* viginti millia barbarorum peditum habebat. In subsidiis pugnacissimas locaverat gentes. Ipsum regem in eodem cornu dimicaturum tria millia delectorum equitum, adsueta corporis custodiae, et pedestris acies quadraginta millia sequebantur. *Hyr cani* deinde, *Medique* equites: his proximi ceterarum gentium, dextra laevaque dispositi. Hoc agmen, sicut dictum est, instructum, sex millia iaculatorum funditorumque antecedeant. Quidquid in illis angustiis adiri poterat, implebant copiae; cornuaque hinc a iugo, illinc a mari stabant: uxorem matremque regis, et alium feminarum gregem in medium agmen acceperant. *Alexander* phalangem, qua nihil apud Macedonas validius erat, in fronte constituit. Dextrum cornu *Nicator*, *Parmenionis* filius, tuebatur: huic proximi stabant *Coenos*, et *Perdiccas*, et *Meleager*, et *Ptolemaeus*, et *Amyntas*, sui quisque agminis duces. In laevo, quod ad mare pertinebat, *Craterus* et *Parmenio* erant; sed

Craterus Parmenioni parere iussus. Equites ab utroque cornu locati: dextrum Macedones Thessalis adiunctis, laevum Peloponnenses tuebantur. Ante hanc aciem posuerat funditorum manum, sagittariis admixtis. Thraces quoque et Cretenses ante agmen ibant, et ipsi leviter armati. At iis, qui praemissi a Dario iugium montis insederant, Agrianos opposuit ex Graecia nuper advectos. Parmenioni autem praeceperat, *ut, quantum posset, agmen ad mare extenderet; quo longius abesset montibus, quos occu-  
paverant barbari.* At illi neque obstare venientibus; nec circumire praetergressos ausi, funditorum maxime ad spectu profugerant territi: eaque res tutum Alexandro agminis latus, quod ne superne incessetur timerat, praestitit. Triginta et duo armatorum ordines ibant; neque enim latius extendi aciem patiebantur angustiae. Paulatim deinde se laxare sinus montium, et maius spatium aperire coeperant; ita ut non pedes solum pluribus ordinibus incedere, sed etiam a lateribus circumfundi posset equitatus.

CAP. X. Iam in conspectu, sed extra teli factum, utraque acies erat; cum priores Persae inconditum et trucem sustulere clamorem. Redditur et a Macedonibus maior, exercitus impar numero, sed iugis montium vastisque saltibus repercussus: quippe semper circumiecta nemora petraeque, quantamcunque acceperere vocem, multiplicato sono referunt. Alexander ante prima signa ibat, identidem manu suos inhibens, ne suspensi, acrius ob nimiam festinationem concitato spiritu, capesserent bellum. Cumque agmen obequitaret, varia oratione, ut cuiusque animi aptum erat, milites alloquebatur. Macedones, *tot bellorum in Europa victores, ad subigendam Asiam atque ultima Orientis, non ipsius magis, quam suo ductu profecti, inveteratae virtutis admonebantur. Illos terrarum orbis liberatores,*

*emensosque olim Herculis et Liberi patris terminos, non Persis, modo, sed etiam omnibus gentibus imposituros iugum: Macedonum Bactra et Indos fore. Minima esse, quae nunc intuerentur; sed omnia victoria parari. Non praeruptis petris Illyriorum et Thraciae saxis sterilem laborem fore; spolia totius Orientis offerri. Vix gladio futurum opus; totam aciem suo pavore fluctuantem umbonibus posse propelli. Victor ad haec Atheniensium Philippus pater invocabatur; domitaeque nuper Boeotiae, et urbis in ea nobilissimae ad solum dirutae, species repraesentabatur animis. Iam Granicum amnem, iam tot urbes, aut expugnatas, aut in fidem acceptas, omniaque, quae post tergum erant, strata, et pedibus ipsorum subiecta memorabat. Cum adierat Graecos; admonebat, ab iis gentibus illata Graeciae bella Darii prius, deinde Xerxis insolentia, aquam ipsam terramque postulantium: ut neque fontium haustum, nec solitos cibos relinquerent. Dein Deum templa ruinis et ignibus esse deleta, urbes eorum expugnatas, foedera humani divinique iuris violata, referebat. Illyrios vero et Thracas, rapto vivere adsuetos, aciem hostium auro purpuraque fulgentem intueri iubebat, praedam, non arma gestantem. Irent, et imbellibus feminis aurum viri eriperent. Aspera montium suorum iuga, nudosque colles, et perpetuo rigentes gelu, ditibus Persarum campis agrisque mutarent.*

CAP. XI. Iam ad teli iactum pervenerant, cum Persarum equites ferociter in laevum cornu hostium invecti sunt. Quippe Darius equestri proello decernere optabat, phalangem Macedonici exercitus robur esse coniectans. Iamque etiam dextrum Alexandri cornu circumibatur. Quod ubi Macedo conspexit; duabus alis equitum ad iugum montis iussis subsistere, ceteros in medium belli discrimen strenue

transfert. Subductis deinde ex acie Thessalis equitibus, praefectum eorum *occulte circumire tergum suorum iubet, Parmenionique coniungi, et quod is imperasset, impigre exsequi.* Iamque ipsi in medium Persarum undique circumfusi egregie se tuebantur; sed conserti, et quasi cohaerentes, tela vibrare non poterant: simul erant emissa, in eisdem concurrentia implicabantur, levique et vano ictu pauca in hostem, plura in humum innoxia cadebant. Ergo cominus pugnam coacti conserere, gladios impigre stringunt. Tum vero multum sanguinis firsus est. Duae quippe acies ita cohaerebant, ut armis arma pulsarent, mucrones in ora dirigerent. Non timido, non ignavo cessare tum licuit: collato pede, quasi singuli inter se dimicarent, in eodem vestigio stabant, donec vincendo locum sibi facerent. Tum demum ergo promovebant gradum, cum hostem prostraverant. At illos novus excipiebat adversarius fatigatos: nec vulnerati, ut alias solent, acie poterant excedere, cum hostis instaret a fronte, a tergo sui urgerent. Alexander non ducis magis, quam militis munera exsequabatur; opimum decus caeso rege expetens. Quippe Darius curru sublimis eminebat; et suis ad se tuendum, et hostibus ad incessendum, ingens incitamentum. Ergo frater eius Oxyathres, cum Alexandrum instare ei cerneret, equites, quibus praerat, ante ipsum currum regis obiecit, armis et robore corporis multum super ceteros eminens; animo vero et pietate in paucissimis. Illo utique proelio clarus, alios improvide instantes prostravit, alios in fugam avertit. At Macedones, ut circa regem erant, mutua adhortatione firmati, cum ipso in equitum agmen irrumpunt. Tum vero similis ruinae strages erat. Circa currum Darii iacebant nobilissimi duces, ante oculos regis egregia morte defuncti, omnes in ora proni, sicut dimicantes procubuerant, adverso corpo-

re vulneribus acceptis. Inter hos Atizyes, et Rheomithres, et Sabaces praetor Aegypti, magnorum exercituum praefecti, noscitantur: circa eos cumulata erat peditum equitumque obscurior turba. Macedonum quoque non quidem multi, sed promptissimi tamen caesi sunt: inter quos Alexandri dextrum femur leviter mucrone perstrictum est. Iamque qui Darium vehebant equi, confossi hastis et dolore efferati, iugum quaterere, et regem curru excutere coeperant; cum ille, veritus ne vivus veniret in hostium potestatem, desilit, et in equum, qui ad hoc sequebatur, imponitur: insignibus quoque imperli, ne fugam proderent, indecore abiectis. Tum vero ceteri dissipantur metū; et qua cuique patebat ad fugam via, erumpunt, arma iacentes, quae paulo ante ad tutelam corporum sumserant: adeo pavor etiam auxilia formidabat. Instabat fugientibus eques a Parmenione missus, et forte in id cornu omnes fuga abstulerat. At in dextro Persae Thessalos equites vehementer urgebant. Iamque una ala ipso impetu proculcata erat: cum Thessali, strenue circumactis equis dilapsi, rursus in proelium redeunt; sparsosque et incompositos victoriae fiducia barbaros ingenti caede prosternunt. Equi pariter equitesque Persarum serie laminarum graves, agmen, quod celeritate maxime constat, aegre moliebantur: quippe in circumagendis equis suis Thessali multos occupaverant. Hac tam prospera pugna nuntiata, Alexander, non ante ausus persequi barbaros, utrimque iam victor instare fugientibus coepit. Haud amplius regem quam mille equites sequebantur; cum ingens multitudo hostium caderet. Sed quis aut in victoria, aut in fuga copias numerat? Agebantur ergo a tam paucis pecorum modo; et idem metus, qui cogebat fugere, fugientes morabatur. At Graeci, qui in Darii partibus steterant, Amynta duce (praetor hic Alexandri fuit, nunc transfuga) abrupti a ceteris, haud

sane fugientibus similes evaserant. Barbari longe diversam fugam intenderunt: alii, qua rectum iter in Persidem ducebat; quidam circumitu rupes, saltusque montium occultos petivere; pauci castra Darii. Sed iam illa quoque hostis victor intraverat, omni quidem opulencia ditia. Ingens auri argentique pondus, non belli, sed luxuriae apparatus, diripuerant milites. Cumque plus raperent, passim strata erant itinera vi-  
 lioribus sarcinis, quas in comparatione meliorum avaritia contemserat. Iamque ad feminas perventum erat; quibus quo cariora ornamenta sunt, violentius detrahebantur: nec corporibus quidem vis ac libido parcebat. Omnia planctu tumultuque, prout cuique fortuna erat, castra repleverant, nec ulla facies mali deerat, cum per omnes ordines aetatesque, victoris crudelitas ac licentia vagaretur. Tunc vero impotentis fortunae species conspici potuit: cum ii, qui tum Dario tabernaculum exornaverant, omni luxu et opulencia instructum, eadem illa Alexandro, quasi veteri domino reservabant. Namque id solum intactum omiserant milites, ita tradito more, ut victorem vici regis tabernaculo exciperent. Sed omnium oculos aivosque in semet converterant captivae, mater, coniuxque Darii: illa non maiestate solum, sed etiam aetate venerabilis; haec formae pulchritudine, nec illa quidem sorte corrupta. Acceperat in sinum filium nondum sextum aetatis annum egressum, in spem tantae fortunae, quantam paulo ante pater eius amiserat, genitum. At in gremio anus aviae iacebant adultae virgines duae, non suo tantum, sed etiam illius moerore confectae. Ingens circa eam nobilium feminarum turba constiterat, laceratis crinibus, abscissaque veste, pristini decoris immemores, *reginas, dominasque*, veris quondam, tunc alienis nominibus invocantes. Illae, suae calamitatis oblitae, *utro cornu Darius stetitset; quae fortuna discriminis fuisset?* requi-

tebant. Negabant *se captas, si viveret rex*. Sed illum equos subinde imitantem longius fuga abstulerat. In acie autem caesa sunt Persarum peditum centum millia, decem vero millia interfecta equitum. At ex parte Alexandri quatuor et quingenti saucii fuere; triginta omnino et duo ex peditibus desiderati sunt: equitum centum quinquaginta interfecti. Tantulo impendio ingens victoria stetit.

CAP. XII. Rex, diu Darium persequendo fatigatus, posteaquam et nox appetebat, et eum assequendi spes non erat, in castra paulo ante a suis capta pervenit. *Invitari deinde amicos*, quibus maxime adsueverat, iussit; quippe summa dumtaxat cutis in femore perstricta non prohibebat interesse convivio: cum repente e proximo tabernaculo lugubris clamor, barbaro ululatu planctuque permixtus, epulantes conterruit. Cohors quoque, quae excubabat ad tabernaculum regis, verita, ne maioris motus principium esset, armare se coeperat. Causa pavoris subiti fuit, quod mater uxorque Darii cum captivis mulieribus nobiles, regem, quem interfectum esse credebant, ingenti gemitu eiulatuque deslebant. Unus namque e captivis spadonibus, qui forte ante ipsarum tabernaculum steterat, amiculum, quod Darius, sicut paulo ante dictum est, ne cultu proderetur, abiecerat, in manibus eius, qui repertum ferebat, agnovit: ratusque interfecto detractum esse, falsum nuntium mortis eius attulerat. Hoc mulierum errore comperto, Alexander fortunae Darii, et pietati earum illacrimasse fertur. Ac primo Mithrenem, qui Sardeis prodiderat, peritum Persicae linguae, *ire ad consolandas eas* iusserat. Veritus deinde, ne proditor captivarum iram doloremque gravaret, Leonnatum ex purpuratis suis misit, iussum indicare, *falso lamentari eas Darium vivum*. Ille cum paucis armigeris in tabernaculum, in quo captivae erant, pervenit, *missumque a rege se* nuntiari iubet.



At ii, qui in vestibulo erant, ut armatos conspexeres, rati actum esse de dominis, in tabernaculum currunt, vociferantes, *adesse supremam horam, missosque qui occiderent captus*. Itaque, ut quae nec prohibere possent, nec admittere auderent; nullo responso dato, tacitae opperiebantur victoris arbitrium. Leonnatus exspectato diu qui se intromitteret, posteaquam nemo procedere audebat; relictis in vestibulo satellitibus, intrat in tabernaculum. Ea ipsa res turbaverat feminas, quod irrupisse non admissus videbatur. Itaque mater et coniux provolutae ad pedes, orare coeperunt, *ut, priusquam interficerentur, Darii corpus ipsis patrio more sepelire permitteret: functas supremo in regem officio se impigre morituras*. Leonnatus, *et vivere Darii, et ipsas non incolumes modo, sed etiam apparatu pristinae fortunae reginas fore*. Tum mater Darii allevari se passa est. Alexander postera die cum cura sepultis militibus, quorum corpora invenerat, *Persarum quoque nobilissimis eundem honorem haberi iubet, matrique Darii permitti, quos vellet, patrio more sepeliret*. Illa paucos arcta propinquitate coniunctos, *pro habitu praesentis fortunae humari iussit; apparatus funerum, quo Persae suprema officia celebrarent, invidiosum fore existimans, cum victores haud pretiose cremarentur*. Iamque iustis defunctorum corporibus solutis, praemittit ad captivas, qui nuntiarent, *ipsum venire*: inhibitaque comitantium turba, tabernaculum cum Hephaestione intrat. Is longe omnium amicorum carissimus erat regi, cum ipso pariter educatus; secretorum omnium arbiter: libertatis quoque in admonendo eo non alius ius habebat; quod tamen ita usurpabat, ut magis a rege permissum, quam vindicatum ab eo videretur: et sicut aetate par erat regi, ita corporis habitu praestabat. Ergo reginae illum regem esse ratae, suo more veneratae sunt. Inde ex

spadonibus captivis, quis Alexander esset monstrantibus, Sysigambis advoluta est pedibus eius, *ignorantionem nunquam antea visi regis excusans*. Quam manu allevans rex, *non errasti, inquit, mater; nam et hic Alexander est*. Equidem si hac continentia animi ad ultimum vitae perseverare potuisset; felicitorem fuisse crederem, quam visus est esse, cum Liberi patris imitaretur triumphum, ab Hellesponto usque ad Oceanum omnes gentes victoria emensus. Vicisset, profecto superbiam atque iram, mala invicta: abstinuisset inter epulas caedibus amicorum: egregiosque bello viros, et tot gentium secum dormitores, indicta causa veritus esset occidere. Sed nondum fortuna se animo eius infuderat. Itaque orientem eam moderate et prudenter tulit; ad ultimum magnitudinem eius non cepit. Tum quidem ita se gessit, ut omnes ante eum reges et continentia et clementia vincerentur. Virgo enim regias excellentis formae tam sancte habuit, quam si eodem quo ipse parente genitae forent: coniugem eiusdem, quam nulla aetatis suae pulchritudine corporis vicit, adeo ipse non violavit, ut summam adhibuerit curam, ne quis captivo corpori illuderet: *omnem cultum reddi feminis iussit*; nec quidquam ex pristinae fortunae magnificentia captivis, praeter fiduciam, defuit. Itaque Sysigambis, *rex, inquit, mereris, ut ea precemur tibi, quae Dario nostro quondam precatæ sumus: et, ut video, dignus es, qui tantum regem non felicitate solum, sed etiam aequitate superaveris. Tu quidem matrem me, et reginam vocas: sed ego me tuam famulam esse confiteor. Et praeteritæ fortunæ fastigium capio, et praesentis iugum pati possum: tua interest, quantum in nos licuerit, si id potius clementia, quam saevitia, vis esse testatum*. Rex bonum animum habere eas iussit. Darii deinde filium collo suo admovit. Atque nihil ille conspectu tunc primum

a se visi conterritus, cervicem eius manibus amplectitur: motus ergo rex constantia pueri, Hephaestionem intuens, *quam vellem*, inquit, *Darius aliquid ex hac indole hausisset!* Tum tabernaculo egressus, tribus aris in ripa Pinari amnis, Iovi atque Herculi Minervaeque sacratis, Syriam petit; Damascum, ubi regis gaza erat, Parmenione praemisso.

CAP. XIII. Atque is, cum praecessisse Darii satrapam comperisset, veritus ne paucitas suorum sperneretur, arcessere maiorem manum statuit. Sed forte in exploratores ab eo praemissos incidit natione Mardus, qui ad Parmenionem perductus, literas ad Alexandrum a praefecto Damasci missas tradit ei; *nec dubitare eum, quin omnem regiam supellectilem cum pecunia traderet*, adiecit. Parmenio, *asservari eo iusso*, literas aperit: in quibus erat scriptum, *ut mature Alexander aliquem ex ducibus suis mitteret, cum manu exigua*. Itaque re cognita, Mardum deus comitibus ad proditorem remittit. Ille e manibus custodientium lapsus, Damascum ante lucem intrat. Turbaverat ea res Parmenionis animum insidias timentis; et ignotum iter sine duce non audebat ingredi: felicitati tamen regis sui confusus, *agrestes, qui duces itineris essent, excipi* iussit. Quibus celeriter repertis, quarto die ad urbem pervenit; iam metuente praefecto, ne sibi fides habita non esset. Igitur quasi parum munimentis oppidi fidens, ante solis ortum *pecuniam regiam, quam gazam* Persae vocant, *cum pretiosissimis rerum efferi* iubet: fugam simulans; re vera, ut praedam hosti offerret. Multa millia virorum feminarumque excedentem oppido sequebantur; omnibus miserabilis turba, praeter eum, cuius fidei commissa fuerat. Quippe quo maior proditionis merces foret, oblicere hosti parabat gratiorem omni pecunia praedam, nobiles viros, praetorum Darii coniuges liberosque; praeter hos urbium Graecarum legatos, quos

Darius velut in arcē tutissima, in proditoris reliquerat manibus. *Gangabas* Persae vocant humeris onera portantes: hi cum frigus tolerare non possent, (quippe et procella subito nivem effuderat, et humus rigebat gelu) tum adstrictas vestes, quas cum pecunia portabant auro et purpura insignes, induunt: nullo prohibere auso; cum fortuna regis etiā humillimis in ipsum licentiam faceret. Praebuere ergo Parmenioni non spernendi agminis speciem: qui intentiore cura suos, quasi ad iustum proelium, paucis adhortatus, *equis calcaria subdere iubet, et acri impetu in hostem invehit*. At illi, qui sub oneribus erant, omissis per metum, capessunt fugam: armati quoque, qui eos persequiebantur, eodem metu arma iactare, ac nota diverticula petere coeperunt. Praefectus quasi et ipse conterritus simulans, cuncta pavore compleverat. facebant totis campis opes regiae: illa pecunia stipendio ingenti militum praeparata: ille cultus tot nobilium virorum, tot illustrium feminarum: aurea vasa, aurei fraeni, tabernacula regali magnificentia ornata: vehicula quoque a suis destituta, ingentis opulentiae plena: facies etiā praedantibus tristis, si qua res avaritiam moraretur. Quippe tot annorum incredibili et fidem excedente fortuna cumulata, tunc alia stirpibus lacerata, alia in coenum demersa eruebantur: non sufficiebant praedantium manus praedae. Iamque etiā ad eos, qui primi fugerant, ventum erat: feminae pleraeque parvos trahentes liberos ibant. Inter quas tres fuere virgines, Ochi, qui ante Darium regnaverat, filiae, olim quidem ex fastigio paterno rerum mutatione detractae; sed tum sortem earum crudelius aggravante fortuna. In eodem grege uxor quoque eiusdem Ochi fuit, Oxathrisque (frater hic erat Darii) filia, et coniux Artabazi principis purpuratorum, et filius, cui *Ilioneo* fuit nomen. Pharnabazi quoque, cui summum imperium maritimae orae rex dederat, uxor

cum filio excepta est: Mentoris filiae tres: ac nobilissimi ducis Memnonis coniux et filius. Vixque ulla domus purpurati fuit tantae cladis experts. Lacedaemonii quoque et Athenienses societatis fide violata Persas secuti: Aristogiton, Dropides et Iphicrates, inter Athenienses genere famaue longe clarissimi; Lacedaemonii, Pausippus et Onomastorides, cum Monimo et Callicratide, ii quoque domi nobiles. Summa pecuniae signatae fuit talentorum duo millia et sexaginta; facti argenti pondus quingenta aequabat. Praeterea triginta millia hominum, cum septem millibus iumentorum, dorso onera portantium, capta sunt. Ceterum Dii tantae fortunae proditorem [sepulturae] celeriter debita poena persecuti sunt. Namque unus e consciis eius, credo, regis vicem, etiam in illa sorte reveritus, interfecti proditoris caput ad Darium tulit, opportunum solatium prodito: quippe et ultus inimicum erat, et bondum in omnium animis memoriam maiestatis suae exolevisse cernebat.

---

Q. CVRTII RVFI  
DE  
REBVS GESTIS  
ALEXANDRI MAGNI  
HISTORIARVM  
LIBER IV.

---

ARGVMENTVM.

*Alexander literis a Dario superbe scriptis re-  
gie respondet. Abdolominum Sidoniis regem prae-  
ficit. Amyntas transfuga, miro modo a Persis  
ipsis occiditur. Varias variis locis praefectorum  
Darii clades, 1. Tyrii, Alexandrum recipere re-  
cusantes, obsidentur, 2. Dubiis belli eventibus  
Tyri obsidio nobilitatur, 3. Tandem Tyrus, vi  
capta, maximaque hominum strage corrupta, lu-  
ctuoso deformatur incendio, 4. Darii iterata de  
pace ad Alexandrum submissior legatio; qua re-  
pudiata, Graeci Alexandrum corona aurea do-  
nant: ille autem, per praefectos, multas in pote-  
statem suam redigit provincias, 5. Ad bellum dum  
se accingit Darius, Alexander Gazam expugnat:  
eiusque praefectum Batim crudeli afficit suppli-*

*cio, 6. Profectio, et varia Alexandri quaesita ad Iovis Hammonis oraculum, 7. In Aegypto Alexandria condita; variaeque Alexandri bellicae expeditiones, 8. Darius ad Arbela pervenit, eoque invito Alexander Granicum superat, 9. Milites, ob lunae defectum turbatos, per Aegyptios vates confirmat Alexander. Persas vastatores coniicit in fugam. Darii uxor captiva, moerore confecta, supremum diem claudit, unde Alexandri lacrimae. Darii suspiciones, luctus et vota, 10. Pacem tertio quaesitam Darius non impetrat; imo ad deditionem, aut ad bellum ab Alexandro provocatur, 11. Ad proelium dum Persarum ingens exercitus paratur, Macedones Panico quodam defuncti terrore arma alacriter capessunt, 12. Consilia de nocturno proelio Parmenionis et Polypercontis Alexander damnat: somnoque reffectus, interrito vultu suos ad pugnam accendit, 13. Alexandri ad Graecorum, Dariique ad Persarum exercitus ante pugnam orationes, 14. Cruenti ad Arbela proelii descriptio. Victor Alexander Darium victum persequitur, 15. Parmenio, in discrimine constitutus, Alexandrum retrahit. Tandem integra victoria potiti Macedones, reliquos Persas, multis suorum millibus desideratis, fuga sibi quaerere salutem cogunt, 16.*

## CAPVT I.

**D**arius tanti modo exercitus rex, qui triumphantis magis, quam dimicantis modo, curru sublimis inierat proelium; per loca, quae prope immensis agminibus compleverat, iam inania et ingenti solitudine vasta fugiebat. Pauci regem sequebantur: nam nec eodem omnes fugam intenderant; et deficientibus equis, cursum eorum, quos rex subinde mutabat, aequare non

poterant. Unchas deinde pervenit, ubi exceperere eum Graecorum quatuor millia, cum quibus ad Euphratem contendit; id demum credens fore ipsius, quod celeritate praeripere potuisset. At Alexander Parmenionem, per quem apud Damascum recepta erat praeda, iussum *eam ipsam, et captivos, diligenti asservare custodia*, Syriae, quam *Coelen* vocant, praefecit. Novum imperium Syri, nondum belli cladibus satis domiti, aspernabantur: sed celeriter subacti obedienter imperata fecerunt. Aradus quoque insula deditur regi. Maritimam tum oram, et pleraque longius etiam a mari recedentia, rex eius insulae Strato possidebat: quo in fidem accepto, castra movit ad urbem Marathon. Ibi illi literae a Dario redduntur; quibus ut superbe scriptis vehementer offensus est. Praecipue eum movit, quod Darius sibi *regis* titulum, nec eundem Alexandri nomini adscriperat. Postulabat autem magis quam petebat, *ut accepta pecunia, quantumcunque tota Macedonia caperet, matrem sibi ac coniugem liberosque restitueret: de regno, aequo, si vellet, Marte contenderet. Si saniora consilia tandem pati potuisset; contentus patrio, cederet alieni imperii finibus: socius amicusque esset. In ea se fidem et dare paratum et accipere.* Contra Alexander in hunc maxime modum rescripsit: *Rex Alexander Dario. Celes ille, cuius nomen sumisti, Darius, Graecos, qui oram Hellesponti tenent, coloniasque Graecorum Ionias, omni clade vastavit: cum magno deinde exercitu mare traiecit, illato Macedoniae et Graeciae bello. Rursus rex Xerxes gentis eiusdem, ad oppugnandos nos cum immanium barbarorum copiis venit: qui navali proelio victus, Mardonium tamen reliquit in Graecia, ut absens quoque popularetur urbes, agrorum ureret. Philippum vero parentem meum quis ignorat ab iis interfectum esse, quos ingentis pecuniae*



spe sollicitaverant vestri? Impia enim bella suscipitis, et cum habeatis arma, licitamini hostium capita: sicut tu proxime talentis mille, tanti exercitus rex, percussorem in me emere voluisti. Repello igitur bellum, non infero: et Diis quoque pro meliore stantibus causa, magnam partem Asiae in ditionem redegei meam: te ipsum acie vici. Quem etsi nihil a me impetrare oportebat, utpote qui ne belli quidem in me iura servaveris; tamen si voveris supplex, et matrem, et coniugem, et liberos sine pretio recepturum te esse pronitto. Et vincere et consulere victis scio. Quod si te nobis committere times; dabimus fidem impune venturum. De cetero cum mihi scribes, memento non solum regi te, sed etiam tuo scribere. Ad hanc perferendam Thersippus missus. Ipse in Phoenicem deinde descendit, et oppidum Byblon traditum recepit. Inde ad Sidona ventum est, urbem vetustate famaue conditorum inclutam. Regnabat in ea Strato, Darii opibus adiutus; sed quia deditionem magis popularium, quam sua sponte fecerat, regno visus indignus: Hephaestionique permissum, ut, quem eo fastigio Sidones dignissimum arbitrarentur, constitueret regem. Erant Hephaestioni hospites clari inter suos iuvenes: qui facta ipsis potestate regnandi, negaverunt, quemquam patrio more in id fastigium recipi, nisi regia stirpe ortum. Admiratus Hephaestio magnitudinem animi spernentis quod alii per ignes ferrumque peterent, Vos quidem macti virtute, inquit, estote, qui primi intellexistis, quanto maius esset regnum fastidire, quam accipere. Ceterum date aliquem regiae stirpis, qui meminerit, a vobis acceptum habere se regnum. At illi, cum multos imminere tantae spei cernerent, singulis amicorum Alexandri ob nimiam regni cupiditatem adulantes, statuunt, neminem esse potioem quam Abdolominum quendam,

*longa quidem cognatione stirpi regiae annexum, sed ob inopiam suburbanum hortum exigua colentem stipe.* Causa ei paupertatis, sicut plerisque, prohibita erat: intentusque operi diurno, strepitum armorum, qui totam Asiam concusserat, non exaudiebat. Subito deinde, de quibus ante dictum est, cum regiae vestis insignibus hortum intrant, quem forte steriles herbas eligens Abdolominus repurgabat. Tunc rege eo salutato, alter ex his: *Habitus, inquit, hic, quem cernis in meis manibus, cum isto squalore permittendus tibi est. Ablue corpus illuvie aeternisque sordibus squalidum: cape regis animum, et in eam fortunam, qua dignus es, istam continentiam profer.* Et cum in regali solio residebis, vitae necisque omnium civium dominus, cave obliviscaris huius status, in quo accipis regnum; immo hercule, propter quem. Somnio similis res Abdolomino videbatur: interdum, *satisne sani essent, qui tam proterve sibi illuderent,* percontabatur. Sed ut constanti squalor ablatus est, et iniecta vestis purpura auroque distincta, et fides a iurantibus facta; serio iam rex, iisdem comitantibus, in regiam pervenit. Fama, ut solet, strenue tota urbe discurret: aliorum studium, aliorum indignatio eminebat: ditissimus quisque humilitatem inopiamque eius apud amicos Alexandri criminabatur. *Admitti eum rex protinus iussit; diuque contemplatus, corporis, inquit, habitus famae generis non repugnat: sed libet scire, inopiam qua patientia tuleris?* Tum ille, *utinam, inquit, eodem animo regnum pati possim! hae manus suffecere desiderio meo: nihil habenti nihil defuit.* Magnae indolis specimen ex hoc sermone Abdolomini cepit. Itaque non *Stratonis* modo regiam supellectilem attribui ei iussit, sed pleraque etiam ex *Persica praeda*: regionem quoque urbi appositam ditioni eius adiecit. Interea Amyntas, quem ad Persas ab Ale-

xandro transfugisse diximus, cum quatuor millibus Graecorum, ipsum ex acie persecutis, fuga Tripolim pervenit. Inde in naves militibus impositis Cyprum transmisit: et cum in illo statu rerum id quemque, quod occupasset, habiturum arbitraretur, velut certo iure possessum; Aegyptum petere decrevit: utrique regi hostis, et semper ex ancipiti mutatione temporum pendens. Hortatusque milites ad spem tantae rei, docet, *Sabacem praetorem Aegypti cecidisse in acie: Persarum praesidium et sine duce esse, et invalidum: Aegyptios semper praetoribus eorum infensos, pro sociis ipsos, non pro hostibus aestimatuos.* Omnia experiri necessitas cogebat: quippe cum primas spes fortuna destituit, futura praesentibus videntur esse potiora. Igitur conclamant, *duceret quo videretur.* Atque ille utendum animis dum spe calerent ratus, ad Pelusii ostium penetrat, simulans a *Dario se esse praemissum.* Potitus ergo Pelusii, Memphim copias promovit: ad cuius famam Aegyptii, vana gens, et novandis quam gerendis aptior rebus, ex suis quisque vicis urbibusque ad hoc ipsum concurrunt, ad delenda praesidia Persarum. Qui territi, tamen spem obtinendi Aegyptum non amiserunt. Sed eos Amyntas proelio superatos, in urbem compellit; castrisque positis, victores ad populandos agros eduxit: ac velut in medio positis omnibus hostinum cuncta agebantur. Itaque Mazaces, quamquam infelici proelio suorum animos territos esse cognoverat, tamen *palantes, et victoriae fiducia incautos ostentans, perpulit ne dubitarent ex urbe erumpere, et res amissas recuperare.* Id consilium non ratione prudentius, quam eventu felicius fuit: ad unum omnes cum ipso duce occisi sunt. Has poenas Amyntas utrique regi dedit; nihilo magis ei ad quem transfugerat fidus, quam illi quem deseruerat. Darii praetores, qui proelio apud Isson su-

perfuerant, cum omni manu, quae fugientes secuta erat, assumpta etiam Cappadocum et Paphlagonum iuventute, Lydiam recuperare tentabant. Antigonus, praetor Alexandri, Lydiae praecerat: qui, quamquam plerosque militum ex praesidiis ad regem dimiserat; tamen barbaris spretis, in aciem suos eduxit. Eadem illic quoque fortuna partium fuit: tribus proeliis alia atque alia regione commissis, Persae funduntur. Eodem tempore classis Macedonum ex Graecia accita, Aristomenem, qui ad Hellesponti oram recuperandam a Dario erat missus, captis eius aut mersis navibus superat. A Milesiis deinde Pharnabazus praefectus Persicae classis pecunia exacta, et praesidio in urbem Chium introducto, centum navibus Andrum, et inde Syphnum petiit. Eas quoque insulas praesidiis occupat; pecunia multat. Magnitudo belli, quod ab opulentissimis Europae Asiaeque regibus, in spem totius orbis occupandi gerebatur, Graeciae quoque et Cretae arma commoverat. Agis, Lacedaemoniorum rex, octo millibus Graecorum, qui ex Cilicia profugi domos repetierant, contractis, bellum Antipatro Macedoniae praefecto moliebatur. Cretenses has aut illas partes secuti, nunc Spartanorum, nunc Macedonum praesidiis occupabantur. Sed leviora inter illos fuere discrimina; unum certamen, ex quo cetera pendebant, intuente fortuna.

CAP. II. Iam tota Syria, iam Phoenice quoque, excepta Tyro, Macedonum erant; habebatque rex castra in continenti, a quo urbem angustum fretum dirimit. Tyrus et claritate, et magnitudine ante omnes urbes Syriae Phoenicesque memorabilis, facilius societatem Alexandri acceptura videbatur, quam imperium. Coronam igitur auream legati donum afferebant; commeatusque large et hospitaliter ex oppido adduxerant. Ille *dona, ut ab amicis, accipi iussit; benigneque legatos allocutus, Herculi, quem praeci-*

*pue Tyr̄ii colerent, sacrificare velle se dixit. Macedonum reges credere, ab illo Deo ipsos genus dicere: se vero ut id faceret etiam oraculo monitum. Legati respondent, esse templum Herculis extra urbem, in eam sedem, quam Palaetyron ipsi vocant: ibi regem Deo sacrum rite facturum. Non tenuit iram Alexander, cuius alioquin potens nbn erat. Itaque, vos quidem, inquit, fiducia loci, quod insulam incolitis, pedestrem hunc exercitum spernitis: sed brevi ostendam in continenti vos esse. Proinde sciat̄is licet, aut intraturum me urbem, aut oppugnaturum. Cum hoc responso dimissos monere amici coeperunt, ut regem, quem Syria, quem Phoenice recepisset, ipsi quoque urbem intrare paterentur. At illi, loco satis fisi, obsidionem ferre decreverunt. Namque urbem a continenti quatuor stadiorum fretum dividit, Africo maxime obiectum, crebros ex alto fluctus in litus evolvens. Nec accipiendo operi, quo Macedones continenti insulam iungere parabant, quidquam magis, quam ille ventus obstabat. Quippe vix leni et tranquillo mari moles agi possunt; Africus vero prima quaeque congesta pulsu illisa mari subruit: nec ulla tam firma moles est, quam non exedant undae per nexus operum manantes, et ubi acrior flatus exstitit, summi operis fastigio superfusae. Praeter hanc difficultatem haud minor alia erat; muros turresque urbis praealtum mare ambiebat: non tormenta, nisi e navibus procul excussa, emitti; non scalae moenibus applicari poterant: praeceps in salum murus pedestre interceperat iter: naves nec habebat rex; et, si adinovisset, pendentes et instabiles missilibus arceri poterant. Inter quae parva dictu res Tyr̄iorum fiduciam accendit. Carthaginensium legati ad celebrandum anniversarium sacrum more patrio tunc venerant: quippe Carthaginem Tyr̄ii condiderunt, semper parentum loco culti. Hortari ergo Poeni coeperunt, ut*

*obsidionem forti animo paterentur; brevi Carthagine auxilia ventura.* Namque ea tempestate magna ex parte Punicis classibus maria obsidebantur. Igitur bello decreto, per muros turresque tormenta disponunt: arma iunioribus dividunt; opificesque, quorum copia urbs abundabat, in officinas distribuunt. Omnia belli apparatu strepunt: ferreae quoque manus (*Harpagonas* vocant) quas operibus hostium iniicerent, corvique, et alia tuendis urbibus excogitata, praeparabantur. Sed cum fornacibus ferrum, quod excudi oportebat, impositum esset, admotisque foliibus ignem flatu accenderent; *sanguinis rivi sub ipsis flammis exstitisse* dicuntur: idque omen in Macedonum metum verterunt Tyrii. Apud Macedonas quoque cum forte panem quidam militum frangeret, manantis sanguinis guttas notaverunt. Territoque rege, Aristander, peritissimus vatum, respondit, *si extrinsecus cruor fluxisset, Macedonibus id triste futurum: contra, cum ab interiore parte manaverit, urbi, quam obsidere destinassent, exitiam portendere.* Alexander cum et classem procul haberet, et longam obsidionem magno sibi ad cetera impedimento videret fore; caduceatores, qui ad pacem eos compellerent, misit: quos Tyrii contra ius gentium occisos praecipitaverunt in altum. Atque ille suorum tam indigna nece commotus, urbem obsidere statuit. Sed ante iacienda moles erat, quae urbem continenti committeret. Ingens ergo animos militum desperatio incessit, cernentium *profundum mare, quod vix divina ope posset impleri: quae saxa tam vasta, quas tam proceras arbores posse reperiri? exhauriendas esse regiones, ut illud spatium aggeraretur: et exaestuare semper fretum, quoque arctius volutetur inter insulam et continentem, hoc acrius furere.* At ille haudquaquam rudis tractandi militares animos, *speciem sibi Herculis in somno oblatam*

*esse pronuntiat, dextram porrigentis: illo duce, illo aperiente in urbem intrare se visum. Inter haec, caduceatores interfectos, gentium iura violata, referebat: unam esse urbem, quae cursum victoris morari uisa esset. Ducibus deinde negotium datur, ut suos quisque castiget: satisque omnibus stimulis, opus orsus est. Magna vis saxorum ad manum erat, Tyro vetere praebente: materies ex Libano monte ratibus et turribus faciendis uehebatur. Iamque a fundo maris in altitudinem montis opus excreverat, nondum tamen aquae fastigium aequabat; et, quo longius moles agebatur a litore, hoc magis quidquid ingerebatur praecaltum absorbebat mare: cum Tyrii parvis navigiis admotis, per ludibrium exprobrabant, illos armis inclutos, dorso sicut iumenta onera gestare: interrogabant etiam, num maior Neptuno esset Alexander? Haec ipsa insectatio alacritatem militum accendit. Iamque paululum moles aquam eminebat, et simul aggeris latitudo crescebat, urbique admovebatur; cum Tyrii magnitudine molis, cuius incrementum eos ante fefellerat, conspecta, leuibus navigiis nondum commissum opus circumire coeperunt; missilibus eos quoque, qui pro opere stabant, incessere. Multis ergo impune vulneratis, cum et removere, et appellere scaphas in expedito esset; ad curam semet ipsos tuendi ab opere converterant. Igitur rex munientibus coria velaque iussit obtendi, ut extra teli ictum essent: duasque turres ex capite molis erexit; e quibus in subeuntes scaphas tela ingeri possent. Contra Tyrii navigia procul a conspectu hostium litori appellunt, expositisque militibus, eos, qui saxa gestabant, obruncant. In Libano quoque Arabum agrestes incompósitos Macedonas aggressi, triginta fere interficiunt, paucioribus captis.*

CAP. III. Ea res Alexandrum dividere copias cogit: et ne sequiter assidere uni urbi videretur, ope-

ri Perdiccam Craterumque praefecit; ipse cum expedita manu Arabiam petiit. Inter haec Tyrii navem magnitudine eximia, saxis arenaque a puppi oneratam, ita ut multum prora emineret, bitumine ac sulphure illitam remis concitaverunt; et cum magnam vim venti vela quoque concepissent, celeriter ad molem successit: tunc prora eius accensa, remiges desiliere in scaphas, quae ad hoc ipsum praeparatae sequebantur. Navis autem igne concepto latius fundere incendium coepit: quod, priusquam posset occurri, turres et cetera opera in capite molis posita comprehendit. At qui desilierant in parva navigia, faces, et quidquid alendo igni aptum erat, in eadem opera ingerunt. Iamque non modo Macedonum turres, sed etiam summa tabulata conceperant ignem: cum ii, qui in turribus erant, partim haurirentur incendio; partim armis omissis, in mare semet ipsi immitterent. At Tyrii, qui capere eos, quam interficere mallent, natantium manus stipitibus saxisque lacerabant, donec debilitati, impune navigiis excipi possent. Nec incendio solum opera consumpta; sed forte eodem die vehementior ventus motum ex profundo mare illisit in molem, crebrisque fluctibus compages operis verberatae se laxavere, saxaque interluens unda medium opus rupit. Prorutis igitur lapidum cumulis, quibus iniecta terra sustinebatur, praecipit in profundum ruit; tantaeque molis vix ulla vestigia invenit Arabia rediens Alexander. Hic, quod in adversis rebus solet fieri, alius in alium culpam referebat; cum omnes verius de saevitia maris queri possent. Rex novi operis molem orsus, in adversum ventum non latere, sed recta fronte direxit; quod cetera opera, velut sub ipso latentia, tuebatur: latitudinem quoque aggeri adiecit, ut turres in medio erectae procul teli iactu abessent. Totas autem arbores cum ingentibus ramis in altum iaciebant; deinde saxis onerabant; rursus cumulo eorum alias arbores



iniiciebant: tum humus aggerebatur; superque alia strue saxorum arborumque cumulata, velut quodam nexu continens opus iunxerant. Nec Tyrii, quidquid ad impediendam molem excogitari poterat, segniter exsequebantur. Praecipuum auxilium erat, qui procul hostium conspectu subibant aquam, occultoque lapsu ad molem usque penetrabant, falcibus palmites arborum eminentium ad se trahentes; quae ubi secutae erant, pleraque secum in profundum dabant: tum levatos onere stipites truncosque arborum haud aegre moliebantur: deinde totum opus, quod stipitibus fuerat innixum, fundamento lapsa sequebatur. Aegro animi Alexandro, et utrum perseveraret, an abiret, satis incerto, classis Cypro advenit; eodemque tempore Cleander cum Graecis militibus in Asiam nuper advectus. Centum et octoginta navium classem in duo dividit cornua: laevum Pnytagoras, rex Cypriorum, cum Cratero tuebatur; Alexandrum in dextro quinqueremis regia vehebat. Nec Tyrii, quamquam classem habebant, ausi navale inire certamen, triremes omnes ante ipsa moenia opposuerunt: quibus rex invectus, ipsas demersit. Postera die classe ad moenia admota, undique tormentis, et maxime arietum pulsu muros quatit: quos Tyrii raptim obstructis saxis refecerunt; interiorum quoque murum, ut si prior fefellisset, illo se tuerentur, undique orsi. Sed undique vis mali urgebat: moles intra teli iactum erat; classis moenia circumibat: terrestri simul navalique clade obruebantur. Quippe binas quadriremes Macedones inter se ita iunxerant, ut prorae cohaerent; puppes intervallo, quantum capere poterant, distarent. Hoc puppium intervallum antennis asseribusque validis deligatis, superque eos pontibus stratis, qui militem sustinerent, impleverant: sic instructas quadriremes ad urbem agebant: inde missilia in propugnantes ingerebantur tuto, quia proris miles tegebatur. Media nox erat, cum

*classen, sicuti dictum est, paratam, circumire muros.* iubet: iamque naves urbi undique admovebantur, et Tyrii desperatione torpebant; cum subito spissae nubes intendere se coelo, et quidquid lucis internitebat, effusa caligine extinctum est. Tum inhorrescens mare paullatim levari, deinde acriori vento concitatum, fluctus ciere, et inter se navigia collidere. Iamque scindi coeperant vincula, quibus connexae quadriremes erant, ruere tabulata, et cum ingenti fragore in profundum secum milites trahere. Neque enim conserta navigia ulla ope in turbido regi poterant: miles ministeria nautarum, remiges militis officia turbabant; et, quod in huiusmodi casu accidit, periti ignavis parebant: quippe gubernatores, alias imperare soliti, tum metu mortis iussa exsequebantur. Tandem remis pertinacius everberatum mare, veluti eripientibus navigia classicis cessit: appulsaque sunt litori, lacerata pleraque. Iisdem diebus forte Carthaginiensium legati triginta superveniunt, maius obsessis solatium, quam auxilium: quippe *domestico bello Poenos impediri; nec de imperio, sed pro salute dimicare, nuntiabant.* Syracusani tunc Africam urebant, et haud procul Carthaginis muris locaverant castra. Non tamen defecere animis Tyrii, quamquam ab ingenti spe destituti erant; sed coniuges liberosque devehendos Carthaginem tradiderunt; fortius quidquid accideret laturi, si carissimam sui partem extra communis periculi sortem habuissent. Cumque unus e civibus concioni indicasset, *oblatam esse per somnum sibi speciem Apollinis, quem eximia religione colerent, urbem deserentis; molemque a Macedonibus iactam in salo, in silvestrem saltum esse mutatam:* quamquam auctor levis erat, tamen ad deteriora credenda proni metu, aurea catena devinxere simulacrum, araeque Herculis, cuius numini urbem dicaverant, inse-rere vinculum, quasi illo Deo Apollinem retenturi.

Syracensis id simulacrum devexerant Poeni, et in ma-  
 iore locaverant patria; multisque aliis spoliis urbium  
 a semet captarum, non Carthaginem magis, quam Ty-  
 rum ornaverant. Sacrum quoque, quod quidem Diis  
 minime cordi esse crediderim, multis seculis inter-  
 missum repetendi auctores quidam erant, *ut inge-  
 nuus puer Saturno immolaretur*: quod sacrilegium  
 verius quam sacrum, Carthaginienses a conditoribus  
 traditum, usque ad excidium urbis suae fecisse dicun-  
 tur. Ac nisi seniores obstitissent, quorum consilio  
 cuncta agebantur, humanitatem dira superstitio vicis-  
 set. Ceterum efficacior omni arte imminens necessi-  
 tas, non usitata modo praesidia, sed quaedam etiam  
 nova admonuit. Namque ad implicanda navigia, quae  
 muros subibant, validis asseribus corvos et ferreas ma-  
 nus cum uncis ac falcibus illigaverant; ut, cum tor-  
 mento asseres promovissent, subito laxatis funibus  
 iniicerent. Unci quoque et falces ex iisdem asseribus  
 dependentes, aut propugnatores, aut ipsa navigia la-  
 cerabant. Clypeos vero aeneos multo igne torrebant,  
 quos repletos fervida arena, coenoque decocto, e mu-  
 ris subito devolvebant. Nec ulla pestis magis time-  
 batur: quippe ubi loricam corpusque servens arena  
 penetraverat, nec ulla vi excuti poterat, et quidquid  
 attigerat, perurebat: iacentesque arma, laceratis  
 omnibus, quis protegi poterant, vulneribus inulti pate-  
 bant: corvi vero et ferreae manus tormentis emissae  
 plerosque rapiebant.

CAP. IV. Hic rex fatigatus statuerat soluta obsi-  
 dione Aegyptum petere. Quippe cum Asiam ingenti  
 celeritate percurrisset, circa muros unius urbis haere-  
 bat, tot maximarum rerum opportunitate dimissa.  
 Ceterum tam discedere irritum, quam morari pude-  
 bat; famam quoque, qua plura, quam armis, everterat,  
 ratus leviolem fore, si Tyrum, quasi testem se posse  
 vinci, reliquisset. Igitur ne quid inexpertum omitte-

ret, plures naves admoveri iubet, delectosque militum imponi. Et forte bellua inusitatae magnitudinis, super ipsos fluctus dorso eminens, ad molem, quam Macedones iecerant, ingens corpus applicuit; diverberatisque fluctibus alevans semet, utrumque conspecta est: deinde a capite molis rursus alto se immersit; ac modo super undas eminens magna sui parte, modo superfusus fluctibus condita, haud procul munimentis urbis emersit. Utrisque laetus fuit belluae aspectus: Macedones iter iaciendo operi monstrasse eam augurabantur; Tyrii, Neptunum occupati maris vindicem arripuisse belluam, ac molem brevi profecto ruituram. Laetique omine eo ad epulas dilapsi oneraverunt se vino: quo graves, orto sole navigia conscendunt, redimita coronis floribusque: adeo victoriae non omen modo, sed etiam gratulationem, praeeperant. Forte rex classem in diversam partem agi iusserat, triginta minoribus navigiis relictis in litore: e quibus Tyrii duobus captis, cetera ingenti terruerant metu; donec suorum clamore audito Alexander classem litori, e quo fremitus acciderat, admovit. Prima a Macedonum navibus quinqueremis velocitate inter ceteras eminens occurrit: quam ut conspexere Tyrii, duae e diverso in latera eius invectae sunt; in quarum alteram quinqueremis eadem concitata, et ipsa rostro icta est, et illam invicem tenuit. Iamque ea, quae non cohaerebat, libero impetu evecta, in aliud quinqueremis latus invehebatur; cum opportunitate mira triremis e classe Alexandri in eam ipsam, quae quinqueremi imminebat, tanta vi impulsus est, ut Tyrius gubernator in mare excenteretur e puppi. Plures deinde Macedonum naves superveniunt, et rex quoque aderat; cum Tyrii inhibentes remis, aegre evellere navem, quae haerebat, portumque omnia simul navigia repetunt. Confestim rex insecutus, portum quidem intrare non potuit, cum procul e muris

missilibus submoveretur; naves autem omnes fere aut demersit, aut cepit. Biduo deinde ad quietem data militibus, iussisque *et classem et machinas pariter admove*, ut *utrimque territis instaret*; ipse in altissimam turrem ascendit, ingenti animo, periculo maiore. Quippe regio insigni et armis fugientibus conspicuus, unus praecipue telis petebatur. Et digna prorsus spectaculo edidit: multos e muris propugnantes hasta transfixit, quosdam etiam cominus gladio clypeoque impulsos praecipitavit: quippe turris, ex qua dimicabat, muris hostium propemodum cohaerebat. Iamque crebris arietibus saxorum compage laxata, munimenta defecerant, et classis intraverat portum, et quidam Macedonum in turres hostium desertas evaserant: cum Tyrii, tot simul malis victi, alii supplices in templa confugiunt; alii foribus aedium obseratis occupant liberum mortis arbitrium; nonnulli ruunt in hostem, haud inulti tamen perituri: magna pars summa tectorum oblinebat, saxa, et quidquid manibus fors dederat, ingerentes subeuntibus. Alexander, *exceptis qui in templa confugerant, omnes interfici, ignemque tectis iniici iubet*. His per praeco-nes pronuntiatis, nemo tamen armatus opem a Diis petere sustinuit: pueri virginesque templa compleverant; viri in vestibulo suarum quisque aedium stabant, parata saevientibus turba. Multis tamen saluti fuere Sidonii, qui intra Macedonum praesidia erant. Hi urbem quidem inter victores intraverant, sed cognationis eum Tyriis memores, (quippe utramque urbem Agenorem condidisse credebant,) multos Tyrionum, etiam protegentes, ad sua perduxere navigia: quibus occulati, Sidona devecti sunt. Quindecim millia hoc furto subducta saevitiae sunt. Quantumque sanguinis fustum sit, - el ex hoc existimari potest, quod intra munimenta urbis sex millia armatorum trucidata sunt. Triste deinde spectaculum, victoribus ira praebuit re-

gis. Dno millia, in quibus occidendi defecerat rabies, crucibus affixi per ingens litoris spatium pependerit. Carthaginensium legatis pepercit, addita denuntiatione *belli, quod praesentium rerum necessitas moraretur.* Tyrus septimo mense, quam oppugnari coepta erat, capta est; urbs et vetustate originis, et crebra fortunae varietate ad memoriam posteritatis insignis. Condita ab Agenore, diu mare, non vicinum modo, sed quodcumque classes eius adierunt, ditionis suae fecit. Et si famae libet credere, haec gens literas prima aut docuit, aut didicit. Coloniae certe eius paene orbe toto diffusae sunt: Carthago in Africa, in Boeotia Thebae, Gades ad Oceanum. Credo libero commentes mari, saepiusque adeundo ceteris incognitas terras, elegisse sedes inventuti, qua tunc abundabant: seu quia crebris motibus terrae, nam hoc quoque traditur, cultores eius fatigati, nova et externa domicilia armis sibimet quaerere cogebantur. Multis ergo casibus defuncta, et post excidium renata, nunc tamen longa pace cuncta refovente, sub tutela Romanae mansuetudinis acquiescit.

CAP. V. Iisdem ferme diebus Darii literae adlatae sunt, tandem ut regi scriptae. Petebat, *uti filiam suam, Statirae erat nomen, nuptiis Alexander sibi adiungeret. Dotem fore omnem regionem inter Hellespontum et Halyn amnem sitam: inde Orientem spectantibus terris contentum se fore. Si forte dubitaret quod offerretur accipere: nunquam diu eodem vestigio stare fortunam, semperque homines, quantamcunque felicitatem habeant, invidiam tamen sentire maiorem. Vereri, ne se avium modo, quas naturalis levitas ageret ad sidera, inani ac puerili mentis affectu efferret. Nihil difficilius esse, quam in illa aetate tantam capere fortunam. Multas se adhuc reliquias habere, nec semper in angustiis posse deprehendi: transe-*

undum esse Alexandro Euphratem, Tigrimque et Araxem, et Hydaspem, magna munimenta regni sui. Veniendum in campos, ubi paucitate suorum erubescendum sit. Mediam, Hyrcaniam, Bactra, et Indos Oceani accolas quando aditurum? vel Sogdianos et Arachosios, nomine tantum notos, ceterasque gentes ad Caucasum et Tanuim pertinentes? Senescendum fore tantum terrarum vel sine proelio obeunti. Se vero ad ipsum vocare desineret: namque illius exitio esse venturum. Alexander iis illis, qui literas attulerant, respondit, *Darium sibi aliena promittere: quod totum amiserit, velle partiri. Doti sibi dari Lydiam, Ioniam, Aeolidem, Hellesponti oram, victoriae suae praemia. Leges autem a victoribus dici; accipi a victis.* In utro statu ambo essent, si solus ignoraret, quamprimum Marte decerneret. Se quoque, cum transisset mare, non Ciliciam, aut Lydiam, (quippe tanti belli exiguam hanc esse mercedem,) sed *Persepolim caput regni eius, Bactra deinde, et Ecbatana, ultimique Orientis oram imperio suo destinasse.* Quocumque ille fugere potuisset, ipsum sequi posse: desineret terrere fluminibus, quem sciret maria transisse. Reges quidem invicem haec scripserant. Sed Rhodii urbem suam portusque debebant Alexandro. Ille Ciliciam Socrati tradiderat; Philota regioni circa Tyrum iusso praesidere. Syriam, quae *Coelè* appellatur, Andromacho Parmenio tradiderat, bello quod supererat interfuturus. Rex, Hephæstione *Phoenicis oram classe praetervehi* iusso, ad urbem Gazam cum omnibus copiis venit. Iisdem fere diebus sollemne erat ludicrum Isthmiorum, quod conventu totius Graeciae celebratur. In eo concilio, ut sunt Graecorum temporaria ingenia, decernunt, ut *duodecim legarentur ad regem, qui ob res pro salute Graeciae ac libertate gestas, coronam auream*

*donum victoriae ferrent.* Idem paullo ante incertae famae captaverant auram, ut quocumque pendentis animos tulisset fortuna, sequerentur. Ceterum non ipse modo rex obibat urbes, imperii iugum adhuc recusantes; sed praetores quoque ipsius, egregii duces, pleraque invaserant. Calas Paphlagoniam, Antigonus Lycaoniam: Balacrus Idarne praetore Darii superato Miletum cepit: Amphoterus et Hegelochus centum sexaginta navium classe insulas inter Achaiam atque Asiam in ditionem Alexandri redegerunt. Tenedo quoque recepta, Chium, incolis ultro vocantibus, stauerant occupare: sed Pharnabazus, Darii praetor, comprehensus qui res ad Macedonas trahebant, rursus Apollonidi et Athanagorae, suarum partium viris, urbem cum modico praesidio militum tradit. Praefecti Alexandri in obsidione urbis perseverabant; non tam suis viribus, quam ipsorum, qui obsidebantur, voluntate. Nec fefellit opinio. Namque inter Apollonidem et duces militum orta seditio, irrumpendi in urbem occasionem dedit. Cumque porta effracta cohors Macedonum intrasset; oppidani, olim consilio proditionis agitato, aggregant se Amphotero et Hegelocho; Persarumque praesidio caeso, Pharnabazus cum Apollonide et Athanagora vincti traduntur. Duodecim triremes cum suo milite ac remige; praeter eas triginta naves et piratici lembi, Graecorumque tria millia a Persis mercede conducta. His in supplementum copiarum suarum distributis, piratisque supplicio affectis, captivos remiges adiecere classi suae. Forte Aristonicus, Methymnaeorum tyrannus, cum piraticis navibus, ignarus omnium quae ad Chium acta erant, prima vigilia ad portus claustra successit; interrogatusque a custodibus *quis esset? Aristonicum ad Pharnabazum venire* respondit. Illi *Pharnabazum quidem iam quiescere, et non posse tum adiri; ceterum patere socio atque hospiti portum, et poste-*



*ro die Pharnabazi copiam fore*, affirmant. Nec dubitavit Aristonicus primus intrare: secuti sunt ducem piratici lembi: ac dum applicant navigia crepidini portus, obiicitur a vigilibus claustrum, et qui proximi excubabant, ab iisdem excitantur: nulloque ex his auso repugnare, omnibus catenae iniectae sunt. Amphotero deinde Hegelochoque traduntur. Hinc Macedones transiere Mitylenem, quam Chares Atheniensis nuper occupatam, duorum millium Persarum praesidio tenebat: sed cum obsidionem tolerare non posset; urbe tradita pactus, *ut incolumi abire liceret*, Imbrum petit. Deditis Macedones pepercerunt.

CAP. VI. Darius desperata pace, quam per literas legatosque impetrari posse crediderat, ad reparandas vires, bellumque impigre renovandum intendit animum. *Duces ergo copiarum Babyloniam venire; Bessum quoque, Bactrianorum ducem, perquam maximo posset exercitu coacto, descendere ad se iubet.* Sunt autem Bactriani inter illas gentes promptissimi, horridis ingeniis, multumque a Persarum luxu abhorrentibus; siti haud procul Scytharum bellicosissima gente, et rapto vivere assueta: semperque in armis errant. Sed Bessus suspecta perfidia, haud sane aequo animo in secundo se continens gradu, regem tercebat. Nam cum regnum affectaret, proditio, qua sola id assequi poterat, timebatur. Ceterum Alexander, quam regionem Darius petisset, omni cura vestigans, tamen explorare non poterat: more quodam Persarum, arcana regum mirae celantium fide. Non metus, non spes elicit vocem, qua prodantur occulta. Vetus disciplina regum silentium vitae periculo sanxerat. Lingua gravius castigatur, quam ullum probrum: nec magnam rem sustineri posse credunt ab eo, cui tacere grave sit; quod homini facillimum voluerit esse natura. Ob hanc causam Alexander omnium, quae apud hostem gererentur, igna-

rus, urbem Gazam obsidebat. Praeerat ei Betis, eximiae in regem suum fidei; modicoque praesidio muros ingentis operis tuebatur. Alexander, aestimato locorum situ, *agi cuniculos* iussit, facili ac levi humo acceptante occultum opus; quippe multam arenam vicinum mare evomit, nec saxa cotesque, quae interpellent specus, obstabant. Igitur ab ea parte, quam oppidani conspiciere non possent, opus orsus, ut a sensu eius averteret, *turres muris admoventi* iubet. Sed eadem humus admovendis inutilis turribus, desidente sabulo agilitatem rotarum morabatur, et tabulata turrium perfringebat; multique vulnerabantur impune; cum idem recipiendis, qui admovendis turribus labor eos fatigaret. Ergo receptui signo dato, *postero die muros corona circumdari* iussit. Ortoque sole, priusquam admovent exercitum, opem Deum exposcens, sacrum patrio more faciebat. Forte praetervolans corvus glebam, quam unguibus ferebat, subito amisit: quae cum regis capiti incidisset, resoluta defluxit; ipsa autem avis in proxima turre consedit. Illita erat turris bitumine ac sulphure: in qua alis haerentibus, frustra se allevare conatus, a circumstantibus capitur. Digna res visa, de qua vates consulerebantur: et erat non intactus ea superstitione mentis. Ergo Aristander, cui maxima fides habebatur, *urbis quidem excidium augurio illo portendi, ceterum periculum esse*, inquit, *ne rex vulnus acciperet*. Itaque monuit, *ne quid eo die inciperet*. Ille, quamquam unam urbem sibi, quo minus securus Aegyptum intraret, obstare aegre ferebat, tamen paruit vati, signumque receptui dedit. Hinc animus crevit obsessis: egressique porta recedentibus inferunt signa; cunctationem hostium fore suam occasionem rati. Sed acrius, quam constantius proelium inierunt: quippe ut Macedonum signa circumagi videre, repente sistunt gradum. Iamque ad regem proeliantium clamor per-

venerat; cum denuntiati periculi haud sane memor, loricam tamen, quam raro induebat, amicis orantibus sumisit, et ad prima signa pervenit. Quo conspecto Arabs quidam Darii miles, maius fortuna sua facinus ausus, clypeo gladium tegens, quasi transfuga genibus regis advolvitur. Ille *assurgere supplicem, recipi- que inter suos* iussit. At gladio barbarus strenue in dextram translato, cervicem appetit regis: qui exigua corporis declinatione evitato ictu, in vanum manum barbari lapsam amputat gladio; denuntiato in illum diem periculo, ut arbitrabatur ipse, defunctus. Sed, ut opinor, inevitabile est fatum. Quippe dum inter primores promptius dimicat, sagitta ictus est: quam per loricam adactam, stantem in humero medicus eius Philippus evellit. Plurimus deinde sanguis, manare coepit; omnibus territis, quia numquam tam alte penetrasse telum, lorica obstante, cognoverant. Ipse nec oris quidem colore mutato, *supprimi sanguinem, et vulnus obligari* iussit. Diu ante ipsa signa vel dissimulato, vel victo dolore perstiterat; cum suppressus paullo ante sanguis medicamento, manare latius coepit: et vulnus, quod recens adhuc dolorem non moverat, frigente sanguine intumuit. Linqui deinde animo, et submitti genu coepit: quem proximi exceptum in castra receperunt. Et Betis interfectum ratus urbem ovans victoria repetit. At Alexander, nondum percurato vultu, aggerem, quo moenium altitudinem aequaret, extruxit; et *pluribus cuniculis muros subru* iussit. Oppidani ad pristinum fastigium moenium novum extruxere munimentum: sed ne id quidem turres aggeri impositas aequare poterat. Itaque interiora quoque urbis infesta telis erant. Ultima pestis urbis fuit cuniculo subrutus murus, per cuius ruinas hostis intravit. Ducebat ipse rex antesignanos; et dum incautius subit, saxo crus eius affligitur. Innixus tamen telo, nondum prioris vulneris obducta cicatrice, inter pri-

mores dimicat; irâ quoque accensus, quod duo in obsidione urbis eius acceperat vulnera. Betim, egregia edita pugna, multisque vulneribus confectum, deseruerant sui: nec tamen segnius proelium capessebat, lubricis armis suo pariter atque hostium sanguine. Sed cum undique \*\*\* adducto, insolenti gaudio invenis elatus, alias virtutis etiam in hoste mirator, *non ut voluisti, inquit, morieris, Beti: sed quidquid tormentorum in captivum inveniri potest, passurum esse te cogita.* Ille non interrito modo, sed contumaci quoque vultu intuens regem, nullam ad minas eius reddidit vocem. Tum Alexander, *videtisne obstinatum ad tacendum?* inquit. *Num genu posuit? num supplicem vocem misit? Vincam tamen silentium, et si nihil aliud, certe gemitu interpolabo.* Ira deinde vertit in rabiem; iam tum peregrinos ritus nova subeunte fortuna. Per talos enim spirantis lora trajecta sunt, religatumque ad currum traxere circa urbem equi: gloriantem rege, *Achillem, a quo genus ipse deduceret, imitatum se esse poena in hostem capiendam.* Cecidere Persarum Arabumque circa decem millia: nec Macedonibus incruenta victoria fuit. Obsidio certe non tam claritate urbis nobilitata est, quam geminato periculo regis. Qui Aegyptum adire festinans, Amyntam cum decem trimibus in Macedoniam ad inquisitionem novorum militum misit. Namque proeliis etiam secundis atterebantur copiae, devictarumque gentium militi minor quam domestico fides habebatur.

CAP. VII. Aegyptii, olim Persarum opibus infensi, quippe avarè et superbe imperitatum sibi esse credebant, ad spem adventus eius erexerant animos; utpote qui Amyntam quoque transfugam, et cum precario imperio venientem, laeti recepissent. Igitur ingens multitudo Pelusium, qua intraturus rex videbatur, convenerat. Atque ille septimo die, posteaquam

a Gaza copias moverat, in regionem Aegypti, quam nunc *Castra Alexandri* vocant, pervenit. Deinde, pedestribus copiis *Pelusium petere* iussis, ipse cum expedita delectorum manu Nilo amne vectus est: nec sustinere adventum eius Persae, defectione quoque perterriti. Iamque haud procul Memphi erat: in cuius praesidio Mazaces praetor Darii relictus, Orio amne superato, octingenta talenta Alexandro, omnemque regionem supellectilem tradidit. A Memphi eodem flumine vectus, ad interiora Aegypti penetrat; compositisque rebus ita, ut nihil ex patrio Aegyptiorum more mutaret, adire Iovis Hammonis oraculum statuit. Iter expeditis quoque et paucis vix tolerabile ingrediendum erat: terra coeloque aquarum penuria est: steriles arenae iacent, quas ubi vapor solis accendit, fervido solo exurente vestigia, intolerabilis aestus existit. Luctandumque est, non tantum cum ardore et siccitate regionis, sed etiam cum tenacissimo sabulo, quod praealtum, et vestigio cedens, aegre molitur pedes. Haec Aegyptii vero maiora iactabant. Sed ingens cupido animum stimulabat adeundi Iovem, quem generis sui auctorem, haud contentus mortali fastigio, aut credebat esse, aut credi volebat. Ergo cum iis, quos ducere secum statuerat, secundo amne descendit ad Mareotim paludem. Eo legati Cyrenensium dona attulere, *pacem, et ut adiret urbes suas, petentes*. Ille, donis acceptis, amicitiaeque coniuncta, destinata exsequi pergit. Ac primo quidem et sequenti die tolerabilis labor visus, nondum tam vastis nudisque solitudinibus aditis, iam tamen sterili et emoriente terra. Sed ut aperueret se campi alto obruti sabulo; haud secus quam profundum aequor ingressi, terram oculis requirebant. Nulla arbor; nullum culti soli occurrebat vestigium. Aqua etiam defecerat, quam utribus cameli devexerant: et in arido solo ac fervido sabulo nulla erat. Ad haec sol omnia incen-

derat, siccaque et adusta erant omnia; cum repente, sive illud Deorum munus, sive casus fuit, obductae coelo nubes condidere solem; ingens aestu fatigatis, etiamsi aqua deficeret, auxilium. Enimvero, ut largum quoque imbrem excusserunt procellae, pro se quisque excipere eum, quidam ob sitim impotentes sui, ore quoque hianti captare coeperunt. Quatriduum per vastas solitudines absumentum est. Iamque haud procul oraculi sede aberant, cum complures corvi agmini occurrunt, modico volatu prima signa antecedentes: et modo humi residebant, cum lentius agmen incederet; modo se pennis levabant, antecedentium iterque monstrantium ritu. Tandem ad sedem consecratam Deo ventum est. Incredibile dictu, inter vastas solitudines sita, undique ambientibus ramis, vix in densam umbram cadente sole, contacta est: multique fontes dulcibus aquis passim manantibus alunt silvas. Coeli quoque mira temperies, verno tempori maxime similis, omnes anni partes pari salubritate percurrit. Accolae sedis sunt ab Oriente proximi Aethiopum: in Meridiem versus Arabes spectant, *Troglodytis* cognomen est: quorum regio usque ad rubrum mare excurrit. At qua vergit ad Occidentem, alii Aethiopes colunt, quos *Scenitas* vocant: a Septemtrione Nasamones sunt, gens Syrtica, navigiorum spoliis quaestiosa; quippe obsident litora, et aestu destituta navigia notis sibi vadis occupant. Incolae nemoris, quos *Hammonios* vocant, dispersis tuguriis habitant: medium nemus pro arce habent, triplici muro circumdatum. Prima munitio tyrannorum veterem regiam clausit: in proxima coniuges eorum cum liberis et pellicibus habitant; hic quoque Dei oraculum est: ultima munita satellitum armigerorumque sedes erant. Est etiam aliud Hammonis nemus: in medio habet fontem, *aquam Solis* vocant: sub lucis ortum tepida manat; medio die, cum vehementissimus est calor, frigida

eadem fluit; inclinato in vesperam caescit; media nocte fervida exaestuatur; quoque propius nox vergit ad lucem, multum ex nocturno calore decrescit; donec sub ipsum diei ortum assueto tepore languescat. Id quod pro Deo colitur, non eandem effigiem habet, quam vulgo Diis artifices accommodaverunt: umbilico maxime similis est habitus, smaragdo et gemmis coagmentatus. Hunc, cum responsum petitur, navigio aurato gestant sacerdotes; multis argenteis pateris ab utroque navigii latere pendentibus. Sequuntur matronae virginesque, patrio more inconditum quoddam carmen canentes, quo *propitiari Iovem* credunt, *ut certum edat oraculum*. At tum quidem regem propius adeuntem maximus natu e sacerdotibus *filium* appellat; *hoc nomen illi parentem Iovem reddere* affirmans. Ille *se vero*, ait, *et accipere, et agnosce-re*; humanae sortis oblitus. Consuluit deinde, *an totius orbis imperium fatis sibi destinaret pater?* Vates, aequae in adulationem compositus, *terrarum omnium rectorem fore* ostendit. Post haec institit, quaerere, *an omnes parentis sui interfectores poenas dedissent*. Sacerdos parentem eius negat *ul-lius scelere posse violari*: *Philippi autem omnes interfectores fuisse supplicia*: adiecit, *invictum fore, donec excederet ad Deos*. Sacrificio deinde facto, dona et sacerdotibus, et Deo data sunt; permis-sumque amicis, *ut ipsi quoque consulerent Iovem*. Nihil amplius quaesiverunt, quam *an auctor esset sibi divinis honoribus colendi suum regem?* Hoc quoque acceptum fore Iovi vates respondit, *ut ipsi victorem regem divino honore colerent*. Vere et salubriter aestimanti fidem oraculi vana profecto responsa videri potuissent: sed fortuna, quos, uni sibi credere coëgit, magna ex parte avidos gloriae magis, quam capaces facit. *Iovis* igitur *filium* se non solum appellari passus est, sed etiam iussit: rerumque ge-

starum famam, dum augere vult tali appellatione, corrumpit. Et Macedones, assueti quidem regio imperio, sed maiore libertatis umbra, quam ceterae gentes, immortalitatem affectantem contumacius, quam aut ipsis expediebat, aut regi, aversati sunt. Sed haec suo quaeque tempori reserventur. Nunc cetera exsequi pergam.

CAP. VIII. Alexander, ab Hammone rediens, ut a mari ad Mareotim paludem, haud procul insula Pharo sitam, venit, contemplatus loci naturam, primum in ipsa insula statuerat urbem novam condere. Inde, ut apparuit magnae sedis insulam haud capacem, elegit urbi locum, ubi nunc est Alexandria, appellationem trahens ex nomine auctoris. Complexus quidquid loci est inter paludem et mare, octoginta stadiorum muris ambitum destinavit; et, qui aedificandae urbi praessent, relictis, Memphim petit. Cupido, haud iniusta quidem, ceterum intempestiva, inceserat, non interiora modo Aegypti, sed etiam Aethiopiam invisere. Memnonis Tithonique celebrata regia cognoscendae vetustatis avidum trahebat paene extra terminos solis. Sed imminens bellum, cuius multo maior supererat moles, otiosae peregrinationi tempora exemerat. Itaque Aegypto praefecit Aeschylum Rhodium, et Pucesten Macedonem; quatuor millibus militum in praesidium regionis eius datis: *claustra Nili fluminis Polemonem tueri iubet; triginta ad hoc triremes datae.* Africae deinde, qua Aegypto iuncta est, praepositus Apollonius: vectigalibus eiusdem Africae, Aegyptique, Cleomenes. Ex finitimis urbibus commigrare Alexandriam iussis, novam urbem magna multitudine implevit. Fama est, *cum rex urbis futuris muris polentam, ut Macedonum mos est, destinasset; apium greges advolasse, et polenta esse pastas: cumque id omen pro tristi a plerisque esset acceptum; respondisse vates, magnam illam urbem*



*advenarum frequentiam culturam, multisque eam terris alimenta praebituram.* Regem, cum secundo anne deflueret, assequi cupiens Hector, Parmenionis filius, eximio aetatis flore, in paucis Alexandro carus, parvum navigium conscendit, pluribus, quam capere posset, impositis. Itaque mersa navis omnes destituit: Hector, diu flumini obluclatus, cum madens vestis, et adstricti crepidis pedes natare prohiberent, in ripam tamen semianimis evasit; et ut primum fatigatus spiritum laxavit, quem metus et periculum intenderant, nullo adjuvante (quippe in diversum evaserant alii) exanimatus est. Rex amissi eius desiderio vehementer afflictus est: repertumque corpus magnifico extulit finire. Oneravit hunc dolorem nuntius mortis Andromachi, quem praefecerat Syriae: vivum Samaritae cremaverant. Ad cuius interitum vindicandum, quanta maxima celeritate potuit, contendit: advenientique sunt traditi tanti sceleris auctores. Andromacho deinde Memnona substituit; affectis supplicio, qui praetorem interemerant. Tyrannos, inter eos Methymnacorum Aristonicum et Chrysolam, popularibus suis tradidit: quos illi e muris ob iniurias tortos necaverunt. Atheniensium deinde, Rhodiorumque et Chiorum legatos audit. Athenienses *victoriam* gratulabantur; et, *ut captivi Graecorum suis restituerentur*, orabant: Rhodii et Chii *de praesidio* querabantur. Omnes aequa desiderare visi, impetraverunt. Mitylenaeis quoque ob egregiam in partes suas fidem et pecuniam, quam in bellum impenderant, obsides reddidit, et magnam regionem finibus eorum adiecit. Cypriorum quoque regibus, qui et a Dario defecerant ad ipsum, et oppugnanti Tyrum miserant classem, pro merito honos habitus est. Amphoterus deinde, classis praefectus, ad liberandam Cretam missus, (namque et Persarum et piratarum armis pleraque eius insulae obsidebantur,) *ante omnia mare a piraticis classi-*

*bus vindicare* iussus: quippe obnoxium praedonibus erat, in bellum utroque rege converso. His compositis, Herculi Tyrio ex auro crateram, cum triginta pateris dicavit: imminensque Dario, *iter ad Euphratem pronuntiari* iussit.

CAP. IX. At Darius, cum ab Aegypto divertisse in Africam hostem comperisset, dubitaverat, utrumne circa Mesopotamiam subsisteret, an interiora regni sui peteret: haud dubie potentior auctor praesens futurus ultimis gentibus impigre bellum capessendi, quas aegre per praefectos suos moliebatur. Sed ut idoneis auctoribus fama vulgavit, *Alexandrum cum omnibus copiis, quamcunque ipse adisset regionem, petiturum*: haud ignarus, quam cum strenuo res esset, *omnia longin quarum gentium auxilia Babyloniam contrahi* iussit. Bactriani, Scythaeque, et Indi convenerant: nam et ceterarum gentium copiae partibus simul adfuerunt. Ceterum, cum dimidio ferme maior esset exercitus, quam in Cilicia fuerat, multis arma deerant: quae summa cura comparabantur. Equitibus equisque tegumenta erant ex ferreis laminis serie inter se connexis: quis antea praeter iacula nihil dederat, scuta gladiique adiciebantur: equorumque domandi greges peditibus distributi sunt, ut maior pristino esset equitatus: ingensque, ut crederat, terror hostium, ducentae falcatae quadrigae, unicum illarum gentium auxilium, secutae sunt. Ex summo temone hastae praefixae ferro eminebant: utrumque a iugo ternos direxerant gladios: et inter radios rotarum plura spicula eminebant in adversum: aliae deinde fales summis rotarum orbibus haerebant; et aliae in terram dimissae, quidquid obvium concitatis equis fuisset, amputaturae. Hoc modo instructo exercitu ac perarmato, Babylone copias movit. A parte dextra erat Tigris, nobilis fluvius; laevam tenebat Euphrates: agmen Mesopotamiae campos im-

pleverat. Tigri deinde superato, cum audisset, *haud procul abesse hostem*; Satropatem equitum praefectum cum mille delectis praemisit. Mazaeo praetori sex millia data, quibus transitu amnis arceret: eidem mandatum, *ut regionem, quam Alexander esset aditurus, popularetur atque ureret*; quippe credebatur, inopia debellari posse nihil habentem, nisi quod rapiendo occupasset: ipsi autem commeatus alii terra, alii Tigri amne subvehebantur. Iam pervenerat ad Arbela vicum, nobilem sua clade facturus. Hic commeatum sarcinarumque maiore parte deposita, Lycum amnem ponte iunxit, et per dies quinque, sicut ante Euphratem, traiecit exercitum. Inde octoginta fere stadia progressus, ad alterum amnem, *Bumado* nomen est, castra posuit. Opportuna explicandis copiis regio erat, equitabilis et vasta plauties. Ne stirpes quidem et brevia virgulta operiunt solum: liberque prospectus oculorum etiam quae procul recessere, permittitur. Itaque si qua campi eminebant, iussit *aequari, totumque fastigium extendi*. Alexandro, qui numerum copiarum eius, quantum procul coniectari poterant, aestimabant, vix fecerunt fidem, tot millibus caesis, maiores copias esse reparatas. Ceterum omnis periculi, et maxime multitudinis contemtor, undecimis castris pervenit ad Euphratem: quo pontibus iuncto *equites primos ire, phalangem sequi iubet*; Mazaeo, qui ad inhibendum transitum eius, cum sex millibus equitum occurrerat, non auso periculum sui facere. Paucis deinde, non ad quietem, sed ad reparandos animos, diebus datis militi, strenue hostem insequi coepit: metuens, ne interiora regni sui peteret, sequendusque esset per loca omni solitudine atque inopia vasta. Igitur quarto die praeter Arbela penetrat ad Tigrim. Tota regio ultra amnem recenti fumabat incendio: quippe Mazaeus, quaecumque adierat, haud secus quam hostis urebat. Ac pri-

mo caligine, quam fumus effuderat, obscurante lucem, insidiarum metu substitit: deinde ut speculatores praemissi *tuta omnia* nuntiaverunt, paucos equitum ad tentandum vadum fluminis praemisit: cuius altitudo primo summa equorum pectora, mox, ut in medium alveum ventum est, cervices quoque aequabat. Nec sane alius ad Orientis plagam tam violentus invehitur; multorum torrentium non aquas solum, sed etiam saxa secum trahens. Itaque a celeritate, qua defluit, *Tigri* nomen est inditum; quia Persica lingua *Tigrim* sagittam appellant. Igitur pedes, velut divisus in cornua, circumdato equitatu, levatis super capita armis, haud aegre ad ipsum alveum penetrat. Primus inter pedites rex egressus in ripam, vadum militibus manu, quando vox exaudiri non poterat, ostendit. Sed gradum firmare vix poterant, cum modo saxa lubrica vestigium fallerent, modo rapidior unda subduceret. Praecipuus erat labor eorum, qui humeris onera portabant: quippe cum semetipsos regere non possent, in rapidos gurgites incommodo onere auferebantur: et dum sua quisque spolia consequi studet, maior inter ipsos, quam cum amne, orta luctatio est: cum ulique sarcinarum passim fluitantes plerosque perculerant. Rex monere, *ut satis haberent, arma retinere; cetera se redditurum.* Sed neque consilium, neque imperium accipi poterat: obstrepebat hinc metus; praeter hunc invicem natantium mutus clamor. Tandem qua leniore tractu amnis aperit vadum, emersere: nec quidquam praeter paucas sarcinas desideratum est. Deleri potuit exercitus, si quis ausus esset vincere: sed perpetua fortuna regis avertit inde hostem. Sic Granicum tot millibus equitum peditumque in ulteriore stantibus ripa superavit: sic angustis in Ciliciae callibus tantam multitudinem hostium. Audaciae quoque, qua maxime viguit, ratio minui potest; quia nunquam in discrimen

venit, an temere fecisset. Mazaens, qui si transcun-  
tibus flumen supervenisset, haud dubie oppressurus  
fuit incompositos, in ripa demum, et iam perarmatos,  
adequitare coepit. Mille admodum equites praemi-  
serat. Quorum paucitate Alexander explorata, dein-  
de contempta, praefectum Paeonum equitum Aristona  
*laxatis habenis invehit* iussit. Insignis eo die pugna  
equitum, et praecipue Aristonis fuit: praefectum equi-  
tatus Persarum Satropatem, directa in gutture hasta  
transfixit; fugientemque per medios hostes consecutus,  
ex equo praecipitavit, et obluctanti caput gladio  
demisit: quod relatum magna cum laude ante regis  
pedes posuit.

CAP. X. Biduo ibi rex stativa habuit: in proximum  
deinde iter pronuntiari iussit. Sed prima fere vigilia  
luna deficiens, primum nitorem sideris sui condidit;  
deinde sanguinis colore suffuso lumen omne foeda-  
vit: sollicitisque sub ipsum tanti discriminis casum  
ingens religio, et ex ea formido quaedam incussa est.  
*Diis invitis in ultimas terras trahi se* querebantur.  
*Iam nec flumina posse adiri; nec sidera pristinum  
praestare fulgorem: vastas terras, deserta omnia  
occurrere: in unius hominis iactationem tot mil-  
lium sanguinem impendi. Fastidio esse patriam;  
abdicari Philippum patrem; coelum vanis cogita-  
tionibus peti.* Iam pro seditione res erat; cum ad  
omnia interritus, *duces principesque militum fre-  
quentes adesse praetorio, Aegyptiosque vates,*  
quos coeli ac siderum peritissimos esse credebat, *quid  
sentirent, expromere* iubet. At illi, qui satis scirent,  
temporum orbis implere destinatas vices, lunamque  
deficere, cum aut terram subiret, aut sole premeretur;  
rationem quidem ipsis perceptam non edocens vulgus:  
ceterum affirmant, *solem Graecorum, lunam esse  
Persarum; quoties illa deficiat, ruinam stragem-  
que illis gentibus portendi: veteraque exempla per-*

censent *Persidis regum, quos adversis Diis pugnasse, lunae ostendisset defectio*. Nulla res efficacius multitudinem regit, quam superstitio: alioqui impotens, saeva, mutabilis; ubi vana religione capta est, melius vatibus, quam ducibus suis, paret. Igitur edita in vulgus Aegyptiorum responsa rursus ad spem et fiduciam erexere torpentes. Rex, impetu animorum utendum ratus, secunda vigilia castra movit: dextra Tigrim habebat; a laeva montes, quos *Gordaeos* vocant. Hoc ingresso iter speculatores, qui praemissi erant, sub lucis ortum, *Darium adventare* nuntiaverunt. Instructo igitur milite, et composito agmine antecedebat. Sed Persarum exploratores erant mille ferme, qui speciem agminis magni fecerant: quippe ubi explorari vera non possunt, falsa per metum augurantur. His cognitis, rex cum paucis suorum assecutus agmen refugientium ad suos, alios cecidit, alios cepit: equitesque praemisit simul speculatum, simul ut ignem, quo barbari cremaverant vicos, exstinguere. Quippe fugientes raptim tectis acervisque frumenti iniecerant flammam: quae cum in summo haesissent, ad inferiora nondum penetraverant. Exstincto igitur igne, plurimum frumenti repertum est: copia aliarum quoque rerum abundare coeperunt. Ea res ipsa militi ad persequendum hostem animum incendit; quippe urente et populante eo terram, festinandum erat, ne incendio cuncta praeiperet. In rationem ergo necessitas versa; quippe Mazaeus, qui antea per otium vicos incenderat, iam fugere contentus, pleraque inviolata hosti reliquit. Alexander *haud longius centum quinquaginta stadiis Darium abesse* compererat. Itaque ad satietatem quoque copia commeatum instructus, quadriduo in eodem loco substitit. Interceptae deinde Barii literae sunt, quibus Graeci milites sollicitabantur, *ut regem interficerent, aut proderent*: *Auditavitque, an eas pro*

*concione recitaret*, satis confisus Graecorum quoque erga se benevolentiae ac fidei. Sed Parmenio deteruit; *non esse talibus promissis imbuendas aurea militum: patere vel unius insidiis regem: nihil nefas esse avaritiae*. Secutus consilii auctorem, castra movit. Iter facienti spado unus ex captivis, qui Darii uxorem comitabantur, *deficere eam nuntiat, et vix spiritum ducere*. Itineris continui labore, animique aegritudine fatigata, inter socrus et virginum filiarum manus collapsa erat; deinde et exstincta. Id ipsum nuntians alius supervenit. Et rex haud secus, quam si parentis suae mors nuntiata esset, crebros edidit gemitus: lacrimisque obortis, quales Darius profudisset, in tabernaculum, in quo mater erat Darii, defuncto assidens corpori, venit. Hic vero renovatus est moeror, ut prostratam humi vidit. Recentimalo priorum quoque admonita, receperat in gremium adultas virgines, magna quidem mutui doloris solatia; sed quibus ipsa deberet esse solatio. In conspectu erat nepos parvulus, ob id ipsum miserabilis, quod nondum sentiebat calamitatem, maxima ex parte ad ipsum redundantem. Crederes, Alexandrum inter suas necessitudines flere, et solatia non adhibere, sed quaerere. Cibo certe abstinuit: omnemque honorem funeri, patrio Persarum more, servavit: dignus hercule, qui nunc quoque tantum mansuetudinis et continentiae ferat fructum. Semel omnino eam viderat, quo die capta est; nec ut ipsam, sed ut Darii matrem videret: eximiamque pulchritudinem formae eius non libidinis habuerat incitamentum, sed gloriae. E spadonibus, qui circa reginam erant, Tyriotes, inter trepidationem lugentium elapsus per eam portam, quae, quia ab hoste aversa erat, levius custodiebatur, ad Darii castra pervenit: exceptusque a vigilibus, in tabernaculum regis perducitur, gemens et veste lacerata. Quem ut conspexit Darius, multiplici doloris

expectatione commotus, et quid potissimum timeret, incertus, *Vultus tuus*, inquit, *nescio quod ingens malum praefert: sed cave miseri hominis auribus parcas. Didici enim esse infelix: et saepe calamitatis solatium est nosse sortem suam. Num, quod maxime suspicor, et loqui timeo, ludibria meorum nuntiaturus es; mihi, et ut credo, ipsis quoque, omni graviora supplicio? Ad haec Tyriotes, istud quidem procul abest*, inquit: *quantuscunque enim reginis honor ab iis qui parent haberi potest, tuis a victore servatus est: sed uxor tua paullo ante excessit e vita.* Tum vero non gemitus modo, sed etiam eiulatus, totis castris exaudiebantur: nec dubitavit Darius, quin interfecta esset, quia nequisset contumeliam pati. Exclamatque amens dolore: *quod ego tantum nefas commisi, Alexander? quem tuorum propinquorum necavi, ut hanc vicem saevitiae meae reddas? Odisti me, non quidem provocatus: sed finge, iustum intulisse te bellum; cum feminis ergo agere debueras? Tyriotes affirmare per Deos patrios, nihil in eam gravius esse consultum: ingemuisse etiam Alexandrum morti, et non parcius flevisse, quam ipse lacrimaretur.* Ob haec ipsa amantis animus in sollicitudinem suspicionemque revolutus est; desiderium captivae profecto a consuetudine stupri ortum esse coniectans. Submotis igitur arbitris, uno dumtaxat Tyriote retento, iam non flens, sed suspirans, *videsne in te, Tyriote, locum mendacio non esse? tormenta iam hic erunt; sed ne expectaveris per Deos, si quid tui tibi regis reverentiae est: num, quod et scire expeto, et quaerere pudet, ausus est et dominus, et juvenis? Ille quaestioni corpus offerre, Deos testes invocare, caste sancteque habitam esse reginam.* Tandem ut fides facta est, vera esse quae affirmaret spado; capite velato diu flevit: manantibusque adhuc lacri-



mis, veste ab ore reiecta, ad coelum manus tendens, *Dii patrii*, inquit, *primum mihi stabilite regnum: deinde, si de me iam transactum est, precor, ne quis Asiae rex sit, quam iste tam iustus hostis, tam misericors victor.*

CAP. XI. Itaque quamquam pace frustra his petita, omnia in bellum consilia converterat; victus tamen continentia hostis, ad novas pacis conditiones ferendas decem legatos cognatorum principes misit: quos Alexander consilio advocato, introduci iussit. E quibus maximus natu, *Darium*, inquit, *ut pacem a te iam hoc tertio peteret, nulla vis subegit: sed iustitia et continentia tua expressit. Matrem, coniugem, liberosque eius, nisi quod sine illo sunt, captos esse non sensit: pudicitiae earum, quae supersunt, curam haud secus quam parens agens, reginas appellas: speciem pristinae fortunae retinere pateris. Vultum tuum video, qualis Darii fuit, cum dimitteremur ab eo: et ille tamen uxorem, tu hostem luges. Iam in acie stares, nisi cura te sepulturae eius moraretur. Et quid mirum est, si tam ab amico animo pacem petit? quid opus est armis, inter quos odia sublata sunt? Antea imperio tuo destinabat Halyn amnem, qui Lydiam terminat. Nunc, quidquid inter Hellespontum et Euphraten est, in dotem filiae offert, quam tibi tradit: Ochum filium, quem habes, pacis et fidei obsidem retine: matrem et duas virgines filias redde; pro tribus corporibus triginta millia talentum auri precatur accipias. Nisi moderationem animi tui notam haberem, non dicerem hoc esse tempus, quo pacem non dare solum, sed etiam occupare deberes. Respice, quantum post te reliqueris: intuere, quantum petas! Periculosum est praegrave imperium: difficile est continere, quod capere non possis. Videsne, ut navigia, quae*

modum excedunt, regi nequeant? Nescio, an Darius ideo tam multa amiserit, quia nimiae opes magnae iacturae locum faciunt. Facilius est, quaedam vincere, quam tueri: quam hercule expeditius manus nostrae rapiunt, quam continent. Ipsa mors uxoris Darii te admonere potest, minus iam misericordiae tuae licere, quam licuit. Alexander, legatis excedere tabernaculo iussis, quid placeret, ad consilium refert. Diu nemo quid sentiret ausus est dicere, incerta regis voluntate. Tandem Parmenio, ante suasissem, ait, ut captivos apud Damascum redimentibus redderes; ingentem pecuniam potuisse redigi ex iis, qui multi vincti virorum fortium occupaverant manus. Et nunc magnopere censerem, ut unam anum, et duas puellas, itinerum agminumque impedimenta, triginta millibus talentis auri permutes. Opimum regnum occupari posse conditione, non bello; nec quemquam alium inter Istrum et Euphraten possedisse terras ingenti spatio intervalloque discretas. Macedoniam quoque respiceret potius, quam Bactra et Indos intueretur. Ingrata oratio regi fuit. Itaque ut finem dicendi fecit; et ego, inquit, pecuniam quam gloriam mallet, si Parmenio essem. [Nunc Alexander, de paupertate securus sum: et me non mercatorem memini esse, sed regem.] Nihil quidem habeo venale; sed fortunam meam utique non vendo. Captivos si placet reddi; honestius dono dabimus, quam pretio remitemus. Introductis deinde legatis ad hunc modum respondit: Nuntiate Dario, [gratiarum actionem apud hostem supervacaneam esse: et] me, quae fecerim clementer et liberaliter, non amicitiae eius tribuisse, sed naturae meae: [nec adversus calamitates, sed adversus hostium vires contendere.] Bellum cum captivis et feminis gerere non soleo: ar-

*matus sit oportet, quem oderim. Quod si saltem pacem bona fide peteret; deliberarem forsitan, an darem. Verum enimvero, cum modo milites meos literis ad proditionem, modo amicos ad perniciem meam pecunia sollicitet; ad internecionem mihi persequendus est, non ut iustus hostis, sed ut percussor veneficus. Condiciones vero pacis, quas fertis, si accepero, victorem eum faciunt. Quae post Euphraten sunt, liberaliter donat: ubi igitur me affamini? nempe ultra Euphraten sum. Summum ergo dotis, quam promittit, terminum, castra mea transeunt. Hinc me depellite, ut sciam vestrum esse, quod ceditis. Eadem liberalitate dat mihi filiam suam: nempe quam scio alicui servorum suorum nupturam. Multum vero mihi praestat, si me Mazaëo generum praeponit! Ite, nuntiate regi vestro: et quae amisit, et quae adhuc habet, praemia esse belli: hoc regente utriusque terminos regni, id quemque habiturum, quod proximae lucis assignatura fortuna est. [Et me in Asiam non venisse, ut ab aliis acciperem; sed ut aliis darem. Si secundus, et non par mihi vellet haberi; facerem forsitan, quae petit. Ceterum, nec mundus duobus solibus potest regi; nec duo summa regna salvo statu terrarum potest habere. Proinde aut deditionem hodie, aut in crastinum bellum paret: nec aliam sibi, quam expertus est, polliceatur fortunam.] Legati respondent: cum bellum in animo sit, facere eum simpliciter, quod spe pacis non frustraretur. Ipsos petere, quamprimum dimittantur ad regem: eum quoque bellum parare debere. Dimissi nuntiant, adesse certamen.*

CAP. XII. Ille quidem confestim Mazaëum cum tribus millibus equitum, ad itinera, quae hostis petiturus erat, occupanda praemisit. Alexander, corpori uxoris eius iustis persolutis, omnique graviore

comitatu intra eadem munimenta cum modico praesidio relicto, ad hostem contendit. In duo cornua diviserat peditem, in utrumque latus equite circumdato: impedimenta sequebantur agmen. Praemissum deinde concitis equitibus Menidam iubet *explorare ubi Darius esset*. At ille, cum Mazaeus haud procul consedisset, non ausus ultra procedere, nihil aliud, quam *fremitum hominum, hinnitumque equorum exaudisse* nuntiat. Mazaeus quoque, conspectis procul exploratoribus, in castra se recipit, adventus hostium nuntius. Igitur Darius, qui in patentibus campis decernere optabat, *armari militem* iubet, aciemque disponit. In laevo cornu Bactriani ibant equites, mille admodum; Dahae totidem: et Arachosii Susiique quatuor millia explebant. Hos quinquaginta falcati currus sequebantur. Proximus quadrigis erat Bessus, cum octo millibus equitum item Bactrianis. Massagetae duobus millibus agmen eius claudebant. Pedites his plurium gentium non mixtas, sed suae quisque nationis iunxerant copias. Persas deinde cum Mardis Sogdianisque Ariobarzanes et Orohates ducebant. Illis partibus copiarum, summae Orsines praecerat, a septem Persis oriundus, ad Cyrum quoque nobilissimam regem originem sui referens. Hos aliae gentes, ne sociis quidem satis notae, sequebantur. Post quas quinquaginta quadrigas Phradates magno Caspianorum agmine antecedebat. Indi, ceterique rubri maris accolae, nomina verius quam auxilia, post currus erant. Claudebatur hoc agmen aliis falcatis curribus quinquaginta: quis peregrinum militem adiunxerat. Hunc Armenii, quos minores vocant; Armenios Babylonii; utrosque Belitae, et qui montes Cossacorum incolebant, sequebantur. Post hos ibant Gortuae, gentes quidem Euboicae, Medos quondam secuti; sed iam degeneres, et patrii moris ignari. Applicuerat his Phrygas et Caetonas. Parthorum deinde

gens, incolentium terras, quas nunc Parthi Scythia profecti tenent, claudebant agmen. Haec sinistri cornu acies fuit. Dextrum tenebat natio maioris Armeniae, Cadusiique, Cappadoces, et Syri, et Medi. His quoque falcati currus erant quinquaginta. Summa totius exercitus, equites quadraginta quinque millia: pedestris acies ducenta nullia expleverat. Hoc modo instructi decem stadia procedunt: iussique *subsistere*, armati hostem exspectabant. Alexandri exercitum pavor, cuius causa non suberat, invasit: quippe lymphati trepidare coeperunt, omnium pectora occulto metu percurrente. Coeli fulgor tempore aestivo ardenti similis internitens, ignis praebuit speciem; flammisque ex Darii castris splendere, velut illati temere praesidiis, credebant. Quod si percussis Mazaeus, qui praesidebat itineri, supervenisset; ingens clades accipi potuit. Ille segnis in eo quem occupaverat tumulo sedet, contentus non lacessi. Alexander, cognito pavore exercitus, *signum ut consisterent dari, ipsos arma deponere ac levare corpora*, iubet; admonens, *nullam subiti causam esse timoris; hostem procul stare*. Tandem compotes sui pariter arma et animos recepere: nec quidquam ex praesentibus tutius visum est, quam eodem loco castra munire. Postero die Mazaeus, qui cum delectis equitum in edito colle, ex quo Macedonum prospiciebantur castra, conederat; sive metu, sive quia *speculari modo* iussus erat, ad Darium rediit. Macedones eum ipsum collem, quem deseruerat, occupaverant: nam et tutior planitie erat; et inde acies hostium, quae in campo explicabatur, conspici poterat. Sed caligo, quam circa humidi effuderant montes, universam quidem rei faciem non abstulit; ceterum agminum discrimina atque ordinem prohibuit perspici. Multitudo inundaverat campos: fremitusque tot millium etiam procul stantium aures impleverat. Fluctuari animo rex,

et modo suum, modo Parmenionis consilium sera aestimatione perpendere; quippe eo ventum erat, unde recipi exercitus, nisi victor, sine clade non posset. [Movebat etiam eum multitudo hostium, respectu paucitatis suae gentis: sed interdum reputabat, quantas res cum hac gente gessisset, quantosque populos fudisset. Itaque, cum spes metum vinceret, periculosius bellum differre ratus, ne desperatio suis cresceret;] dissimulato eo, *mercenarium equitem ex Paeonia praecedere iubet*. Ipse phalangem, sicut antea dictum est, in duo cornua extenderat: utrumque cornu equites tegebant. Iamque nitidior lux, discussa caligine, aciem hostium ostenderat; et Macedones, sive alacritate, sive taedio expectationis, ingentem, pugnantium more, edidere clamorem. Redditus et a Persis, nemora vallesque circumiectas terribili sono impleverat. Nec iam contineri Macedones poterant, quin cursu quoque ad hostem contenderent. Melius adhuc ratus in eodem tumultu castra munire, *vallum iaci iussit*: strenueque opere perfecto, in tabernaculum, ex quo tota acies hostium conspiciebatur, secessit.

CAP. XIII. Tum vero universa futuri discriminis facies in oculis erat: armis insignibus equi virique splendebant: et, omnia intentiore cura praeparari apud hostem, sollicitudo praetorum agmina sua interequitantium ostendebat: ac pleraque inania, sicut fremitus hominum, equorum hinnitus, armorum internitentium salgor, sollicitam expectatione mentem turbaverant. Igitur sive dubius animi, sive ut suos experiretur, consilium adhibet: *quid optimum factum esset*, exquirens. Parmenio, peritissimus inter duces artium belli, *furto, non proelio opus esse censebat: intempesta nocte opprimi posse hostes; discordes moribus, linguis, adhaec somno et improvise periculo territos, quando in nocturna trepi-*

*datione coituros? At interdiu primum terribiles occurruras facies Scytharum Bactrianorumque: hirta illis ora, et intonsas comas esse; praeterea eximiam vastorum magnitudinem corporum. Vanis et inanibus militem magis quam iustis formidinis causis moveri. Deinde tantam multitudinem circumfundi paucioribus posse. Non in Ciliaciae angustiis, et inviis callibus, sed in aperta et lata planitie dimicandum fore. Omnes sese Parmenioni assentiebant: Polypercon haud dubie in eo consilio positam victoriam arbitrabatur. Quem iutuens rex; namque Parmenionem nuper acrius quam vellet increpitum, rursus castigare non sustinebat: latrunculorum, inquit, et furum ista sollertia est, quam praecipitis mihi; quippe illorum votum unicum est fallere. Meae vero gloriae semper aut absentiam Darii, aut angustias locorum, aut furtum noctis obstare non patiar: palam luce aggredi certum est: malo me fortunae poeniteat, quam victoriae pudeat. Ad haec illud quoque accedit, vigiliis agere barbaros, et in armis stare, ut ne decipi quidem possint, compertum habeo. Itaque ad proelium vos parate. Sic incitatos ad corpora curanda dimisit. Darius illud, quod Parmenio suaserat, hostem facturum esse coniectans, frenatos equos stare, magnamque exercitus partem in armis esse, ac vigiliis intentiore cura servari iusserat: ergo ignibus tota eius castra sugebant. Ipse cum ducibus propinquisque agmina in armis stantium circumibat, Solem Mithren, sacrumque et aeternum invocans ignem, ut illis dignam veteri gloria, maiorumque monumentis fortitudinem inspirarent. Et profecto, si qua divinae opis auguria humana mente concipi possent, Deus stare secum. Illos nuper Maæilonum animis subitam invulsisse formidinem; adhuc lymphatos ferri*

*agique, arma iacentes: expetere praesides Persarum imperii Deos debitas e vecordibus poenas. Nec ipsum ducem saniozem esse: quippe ritu ferarum praedam modo, quam expeteret, intuentem, in perniciem, quae ante praedam posita esset, incurrere.* Similis apud Macedones quoque sollicitudo erat: noctemque, velut in eam certamine edicto, metu egerunt. Alexander, non alias magis territus, *ad vota et preces Aristandrum vocari iubet.* Ille in candida veste, verbenas manu praefrens, capite velato praebat preces regi, Iovem, Minervam Victoriãque propitiant. Tunc quidem sacrificio rite perpetrato, reliquum noctis adquieturus in tabernaculum rediit. Sed nec somnum capere, nec quietem pati poterat. Modo e iugo montis aciera in dextrum Persarum cornu demittere agitabat; modo recta fronte concurrere hosti; interdum haesitare, an potius in laevum torqueret agmen? Tandem gravatum animi anxietate corpus alior somnus oppressit. Iamque luce orta duces ad accipienda imperia convenerant, insolito circa praetorium silentio attoniti: quippe alias arcessere ipsos, et interdum morantes castigare assueverat: tunc ne ultimo quidem reum discrimine excitatum esse mirabantur; et non somno quiescere, sed pavore marcere credebant. Non tamen quisquam e custodibus corporis intrare tabernaculum audebat: et iam tempus instabat; nec miles iniussu ducis, aut arma capere poterat, aut iam ordines ire. Diu Parmenio cunctatus, *cibum ut caperent,* ipse pronuntiat. Iamque exire necesse erat: tunc demum intrat tabernaculum: saepiusque nomine compellatum, cum voce non posset, tactu excitavit. *Multa lux, inquit, est: instructam aciem hostis admovit: tuus miles adhuc inermis exspectat imperium. Ubi est vigor ille animi tui? nempe excitare vigilas soles.* Ad haec Alexander: *credisne, me prius*





venire aciem tentasset, parata pugnae forent. Hic Agriani erant, quibus Attalus praeerat, adiunctis sagittariis Cretensibus. Ultimos ordines avertit a fronte, ut totam aciem orbe muniret. Illyrii hic erant, adiuncto milite mercede conducto. Thracas quoque simul obiecerat leviter armatos. Adeoque aciem versatilem posuit, ut qui ultimi stabant, ne circumirentur; verti tamen, et in frontem circumagi possent. Itaque non prima, quam latera; non latera munitiora fuere, quam terga. His ita ordinatis, praecipit, *ut, si falcatos currus cum fremitu barbari emitterent, ipsi laxatis ordinibus impetum occurrentium silentio exciperent*: haud dubius sine noxa transcururos, si nemo se opponeret. *Sin autem sine fremitu immisissent; eos ipsi clamore terrerant, pavidosque equos telis utrimque suffoderent.* Qui cornibus praeerant, *extendere ea iussi, ita ut nec circumvenirentur, si arctius starent; nec tamen mediam aciem exinanirent.* Impedimenta cum captivis, inter quos mater liberique Darii custodiebantur, haud procul acie in edito colle constituit, modico praesidio relicto. Laevum cornu, sicut alias, Parmenioni tuendum datum: ipse in dextro stabat. Nondum ad teli iactum pervenerant, cum Bion quidam transfuga, quanto maximo cursu potuerat, ad regem pervenit: nuntians, *murices ferreos in terram defodisse Darium, qua hostem equites emissurum esse credebat; notatumque certo signo locum, ut fraus evitari a suis posset.* Adservari transfuga iusso, duces convocat: expositoque quod nuntiatum erat, monet, *ut regionem monstratam declinent, equitemque periculum edoceant.* Ceterum hoc tantus exercitus exaudire non poterat, usum aurium intercipientem fremitu duorum agminum: sed in conspectu omnium duces et proximum quemque interequitans alloquebatur.

CAP. XIV. *Emensis tot terras in spem victoriae, de qua dimicandum foret, hoc unum superesse discrimen. Granicum hic amnem, Ciliciaeque montes, et Syriam Aegyptumque praetereuntibus raptas, ingentia spei gloriaeque incitamenta, reterebat. Reprehensos ex fuga Persas pugnatu-  
 ros, quia fugere non possent. Tertium diem iam metu exsanguis, armis suis oneratos, in eodem vestigio haerere. Nullum desperationis illorum maius indicium esse, quam quod urbes, quod agros suos urerent; quidquid non corrupissent, hostium esse confessi. Nomina modo vana gentium ignotarum ne extimescerent. Neque enim ad belli discrimen pertinere, qui ab his Scythae, quive Cadusii appellentur. Ob id ipsum, quod ignoti essent, ignobiles esse. Nunquam ignorari viros fortes: at imbelles, ex latebris suis erutos, nihil praeter nomina afferre. Macedones virtute assecutos, ne quis toto orbe locus esset, qui tales viros ignoraret. Intuerentur barbarorum inconditum agmen: alium nihil praeter iaculum habere; alium funda saxa librare: paucis iusta arma esse. Itaque illinc plures stare: hinc plures dimicatu-  
 ros. Nec postulare se, ut fortiter capesserent proelium, nisi ipse ceteris fortitudinis fuisset exemplum. Se ante prima signa dimicaturum. Spondere pro se, quot cicatrices, totidem corporis decora: scire ipsos, unum paene se praedae communis exsortem, in illis colendis ornandisque usurpare victoriae praemia. Haec se fortibus viris dicere. Si qui dissimiles eorum essent, illa fuisse dicturum: pervenisse eo, unde fugere non possent. Tot terrarum spatia emensis, tot omnibus montibusque post tergum obiectis, iter in patriam et penates manu esse faciendum. Sic duces, sic proximi militum instincti sunt. Darius in*

laevo cornu erat, magno suorum agmine, delectis equitum peditumque stipatus: contemseratque paucitatem hostis; vanam aciem esse, extentis cornibus ratus. Ceterum, sicut curru eminebat, dextra laevaue ad circumstantium agmina oculos manusque circumferens, *Terrarum*, inquit, *quas Oceanus hinc alluit, illinc claudit Hellespontus, paullo ante domini, iam non de gloria, sed de salute, et, quod saluti praeponitis, de libertate pugnandum est. Hic dies imperium, quo nullum amplius vidit aetas, aut constituet, aut finiet. Apud Granicum minima virum parte cum hoste certavimus: in Cilicia victis Syria poterat excipere: magna munimenta regni Tigris atque Euphrates erant. Ventum est eo, unde pulsus ne fugae quidem locus est. Omnia tam diutino bello exhausta post tergum sunt: non incolae suos urbes, non cultores habent terrae. Coniuges quoque et liberi sequuntur hanc aciem, parata hostibus praeda, nisi pro carissimis pignoribus corpora opponimus. Quod mearum fuit partium, exercitum, quem paene immensa planities vix caperet, comparavi: equos, arma distribui: comعات, ne tantae multitudinis deessent, providi: locum, in quo acies explicari posset, elegi. Cetera in vestra potestate sunt: audete modo vincere; famamque, infirmissimum adversus fortes viros telum, contemnite. Temeritas est, quam adhuc pro virtute timuistis: quae ubi primum impetum effudit, velut quaedam animalia amisso aculeo torpet. Hi vero campi deprehendere paucitatem, quam Ciliciae montes absconderant. Videtis ordines raros, cornua extenta, mediam aciem vanam et exhaustam: nam ultimi, quos locavit aversos, terga iam praebent. Obteri mehercule equorum unguis possunt; etiamsi nil praeter falcatos currus emisero. Et bello vi-*

*cerimus, si vincimus proelio: nam ne illis quidem ad fugam locus est: hinc Euphrates, illinc Tigris prohibet inclusos. Et quae antea pro illis erant, in contrarium conversa sunt. Nostrum mobile et expeditum agmen est; illud praeda grave. Implicatos ergo spoliis nostris trucidabimus: eademque res et causa victoriae erit, et fructus. Quod si quem e vobis nomen gentis movet; cogitet, Macedonum illic arma esse, non corpora. Multum enim sanguinis invicem hausimus; et semper gravior in paucitate iactura est. Nam Alexander, quantuscunque ignavis et timidus videri potest, unum animal est: et si quid mihi creditis, temerarium et vecors; adhuc nostro pavore, quam sua virtute, felicius. Nihil autem potest esse diuturnum, cui non subest ratio. Licet felicitas adspirare videatur; tamen ad ultimum temeritati non sufficit. Praeterea breves et mutabiles vices rerum sunt; et fortuna nunquam simpliciter indulget. Forsitan ita Dii fata ordinaverunt, ut Persarum imperium, quod secundo cursu per ducentos triginta annos ad summum fastigium evexerant, magno motu concuterent magis, quam affligerent; admonerentque nos fragilitatis humanae, cuius nimia in prosperis rebus oblitio est. Modo Graecis ultro bellum inferebamus: nunc in sedibus nostris propulsamus illatum. Iactamur invicem varietate fortunae. Videlicet imperium, quod mutuo affectamus, una gens non capit. Ceterum, etiamsi spes non subesset, necessitas tamen stimulare deberet: ad extrema perventum est. Matrem meam, duas filias, Ochum in spem huius imperii genitum, illos principes, illam sobolem regiae stirpis, duces vestros regum inatar, victos habet: nisi quod in vobis est, ipse ego maiore parte captivus sum. Eripite viscera mea ex vis-*

*culis: restituite mihi pignora, pro quibus ipse mori non recuso, parentem, liberos: nam coniugem in illo carcere amisi. Credite, nunc omnes tendere ad vos manus; implorare patrios Deos; opem vestram, misericordiam, fidem exposcere, ut servitute, ut compedibus, ut precario victu ipsos liberetis. An creditis aequo animo iis servire, quorum reges esse fastidiunt? Video admoveri hostium aciem; sed quo propius discrimen accedo, hominibus iis, quae dixi, possum esse contentus. Per ego vos Deos patrios, aeternumque ignem, qui praefertur altaribus, fulgoremque Solis intra fines regni mei orientis, per aeternam memoriam Cyri, qui ademptum Medis Lydisque imperium primus in Persidem intulit: vindicatis ab ultimo dedecore nomen gentemque Persarum. Ite alacres et spe pleni, ut, quam gloriam accepistis a maioribus vestris, posteris relinquatis. In dextris vestris iam libertatem, opem, spem futuri temporis geritis. Effugit mortem, quisquis contemserit: timidissimum quemque consequitur. Ipse non patrio more solum, sed etiam ut conspici possim, curru vehor: nec recus, quo minus imitemini me, sive fortitudinis exemplum, sive ignaviae fuero.*

CAP. XV. Interim Alexander, ut et demonstratum a transfuga insidiarum locum circumiret, et Dario, qui laevum cornu tuebatur, occurreret, agmen obliquum incedere iubet. Darius quoque eodem suum obvertit; Besso admonito, ut Massagetarum equites in laevum Alexandri cornu a latere invehi iuberet. Ipse ante se falcatos currus habebat: quos signo dato universos in hostem effudit. Ruebant laxatis habenis aurigae, quo plures nondum satis proviso impetu obtererent. Alios ergo hastae multum ultra temones eminentes, alios ab utroque latere dimissae falces laceravere. Nec sensim Macedones cede-

bant; sed effusa turbaverant fuga ordines: Mazaenus quoque percussis metum incussit, mille equitibus *ad diripienda hostis impedimenta circumvehi iussis*; ratus, captivos quoque, qui simul asservabantur, rupturos vincula, cum suos appropinquantes vidissent. Non fefellerat Parmenionem, qui in laevo cornu erat: prope igitur Polydamanta mittit ad regem, qui et periculum ostenderet, et, *quid fieri iuberet*, consuleret. Ille, audito Polydamante, *abi, nuntia*, inquit, *Parmenioni, si acie vicerimus, non nostra solum nos recuperaturos; sed omnia, quae hostium sunt, occupaturos. Proinde non est quod quidquam virium subducat ex acie; sed, ut me et Philippo patre dignum est, contempto sarcinarum damno fortiter dimicet*. Interim barbari impedimenta turbaverant; caesisque plerisque custodum, captivi, vinculis ruptis, quidquid obvium erat, quo armari possent, rapiunt: et aggregati suorum equitibus Macedonas, anticipi circumventos malo, invadunt; laetique circa Sysigambim, *viciisse Darium, ingenti caede prostratos hostes, ad ultimum etiam impedimentis exutos esse*, nuntiant: quippe eandem fortunam ubique esse credebant, et victores Persas ad praedam discurrisse. Sysigambis, hortantibus captivis, *ut animum a moerore allevaret*, in eodem, quo antea fuit, perseveravit. Non vox ulla excidit ei: non oris color, vultusve mutatus est: sed sedit immobilis, (credo, praecoce gaudio verita fortunam irritare,) adeo ut, quid mallet, intuentibus fuerit incertum. Inter haec Amyntas, praefectus equitum Alexandri, cum paucis turmis opem impedimentis laturus advenerat, incertum suone consilio, an regis imperio; sed non sustinuit Cadusiorum Scytharumque impetum: quippe vix tentato certamine effugit ad regem, amissorum impedimentorum testis magis, quam vindex. Iam consilium Alexandri vicerat dolor: et ne cura recuperandi sua mili-

sem a proelio averteret, non immerito verebatur. Itaque Areten, ducem hastatorum, quos *sarissophoros* vocabant, adversus Scythas mittit. Inter hanc currus, qui circa prima signa turbaverant aciem, in phalangem inveci erant. Macedones confirmatis animis in medium agmen accipiunt. Vallo similis acies erat: iunxerant hastas, et ab utroque latere temere incurrentium ilia suffodiebant. Circumire deinde currus, et propugnatores praecipitare coeperunt. Ingens ruina equorum aurigarumque aciem compleverat. Hi territos regere non poterant: equi crebra iactatione cervicum non iugum modo excusserant, sed etiam currus everterant. Vulnegrati interfectos trahebant: nec consistere territi, nec progredi debiles poterant. Paucae tamen evasere quadrigae in ultimam aciem, iis, quibus inciderunt, miserabili morte consumptis: quippe amputata virorum membra humi iacebant; et quia calidis adhuc vulneribus aberat dolor, trunci quoque et debiles arma non omittent; donec multo sanguine effuso, exanimati procumberent. Interim Aretes, Scytharum, qui impedimenta diripiebant, duce occiso, gravius territis instabat. Supervenere deinde missi a Dario Bactriani, pugnaeque vertere fortunam. Multi ergo Macedonum primo impetu obruti sunt: plures ad Alexandrum refugerunt. Tum Persae, clamore sublato, qualem victores solent edere, ferociter in hostem, quasi ubique profligatum, incurrunt. Alexander territos castigare, adhortari, proelium, quod iam elanquerat, solus accendere; confirmatisque tandem animis, *ire in hostem* iubet. Rarior acies erat in dextro cornu Persarum; namque inde Bactriani decesserant ad opprimenda impedimenta. Itaque Alexander laxatos ordines invadit, et multa caede hostium invenitur. At qui in laevo cornu erant Persae, spe posse eum includi, agmen suum a tergo dimicantis oppo-



nunt: ingensque periculum in medio haerens adisset, ni equites Agriani calcaribus subditis circumfusos regi barbaros adorti essent, aversosque caedendo in se obverti coëgissent. Turbata erat utraque acies. Alexander a fronte et a tergo hostem habebat: qui averso ei instabant, ab Agrianiis militibus premebantur: Bactriani, impedimentis hostium direptis, reversi, ordines suos recuperare non poterant: plura simul abrupta a ceteris agmina, ubicunque alium alii fors miscuerat, diiucabant. Duo reges iunctis prope agminibus proelium accendebant. Plures Persae cadebant: par ferme utrimque numerus vulnerabatur: curru Darius, Alexander equo vehebatur: utrumque delecti tuebantur, sui immemores. Quippe amisso rege nec volebant salvi esse, nec poterant. Ante oculos sui quisque regis mortem occumbere ducebant egregium. Maximum tamen periculum adibant, qui maxime tuebantur; quippe sibi quisque caesi regis expetebat decus. Ceterum, sive ludibrium oculorum, sive vera species fuit, qui circa Alexandrum erant, vidisse se crediderunt, paullulum super caput regis placide volantem aquilam, non sonitu armorum, non gemitu morientium territam: diuque circa equum Alexandri pendenti magis, quam volanti, similis apparuit. Certe vates Aristander, alba veste indutus, et dextra praefereus lauream, militibus in pugnam intentis avem monstravit, *haud dubium victoriae auspiciam*. Ingens ergo alacritas ac fiducia paullo ante territos accendit ad pugnam: utique postquam auriga Darii, qui ante ipsum sedens equos regebat, hasta transfixus est. Nec aut Persae, aut Macedones dubitavere, quin ipse rex esset occisus. Lugubri ergo ululatu et incondito clamore gemituque totam fere aciem adhuc aequo Marte pugnantium turbavere cognati Darii et armigeri: laevoque cornu in fugam effuso, destituerant currum: quem a dextra parte stipati in medium agmen

receperunt. Dicitur acinace stricto Darius dubitasse, an fugae dedecus honesta morte vitaret. Sed eminentem curru nondum omnem suorum aciem proelio excedentem destituere erubescerat. Dum inter spem et desperationem haesitat, sensim Persae cedebant, et laxaverant ordines. Alexander, mutato equo, quippe plures fatigaverat, resistentium adversa ora fodiebat, fugientium terga. Iamque non pugna, sed caedes erat; cum Darius quoque currum suum in fugam vertit. Haerebat in tergis fugientium victor: sed prospectum oculorum nubes pulveris, quae ad coelum ferebatur, abstulerat: ergo haud secus quam in tenebris errabant; ad sonitum notae vocis, ut signum, subinde coeuntes. Exandiebantur tantum strepitus habenarum, quibus equi currum trahentes identidem verberabantur: haec sola fugientis vestigia excepta sunt.

CAP. XVI. At in laevo Macedonum cornu, quod Parmenio, sicut ante dictum est, tuebatur, longe alia fortuna utriusque partis res gerebatur. Mazaeus, cum omni suorum equitatu vehementer invectus, urgebat Macedonum alas. Iamque abundans multitudine aciem circumvehi coeperat; cum Parmenio equites *nuntiare iubet Alexandro, in quo discrimine ipsi essent, nisi mature subveniretur; non posse sisti fugam.* Iam multum viae processerat rex, imminens fugientium tergis; cum a Parmenione tristis nuntius venit. *Refrenare equos iussi, qui vehebantur, agmenque constitit; frendente Alexandro, eripit sibi victoriam e manibus, et Darium felicius fugere quam sequi se.* Interim ad Mazaeum superati regis fama pervenerat. Itaque, quamquam validior erat, fortuna tamen partium territus, percussis languidius instabat. Parmenio ignorabat quidem causam sua sponte pugnae remissae; sed occasione vincendi strenue est usus. Thessalos equites ad se vocari iubet. *Quid, inquit, videtis istos, qui ferociter*

*modo instabant, pedem referre, subito pavore perterritos? Nimirum nobis quoque regis nostri fortuna vincit. Omnia Persarum caede strata sunt. Quid cessatis? an ne fugientibus quidem pares estis? Vera dicere videbatur, et spes languentes quoque crexerat. Subditis calcaribus praeuere in hostem: et illi iam non sensim, sed citato gradu recedebant: nec quidquam fugae, nisi quod terga nondum verterant, deerat. Parmenio tamen, ignarus quaenam in dextro cornu fortuna regis esset, repressit suos: Mazaeus, dato fugae spatio, non recto itinere, sed maiore et ob id tutiore circumitu Tigrim superat, et Babylonem cum reliquiis devicti exercitus intrat. Darius paucis fugae comitibus ad Lycum amnem contendebat: quo trajecto dubitavit an solveret pontem, quippe hostem iam affore nuntiabatur. Sed tot millia suorum, quae nondum ad amnem pervenerant, ponte reciso, praedam hostis fore videbat. Abeuntem, cum intactum sineret pontem, dixisse constat, *Malle insequentibus iter dare, quam auferre fugientibus.* Ipse ingens spatium fuga emensus, media fere nocte Arbela pervenit. Quis tot ludibria fortunae, ducum agminumque caedem multiplicem, devictorum fugam, clades nunc singulorum, nunc universorum, aut animo assequi queat, aut oratione complecti? Propemodum seculi res in unum illum diem fortuna cumulavit. Alii qua brevissimum patebat iter, alii diversos saltus, et ignotos sequentibus calles petebant. Eques pedesque confusi sine duce, armatis inermes, integris debiles implicabantur. Deinde, misericordia in metum versa, qui sequi non poterant, inter mutuos gemitus deserebantur. Sitis praecipue fatigatos et saucios perurebat, passimque omnibus rivis prostraverant corpora, praeterfluentem aquam hianti ore captantes. Quam cum diu avidi turbidam hausissent, tendebantur extemplo praecordia premente limo; re-*

solutisque et torpentibus membris, cum supervenisset hostis, novis vulneribus excitabantur. Quidam, occupatis proximis rivis, divertērant longius, ut, quidquid occulti humoris usquam manaret, exciperent; nec ulla adeo avia et sicca lacuna erat, quae vestigantium sitim falleret. E proximis vero itineri vicis senum ululatus seminarumque exaudiebantur, barbaro ritu *Darium* adhuc *regem* clamantium. Alexander, ut supra dictum est, inhibito suorum cursu ad Lycum amnem pervenerat, ubi ingens multitudo fugientium oneraverat pontem, et plerique, cum hostis urgeret, in flumen se praecipitaverant, gravesque armis et proelio ac fuga defatigati gurgitibus hauriebantur. Iamque non pons modo fugientes, sed ne armis quidem capiebat, agmina sua improvidē subinde cumulantē: quippe ubi intravit animos pavor, id solum metunt, quod primum formidare coeperunt. Alexander instantibus suis, *impune abeuntem hostem sequi permetteret; hebetia tela esse, et manus fatigatas, tantoque cursu corpora exhausta, et praeceptis in noctem diei tempus causatus est.* Revera de laevo cornu, quod adhuc in acie stare credebat, sollicitus, reverti ad ferendam opem suis statuit. Iamque signa converterat, cum equites, a Parmenione missi, *Alis* quoque partis victoriam nuntiant. Sed nullum eo die mains periculum adiit, quam dum copias reducit in castra. Pauci eum et incompoti sequebantur ovantes victoria; quippe omnes hostes aut in fugam effusos, aut in acie credebant cecidisse: cum repente ex adverso apparuit agmen equitum, qui primo inhibuere cursum, deinde Macedonum paucitate conspecta, turmas in obvios concitaverunt. Ante signa rex ibat, dissimulato magis periculo, quam spreto. Nec desinit ei perpetua in dubiis rebus felicitas; namque praefectum equitatus avidum certaminis, et ob id ipsum incantius in se ruentem, hasta transfixit!

quo ex equo lapsa, proximum, ac deinde plures eadem telo confodit. Invasere turbatos amici quoque: nec Persae inulti cadebant; quippe non universae acies, quam haec tumultuariae manus, vehementius iniere certamen. Tandem barbari, cum obscura luce fuga tutior videretur esse quam pugna, diversis agminibus abiere. Rex, extraordinario periculo defunctus, incolumes suos reduxit in castra. Cecidere Persarum, quorum numerum victores finire potuerunt, millia XL; Macedonum minus quam CCC desiderati sunt. Ceterum hanc victoriam rex maiore ex parte virtuti, quam fortunae suae debuit: animo, non ut antea loco, vicit. Nam et aciem peritissime instruxit: et promptissime ipse pugnavit: et magno consilio iacturam sarcinarum impedimentorumque contempsit, cum in ipsa acie summum rei videret esse discrimen: dubioque adhuc pugnae eventu pro victore se gessit: percultos deinde hostes fudit: fugientes, quod in illo ardore animi vix credi potest, prudentius quam avidius persecutus est. Nam si parte exercitus adhuc in acie stante, instare cedentibus perseverasset; aut sua culpa victus esset, aut aliena virtute vicisset. Iam si multitudinem equitum occurrentium extimuisset; victori aut foede fugiendum, aut miserabiliter cadendum fuit. Ne duces quidem copiarum sua laude fraudandi sunt; quippe vulnera, quae quisque excepit, indicia virtutis sunt. Hephaestionis brachium hasta ictum est: Perdicas, ac Coenus, et Menidas, sagittis prope occisi. Et, si vere aestimare Macedonas, qui tunc erant, volumus; fatebimur, et regem talibus ministris, et illos tanto rege fuisse dignissimos.

---

Q. CVRTII RVFI  
DE  
REBVS GESTIS  
ALEXANDRI MAGNI  
HISTORIARVM  
LIBER V.

---

ARGVMENTVM.

*Dario Mediae fines ingresso, Arbela potitur Alexander, et Babylone: cuius situs, amplitudo, et corrupti mores describuntur, 1. Militibus praemia proponit, ut iis otium exaceret. Susianam urbem ac regum Persiae thesauros recipit, et Sygambim solatur, 2. Uxiorum regione superata, Madatem praefectum, ac deditos et captivos, tum libertate tum immunitate donat: Persidemque intrare cogitans, ab Ariobarzane recederè cogitur, 3. Captivo quodam iter paucis cognitum aperiente, Persarum exercitum, ipso Ariobarzane occiso, delet Alexander, 4. Ad Persepolim properans, captivorum Graecorum IV millia liberat, 5. Opulentissima Persepoli direpta, interiorem Persidis regionem petit, ac Mardorum domat gentem, 6. Ale-*

*xander in convivio, a Thaide aliisque castrensi-  
bus scortis impulsus, Persarum regiam incendit:  
deinde persequi Darium statuit, 7. Darii, suos ad  
pugnam hortantis, oratio, 8. Varias Magnatum  
sententias, ac tumultus, ob Nabarzanis, qui cum  
Besso proditionis societatem inierat, consilium, 9.  
Bessi et Nabarzanis de Dario prodendo aut occi-  
dendo nefaria deliberatio: quam miris artibus oc-  
cultant, 10. Insidias proditorum Dario aperitun-  
tur, qui Graecorum praesens tutumque respuit au-  
xilium; paratus perire, si salvum esse nollent sui  
milites, 11. Bessus Darium fictis verbis et lacri-  
mis delusum comprehendit, aureisque vinctum  
compedibus, in sordido vehiculo ad Alexandrum  
deduci curat, 12. Alexander, audito Darii peri-  
culo, ad Persarum exercitum contendit. Bessus  
autem, cum parricidis aliis arma vultumque me-  
tuens victoris, Darium, multis confossum vulneri-  
bus, relinquit, fugaque sibi consulere conatur.  
Darii corpus repertum Alexander lacrimis prose-  
quitur, et ad Sysigambim sepeliendum mittit, 13.*

## C A P V T I.

**Q**uae interim ductu imperioque Alexandri vel in  
Graecia, vel in Illyriis ac Thracia gesta sunt, si quae-  
que suis temporibus reddere voluero, interrumpendae  
sunt res Asiae: quas utique ad fugam mortemque Da-  
rii universas in conspectu dari, et sicut inter se cohae-  
rent tempore, ita opere ipso coniungi, haud paullo  
aptius videri potest. Igitur ante, quae proelio apud  
Arbela coniuncta sunt, ordiar dicere. Darius media  
fere nocte Arbela pervenit: eodemque magnae partis  
amicorum eius ac militum fugam fortuna compulerat.  
Quibus convocatis exponit: *haud dubitare se, quin  
Alexander celeberrimas urbes, agrosque omni co-*

*via rerum abundantes petiturus esset: praedam optimam paratamque ipsum et milites eius spectare. Id suis rebus tali in statu salutis fore, quippe se deserta cum expedita manu petiturum. Ultima regni adhuc intacta esse; inde bello vires haud aegre reparaturum. Occuparet sane gazam avidissima gens, et ex longa fame satiaret se auro, mox futura praedae sibi: didicisse usu, pretiosam suppellectilem, pellicesque et spadonum agmina nihil aliud fuisse, quam onera et impedimenta: eadem trahentem Alexandrum, quibus antea vicisset, inferiorem fore. Plena omnibus desperationis videbatur oratio, quippe Babylonem urbem opulentissimam dedì cernentibus. Iam Susa, iam cetera ornamenta regni, causamque belli victorem occupaturum. At ille docere pergit: non speciosa dictu, sed usu necessaria in rebus adversis sequenda esse. Ferro geri bella, non auro; viris, non urbium tectis: omnia sequi armatos. Sic maiores suos percussos in principio rerum, celeriter pristinam reparasse fortunam. Igitur, sive confirmatis eorum animis, sive imperium magis quam consilium sequentibus, Mediae fines ingressus est. Paulo post Alexandro traduntur Arbela, regia suppellectili ditiq̃ue gaza repleta: quatuor millia talentum fuere; praeterea pretiosae vestes; totius, ut supra dictum est, exercitus opibus in illam sedem congestis. Ingruentibus deinde morbis, quos odor cadaverum totis iacentium campis vulgaverat, maturius castra movit. Euntibus a parte laeva Arabia, odorum fertilitate nobilis regio, campestre iter est. Inter Tigriim et Euphratem iacentia tam uberi et pingui solo sunt, ut a pastu repelli pecora dicantur, ne satietas perimat. Causa fertilitatis est humor, qui ex utroque amne manat, toto fere solo propter venas aquarum resudante. Ipsi amnes ex Armeniae montibus profluunt, ac magno deinde aquarum divortio*



iter, quod cepere, percurrunt: duo millia et *D* stadia emensi sunt, qui amplissimum intervallum circa Armeniae montes notaverunt. Iidem cum Mediae et Gordianorum terras secare coeperunt, paulatim in arctius coeunt, et quo longius manant, hoc angustius inter se spatium terrae relinquunt. Vicini maxime sunt his campis, quos incolae *Mesopotamiam* appellant; mediam namque ab utroque latere concludunt. Iidem per Babyloniorum fines in Rubrum mare prorumpunt. Alexander quartis castris ad Mennim urbem pervenit. Caverna ibi est, ex qua fons ingentem vim bituminis effundit, adeo, ut satis constet, Babylonios muros ingentis operis huius fontis bitumine interlitos esse. Ceterum Babylonem procedenti Alexandro Mazaens, qui ex acie in urbem eam confugerat, cum adultis liberis supplex occurrit, urbem seque dedens. Gratus adventus eius fuit regi; quippe magni operis futura erat obsidio tam munitae urbis. Ad hoc vir illustris, et manu promptus, famaque etiam proximo proelio celebris, et ceteros ad deditionem sui incitaturus exemplo videbatur. Igitur hunc quidem benigne cum liberis excepit: ceterum *quadrato agmine*, quod ipse ducebat, *velut in aciem irent, ingredi* suos iubet. Magna pars Babyloniorum constiterat in muris, avida cognoscendi novum regem: plures obviam egressi sunt. Inter quos Bagophanes arcis et regiae pecuniae custos, ne studio a Mazaeco vinceretur, totum iter floribus coronisque constraverat; argenteis altaribus utroque latere dispositis, quae non thure modo, sed omnibus odoribus cumulaverat. Eum dona sequebantur, greges pecorum equorumque, leones quoque et pardales caveis praeferebantur. Magi deinde, suo more patrium carmen canentes. Post hos Chaldaei, Babyloniorumque non vates modo, sed etiam artifices cum fidibus sui generis ibant. Laudes *ii* regum canere soliti: Chaldaei siderum motus et

stâtas temporum vices ostendere. Equites deinde Babylonii, suo atque equorum cultu ad luxuriam magis, quam ad magnificentiam, exacto, ultimi ibant. Rex, armatis stipatus, *oppidanorum turbam post ultimos pediteâ ire* iussit: ipse cum carru urbem, ac deinde regiam intravit. Postero die suppellectilem Darii, et omnem pecuniam recognovit. Ceterum ipsius urbis pulchritudo ac vetustas, non regis modo, sed etiam omnium oculos in semet laud immerito convertit. Semiramis eam condiderat; vel, ut plerique credidere, Belus, cuius regia ostenditur. Murus instructus laterculo coctili, bitumine interlitus, spatium xxx et duorum pedum latitudinem amplectitur: quadrigae inter se occurrentes sine periculo commeari dicuntur. Altitudo muri c cubitorum eminent spatio: turres denis pedibus quam murus altiores sunt. Totius operis ambitus ccclxviii stadia complectitur: singulorum stadiorum structuram singulis diebus perfectam esse memoriae proditum est. Aedificia non sunt adnota muris, sed fere spatium unius iugeris absunt. Ac ne totam quidem urbem tectis occupaverunt: per xc stadia habitatur; nec omnia continua sunt: credo, quia tutius visum est, pluribus locis spargi. Cetera serunt coluntque, ut si externa vis ingruat, obsessis alimenta ex ipsius urbis solo subministrantur. Euphrates intersluit, magnaeque molis crepidinibus coërcetur. Sed oranium operum magnitudinem circumveniunt caveruae ingentes, in altitudinem pressae ad accipiendum impetum fluminis; quod ubi appositae crepidinis fastigium excessit, urbis tecta corripere, nisi essent specus lacusque, qui exciperent. Coctili laterculo structi sunt: totum opus bitumine adstringitur. Pons lapideus, flumini impositus, iungit urbem. Hic quoque inter mirabilia Orientis opera numeratus est: quippe Euphrates altum limum vehit, quo penitus ad fundamenta iacienda ego-

sto, vix suffiçiendo operi firmum reperiunt solum; arenæ autem subinde cumulatae, et saxia, quibus pons sustinetur adnexæ, morantur amnem; qui retentus acrius, quam si libero cursu mearet, illiditur. Arcem quoque ambitu xx stadia complexam habet. xxx pedes in terram turrium fundamenta demissa sunt: ad lxxx summum munimenti fastigium pervenit. Super arce vulgatum Graecorum fabulis miraculum, pensiles horti sunt, summam murorum altitudinem æquantes, multarumque arborum umbra et proceritate amoeni. Saxo pilæ, quæ totum onus sustinent, instructæ sunt: super pilas lapide quadrato solum stratum est, patiens terræ, quam altam iniiciunt; et humoris, quo rigant terras: adeoque validas arbores sustinent moles, ut stipites earum viii cubitorum spatium crassitudine æquent, in l pedum altitudinem emineant, et frugiferae sint, ut si terra sua alerentur. Et cum vetustas non opera solum manu facta, sed etiam ipsam naturam paulatim exedendo perimat: hæc moles, quæ tot arborum radicibus premitur, tantique nemoris pondere onerata est, inviolata durat; quippe xx latî parietes sustinent, undecim pedum intervallo distantes, ut procul visentibus silvæ montibus suis imminere videantur. Syriæ regem, Babylone regnantem, hoc opus esse molitum memoriæ proditum est, amore coniugis victum: quæ desiderio nemorum silvarumque in campestribus locis, virum compulit amoenitatem naturæ genere huic operis imitari. Diutius in hac urbe quam usquam constitit rex nec ullus locus disciplinae militari magis nocuit. Nihil urbis eius corruptius moribus, nec ad irritandas illicitendasque immodicas voluptates instructius. Liberos coningesque cum hospitibus stupro coire, modo pretium flagitii detur, parentes maritique patiuntur. Convivales ludi tota Perside regibus purpuratisque eordi sunt: Babyloni maxime in vinum, et quæ ebric-

tatem sequuntur, effusi sunt. Feminarum, convivia ineuntium, in principio modestus est habitus: dein summa quaeque amicula exuunt, paulatimque pudorem profanant: ad ultimum (honus auribus sit) ima corporum velamenta proiciunt. Nec meretricum hoc dedecus est, sed matronarum virginumque, apud quas comitas habetur vulgati corporis vilitas. Inter haec flagitia exercitus ille domitor Asiae per xxxiv dies saginatus, ad ea quae sequebantur discrimina haud dubie debilior futurus fuit, si hostem habuisset. Ceterum, quo minus damnum sentiret, identidem incremento novabatur. Namque Amyntas Andromenis ab Antipatro Macedonum peditum sex millia adduxit: D praeterea eiusdem generis equites. Cum his DC Thracas, adiunctis peditibus suae gentis III millibus et D, et ex Peloponneso mercenarius miles ad IV millia advenerat, cum CCCLXXX equitibus. Idem Amyntas adduxerat L principum Macedoniae liberos adultos ad custodiam corporis: quippe inter epulas hi sunt regis ministri; iidemque equos ineunti proelium admovent, venantemque comitantur; et vigiliarum vices ante cubiculi fores servant: magnorumque praefectorum et ducum haec incrementa sunt et rudimenta. Igitur arci Babyloniae rex Agathone praesidere iusso cum DCC Macedonum, trecentisque mercede conductis; praetores, qui regioni Babyloniae et civitati praeesent, Menetem et Apollodorum reliquit. His duo millia peditum dat cum mille talentis: utrique praecoepum, *ut in supplementum milites legerent*. Mazaeum transfugam Satrapia Babyloniae donat; Bagophanem, qui arcem tradiderat, se sequi iussit: Armenia Mithreni Sardium proditori data est. Ex pecunia deinde Babyloniae Macedonibus equitibus sexcenti denarii tributi: peregrinus eques quingenos accepit: ducenis pedestrium stipendium mensum est.

CAP. II. His ita compositis, in regionem, quae *Satrapene* vocatur, pervenit. Fertilis terra, copia rerum et omni commeatu abundans. Itaque diutius ibi substitit; ac ne desides otio densitterent animos, iudices dedit, praemiaque proposuit de virtute militari certantibus. Novem, qui fortissimi iudicati essent, singulis militum millibus praefuturi erant, *Chiliarchas* vocabant, tum primum in hunc numerum copiis distributis: namque antea quingenariae cohortes erant; nec fortitudinis praemia gesserant. Ingens militum turba convenerat, egregio interfutura certamini, testis eadem cuiusque factorum, et de iudicibus latura sententiam: quippe verone an falso honos cuique haberetur, ignorari non poterat. Primus omnium virtutis causa donatus est Adarchias senior, qui omissum apud Halicarnasson a iunioribus proelium unus maxime accenderat: proximus ei Antigones visus est: tertium locum Philotas Angeus obtinuit: quartus Amyntae datus est: post hos Antigonus, et ab eo Lyncestes Amyntas fuit: septimum locum Theodotus, \* ultimum obtinuit Helanicus. In disciplina quoque militaris rei pleraque a maioribus tradita utiliter mutavit. Nam cum ante equites in suam quisque gentem describerentur seorsum a ceteris; exempto nationum discrimine, praefectis, non utique suarum gentium, sed delectis, attribuit. Tuba, cum castra movere vellet, signum dabat, cuius sonus plerumque, tumultuantium frémitu exoriente, haud satis exaudiebatur: ergo perticam, quae undique conspici posset, supra praetorium statuit, ex qua signum eminebat pariter omnibus conspicuum: observabatur ignis noctu, fumus interdiu. Iamque Susa adituro Abulites, regionis eius praefectus, sive Darii iussu, ut Alexandrum praeda retineret, sive sponte, filium obviam misit, *traditurum se urbem* promittens. Benigne iuvenem excepit rex, et eo duce ad Choaspen annem pervenit, delicatam, ut fama est,

vehentem aquam. Hic Abulites cum donis regalis opulentiae occurrit. Dromades cameli inter dona erant velocitatis eximiae; XII Elephanti a Dario ex India acciti, non iam terror, ut speraverant, Macedonum, sed auxilium; opes victi ad victorem transferente fortuna. Ut vero urbem intravit, incredibilem ex thesauris summam pecuniae egressit. L millia talentum argenti non signati forma, sed rudi pondere. Multi reges tantas opes longa aetate cumulaverant liberis posterisque, ut arbitrabantur, quas una hora in externi regis manus intulit. Consedit deinde in regis sella multo excelsiore, quam pro habitu corporis. Itaque pedes cum imum gradum non contingerent, auns ex regis pueris mensam subdidit pedibus. Et cum spadonem, qui Darii fuerat, ingemiscentem conspexisset rex, *causam moestitiae* requisivit. Ille indicat, *Darium vesci in ea solitum: seque sacram eius mensam ad ludibrium recidentem sine lacrimis conspici non posse.* Subiit ergo regem verecundia violandi hospitales Deos. Iamque *subducit* iubebat; cum Philotas, *minime vero haec feceris, rex; sed omen quoque accipe, mensam, ex qua libavit hostis epulas, tuis pedibus esse subiectam.* Rex, Persidis fines aditurus, Susa urbem Archelao et praesidium III millium tradidit; Xenophilo arcis cura mandata est; Macedonum aetate graves, praesidere arcis custodiae iussi. Thesaurorum Callicrati tutela permissa: Satrapia regionis Susiae restituta Abuliti. Matrem quoque Darii et liberos in eadem urbe deponit. Ac forte Macedonicas vestes, multamque purpuram, dono ex Macedonia sibi missam, cum his, quae eam confecerant, *tradi Sisygambi* iussit. • Omni namque honore eam, et filii quoque pietate prosequabatur. *Admonerique* iussit, *ut si cordi quoque vestis esset, conficere eam neptes suas adsuefaceret, donoque doceret dare.* Ad hanc vocem lacrimae

obortae prodidere animum aspernantis id munus, quippe non aliud magis in contumeliam Persarum feminae accipiunt, quam admovere lanae manus. Nuntiant qui dona tulerant, *tristem esse Sisygambim*; dignaque res excusatione et solatio visa. Ipse ergo pervenit ad eam, et, *mater*, inquit, *hanc vestem, qua indutus sum, sororum non solum donum, sed etiam opus vides: nostri decepere me mores. Cave, obsecro, in contumeliam accipias ignorationem meam. Quae tui moris esse cognovi, ut spero, abunde servata sunt. Scio, apud vos filium in conspectu matris nefas esse considerare, nisi cum illa permittit. Quotiescunque ad te veni, donec, ut considerem, annueres, restiti. Procumbens venerari me saepe voluisti: inhibui. Dulcissimae matri Olympiadi nomen debitum, tibi reddo.*

CAP. III. Mitigato animo eius, rex quartis castris pervenit ad fluvium: Pasitigrim incolae vocant. oritur in montibus Uxiorum, et per L stadia silvestribus ripis praecipit inter saxa devolvitur. Accipiunt deinde eum campi, quos clementiore alveo praeterit, iam navium patiens. DC stadia sunt mollioris soli, per quod leni tractu aquarum Persico mari se iusinat. Alexander, amne superato, cum IX millibus peditum, et Agrianis atque Graecorum mercenariis millibus III, additis millibus Thracum, in regionem Uxiorum pervenit. Finitima Susis est, et in primam Persidem excurrit, arctum inter se et Susianos aditum relinquens. Madates erat huius regionis praefectus, haud sane temporum homo. Quippe ultima, pro fide experiri decreverat. Sed periti locorum Alexandrum docent, *occultum iter esse per calles, et aversum ab urbe: si paucos misisset leviter armatos, super capita hostium evasuros.* Cum consilium placuisset, iidem itinerum fuerunt duces. M et D mercede conducti, et Agriani fere M Tauroni praefecto dati, ac

post solis occasum iter ingredi iussi. Ipse tertia vigilia castris motis circa lucis ortum superaverat angustias, caesaque materia cratibus et pluteis faciendis, ut qui turres admovent, extra teli ictum essent, urbem obsidere coepit. Praerupta erant omnia, saxis et cotibus impedita. Multis ergo vulneribus depulsi, ut quibus non cum hoste solum, sed etiam cum loco dimicandum esset, subibant tamen; quia rex inter primos constiterat, interrogans tot urbium victores, *an erubescerent haerere in obsidione castelli exigui et ignobilis?* Simul iam inter haec eminus petebatur; cum testudine obiecta milites, qui ut inde discederet percellere nequiverant, tuebantur. Tandem Tauron super arcem urbis se cum suo agmine ostendit: ad cuius conspectum et animi hostium labare, et Macedones acrius proelium inire coeperunt. Anceps oppidanos malum urgebat; nec sisti vis hostium poterat. Paucis ad moriendum, pluribus ad fugam animus fuit: magna pars in arcem concessit. Inde xxx oratoribus missis ad deprecandum, triste responsum a rege redditur, *non esse veniae locum.* Itaque suppliciorum metu perculsi, ad Sisygambium, Darii matrem, occulto itinere ignotoque hostibus mittunt, qui peterent, *ut ipsa regem mitigaret:* haud ignari, parentis eam loco diligi colique. Et Madates sororis filiam secum matrimonio iunxerat, Darium propinqua cognatione contingens. Diu Sisygambis supplicum precibus repugnavit, abnuens, *deprecationem pro illis convenire fortunae, in qua esset:* adiecitque, *metuere sese, ne victoris indulgentiam fatigaret. Saepius cogitare, captivam esse se, quam reginam fuisse.* At ultimum victa, literis Alexandrum ita deprecata est: *ut ipsam excusaret, quod deprecaretur. Petere se, ut illis quoque; si minus, sibi ignosceret. Pro necessario ac propinquo suo, iam non hoste, sed supplice, tantum vitam precari. Mode-*



rationem clementiamque regis, quae tunc fuit, vel una haec res possit ostendere: non Madati modo ignovit, sed omnes et deditos et captivos libertate atque immunitate donavit; urbem reliquit intactam, agros sine tributo colere permisit. A victore Dario plura mater non impetrasset. Uxiorum deinde gentem subactam Susianorum Satrapiae contribuit: divisisque cum Parmenione copiis, illum *campestri itinere procedere* iubet; ipse cum expedito agmine iugum montium cepit, quorum perpetuum dorsum in Persidem excurrit. Omni hac regione vastata, tertio die Persidem, quinto angustias, quas illi *Susidas Pylas* vocant, intrat. Ariobarzanes has cum xxv millibus pedatum occupaverat rupes, abscissas et undique praeruptas, in quarum cacuminibus extra teli iactum barbari stabant, de industria quieti et paventibus similes, donec in arctissimas fauces penetraret agmen. Quod ubi contemptu sui pergere vident; tum vero ingentis magnitudinis saxa per montium prona devolvunt: quae incussa saepius subiacentibus petris maiore vi incidebant, nec singulos modo, sed agmina proterebant. Fundis quoque excussi lapides et sagittae ingerebantur undique. Nec id miserrimum fortibus viris erat; sed quod inulti ferarum ritu velut in fovea deprehensi caederentur. Ira igitur in rabiem versa, eminentia saxa complexi, ut ad hostem perveniant, alius alium levantes conabantur ascendere. Ea ipsa multorum simul manibus correpta et convulsa, in eos, qui commoverant, recidebant. Nec stare ergo, nec niti, nec testudine quidem protegi poterant, cum tantae molis onera propellerent barbari. Regem non dolor modo, sed etiam pudor temere in illas angustias coniecti exercitus angebat. Invictus ad eam diem fuerat, nihil frustra ausus: impune Ciliciae fauces intraverat: mari quoque novum iter in Pamphyliam aperuerat: tunc haesitabat deprehensa felicitas; nec aliud reme-

dium erat, quam reverti qua venerat. Itaque signo receptui dato, *densatis agminibus, scutisque super capita consertis, retro evadere ex angustiis iubet. xxx* fuere stadia, quae remensi sunt.

CAP. IV. Tum castris undique aperto loco positis, non consultare modo *quid agendum esset*, sed vates quoque adhibere coepit a superstitione animi. Sed quid tunc praedicere Aristander, cui tum plurimum credebatur ex vatibus, poterat? Itaque damnatis intempestivis sacrificiis, *peritos locorum convocari* iubet. *Per Mediciter* ostendebant, *tutum apertumque*: sed rex dimittere milites insepultos erubescibat; ita tradito more, ut vix ullum militiae tam sollemne esset munus, quam humandi suos. *Captivos* ergo, *quos nuper exceperat, vocari* iubet: inter quos erat quidam Graecae Persicaeque linguae peritus, qui *frustra eum in Persidem montium dorso exercitum ducere* affirmat: *silvestres esse calles, vix singulis pervios; omnia contegi frondibus, implexosque arborum ramos silvas committere*. Namque Persis ab altero latere perpetuis montium iugis clauditur, quod in longitudinem MDC stadia, in latitudinem CLXX procurrit. Hoc dorsum a Caucasio monte ad rubrum mare pertinet; quaque deficit mons, aliud munimentum, fretum obiectum est. Planities deinde sub radicibus montium spatiosa procumbit, fertilis terra, multisque vicis atque uribus frequens. Araxes amnis per hos campos multorum aquas torrentium evolvit in Medum: Medus a mari, et ad meridiem versus, minor amnis eo quem accipit, vehitur; gignendaeque herbae non alius est aptior, quidquid alluit floribus vestiens. Platani quoque et populi contegant ripas; ita ut procul visentibus continuata videantur montibus nemoia riparum. Quippe obumbratus amnis presso in solum dilabitur alveo; imminentque colles, ipsi quoque frondibus laeti,

radices eorum humore subeunte. Regio non alia tota Asia salubrior habetur: temperatum coelum: hinc perpetuum iugum opacum et umbrosum, quod aestus levat; illinc mare adiunctum, quod modico tepore terras fovet. - His expositis captivus interrogatus a rege, *auditune an oculis comperta haberet, quae diceret? Pastorem se fuisse, et omnes eos calles percurrisse*, respondit: *bis captum, semel a Persis in Lycia, iterum ab ipso*. - Subit animum memoria regis oraculo editae sortis: quippe consulenti responsum erat, *ducem in Persidem fuentis viae Lycium civem fore*. Igitur promissis, quanta et praesens necessitas exigebat, et ipsius fortuna capiebat, oneratum, armari iubet Macedonum more, et, *quod bene verteret, monstraret iter: quamvis arduum et praecipit, evasurum se esse cum paucis*. Nisi forte crederet, *quo ipse pecoris causa isset, Alexandrum pro gloria et perpetua laude ire non posse*. Etiam atque etiam docere captivus, *quam difficile iter esset, maxime armatis*. Tum rex, *praedem me, inquit, accipe, neminem eorum, qui sequuntur, recusaturum ire qua duces*. Cratero igitur ad custodiam castrorum relicto cum peditibus, quos assueverat, et iis copiis, quas Meleager ducebat, et sagittariis equitibusque, praecepit, *ut castrorum specie manente, plures de industria ignes fieri imperet, quo magis barbari crederent, ipsum regem in castris esse*. Ceterum, *si forte Ariobarzanes cognovisset, per calillum anfractus eum intrare, et ad occupandum iter suum partem copiarum tentasset opponere; Craterus in eum illato terrore retineret ad propius periculum conversum agmen: sin autem ipse hostem fefellisset, et saltum occupasset; cum trepidantium barbarorum tumultum exaudisset persequentium regem, id ipsum iter, quo pridie pulsifuerant, ne dubitaret ingredi: quippe vacuum fo-*

*re, hostibus in semet aversis.* Ipse tertia vigilia silenti agmine, ac ne tuba quidem dato signo, pergit ad demonstratum iter callium. *Tridui alimentis portare* militem iusserat leviter armatum. Sed praeter invias rupes ac praerupta saxa, vestigium subiinde fallentia, nix cumulata vento ingredienti fatigabat; quippe velut in foveas delati hauriebantur; et cum a commilitonibus levarentur, trahebant magis adiuvantes, quam sequebantur. Nox quoque, et ignota regio, ac dux, incertum an satis fidus, multiplicabant metum: *si custodes fefellisset; quasi feras, bestias ipsos posse deprehendi.* *Ex unius captivi vel fide, vel anima, pendere et regis salutem, et suam.* Tandem venere in iugum. A dextera iter ad ipsum Ariobarzanem erat: hic Philotam et Coenon cum Amynta et Polyperconte, expeditam habentes manum, reliquit, monitos, *ut quia eques pediti erat mixtus, qua pinguisimum esset solum, et pabuli fertile, sensim procederent:* duces itineris de captivis dati. Ipse cum armigeris et ala, quam *Agema* appellant, ardua semita, sed longius a stationibus hostium remota, multa cum vexatione processit. Medius erat dies, et fatigatis necessaria quies: quippe tantundem itineris supererat, quantum emensi erant; sed minus praecipitis atque ardui. Itaque relictis cibo somnoque militibus, secunda vigilia surgit. Et cetera quidem haud aegre praeteriit. Ceterum, qua se iugum montium paullatim ad planiora demittit, ingens vorago concursu cavata torrentium iter ruperat. Ad haec arborum rami alius alio implicati et coeuntes, ut perpetuam obiecerant sepem. Desperatio igitur ingens, adeo, ut vix lacrimis abstinerent, incesserat. Praecipue obscuritas terrori erat: nam etiamsi qua sidera internitebant, continenti fronde tectae arbores conspiciere prohibebant. Ne aurium quidem usus supererat, silvas quatiente vento; quae concutientibus ramis maiorem

radices eorum humore subeunte. Regio non alia tota Asia salubrior habetur: temperatum coelum: hinc perpetuum iugum opacum et umbrosum, quod aestus levat; illinc mare adiunctum, quod modico tepore terras fovet. - His expositis captivus interrogatus a rege, *audirene an oculis comperta haberet, quae diceret? Pastorem se fuisse, et omnes eos calles percurrisse*, respondit: *bis captum, semel a Persis in Lycia, iterum ab ipso*. - Subit animum memoria regis oraculo editae sortis: quippe consulenti responsum erat, *ducum in Persidem fuentis viae Lycium civem fore*. Igitur promissis, quanta et praesens necessitas exigebat, et ipsius fortuna capiebat, oneratum, *armari iubet Macedonum more, et, quod bene verteret, monstraret iter: quamvis arduum et praecipue, evasurum se esse cum paucis. Nisi forte crederet, quo ipse pecoris causa isset, Alexandrum pro gloria et perpetua laude ire non posse*. Etiam atque etiam docere captivus, *quam difficile iter esset, maxime armatis*. Tum rex, *praedem me, inquit, accipe, neminem eorum, qui sequuntur, recusaturum ire qua duces*. Cratero igitur ad custodiam castrorum relicto cum peditibus, quos assueverat, et iis copiis, quas Meleager ducebat, et sagittariis equitibusque, praecipit, *ut castrorum specie manente, plures de industria ignes fieri imperet, quo magis barbari crederent, ipsum regem in castris esse. Ceterum, si forte Ariobarzanes cognovisset, per calillum anfractus eum intrare, et ad occupandum iter suum partem copiarum tentasset opponere; Craterus in eum illato terrore retineret ad propius periculum conversum agmen: sin autem ipse hostem fefellisset, et saltum occupasset; cum trepidantium barbarorum tumultum exaudisset persequentium regem, id ipsum iter, quo pridie pulsifuerant, ne dubitaret ingredi: quippe vacuum fo-*

*re, hostibus in semet aversis.* Ipse tertia vigilia silenti agmine, ac ne tuba quidem dato signo, pergit ad demonstratum iter callium. *Tridui alimenta portare* militem iusserat leviter armatum. Sed praeter invias rupes ac praerupta saxa, vestigium subinde fallentia, nix cumulata vento ingredienti fatigabat; quippe velut in foveas delati hauriebantur; et cum a commilitonibus levarentur, trahebant magis adiuvantes, quam sequebantur. Nox quoque, et ignota regio, ac dux, incertum an satis fidus, multiplicabant metum: *si custodes fefellisset; quasi feras, bestias ipsos posse deprehendi.* *Ex unius captivi vel fide, vel anima, pendere et regis salutem, et suam.* Tandem venere in iugum. A dextera iter ad ipsum Ariobarzanem erat: hic Philotam et Coenon cum Amynta et Polyperconte, expeditam habentes manum, reliquit, monitos, *ut quia eques pediti erat mixtus, qua pinguisimum esset solum, et pabuli fertile, sensim procederent:* duces itineris de captivis dati. Ipse cum armigeris et ala, quam *Agema* appellant, ardua semita, sed longius a stationibus hostium remota, multa cum vexatione processit. Medius erat dies, et fatigatis necessaria quies: quippe tantundem itineris supererat, quantum emensi erant; sed minus praecipitis atque ardui. Itaque relictis cibo somnoque militibus, secunda vigilia surgit. Et cetera quidem haud aegre praeteriit. Ceterum, qua se iugum montium paulatim ad planiora demittit, ingens vorago concursu cavata torrentium iter ruperat. Ad haec arborum rami alius alio implicati et coeuntes, ut perpetuam obiecerant sepe. Desperatio igitur ingens, adeo, ut vix lacrimis abstinerent, incesserat. Praecipue obscuritas terrori erat: nam etiamsi qua sidera internitebant, continenti fronde tectae arbores conspiciere prohibebant. Ne aurium quidem usus supererat, silvas quatiente vento; quae concutientibus ramis maiorem

quam pro flatu sonum reddebant. Tandem expectata lux omnia, quae terribiliora nox fecerat, minuit: circumiri brevi spatio poterat eluvies; et sibi quisque dux itineris coeperat fieri. Evadunt ergo in editum verticem: ex quo hostium statione conspecta, strenue armati, a tergo se ostendunt nihil tale metuentibus; quorum pauci, qui congregari ausi erant, caesi sunt. Itaque hinc morientium gemitus, hinc ad suos recurrentium miserabilis facies, integros quoque, antea quam discrimen experirentur, in fugam avertit. Fremitu deinde in castra, quos Craterus praecerat, illato, ad occupandas angustias, in quibus pridie haesitabat, miles educitur. Simul et Philotas cum Polyperconte Amyntaque et Coeno diversum iter ingredi iussus, alium terrorem intulit barbaris. Ergo undique Macedonum armis fulgentibus ancipiti malo oppressi, memorabile tamen proelium edunt. Ut opinor, ignaviam quoque necessitas acuit; et saepe desperatio spei causa est. Nudi complectebantur armatos, et ingenti corporum mole secum ad terram detrahentes, ipsorum telis plerosque fodiebant. Ariobarzanes tamen, XL ferme equitibus et quinque millibus peditum stipatus, per mediam aciem Macedonum cum multo suorum atque hostium sanguine erupit, Persepolim urbem caput regionis occupare festinans. Sed a custodibus urbis exclusus, consecutus strenue hostibus, cum omnibus fugae comitibus renovato proelio cecidit. Craterus quoque, raptim agmine acto, supervenit.

CAP. V. Rex eodem loco, quo hostium copias fuderat, castra communivit. Quamquam enim undique fugati hostes victoriam concesserant; tamen praeraltae praecipitesque fossae, pluribus locis obiectae, abruperant iter: sensimque et caute progrediendum erat, iam non hostium, sed locorum fraude suspecta. Procedenti ei literae redduntur a Tyridate, custode regiae pecuniae, indicantes, eos, qui in urbe essent,

*audito eius adventu, diripere velle thesauros: properaret occupare: expeditum iter esse, quamquam Araxes amnis interfluat.* Nullam virtutem regis istius magis, quam celeritatem, laudaverim. Relictis enim pedestribus copiis, tota nocte cum equitibus, itineris tanto spatio fatigatis, ad Araxem prima luce pervenit. Vici erant in propinquo: quibus directis ac dirutis, pontem ex materia eorum, subditis saxis, strenne induxit. Iamque haud procul urbe erant; cum miserabile agmen, inter pauca fortunae exempla memorandum, regi occurrit. Captivi erant Graeci ad quatuor millia fere, quos Persae vario suppliciorum modo affecerant. Alios pedibus, quosdam manibus auribusque amputatis, inustusque barbararum literarum notis, in longum sui ludibrium reservaverant; et cum se quoque alienae ditio- nis esse cernerent, volentes regi occurrere non prohibuerant. Inusitata simulacra, non homines videbantur; nec quidquam in illis praeter vocem poterat agnosci. Plures igitur lacrimas commovere, quam profuderant ipsi. Quippe in tam multiplici variaque fortuna singulorum, intuentibus similes quidem, sed tamen dispares poenas, quis maxime miserabilis esset, liquere non poterat. Ut vero *Iovem illi tandem Graeciae ultorem aperuisse oculos* conclamavere; omnes pari supplicio affecti sibi videbantur. Rex abstersis, quas profuderat, lacrimis, *bonum habere animum* iubet; *visuros urbes suas coniugesque*: et castra inde duo ab urbe stadia communit. Graeci ex- cesserant vallo, deliberaturi, quid potissimum a rege peterent: cumque aliis *sedes in Asia rogare, reverti domos* placeret; Euthymon Cymaeus ita locutus ad eos fertur. *Hi, qui modo ad opem petendam ex tenebris et carcere procedere erubuimus, ut nunc est, supplicia (quorum nos pudeat magis an poeniteat, incertum est) ostentare Graeciae velut*



laetum spectaculum cupimus. At ii optime miseris ferunt, qui abscondunt: nec ulla est tam familiaris infelicibus patria, quam solitudo, et status prioris oblivio. Nam qui multum in suorum misericordia ponunt, ignorant, quam celeriter lacrimae inarescant. Nemo fideliter diligit, quem fastidit; nam et calamitas querula est, et superba felicitas. Ita suam quisque fortunam in consilio habet, cum de aliena deliberat: et nisi mutuo essemus miseri, olim alius alii potuissemus esse fastidio. Quid mirum est, fortunatos semper parem quaerere? Obsecro vos, olim vita defuncti, quaeramus locum, in quo haec semesa membra obruamus; ubi horribiles cicatrices celet exilium. Grati prorsus coniugibus, quas iuvenes duximus, revertemur! Liberi in flore et aetatis et rerum agnoscent, et fratres ergastuli detrimenta? Et quota pars nostri tot obire terras potest? Procul Europa in ultima Orientis relegati, senes, debiles, maiore membrorum parte mulctati, tolerabimus scilicet, quae armatos et victores fatigaverunt. Coniuges deinde, quas captis sors et necessitas unicum solatium applicuit, parvosque liberos, trahimus nobiscum, an relinquimus? cum his venientes nemo agnoscere volet. Relinquemus ergo extemplo praesentia pignora, cum incertum sit, an visurimus ea quae petimus? Inter hos latendum est, qui nos miseros nosse coeperunt. Haec Euthymon. Contra Theaetetus Atheniensis orsus est dicere: Neminem pium habitu corporis suos aestimaturum; utique saevitia hostis, non natura, calamitosos. Dignum esse omni malo, qui erubesceret fortuita: tristem enim de mortalitate ferre sententiam; et desperare misericordiam, quia ipse alteri denegaturus sit. Deos, quod ipsi nunquam ausi optare forent, offerre patriam, coniuges, liberos, et quid-

*quid homines vel vita aestimant, vel morte redimunt. Quin illi ex hoc carcere erumperent: alium domi esse coeli haustum, alium lucis adspectum: mores, sacra, linguae commercium etiam a barbaris expeti; quae ingenita ipsi omissuri sint sua sponte; non ob aliud tam calamitosi, quam quod illis carere coacti essent. Se certe redituum ad penates et in patriam, tantoque beneficio regis usurum: si quos contubernii, liberorumque, quos servitus coëgisset agnoscere, amor detineret; relinquerent, quibus nil patria carius est. Pauci huius sententiae fuere: ceteros consuetudo, natura potentior, vicit. Consenserunt, petendum esse a rege, ut aliquam ipsis attribueret sedem. Centum ad hoc electi sunt: quos Alexander ratus, quod ipse praestare cogitabat, petituros, iumenta, inquit, assignari quae vos veherent, et singulis vestrum mille denarium dari iussi. Cum redieritis in Graeciam, praestabo, ne quis statum suum, si haec calamitas absit, vestro credat esse meliorem. Illi obortis lacrimis terram intuebantur, nec aut erigere vultus, aut loqui audebant: tandem rege tristitiae causam exigente, Euthymon similia iis, quae in consilio dixerat, respondit. Atque ille non fortunae solum eorum, sed etiam poenitentiae misertus, terna millia denarium singulis dari iussit: denae vestes adiectae sunt; et armenta cum pecoribus ac frumento data, ut coli serique attributus iis ager posset.*

CAP. VI. Postero die convocatos duces copiarum docet, nullam infestiores urbem Graecis esse quam regiam veterum Persidis regum. Hinc illa immensa agmina infusa: hinc Darium prius, deinde Xerxem Europae impium intulisse bellum. Excidio illius parentandum esse maioribus. Iamque barbari, deserto oppido, qua quemque metus agebat, diffugerant; cum rex phalangem nil cunctatus in-

ducit. Multas urbes, refertas opulentia regia, partim expugnaverat, partim in fidem acceperat; sed urbis huius divitiae vicere praeterita. In hanc totius Persidis opes congesserant barbari: aurum argentumque cumulatam erat, vestis ingens modus, supellex non ad usum modo, sed ad ostentationem luxus comparata. Itaque inter ipsos victores ferro dimicabatur: pro hoste erat, qui pretiosorem occupaverat praedam: et cum omnia, quae reperiebantur, capere non possent; iam res non occupabantur, sed aestimabantur. Lacerabant regias vestes, ad se quisque partem trahentes: dolabris pretiosae artis vasa caedebant: nihil neque intactum erat, nec integrum ferebatur; abrupta simulacrorum membra, ut quisque avellerat, trahebat. Neque avaritia solum, sed etiam crudelitas, in capta urbe grassata est: auro argentoque onusti vilia captivorum corpora trucidabant; passimque obvii caedebantur, quos antea pretium sui miserabiles fecerat. Multi ergo hostium manus voluntaria morte occupaverunt; pretiosissima vestium induti, e muris semetipsos cum coniugibus ac liberis in praeceps iactantes. Quidam ignes, quod paullo post facturus hostis videbatur, subiecerant aedibus, ut cum suis vivi cremarentur. Tandem suis rex *corporibus, et cultu feminarum abstinere* iussit. Ingens pecuniae captivae modus traditur, prope ut fidem excedat. Ceterum aut de aliis quoque dubitamus; aut credimus, in huius urbis gaza fuisse et xx millia talenta: ad quae vehenda (namque ad usus belli secum portare decreverat) *umenta et camelos a Susis et Babylone contrahi* iussit. Accessere ad hanc pecuniae summam, captis Persagadis, sex millia talentorum. Cyrus Persagadam urbem condiderat, quam Alexandro praefectus eius Gobares tradidit. Rex arcem Persepolis, III millibus Macedonum praesidio relicta, *Nicarthidem tueri* iubet; Tyridati quoque, qui

gazam tradiderat, servatus est honos, quem apud Darium habuerat: magnaue exercitus parte et impedimentis ibi relictis, Parmenionem Craterumque praefecit. Ipse cum mille equitibus, peditumque expedita manu, interiorem Persidis regionem, sub ipsum Vergiliarum sidus petiit: multisque imhribus et prope intolerabili tempestate vexatus, procedere tamen, quo intenderat, perseveravit. Ventum erat ad iter perpetuis obsitum nivibus, quas frigoris vis gelu adstrinxerat. Locorum squalor et solitudines inviae fatigatum militem terrebant, *humanarum rerum terminos se videre* credentem. Omnia vasta, atque sine ullo humani cultus vestigio attoniti intuebantur; et *antequam lux quoque et coelum ipsos deficerent*, reverti inebant. Rex castigare territos supersedit: ceterum ipse equo desiliit, pedesque per nivem et concretam glaciem ingredi coepit. Erubuerunt non sequi, primum amici, deinde copiarum duces, ad ultimum milites. Primusque rex dolabra glaciem perfringens, iter sibi fecit: exemplum regis ceteri imitati sunt. Tandem propemodum invias silvas emensi, humani cultus rara vestigia et passim errantes pecorum greges reperere: et incolae, qui sparsis tuguriis habitabant, cum se callibus invius septos esse credidissent, ut conspexere hostium agmen, interfectis, qui comitari fugientes non poterant, devios montes, et obsitos nivibus petiverunt. Inde per colloquia captivorum paullatim feritate mitigata, tradidere se regi. Nec in deditos gravius consultum. Vastatis deinde agris Persidis, vicisque compluribus redactis in potestatem, ventum est in Mardorum gentem bellicosissimam, et multum a ceteris Persis cultu vitae abhorrentem. Specus in montibus fodiunt, in quos seque ac coniuges et liberos condunt: pecorum, aut ferarum carne vescuntur. Ne feminis quidem pro naturae habitu molliora ingenia sunt: comae prominent hirtae: vestis super genua est: funda

vinciunt frontem; hoc et ornamentum capitis et telum est. Sed hanc quoque gentem idem fortunae impetus domuit. Itaque trigesimo die, posteaquam a Persepoli profectus erat, eodem rediit. Dona deinde amicis ceterisque pro cuiusque merito dedit. Prope modum omnia, quae in ea urbe ceperat, distributa.

CAP. VII. Ceterum ingentia animi bona, illam indolem, qua omnes reges antecessit, illam in subeundis periculis constantiam, in rebus molientis efficiendisque velocitatem, in deditis fidem, in captivis clementiam, in voluptatibus permissis quoque et usitatis temperantiam, haud tolerabili vini cupiditate foedavit. Hoste et aemulo regni reparante tum cum maxime bellum; nuper subactis, quos vicerat, novumque imperium aspernantibus; de die inibat convivia, quibus feminae intererant; non quidem quas violari nefas esset; quippe pellices licentius quam debeat cum armato vivere assuetae. Ex his una Thais, et ipsa temulenta, *maximam apud omnes Graecorum initurum gratiam* affirmat, *si regiam Persarum iussisset incendi. Expectare hoc eos, quorum urbes barbari delessent.* Ebrio scorto de tanta re ferente sententiam, unus et alter, et ipsi mero onerati, assentiunt. Rex quoque fuit avidior, quam patientior. *quin igitur ulciscimur Graeciam, et urbi faces subdimus?* Omnes incaluerant mero: itaque surgunt temulenti ad incendendam urbem, cui armati pepercerant. Primus rex ignem regiae iniecit; tum convivae et ministri, pellicesque. Multa cedro aedificata erat regia: quae celeriter igne concepto, late fudit incendium. Quod ubi exercitus, qui haud procul ab urbe tendebat, conspexit; fortuitum ratus, ad opem ferendam concurrat. Sed ut ad vestibulum regiae ventum est, vident regem ipsum adhuc adgerentem faces. Omissa igitur, quam portaverant, aqua, aridam materiam in incendium iacere coeperunt. Hunc exi-

tum habuit regia totius Orientis, unde tot gentes ante iura petebant: patria tot regum; unicus quondam Graeciae terror; molita mille navium classem, et exercitus, quibus Europa inundata est; contabulato mari molibus, perfossisque montibus, in quorum specus fretum immissum est, Ac ne longa quidem aetate, quae excidium eius secuta est, resurrexit. Alias urbes habuere Macedonum reges, quas nunc habent Parthi: huius vestigium non inveniretur, nisi Araxes annis ostenderet. Haud procul moenibus fluxerat: inde urbem fuisse xx stadiis distantem credunt magis, quam sciunt, accolae. Pudebat Macedones, tam praeclaram urbem a comessabundo rege deletam esse. Itaque res in serium versa est; et imperaverunt sibi, ut crederent *illo potissimum modo fuisse delendam*. Ipsum, ut primum gravatam ebrietate mentem quies reddidit, poenituisse constat, et dixisse: *maiores poenas Persas Graecis daturus fuisse, si ipsum in solio regiaeque Xerxis respicere coacti essent*. Postero die Lycio, itineris, quo Persidem intraverat, duci, xxx talenta dono dedit. Hinc in regionem Mediae transit, ubi supplementum novorum militum e Cilicia occurrit. Peditum erant quinque millia, equites mille: utrisque Plato Atheniensis praerat. His copiis auctus, Darium persequi statuit. Ille iam Ecbatana pervenerat, caput Mediae.

CAP. VIII. Urbem hanc nunc tenent Parthi, eaque aestiva agentibus sedes est. Adire deinde Bactra decreverat: sed veritus, ne celeritate Alexandri occuparetur, consilium iterque mutavit. Aberat ab eo Alexander stadia MD; sed iam nullum intervallum adversus celeritatem eius satis longum videbatur. Itaque proelio magis, quam fugae, se praeparabat. xxx millia peditum sequebantur, in quibus Graecorum erant quatuor millia, fide erga regem ad ultimum invicta. Funditorum quoque et sagittariorum manus quatuor

millia expleverat: praeter hos III millia et CCC equites  
 erant, maxime Bactrianorum. Bessus praerat, Ba-  
 ctrianae urbis regionisque praefectus. Cum hoc agni-  
 ne Darius paullum declinavit via militari, iussis  
 praecedere lixis impedimentorum custodibus. Con-  
 silio deinde advocato, *si me cum ignavis*, inquit, *et*  
*pluris qualemcunque vitam honesta morte aesti-*  
*mantibus, fortuna iunxisset; tacerem potius,*  
*quam frustra verba consumerem.* Sed maiore,  
*quam vellem, documento, et virtutem vestram, et*  
*fidem expertus, magis etiam conniti debeo, ut di-*  
*gnus talibus amicis sim, quam dubitare, an vestri*  
*similes adhuc sitis.* Ex tot millibus, quae sub im-  
 perio fuerunt meo, bis me victum, bis fugientem  
 persecuti estis. Fides vestra et constantia, ut  
 regem me esse credam, facit. Proditores et  
 transfugae in urbibus meis regnant: non hercule  
 qui tanto honore digni habeantur; sed ut prae-  
 miis eorum vestri sollicitentur animi. Meam ta-  
 men fortunam quam victoris maluistis sequi; di-  
 gnissimi, quibus, si ego non possim, Dii pro me  
 gratiam referant. Et mehercule referent. Nulla  
 erit tam surda posteritas, nulla tam ingrata fama,  
 quae non in coelum vos debitis laudibus ferat.  
 Itaque, etiamsi consilium fugae, a qua multum  
 abhorret animus, agitassem; vestra tamen virtu-  
 te fretus, obviam issem hosti. Quousque enim in  
 regno exulabo, et per fines imperii mei fugiam  
 externum et advenam regem? cum liceat experto  
 belli fortunam, aut reparare quae amisi, aut ho-  
 nesta morte defungi. Nisi forte satius est exspe-  
 ctare victoris arbitrium, et Mazaei et Mithrenis  
 exemplo precarium, accipere regnum nationis  
 unius: ut iam malit ille gloriae suae, quam irae  
 obsequi. Nec Dii siverint, ut hoc decus mei capi-  
 tis aut demere mihi quisquam aut condonare pos-

*sit: nec hoc imperium vivus amittam, idemque erit regni mei, qui et spiritus, finis. Si hic animus, si haec lex; nulli non parata libertas est: nemo e vobis fastidium Macedonum, nemo vultum superbum ferre cogetur. Sua cuique dextra aut ultionem tot malorum pariet, aut finem. Equidem quam verisabilis fortuna sit, documentum ipse sum. Nec immerito mitiores vices eius exspecto. Sed si iusta ac pia bella Dii aversantur; fortibus tamen viris licebit honeste mori. Per ego vos decora maiorum, qui totius Orientis regna cum memorabili laude tenuerunt; per illos viros, quibus stipendium Macedonia quondam tulit; per tot navium classes in Graeciam missas; per tot trophaea regum oro et obtestor, ut nobilitate vestra gentisque dignos spiritus capiatis: ut eadem constantia animorum, qua praeterita tolerastis, experiamini, quidquid deinde fors tulerit. Me certe in perpetuum aut victoria egregia nobilitabit, aut pugna.*

CAP. IX. Haec dicente Dario, praesentis periculi species omnium simul corda animosque horrore perstrinxerat, nec aut consilium suppetebat, aut vox; cum Artabazus, vetustissimus amicorum, quem hospitem fuisse Philippi saepe diximus, *Nos vero, inquit, pretiosissima vestium induti, armisque quanto maximo cultu possumus adornati, regem in aciem sequemur; ea quidem mente, victoriam ut speremus, mortem non recusemus.* Assensu exceperet ceteri hanc vocem. Sed Nabarzanes, qui in eodem consilio erat cum Besso, inauditi autea facinoris societate inita, regem suum per milites, quibus ambo praecerant, comprehendere et vincire decreverant: ea mente, ut si Alexander ipsos insecutus foret, tradito rege vivo ini-  
rent gratiam victoris, magni profecto cepisse Darium aestimaturi; sin autem eum effugere potuissent, interfecto Dario, regnum sibi occuparent, bellumque reno-



varent. Hoc parricidium cum diu volutassent, Nabarzanes aditum nefariae spei praeparans, *Scio, me, inquit, sententiam esse dicendum, prima specie haudquaquam auribus tuis gratam. Sed medici quoque graviores morbos asperis remediis curant; et gubernator, ubi naufragium timet, iactura, quidquid servari potest, redimit. Ego tamen, non ut damnum quidem facias, suadeo; sed ut te ac regnum tuum salubri ratione conserves. Diis adversis bellum inimus; et pertinax fortuna Persas urgere non desinit. Novis initiis et ominibus opus est. Auspicium et imperium alii trade'interim, qui tamdiu rex appelletur, donec Asia decedat hostis; victor deinde regnum tibi reddat. Hoc autem brevi futurum ratio promittit. Bactra intacta sunt: Indi et Sacae in tua potestate: tot populi, tot exercitus, tot equitum peditumque milia ad renovandum bellum vires paratas habent; ut maior belli moles supersit, quam exhausta sit. Quid ruimus belluarum ritu in perniciem non necessariam? Fortium virorum est, magis mortem contemnere, quam odisse vitam. Saepe taedio laboris ad vilitatem sui compelluntur ignavi: at virtus nihil inexpertum omittit. Itaque ultimum omnium mors est, ad quam non pigre ire satis est. Proinde si Bactra, quod tutissimum receptaculum est, petimus; praefectum regionis eius Bessum, regem temporis gratia statuamus. Compositis rebus, iusto regi tibi fiduciarium restituet imperium. Haud mirum est, Darium non temperasse animo, quamquam tam impiae voci quantum nefas subesset, latebat. Itaque, pessimum, inquit, mancipium, reperisti optatum tibi tempus, quo parricidium aperires! strictoque acinace interfecturus videbatur; ni prope Bessus Bactrianique, tristium specie, ceterum, si perseveraret, victuri, circumstetis-*

sent. Nabarzanes interim elapsus, mox et Bessus secutus, copias, quibus praeerant, a cetero exercitu secedere iubent; secretum inituri consilium. Artabazus convenientem praesenti fortunae sententiam orsus, mitigare Darium, temporum identidem admonens, coepit: *Ferret aequo animo qualiumcunque, suorum tamen, vel stultitiam, vel errorem. Instare Alexandrum gravem, etiamsi omnes praesto essent: quid futurum, si persecuti fugam ipsius alienentur a rege?* Ea re paruit Artabazo, et quamquam movere castra statuerat, turbatis tamen omnium animis, eodem in loco substitit. Sed attonitus moestitia simul et desperatione, tabernaculo se inclusit. Ergo in castris, quae nullius regebantur imperio, varii animorum motus erant; nec in commune, ut antea, consulebatur. Dux Graecorum militum Patron arma capere suos iubet, *paratosque esse ad exsequendum imperium.* Persae secesserant: Bessus cum Bactrianis erat; tentabatque Persas abducere, *Bactra, et intactae regionis opulentiam, simulque quae manentibus instarent pericula,* ostentans. Persarum omnium eadem fere fuit vox, *nefas esse deseri regem.* Inter haec Artabazus omnibus imperatoriis fungebatur officiis. Ille Persarum tabernacula circumire, hortari, monere nunc singulos, nunc universos, non ante destitit, quam satis constaret imperata facturos. Idem aegre a Dario impetravit, *ut cibum caperet, animumque regis.*

CAP. X. At Bessus et Nabarzanes olim agitatedum scelus exsequi statuunt, regni cupiditate accensi: Dario autem incolumi tantas opes sperare non poterant. Quippe in illis gentibus regum eximia maiestas est: ad nomen quoque barbari conveniunt; et pristinae veneratio fortunae sequitur adversam. Inflabat impios animos regio cui praeerant, arinis virisque et spatio locorum nulli earum gentium secunda. Tertiam par-

tem Asiae tenet: multitudo iuniorum, exercitus, quos amisere. Darius, aequabat. Itaque non illum modo, sed etiam Alexandrum spernebant; inde vires imperii repetituri, si regionis potiri contigisset. Diu omnibus cogitatis, placuit per milites Bactrianos, ad omne obsequium destinatos, regem comprehendere; mittique nuntium ad Alexandrum, qui indicaret, *vivum asservari eum*: si, id quod timebant, proditionem aspernatus esset; occisuri Darium, et Bactra cum suarum gentium manu petituri. Ceterum propalam comprehendi Darius non poterat, tot Persarum millibus laturis opem regi: Graecorum quoque fides timebatur. Itaque quod non poterant vi, fraude assequi tentant: poenitentiam secessionis simulare decreverant, et excusare apud regem consternationem suam. Interim qui Persas sollicitarent mittuntur. Ilinc spe, hinc metu militares animos versant: *ruinae rerum illos subdere capita; in perniciem trahi; cum Bactra pateant, exceptura eos donis et opulentia, quantam animis concipere non possint.* Haec agitantibus Artabazus supervenit, sive regis iussu, sive sua sponte, affirmans, *mitigatum esse Darium, et eundem illis amicitiae gradum patere apud regem.* Illi lacrimantes nunc purgare se, nunc Artabazum orare, *ut causam ipsorum tueretur, precesque perferret.* Sic peracta nocte, sub lucis ortu Nabarzanes cum Bactrianis militibus in vestibulo praetorii aderat, titulum sollemnis officii occulto scelere praeferebat. Darius signo ad eundem dato, currum pristino more conscendit. Nabarzanes ceterique parricidae procumbentes humi, quem paulo post in vinculis habituri erant, sustinere venerari, lacrimas etiam poenitentiae indices profuderunt: adeo humanis ingeniis parata simulatio est. Preces deinde suppliciter admotae, Darium, natura simplicem et mitem, non credere modo quae affirmabant, sed etiam flere coegerunt. Ac ne tum quidem

cogitati sceleris poenituit, cum intuerentur, qualem et regem et virum fallerent. Ille quidem, securus periculi quod instabat, Alexandri manus, quas solas timebat, effugere properabat.

CAP. XI. Patron autem, Graecorum dux, praecepit suis, *ut arma, quae in sarcinis antea ferebantur, induerent, ad omne imperium suum parati et intenti.* Ipse currum regis sequebatur, occasione imminens alloquendi eum: quippe Bessi facius praesenserat. Sed Bessus, id ipsum metuens, custos verius, quam comes, a curru non recedebat. Diu ergo Patron cunctatus, ac saepius sermone revocato, inter fidem timoremque haesitans, regem intuebatur. Qui ut tandem advertit oculos, Bubacem spadonem inter proximos currum sequentem *percontari* iubet, *numquid ipse velit dicere.* Patron, *se vero, sed remotis arbitris, loqui velle cum eo* respondit. Iussusque *propius accedere, sine interprete*, nam haud rudis Graecae linguae Darius erat: *Rex, inquit, ex L millibus Graecorum supersumus pauci, omnis fortunas tuae comites, et in hoc tuo statu iidem, qui florente te fuimus; quascunque sedes elegeris, pro patria et domesticis rebus petituri. Secundae adversaeque res tuae copulavere nos tecum. Per hanc fidem invictam oro et obtestor, in nostris castris tibi tabernaculum statue: nos corporis tui custodes esse patiaris. Amisimus Graeciam, nulla Bactra sunt nobis: spes omnis in te, utinam et in ceteris esset. Plura dici non attinet. Custodiam corporis tui externus et alienigena non deposcerem, si crederem alium posse praestare.* Bessus, quamquam erat Graeci sermonis ignarus, tamen stimulante conscientia indicium profecto Patronem detulisse credebat: et interpretis Graeci relato sermone exemta dubitatio. Darius autem, quantum ex vultu concipi poterat, haud sane territus, percon-

tari Patrona *causam consilii, quod afferret*; coepit. Ille non ultra differendum ratus, *Bessus, inquit, et Nabarzanes insidiantur tibi, in ultimo discrimine et fortunae tuae et vitae. Hic dies aut parricidis, aut tibi futurus ultimus.* Et Patron quidem egregiam conservati regis gloriam tulerat. Eludant licet, quibus forte ac temere humana negotia volvi agique persuasum est: equidem aeterna constitutione crediderim, nexuque causarum latentium, et multo antè destinatarum, suum quemque ordinem immutabili lege percurrere. Darius certe respoudit: *quamquam sibi Graecorum militum fides nota sit; nunquam tamen a popularibus suis recessurum. Difficilius sibi esse damnare, quam decipi. Quidquid fors tulisset, inter suos perpeti malle, quam transfugam fieri. Sero se perire, si salvum esse sui milites nollent.* Patron, desperata salute regis, ad eos, quibus praecerat, rediit, omnia pro fide experiri paratus.

CAP. XII. At Bessus occidendi protinus regis impetum conceperat. Sed veritus, ne gratiam Alexandri, ni vivum eum tradidisset, inire non posset, dilato in proximam noctem sceleris consilio, agere gratias incipit, *quod perfidi hominis insidias, iam Alexandri opes spectantis, prudenter cauteque vitasset. Donum eum hosti laturum fuisse regis caput. Nec mirari, hominem mercede conductum omnia habere venalia: sine pignore, sine lare, terrarum orbis exsulem, ancipitem hostem, ad nutum licentium circumferri.* Purganti deinde se, *Deosque patrios testes fidei suae* invocanti, Darius vultu asseuebat: haud dubius, quin vera deferrentur a Graecis; sed eo rerum ventum erat, ut tam periculosum esset non credere suis, quam decipi. xxx millia erant, quorum inclinata in scelus levitas timebatur: xv millia Patron habebat; quibus si credidisset salutem

suam, damnata popularium fide, parricidio excusationem videbat offerri. Itaque praeoptabat immerito, quam iure violari. Besso tamen insidiarum consilium purganti respondit, *Alexandri sibi non minus iustitiam, quam virtutem, esse perspectam. Falli eos, qui proditionis ab eo praemium expectent: violatae fidei neminem acriorem fore vindicem ultoremque.* Iamque nox appetebat, cum Persae more solito armis positis ad necessaria ex proximo vico ferenda discurrunt. At Bactriani, ut imperatum erat a Besso, armati stabant. Inter haec Darius *Artabazum acciri iubet; expositisque, quae Patron detulerat, haud dubitare Artabazum quin transeundum esset in castra Graecorum. Persas quoque periculo vulgato secuturos.* Destinatus sorti suae, et iam nullius salubris consilii patiens, unicam in illa fortuna opem Artabazum ultimum illum visurus amplectitur; perfususque mutuis lacrimis, *inhaerentem sibi avelli iubet: capite deinde velato, ne inter gemitus digredientem velut a rege intueretur, in humum primum corpus abiecit.* Tum vero custodiae eius assueti, quos regis salutem vel periculo vitae tueri oportebat, dilapsi sunt; cum armatis, quos iam adventare credebant, haud rati se futuros pares. Ingens ergo in tabernaculo solitudo erat, paucis spadonibus, quia quo discederent non habebant, circumstantibus regem. At ille, remotis arbitris, diu aliud atque aliud consilium animo volutabat. Iamque solitudinem, quam paulo ante pro solatio petiverat, perosus, *Rubacem vocari iubet. Quem intuens, Ite, inquit, consulite vobis, ad ultimum regi vestro, ut decebat, fide exhibita. Ego hic legem fati mei exspecto. Forsitan mireris, quod vitam non finiam? alieno scelere, quam meo, mori malo.* Post hanc vocem spado gemitu non modo tabernaculum, sed etiam castra complevit. Irrupere deinde alii, laceratisque vestibus

ingubri et barbaro ululatu regem deplorare coeperunt. Persae, ad illos clamore perlato, attoniti metu, nec arma capere, ne in Bactrianos incidere, nec quiescere audebant, ne impie deserere regem viderentur. Varius ac dissonus clamor sine duce ac sine imperio totis castris referebatur. Besso et Nabarzani nuntiaverant sui, *regem a semetipso interentum esse*. Planctus eos deceperat. Itaque citatis equis advolant, sequentibus quos ad ministerium sceleris delegerant; et cum tabernaculum intrassent, *quia regem vivere* spadones indicabant, *comprehendi vincirique iusserunt*. Rex curru paullo ante vectus, et Deorum a suis honoribus cultus, nulla externa ope admota, captivus servorum suorum, in sordidum vehiculum pellibus undique contactum imponitur. Pecunia regis, et suppellex, quasi iure belli diripitur; onustique praeda, per scelus ultimum parta, fugam intendunt. Artabazus sum iis, qui imperio parebant, Graecisque militibus Parthienem petebat, omnia tutiora parricidarum conatu ratus. Persae, promissis Bessi onerati, maxime quia nemo alius erat, quem sequerentur, coniungere se Bactrianis, agmen eorum tertio assecuti die. Ne tamen honos regi non haberetur, aureis compedibus Darium vincunt; nova ludibria subinde excogitante fortuna. Et ne forte cultu regio posset agnosci, sordidis pellibus vehiculum intexerant: ignoti iumenta agebant, ne percontantibus in agmine monstrari posset: custodes procul sequebantur.

CAP. XIII. Alexander, audito Darium movisse ab Ecbatanis, omisso itinere, quod patebat in Mediam, fugientem insequi pergit strenue. Tabas oppidum est in Paraetacene ultima: ibi transfugae nuntiant, *praecipitem fuga Bactra petere Darium*. Certiora deinde cognoscit ex Bagysthene Babylonio, *non equidem vinctum regem, sed in periculo esse aut mortis, aut vinculorum*. Rex, ducibus convocatis,

*maximum, inquit, opus, sed labor brevissimus superest: Darius haud procul destitutus a suis, aut oppressus. In illo corpore posita est victoria nostra: et tanta res celeritatis est praemium. Omnes pariter conclamant, paratos ipsos sequi; nec labori, nec periculo parceret. Igitur raptim agmen cursus magis quam itineris modo ducit, ne nocturna quidem quiete diurnum laborem relaxante. Itaque quingenta stadia processit: perventumque erat in vicum, in quo Darium Bessus comprehenderat. Ibi Melon Darii interpres excipitur. Corpore aeger non potuerat agmen sequi, et deprehensus celeritate regis, transfugam se esse simulabat. Ex hoc acta cognoscit. Sed fatigatis necessaria quies erat. Itaque delectis equitum sex millibus, trecentos, quos *Dimachas* appellant, adiungit: dorso hi graviora arma portabant, ceterum equis vehebantur; cum res locusque posceret, pedestris acies erat. Haec agentem Alexandrum adeunt Orsillos et Mythracenes, qui Bessi parricidium exosi transfugerant; nuntiabantque, *stadia D abesse Persas; ipsos brevius iter monstraturos*. Gratus regi adventus transfugarum fuit. Itaque prima vespere ducibus iisdem cum expedita equitum manu monstratam viam ingreditur, phalange, *quantum festinare posset, sequi iussa*. Ipse quadrato agmine incedens, ita cursum regebat, ut primi coniungi ultimis possent. CCC stadia processerant, cum occurrit Brocubelus Mazaei filius, Syriae quondam praetor. Is quoque transfuga nuntiabat, *Bessum haud amplius quam CC stadia abesse. Exercitum, utpote qui nihil praecaveret, incompositum inordinatumque procedere. Hyrcaniam videri petiuros. Si festinaret sequi, palantibus superventurum. Darium adhuc vivere*. Strenuo alioqui cupiditatem consequendi transfuga iniecerat. Itaque calcaribus subditis, effuso cursu eunt. Iamque fremitus hostium*



iter ingredientium exaudiebatur; sed prospectum ademerat pulveris nubes. Paullisper ergo inhibuit cursum, donec consideret pulvis. Iamque conspecti a barbaris erant, et abeuntium agmen conspexerant; nequaquam futuri pares, si Besso tantum animi fuisset ad proelium, quantum ad parricidium fuerat. Namque et numero barbari praestabant, et robore: ad hoc refecti cum fatigatis certamen inituri erant. Sed nomen Alexandri, et fama, maximum in bello utique momentum, pavidos in fugam convertit. Bessus, et ceteri facinoris eius participes, vehiculum Darii assecuti, coeperunt hortari eum, *ut conscenderet equum, et se hosti fuga eriperet.* Ille *Deos ultores adesse* testatur, et *Alexandri fidem* implorans, negat, *se parricidas velle comitari.* Tum vero ira quoque accensi, tela iniiciunt in regem; multisque confossum vulneribus relinquunt. Iumenta quoque, ne longius prosequi possent, convulnerantur; duobus servis, qui regem comitabantur, occisis. Hoc edito facinore, ut vestigia fugae spargerent, Nabarzaeus Hyrcaniam, Bessus Bactra, paucis equitum comitantibus, petebant: barbari, ducibus destituti, quae quemque aut spes ducebat, aut pavor, dissipabantur: ut tantum equites congregaverant se, incerti adhuc, resisterene melius esset, an fugere. Alexander, hostium trepidatione comperita, Nicanorem cum equitum parte ad inhibendam fugam praemittit: ipse cum ceteris sequitur. III ferme millia resistentium occisa sunt; reliquum agmen more pecudum intactum agebatur, iubente rege, *ut caedibus abstineretur.* Nemo captivorum erat, qui monstrare Darii vehiculum posset: singuli, ut quaeque prehenderant, scrutabantur; nec tamen ullum vestigium fugae regis exstabat. Festinantem Alexandrum vix tria millia equitum persecuta sunt. At in eos, qui lentius sequebantur, incidebant universa fugientium agmina. Vix credibile dictu, plures captivi, quam qui

caperent, erant: adeo omnem sensum territis fortuna penitus excusserat, ut nec hostium paucitatem, nec multitudinem suam satis cernerent. Interim iumenta, quae Darium vehabant, nullo regente decesserant militari via, et errore delata per IV stadia, in quadam valle constiterant, aestu, simulque vulneribus fatigata. Haud procul erat fons, ad quem monstratum et peritis Polystratus Macedo siti maceratus accessit; ac dum galea haustam aquam sorbet, tela iumentorum deficientium corporibus infixæ conspexit. Miratusque confossa potius, quam abacta esse, semivivi \*\*\*

*(Veteres scripti cusique hic deficiunt. Quae in recentioribus attextuntur, ut a genuinis dignosci possint, minori typo subiicimus.)*

\*\*\* hominis corpus, cum propius accessisset, in sordido vehiculo pellibus contacto situm reperit: atque Darium, multis quidem vulneribus confossum, adhuc tamen spirantem, esse cognovit. Qui applicito captivo, cum civem ex voce cognovisset, id saltem praesentis fortunae solatium se habere dixit, quod apud intellecturum locuturus esset, nec incassum postremas voces emissurus. Haecque Alexandro perferri iubet: Se nullis in eum meritorum officiis, maximorum autem illi debitorem mori. Agere tamen ei maximas gratias pro beneficiis in matrem, coniugem, liberosque suos impensis: iis enim vitam, et pristini status reverentiam dignitatemque concessam: sibi autem a cognatis atque amicis, quibus et regna et vitam dederit, illa omnia erepta esse. Precari se, ut illi victori terrarum omnium imperium contingat. Ultionem sceleris erga se perpetrati, non solum sua, sed exempli, omniumque regum causa, non negligere, illi cum decorum, tum utile futurum. Iamque deficiens aquam poposcit: quam allatam postquam bibit, Polystrato.

qui eam tulerat, *Quisquis es mortalium*, inquit, *hoc mihi extremum universae calamitatis genus accidit, ut pro tanto in me beneficio dignas tibi grates referre nequeam: at referat Alexander; Alexandro vero Diis, pro eius summa in meos humanitate ac clementia. Cui hoc fidei regiae unicum dextrae pignus pro me dabis.* Haec dicentem, accepta Polystrati manu, vita destituit. Quibus Alexandro nuntiatis, ad corpus demortui perveniens, tam indignam illo fastigio mortem lacrimis prosequutus est. Demtaque sibi chlamyde, corpus illius contexit: atque regio ornatum cultu, ad matrem Sysigambim, patrio regioque more sepeliendum, atque regis maiorum suorum tumulis inferendum, misit.

#### IO. FREINSHEMII ARGUMENTVM ALIVD.

*Miratusque confossa potius quam abacta esse, semivivi hominis gemitum percipit. Itaque more ingenii humani cupidus visendi quid rei vehiculo isto conderetur, dimotis pellibus, quibus obiectum erat, Darii multos vulneribus confossum reperit. Regius enim cultus, et aureae catenae, quis a parricidis vinctus fuerat, dubitationem eximebant. Non erat expers Graeci sermonis Darius; gratiasque agebat Diis, qui post tanta mala, tamque gravia hoc tamen indulsissent solatii, ne omnino in solitudine extremum spiritum effunderet. Itaque te, inquit, quisquis es mortalium, per communem hominum sortem, a qua nec maximos regum exemptos esse praesenti spectaculo moneris, rogo quaesoque, ut haec ad Alexandrum mandata mea perferas: nihil eorum, quae longe tristissima perpeesus sum, ne hunc quidem incomparabilis calamitatis exitum, ita gravem mihi accidisse, ut hoc unum, quod post tanta in me meosque merita adversus clementissimi*

*num victorem inimico vivendum fuit, et nunc ingrato moriendum est. Sed si qua postremis miserorum votis apud Deos vis est, et cum ipso spiritu profusas preces mitius aliquod numen exaudit; ille, quidem sospes et incolumis, longeque supra contagium meae sortis et invidiam fortunae positus, in solio Cyri gloriosam aetatem exigit: suaeque virtutis memor, eum matri liberisque meis locum apud se esse patiat, quem illi fide et obsequio meruerint. At parricidas promptum exitium consequatur, quod Alexander irrogabit, si non misericordia infelicis hostis, saltem odio facinorum, et ne impunita in aliorum etiam regum suumque ipsius exitium erumpant. Post haec, cum siti angetur, allata per Polystratum aqua recreatus, Ergo, ait, hanc etiam tantis calamitatibus extremam accedere oportuit, ut bene merito gratiam referre non possim: at referet Alexander; Alexandro vero Dii. Dextram deinde protendit, eamque Alexandro, fidei regiae pignus, ferri iubens, apprehensa Polystrati manu animam efflavit. Alexander an spiranti adhuc supervenerit, incertum est: illud constat, miserabili regis opulentissimi exitu comperto, copiosas lacrimas profudisse, statimque chlamyde sibi detracta corpus operuisse, et magno cum honore ad suos deferri iussisse, ut regio Persarum more curatum monumentis maiorum inferretur. Ingratitudinem hominum, a quibus pro summis beneficiis crudele exitium Darius pertulit, quamquam suo apte ingenio horrendam et execrabilem, insigniore ad posteritatem infamia damnavit canis cuiusdam mira fides, qui ab omnibus familiaribus derelicto solus adfuit, et quam in vivum prae se tulit benevolentiam, morienti quoque constanter praestitit. Hunc vitae finem sortitus est ille, quem modo contumelia affici putabant, nisi regem regum, et Deorum consanguineum salu-*

tarent: magnoque iterum experimento approbatum est, neminem magis patere fortunae, quam qui pluribus eiusdem blanditiis irretitus, iugum illius tota ceruice receperit.

---

I. FREINSHEMII  
S V P P L E M E N T V M

I N

Q. CVRTII

LIB. VI A PRINCIPIO.

---

**D**um ea per Asiam geruntur, ne in Graecia quidem Macedoniaque tranquillae res fuere. Régnabat apud Lacedaemonios Agis Archidami filius, qui Tarentinis opem ferens ceciderat, eodem die quo Philippus Athenienses ad Chaeroneam vicit. Is Alexandri per virtutem aemulus, cives suos stimulabat, *ne Graeciam servitute Macedonum diutius premi paterentur: nisi in tempore providerent, idem iugum ad ipsos transiturum esse. Adnitendum igitur, dum aliquae adhuc Persis ad resistendum vires essent: illis oppressis, adversus immanem potentiam frustra vitae libertatis memores futuros.* Sic instinctis animis, occasionem belli ex commodo coeptandi circumspiciebant. Igitur felicitate Memnonis invitati,

consilia cum ipso miscere aggressi sunt; et postquam ille rerum laetarum initia intempestiva morte destituit, nihilo remissius agebant. Sed ad Pharnabazum et Autophradaten profectus Agis, triginta argenti talenta, decemque triremes impetravit, quas Agesilao fratri misit, ut in Cretam navigaret, cuius insulae cultores inter Lacedaemonios et Macedonas diversis studiis distrahebantur. Legati quoque ad Darium missi sunt, qui in usum belli amplio rem viam pecuniae, pluresque naves peterent. Atque haec eorum coepta clades ad Issum (nam ea intervenerat) adeo non interpellavit, ut etiam adiuverit. Quippe fugientem insecutus Alexander in longinqua loca magis magisque rapiebatur; et ex ipso proelio mercenariorum ingens multitudo in Graeciam fuga penetraverat: quorum octo millia Persica pecunia conduxit Agis, eorumque opera plerasque Cretensium urbes recepit. Cum deinceps Menon, in Thraciam ab Alexandro missus, barbaros ad defectionem impulisset, adque eam comprimendam Antipater exercitum ex Macedonia in Thraciam duxisset, opportunitate temporis strenue usi Lacedaemonii totam Peloponnesum, paucis urbibus exceptis, in partes traxerunt, confectoque exercitu viginti millium peditum, cum equitibus bis mille, Agidi summam imperii detulerunt. Antipater ea re comperita bellum in Thracia, quibus potest conditionibus, componit; raptimque in Graeciam regressus, ab amicis sociisque civitatibus auxilia cogit. Quibus convenientibus, ad quadraginta pugnatorum millia recensuit. Advenerat et ex Peloponneso valida manus: sed quia dubiam ipsorum fidem resciverat, dissimulata suspitione gratias egit, *quod ad defendendam adversus Lacedaemonios Alexandri dignitatem adfuissent: scripturum se id regi, gratiam in tempore relaturum. In praesens nihil opus esse maiortibus copiis: itaque domos redirent, foederis neces-*

*sitate expleta.* Nuntios deinde ad Alexandrùm mittit, de motu Graeciae certiores facturos. Atque illi regem apud Bactra demum consecuti sunt; cum interim Antipatri victoria, et nece Agidis, in Arcadia transactum esset. Sane iam pridem tumultu Lacedaemoniorum cognito quantum tot terrarum spatiis discretus potuit, providerat: *Amphoterum cum Cypriis et Phoeniciis navibus in Peloponnesum navigare, Meneten tria millia talentum ad mare deferre iusserat, ut ex propinquo pecuniam Antipatro subministraret, quanta illum indigere cognovisset.* Probe enim perspexerat, quanti ad omnia momenti motus istius inclinatio futura esset, quamquam deinceps adepto victoriae nuntio suis operibus id discrimen comparans, *mirium eam pugnam fuisse cavillatus est.* Ceterum principia eius belli haud improspera Lacedaemoniis fuere. Iuxta Corrhagum Macedoniae castellum cum Antipatri militibus congressi victores exstiterant: et rei bene gestae fama etiam qui suspensis mentibus fortunam spectaverant, in societatem eorum pertracti sunt. Una ex Elaeis Achaisque urbibus Pellene foedus aspernabatur; et in Arcadia Megalopolis, fida Macedonibus ob Philippi memoriam, a quo beneficiis affecta fuerat. Sed haec arcte circumsessa haud procul deditione aberat, nisi tandem Antipater subvenisset. Is postquam castra castris contulit, seque numero militum alioque apparatu superiorem conspexit, quamprimum de summa rerum proelio contendere statuit: neque Lacedaemonii detrectavere certamen. Ita commissa est pugna, quae rem Spartanam maiorem in modum afflixit. Cum enim angustiis Iocorum, in quibus pugnabatur, confisi, ubi hosti nullum multitudinis usum futurum credebant, animose congressi essent, neque Macedones impigre resisterent, multum sanguinis fusum est. Sed postquam Antipater integram subinde manum labo-

rantibus suis subsidio mittebat; impulsæ Lacedæmoniorum acies gradum paullisper retulit. Quod conspicatus Agis, cum cohorte regia quæ ex fortissimis constabat, se in medium pugnae discrimen immisit, etc.

---

## Q. CVRTII RVFI

DE

REBUS GESTIS

ALEXANDRI MAGNI

HISTORIARVM

LIBER VI.

---

ARGVMENTVM.

*Proelii inter Lacedæmonios atque Macedones descriptio, et pax ab Alexandro victore Graecis, qui eo absente defecerant, concessa, 1. Alexander, bello invictus, otio et deliciis frangitur: unde rumor in castris, qui torpentem excitat, 2. Hortatoria Alexandri ad milites oratio, ut bellum in Asia inchoatum persequantur et absolvant, 3. Zioberis miri fluminis descriptio. Alexander Nabarzani, per literas salutem quaerenti, veniam pollicetur. Deinde mari Caspio et Hyrcaniae proxi-*



*mus, quosdam Darii praefectos recipit in gratiam, 4. Artabazo summa cum amini benevolentia excepto, Graecis qui Darium adiuverant parcat Alexander, et Mardorum gente debellata, Amazonicae cuiusdam reginae petitioni satisfacit, 5. Macedones Alexandri offenduntur moribus: qui ut seditionem averteret, ad bellum Besso inferendum mentem convertit, quod et stratagemate inchoat: ac Satibarzanem, quod defecisset, primum persequitur; barbaros a montibus fortiter dispellit; Artacacnam expugnat, 6. Coniurationem in Alexandrum Dymnus Nicomacho, hic per Zeballinum fratrem Alexandro detegit. Hinc mors Dymni, qui ipse sibi manus infert, 7. Amicorum regiorum consilio Philotas Parmenionis filius, coniurationis auctor et particeps creditus, capitur, ac velato capite in regiam abducitur, 8. De coniuratione, adversus Philotam expostulatoria Alexandri ad milites oratio: coram quibus Philotas adductus, defensionem parat, 9. Apologetica Philotae oratio, qua coniurationis accusationem prolixè refellit, 10. Cōncio, quodam Belone accensa, in Philotam surgit. Is paulo post, ut se cruciatibus liberaret, fictae coniurationis circumstantias aperit, cumque aliis, qui accusantur, saxis a Nicomacho obruitur, 11.*

## C A P V T L

**P**ugnae discrimen immisit, obtruncatisque, qui promptius resistebant, magnam partem hostium propulit. Coeperant fugere victores: et donec avidius sequentes in planum deduxere, multi cadebant; sed ut primum locus, in quo stare posset, fuit, aequis viribus dimicatum est. Inter omnes tamen Lacedaemonios rex aeniuebat, non armorum modo et corporis specie, sed

etiam magnitudine animi, quo uno vinci non potuit. Utdique nunc cominus, nunc eminus petebatur; diuque arma circumferens, alia tela clypeo excipiebat, corpore alia vitabat: donec hasta femora perfossa plurimo sanguine effuso destituere pugnantem. Ergo clypeo suo exceptum armigeri raptim in castra referebant, iactationem vulnerum haud facile tolerantem. Non tamen omisere Lacedaemonii pugnam; et ut primum sibi quam hosti aequiorem locum capere potuerunt, densatis ordinibus effuse fluentem in se aciem exceperunt. Non aliud discrimen vehementius fuisse memoriae proditum est. Duarum nobilissimarum bello gentium exercitus pari Marte pugnabant. Lacedaemonii vetera, Macedones praesentia decora intuebantur: illi pro libertate, hi pro dominatione pugnabant. Lacedaemoniis dux, Macedonibus locus deerat. Diei quoque unius tam multiplex casus modo spem, modo metum utriusque partis augebat; velut de industria inter fortissimos viros certamen aequante fortuna. Ceterum angustiae loci, in quo haeserat pugna, non patiebatur totis congrredi viribus. Spectabant ergo plures, quam interant proelium, et qui extra teli iactum erant, clamore invicem suos accendebant. Tandem Laconum acies langrescere, lubrica arma sudore vix sustinens; pedem deinde referre coepit urgente hoste, ac apertius fugere. Insequabatur dissipatos victor, et emensus cursu omne spatium, quod acies Laconum obtinuerat, ipsum Agim persequabatur. Ille, ut fugam suorum, et proximos hostium conspexit, *deponi se* iussit: expertusque membra an impetum animi sequi possent, postquam deficere se sensit, poplitibus semet excepit; galeaque strenue sumta, clypeo protegens corpus, hastam dextra vibrabat, ultro vocans hostem, *si quis iacenti spoliu demere auderet*. Nec quisquam fuit, qui sustineret cominus congrredi. Procul missilibus appetebatur, ea

ipsa in hostem retorquens; donec lancea nudo pectori infixi est: qua ex vulnere evulsa, inclinatum ac deficiens caput clypeo paulisper excepit; deinde linqnente spiritu pariter ac sanguine, moribundus in arma procubuit. Cecidere Lacedaemoniorum v millia, et ccclx: ex Macedonibus haud amplius ccc: ceterum vix quisquam nisi saucius revertit in castra. Haec victoria non Spartam modo, sociosque eius, sed etiam omnes, qui fortunam belli spectaverant, fregit. Nec fallebat Antipatrum, dissentire ab animis gratulantium vultus; sed bellum finire cupienti opus erat decipi. Et quamquam fortuna rerum placebat; invidiam tamen, quia maiores res erant, quam quas praefecti modus caperet, metuebat. Quippe Alexander hostes vinci voluerat; Antipatrum vicisse, ne tacitus quidem indignabatur; suae demtum gloriae existimans, quidquid cessisset alienae. Itaque Antipater, qui probe nosset spiritum eius, non est ausus ipse agere arbitria victoriae; sed consilium Graecorum, *quid fieri placeret*, consuluit. A quo Lacedaemonii, *nihil aliud quam ut oratores mittere ad regem liceret* precati, veniam defectionis praeter auctores imptaverunt. Megalopolitani, quorum urbs erat obsessa a defectione, Achaeis et Aetolis cxx talenta dare iussi sunt. Hic fuit exitus belli, quod repente ortum, prius tamen finitum est, quam Darium Alexander apud Arbela superaret.

CAP. II. Sed ut primum instantibus curis laxatus est, animus militarium rerum quam quietis otii-que patientior; exceperunt eum voluptates: et quem arma Persarum non frugerant, vitia vicerunt. Intempestiva convivia, et perpotandi pervigilandique insana dulcedo, ludique, et greges pellicum, omnia in exteruum lapsa sunt morem. Quem aemulatus quasi potiore suo, ita popularium animos oculosque pariter offendit, ut a plerisque amicorum pro hoste haberetur.

Tenaces quippe disciplinae suae, solitosque parco ac parabili victu ad implenda naturae desideria defungi, in peregrina et devictarum gentium mala impulerat. Hinc saepius comparatae in caput eius insidiae: secessio militum, et liberior inter mutuas querelas dolor: ipsius deinde nunc ira, nunc suspiciones, quas excitabat inconsultus pavor: ceteraque his similia, quae deinde dicentur. Igitur cum intempestivis conviviiis dies pariter noctesque consumeret; satietatem epularum ludis interpolabat: non contentus artificum, quos e Graecia excitaverat, turba; quippe captivae feminarum iubebantur *suo ritu canere*, inconditum et abhorrens peregrinis auribus carmen. Inter quas unam rex ipse conspexit moestiorē quam ceteras et producentibus eam verecunde reluctantem. Excellens erat forma, et formam pudor honestabat: deiectis in terram oculis, et, quantum licebat, ore velato, suspitionem praebuit regi, nobiliorem esse, quam ut inter convivales Indos deberet ostendi. Ergo interrogata, *quaenam esset? Neptem se Ochi, qui nuper regnasset in Persis, filio eius genitam esse*, respondit: *uxorem Hystaspis fuisse*. Propinquus hic Darii fuerat, magni et ipse exercitus praetor. Adhuc in animo regis tenues reliquiae pristini moris haerebant. Itaue fortunam regia stirpe genitae, et tam celebre nomen reveritus, *non dimitti modo captivam, sed etiam restitui ei suas opes iussit: virum quoque requiri, ut reperto coniugem redderet*. Postero autem die praecepit Hephaestioni, *ut omnes captivos in regiam iuberet adduci*. Ubi singulorum nobilitate spectata, secrevit a vulgo, quorum eminebat genus. Decem hi fuerunt: inter quos repertus est Oathres Darii frater, non illius fortuna, quam indole animi sui clarior. Sex et viginti millia talentū proxima praeda redacta erant: e quis duodecim millia in congiarium militum absumta sunt. Par hinc

pecuniae summa custodum fraude subtracta est. Oxartes erat nobilis Perses, qui a Dario capitali supplicio destinatus, cohibebatur in vinculis; huic liberato satrapeam Mediae attribuit: fratremque Darii recepit in cohortem amicorum, omni vetustae claritatis honore servato. Hinc in Parthienem perventum est, tunc ignobilem gentem; nunc caput omnium, qui post Euphratem et Tigrim amnes siti, rubro mari terminantur. Scythae regionem campestris ac fertilem occupaverunt; graves adhuc accolae. Sedes habent et in Europa, et in Asia: qui super Bosphorum colunt, adscribuntur Asiae; at qui in Europa sunt, a laevo Thraciae latere ad Borysthenem, atque inde ad Tanaim alium amnem, recta plaga attingunt. Tanais Europam et Asiam medius interfuit. Nec dubitatur, quin Scythae, qui Parthos condidere, non a Bosphoro, sed ex regione Europae penetraverint. Urbs erat ea tempestate clara Hecatompylos, condita a Graecis: ibi stativa rex habuit, commeatibus undique advectis. Itaque rumor, otiosi militis vitium, sine auctore percrebuit, *regem contentum rebus, quas gessisset, in Macedoniam protinus redire statuisse.* Discurrunt lymphatis similes in tabernacula, et itineri sarcinas aptant: signum datum credentes, ut vasa colligerent. Totis castris tumultus hinc contubernales suos requirentium, hinc onerantium plaustra, perfertur ad regem. Fecerant fidem rumori temere vulgato Graeci milites, *redire iussi domos, quorum equitibus singulis denariorum sena millia dono dederat.* Ipeis quoque finem militiae adesse credebant. Haud secus quam par erat territus Alexander, qui Indos atque ultima Orientis peragrarare statuisset, praefectos copiarum in praetorium contrahit: obortisque lacrimis, *ex medio gloriae spatio revocari se, victi magis, quam victoris, fortunam in patriam relaturum conquestus est; nec sibi ignaviam militum obstare, sed Deo-*

*rum invidiam, qui fortissimis viris subitum patriae desiderium admovissent, paulo post in eandem cum maiore laude famaue redituris. Tum vero pro se quisque operam suam offerre; difficillima quaeque poscere; polliceri militum quoque obsequium, si animos eorum leni et apta oratione permulcere voluisset. Nunquam infractos et abiectos recessisse, quoties ipsius alacritatem et tanti animi spiritus haurire potuissent. Ita se facturum esse respondit: illi vulgi aures praeparent sibi. Satisque omnibus, quae in rem videbantur esse, compositis, vocari ad concionem exercitum iussit, apud quem talem orationem habuit.*

CAP. III. *Magnitudinem rerum, quas gessimus, milites, intuentibus vobis, minime mirum est, et desiderium quietis, et satietatem gloriae occurrere. Ut omittam Illyrios, Triballos, Boeotiam, Thraciam, Spartam, Achaeos, Peloponnesum, quorum alia ductu meo, alia imperio auspicioque perdomui; ecce orsi bellum ad Hellespontum, Ionas, Aeolide servitio barbariae impotentis eximimus; Cariam, Lydiam, Cappadociam, Phrygiam, Paphlagoniam, Pamphiliam, Pisidas, Ciliciam, Syriam, Phoenicem, Armeniam, Persidem, Medos, Parthienem habemus in potestate: plures provincias complexus sum, quam alii urbes ceperunt: et nescio, an enumeranti mihi, quaedam ipsarum rerum multitudo subduxerit. Itaque si crederem, satis certam esse possessionem terrarum, quas tanta velocitate domuimus; ego vero, milites, ad penatos meos, ad parentem sororesque, et ceteros cives, vel renitentibus vobis erumperem, ut ibi potissimum parta vobiscum laude et gloria fruerer, ubi nos uberrima victoriae praemia expectant: liberorum, coniugum, parentumque laetitia, pax, quies, rerum per virtutem partarum se-*

*cura possessio. Sed in novo, et (si verum fateri volumus) precario imperio, adhuc iugum eius rigida cervice subeuntibus barbaris, tempore, milites, opus est, dum mitioribus ingeniis imbuantur, et efferatos mollior consuetudo permulceat. Fruges quoque maturitatem statuto tempore expectant: adeo etiam illa sensus omnis expertia, tamen sua lege mitescunt. Quid? creditis tot gentes alterius imperio ac nomine adsuetas, non sacris, non moribus, non commercio linguae nobiscum cohaerentes, eodem proelio domitas esse, quo victae sunt? Vestris armis continentur, non suis moribus; et qui praesentes metuunt, in absentia hostes erunt. Cum feris bestiis res est, quas captas et inclusas, quia ipsarum natura non potest, longior dies mitigat. Et adhuc sic ago tanquam omnia subacta sint armis, quae fuerunt in ditione Darii. Hyrcaniam Nabarzanes occupavit: Bactra non possidet solum parricida Bessus, sed etiam minatur: Sogdiani, Dahae, Massagetae, Sacae, Indi sui iuris sunt. Omnes hi, simul terga nostra viderint, sequentur. Illi enim eiusdem nationis sunt; nos alienigenae et externi. Suis autem quae parent placidius; etiam cum is praees, qui magis timeri potest. Proinde, aut quae cepimus, omittenda sunt; aut quae non habemus, occupanda. Sicut in corporibus aegris, milites, nihil quod nociturum est, medici relinquunt; sic nos, quidquid obstat imperio, recidamus. Parva saepe scintilla contemta magnum excitavit incendium. Nihil tuto in hoste despicitur: quem spreveris, valentior neglignetia facies. Ne Darius quidem hereditarium Persarum accepit imperium; sed in sedem Cyri, beneficio Bagoae castrati hominis, admissus, ne vos magno labore credatis Bessum vacuum regnum occupaturum. Nos vero peccavi-*

mus, milites, si Darium ob hoc vicimus, ut servo eius traderemus imperium: qui ultimum ausus scelus, regem suum, etiam externae opis agentem, certe, cui nos victores pepercissemus, quasi captivum in vinculis habuit; ad ultimum, ne a nobis conservari posset, occidit. Hunc vos regnare patiemini? quem equidem cruci affixum videre festino, omnibus regibus gentibusque fidei, quam violavit, meritas poenas solventem. At hercule, si mox eundem Graecorum urbes aut Hellespontum vastare nuntiatum erit vobis; quo dolore afficiemini, Bessum praemia vestrae occupasse victoriae? Tunc ad repetendas res festinabitis; tunc arma capietis. Quanto autem praestat, territum adhuc et vix mentis suae compotem opprimere? Quatridui nobis iter superest, qui tot proculcavimus rivas, tot amnes superavimus, tot montium iuga transcurrimus. Non mare illud, quod exaestuans iter fluctibus occupat, euntes nos moratur; non Ciliciae fauces et angustiae includunt: plana omnia et prona sunt. In ipso limine victoriae stamus. Pauci nobis fugitivi et domini sui interfectores supersunt. Egregium mehercule opus, et inter prima gloriae vestrae numerandum posteritati famaeque tradetis; Darii quoque hostis, finito post mortem eius odio, parricidas esse vos ultos, neminem impium effugisse manus vestras. Hoc perpetrato, quanto creditis Persas obsequentiores fore, cum intellexerint vos pia bella suscipere, et Bessi scelere, non nomini suo, irasci?

CAP. IV. Summa militum alacritate, iubentium, quocunque vellet, duceret, oratio excepta est. Nec rex moratus impetum; tertioque per Parthienem die ad fines Hyrcaniae penetrat; Cratero relicto cum iis copiis, quibus praeerat, et ea manu, quam Amyntas ducebat, additis sexcentis equitibus, et totidem sagit



tariis, ut ab incursione barbarorum Parthienem tueretur. Erigyium *impedimenta*, modico praesidio dato, *campestri itinere ducere* iubet. Ipse cum phalange et equitatu CL stadia emensus, castra in valle, qua Hyrcaniam adennt, communit. Nemus praealtis densisque arboribus umbrosum est, pingue vallis solum rignantibus aquis, quae ex petris imminentibus manant. Ex ipsis radicibus montium Zioberis amnis effunditur, qui tria fere stadia in longitudinem uniuersus fluit; deinde saxo, quod alveolum interpellat, repercussus, duo itinera velut dispensatis aquis aperit. Inde torrens, et saxorum, per quae incurrit, asperitate violentior, terram praeceps subit. Per CCC stadia conditus labitur: rursusque velut ex alio fonte conceptus editur, et novum alveum intendit, priore sui parte spatiosior. Quippe in latitudinem XIII stadiorum diffunditur: rursusque angustioribus coercitus ripis iter cogit; tandem in alterum amnem cadit, cui *Rhidago* nomen est. Incolae affirmabant, *quaecumque dimissa essent in cavernam, quae propior est fonti, rursus ubi aliud os amnis aperit, existere*. Itaque Alexander *duos tauros, qua subeunt aquae terram, praecipitari* iubet, quorum corpora, ubi rursus erumpit, expulsa videre, qui missi erant, ut exciperent. Quartum iam diem eodem loco quietem militi dederat; cum literas Nabarzanis, qui Darium cum Besso interceperat, accipit, quarum sententia haec erat: *Se Dario non fuisse inimicum; immo etiam quae credidisset utilia esse suasisse: et quia fidele consilium regi dedisset, prope occisum ab eo. Agitasse Darium, custodiam corporis sui, contra ius fasque, peregrino militi tradere, damnata popularium fide, quam per ducentos et triginta annos inuiolatam regibus suis praestitissent. Se in praecipiti et lubrico stantem consilium a praesenti necessitate repetisse. Darum quoque, cum occidisset Bagoan, hac*

*excusatione satisfacisse popularibus, quod insidiantem sibi interemisset. Nihil esse miseris mortalibus spiritu carius. Amore eius ad ultima esse propulsum. Sed ea magis esse secutum, quae coegisset necessitas, quam quae optasset. In communi calamitate suam quemque habere fortunam. Si venire se iuberet, sine metu esse venturum. Non timere, ne fidem datam tantus rex violaret: Deos a Deo falli non solere. Ceterum si, cui fidem daret, videretur indignus, multa exsilia patere fugienti: patriam esse, ubicunque vir fortis sedem elegerit. Nec dubitavit Alexander, fidem, quo Persae modo accipiebant, dare, Inviolatum, si venisset, fore. Quadrato tamen agmine et composito ibat, speculatores subinde praemittens, qui explorarent loca. Levis armatura ducebat agmen: phalanx eam sequebatur: post pedites erant impedimenta. Et gens bellicosa, et natura situs difficilis aditu, curam regis intenderat. Namque perpetua vallis iacet, usque ad mare Caspium patens. Duo terrae eius velut brachia excurrunt: media flexu modico sinum faciunt, lunae maxime similem, cum eminent cornua, nondum totum orbem sidere implente. Cercetae, Mosyni, et Chalybes a laeva sunt: ab altera parte Leucosyri, et Amazonum campi; et illos qua vergit ad Septemtrionem, hos ad occasum conversa prospectat. Mare Caspium, dulcius ceteris, ingentis magnitudinis serpentes alit: pisces longe diversi ab aliis coloris. Quidam Caspium, quidam Hyrcanum appellant: alii sunt, qui Maeotim paludem in id cadere putent: et argumentum afferunt, aquam, quo dulcior sit quam cetera maria, infuso paludis humore mitescere. A Septemtrione ingeus in litus mare incumbit, longeque agit fluctus, et magna parte exaestuans stagnat. Idem alio coeli statu, recipit in se fretum, eodemque impetu, quo effusum est, relabens, terram*

naturae suae reddit. Et quidam credidere, non Caspium mare esse; sed ex India in Hyrcaniam cadere, cuius fastigium, ut supra dictum est, perpetua valle submittitur. Hinc rex **xx** stadia processit semita propemodum in via, cui silva imminebat, torrentesque et eluvies iter morabantur. Nullo tamen hoste obvio, penetravit; tandemque ad ulteriora perventum est. Praeter alios commeatus, quorum tum copia regio abundabat, pomorum quoque ingens modus nascitur, et uberrimum gignendis uvis solum est. Frequens arbor faciem quercus habet, cuius folia multo melle tinguntur: sed nisi solis ortum incolae occupaverint, vel modico tepore succus exstinguitur. **xxx** hinc stadia processerat, cum Phrataphernes ei occurrit, seque et eos, qui post Darii mortem profugerant, dedens: quibus benigne exceptis, ad oppidum Arvas pervenit. Hic ei Craterus et Erigyius occurrunt. Praefectum Tapurorum gentis Phradatem adduxerant. Hic quoque in fidem receptus, multis exemplo fuit experiendi clementiam regis. Satrapem deinde Hyrcaniae dedit Menapim: exsul hic regnante Ocho ad Philippum pervenerat. Tapurorum quoque gentem Phradati reddidit.

CAP. V. Iamque rex ultima Hyrcaniae intraverat, cum Artabazus (quem Dario fidissimum fuisse supra diximus) cum propinquis Darii ac suis liberis modicaque Graecorum militum manu occurrit. Dextram venienti obtulit rex: quippe et hospes Philippi fuerat, cum Ocho regnante exsularet; et hospitii pignora in regem suum ad ultimum fides conservata vincebat. Comiter igitur exceptus, *Tu quidem, inquit, rex, perpetua felicitate floreas. Ego ceteris laetus, hoc uno torqueor, quod praecipiti senectute, diu frui tua bonitate non possum.* Nonagesimum et quintum annum agebat. Novem iuvenes, eadem matre geniti, patrem comitabantur: hos Artaba-

zus dextrae regis admovit, precatus ut tam diu viverent, donec utiles Alexandro essent. Rex pedibus iter plerumque faciebat: tunc admoveri sibi et Artabazo equos inssit; ne ipso ingrediente pedibus, senex equo vehi erubesceret. Deinde ut castra sunt posita, Graecos, quos Artabazus adduxerat, convocari iubet: at illi, nisi Lacedaemoniis fides daretur, respondent, se, quid agendum ipsis foret, deliberaturos. Legati erant Lacedaemoniorum missi ad Darium, quo victo applicaverant se Graecis mercede apud Persas militantibus. Rex, omissis sponsionum fideique pignoribus, venire eos iussit, fortunam quam ipse dedisset habituros. Diu cunctantes, plerisque consilia variantibus, tandem venturos se pollicentur. At Democrates Atheniensis, qui maxime Macedonum opibus semper obstiterat, venia desperata, gladio se transfigit. Ceteri, sicut constituerant, ditioni Alexandri se ipsos permittunt. Mille et D milites erant: praeter hos legati ad Darium missi XC. In supplementum distributus miles; ceteri remissi donum, praeter Lacedaemonios, quos tradi in custodiam iussit. Mardorum erat gens confinis Hyrcaniae, cultu vitae aspera, et latrociniis adsueta. Haec sola nec legatos miserat, nec videbatur imperata factura. Itaque rex indignatus, si una gens posset efficere, ne invictus esset, impedimentis cum praesidio relictis, invicta manu comitante procedit. Noctu iter fecerat, et prima luce hostis in conspectu erat: tumultus magis quam proelium fuit. Deturbati ex collibus, quos occupaverant, barbari profugiunt: proximique vici ab incolis deserti capiuntur. Interiora regionis eius haud sane adire sine magna vexatione exercitus poterat. Iuga montium praealtae silvae rupesque inviae sepiunt: ea, quae plana sunt, novo munimenti genere impedierant barbari. Arbores densae sunt ex industria consitae, quarum teneros adhuc ramos manu flectunt, quos in-

tortos rursus inserunt terrae: inde velut ex alia radice lactiores virent trunci. Hos, qua natura fert, adolescere non sinunt: quippe alium alii quasi nexu conserunt; qui ubi multa fronde vestiti sunt, operiunt terram. Itaque occulti nexu ramorum velut laquei perpetua sepe iter cludunt. Una ratio erat, caedendo aperire saltum: sed hoc quoque magni operis. Crebri namque nodi duraverant stipites, et in se implicati arborum rami suspensis circulis similes, lento vimine frustrabantur ictus. Incolae autem, ritu ferarum virgulta subire soliti, tum quoque intraverant saltum, occultisque telis hostem lacescebant. Ille venantium modo latibula scrutatus, plerosque confodit: ad ultimum *circumire saltum milites iubet, ut si qua pateret, irrumperent.* Sed ignotis locis plerique oberabant. Excepti sunt quidam; inter quos equus regis, *Bucephalam* vocabant: quem Alexander non eodem quo ceteras pecudes animo aestimabat. Nam ille nec in dorso insidere suo patiebatur alium; et regem, cum vellet ascendere, sponte sua genua submittens excipiebat, credebaturque sentire quem veheret. Maiore ergo, quam decebat, ira simul ac dolore stimulatus, *equum vestigari iubet, et per interpretem pronuntiare, ni reddidissent, neminem esse victurum.* Hac denuntiatione territi, cum ceteris donis equum adducunt. Sed ne sic quidem mitigatus, *caedi silvas iubet, adgestaque humo e montibus planitiem ramis impeditam exaggerari.* Iam aliquantulum altitudinis opus creverat, cum barbari, desperato regionem, quam occupaverant, posse retineri, gentem suam dedidere. Rex, obsidibus acceptis *Phradati tradere eos iussit.* Inde quinto die in stativa revertitur. Artabazum deinde, geminato honore, quem Darius habuerat ei, remittit domum. Iam ad urbem Hyrcaniae, in qua regia Darii fuit, ventum erat. Ibi Nabarzanes accepta fide occurrit, dona ingentia fereps, *Lutes*

quae Bagoas erat, specie singulari spado, atque in ipso  
 flore pueritiae; cui et Darius fuerat adsuetus, et mox  
 Alexander adsuevit: eiusque maxime precibus motus  
 Nabarzani ignovit. Erat, ut supra dictum est, Hyrcaniae  
 finitima gens Amazonum, circa Thermodoonta  
 amnem Themiscyrae incolentium campos. Reginam  
 habebant Thalestrim, omnibus inter Caucasum mon-  
 tem et Phasim amnem imperitantem. Haec cupidine  
 visendi regis accensa finibus regni sui excessit; et cum  
 haud procul abesset, praemisit indicantes, *venisse  
 reginam adeundi eius cognoscendique avidam.*  
 Protinus facta potestate veniendi, ceteris iussis subsi-  
 stere, cum feminarum comitata processit. Atque ut  
 primum rex in conspectu fuit, equo ipsa desiliit duas  
 lanceas dextra praefereans. Vestis non toto Amazonum  
 corpore obducitur: nam laeva pars ad pectus est  
 nuda, cetera deinde velantur. Nec tamen sinus vestis,  
 quem nodo colligunt, infra genua descendit. Altera  
 papilla intacta servatur, qua muliebris sexus  
 liberos alant; aduritur dextra, ut arcus facilius inten-  
 dant, et tela vibrent. Interrito vultu regem Thalestris  
 intuebatur, habitum eius haudquaquam rerum famae  
 parem oculis perlustrans. Quippe hominibus barbaris  
 in corporum maiestate veneratio est; magnorumque  
 operum non alios capaces putant, quam quos eximia  
 specie donare natura dignata est. Ceterum interrogata,  
*num aliquid petere vellet;* haud dubitavit fateri,  
*ad communicandos cum rege liberos se venisse:*  
*dignam, ex qua ipse regni generaret heredes.*  
*Feminini sexus se retenturam; marem reddituram patri.*  
 Alexander, *an cum ipso militare vellet?*  
 interrogat: et illa, causata sine custode regnum  
 reliquisse, petere perseverabat, *ne se irritam  
 spei pateretur abire.* Acrior ad Venerem feminae  
 cupido, quam regis, ut paucos dies subsisteret, per-  
 pulit. XIII dies in obsequium desiderii eius absumti

sunt. Tum illa regnum suum, rex Parthienem petiverunt.

CAP. VI. Hic vero palam cupiditates suas solvit; continentiamque et moderationem, in altissima quaque fortuna eminentia bona, in superbiam ac lasciviam vertit. Patrios mores disciplinamque Macedonum regum salubriter temperatam, et civilem habitum, velut leviora magnitudine sua ducens; Persicae regiae, par Deorum potentiae fastigium aemulabatur. Iacere humi venerabundos pati coepit; paullatimque servilibus ministeriis tot victores gentium imbuere, et captivis pares facere expetebat. Itaque purpureum diadema distinctum albo, quale Darius habuerat, capiti circumdedit, vestemque Persicam sumsit; ne omen quidem veritus, quod a victoris insignibus in devicti transiret habitum. Et ille se quidem Persarum spolia gestare dicebat; sed cum illis quoque mores induerat; superbiamque habitus animi insolentia sequebatur. Literas quoque, quas in Europam mitteret, veteris annuli gemma obsignabat: iis, quas in Asiam scriberet, Darii annulus imprimebatur; ut appareret, unum animum duorum non capere fortunam. Amicos vero et equites, cumque his principes militum, aspernantes quidem, sed recusare non ausos, Persicis ornaverant vestibus. Pellices CCC et LX, totidem quot Darii fuerant, regiam implebant; quas spadonum greges, et ipsi muliebria pati assueti, sequebantur. Haec luxu et peregrinis infecta moribus veteres Philippici milites, rudis natio ad voluptates, palam aversabantur; totisque castris unus omnium sensus ac sermo erat, *plus amissum victoria, quam bello quaesitum esse. Tum maxime vinci ipsos, dedique alienis moribus et externis: tantae morae pretium, domos quasi in captivo habitu reversuros. Pudere iam sui. Regem, victis quam victoribus similiorem, ex Macedoniae imperatore Darii Satrapen*

*factum.* Ille non ignarus, et principes amicorum, et exercitum graviter offendi, gratiam liberalitate donisque recuperare tentabat. Sed, opinor, liberis pretium servitutis ingratum est. Igitur ne in seditionem res verteretur, otium interpellandum erat bello; cuius materia opportune alebatur. Namque Bessus veste regia sumta, *Artaxerxen appellari se iusserat*; Scythasque et ceteros Tanais accolae contrahebat. Haec Satibarzanes nuntiabat: quem receptum in fidem regioni, quam antea obtinuerat, praefecit. Et cum grave spoliis apparatuque luxuriae agmen vix moveretur; *suas primum, deinde totius exercitus sarcinas, exceptis admodum necessariis, conferri iussit in medium.* Planities spatiosa erat, in quam vehicula onusta perduxerant. Expectantibus cunctis, quid deinde esset imperaturus; *umenta iussit abduci; suisque primum sarcinis face subdita, ceteras incendi* praecepit. Flagrabant exurentibus dominis, quae ut intacta ex urbibus hostium raperent, saepe flammam restinuerant; nullo sanguinis pretium audente desferre, cum regias opes idem ignis exureret. Brevis deinde oratio mitigavit dolorem; habilesque militiae, et ad omnia parati, laetabantur, *sarcinarum potius, quam disciplinae, fecisse iacturam.* Igitur Bactrianam regionem petebant. Sed Nicanor, Parmenionis filius, subita morte correptus, magno desiderio sui affecerat cunctos. Rex ante omnes moestus, cupiebat quidem subsistere funeri adfuturus; sed penuria commeatuum festinare cogebat. Itaque Philotas cum II millibus et DC relictus, ut iusta fratri persolveret: ipse contendit ad Bessum. Iter facienti literae ei afferuntur a finitimis Satraparum; e quibus cognoscit, *Bessum quidem hostili animo occurrere cum exercitu: ceterum Satibarzanem, quem Satrapem Ariorum ipse praefecisset, defecisse ab eo.* Itaque quamquam Besso imminebat, tamen ad Satibar-



zancm opprimendum praeverti optimum ratus, levem armaturam et equestres copias educit, totaque nocte strenue facto itinere, improvisus hosti supervenit. Cuius cognito adventu Satibarzanes cum II millibus equitum (nec enim plures subito contrahi poterant) Bactra perfugit, ceteri proximos montes occupaverunt. Praerupta rupes erat, qua spectat Occidentem: eadem qua vergit ad Orientem leniore submissa fastigio, multis arboribus obsita, perennem habet fontem, ex quo largae aquae manant. Circumitus eius xxx et II stadia comprehendit. In vertice herbidus campus. *In hoc multitudinem imbellem considerare iubent: ipsi, qua rupes erat, arborum truncos et saxa obmoluntur.* XIII millia armata erant. In horum obsidione Cratero relicto, ipse Satibarzanem sequi festinat. Et quia longius eum abesse cognoverat; ad expugnandos eos, qui edita montium occupaverant, redit. Ac primo *repurgari iubet, quidquid ingredi possent:* deinde, ut occurrebant inviae cotes praeruptaeque rupes, irritus labor videbatur obstante natura. Ille, ut erat animi semper obluctantis difficultatibus, cum et progredi arduum, et reverti periculosum esset, versabat se ad omnes cogitationes, aliud atque aliud, ita ut fieri solet ubi prima quaeque damnamus, subiiciente animo. Haesitanti, quod ratio non potuit, fortuna consilium subministravit. Vehemens Favonius erat, et multam materiam ceciderat milés, aditum per saxa molitus. Haec vapore torrida inaruerat. Ergo *adgeri alias arbores iubet, et igni dari alimenta:* celeriterque stipitibus cumulatis fastigium montis aequatum est. Tunc undique ignis iniectus cuncta comprehendit. Flammam in ora hostium ventus ferebat; fumus ingens velut quadam nube absconderat coelum. Sonabant incendio silvae; atque ea quoque, quae non incenderat miles, concepto igne proxima quaeque adurebant. Barbari suppliciorum ultimum, si qua

intermoreretur ignis, effugere tentabant; sed qua flamma dederat locum, hostis obstabat. Varia igitur caede consumti sunt. Alii in medios ignes, alii in petras praecipitavere se; quidam manibus hostium se obtulerunt: pauci semiustulati venere in potestatem. Hinc ad Craterum, qui Artacacna obsidebat, redit. Ille, omnibus praeparatis, regis exspectabat adventum, captae urbis titulo, sicut par erat, cedens. Igitur Alexander *turres admoveri* iubet: ipsoque ad spectu territi barbari, e muris supinas manus tendentes, orare coeperunt, *iram in Satibarzanem defectionis auctorem reservaret; supplicibus semet deditibus parceret*. Rex, data venia, non obsidionem modo solvit, sed omnia sua incolis reddidit. Ab hac urbe digresso supplementum novorum militum occurrit. Zoilus et equites ex Graecia adduxerat: III millia ex Illyrico Antipater miserat. Thessali equites C et XXX cum Philippo erant: ex Lydia II millia, et DC peregrinus miles advenerant: CCC equites gentis eiusdem sequebantur. Hac manu adiecta Drangas pervenit. Bellicosa natio est. Sâtrapes erat Barzaentes, sceleris in regem suum particeps Besso. Is suppliciorum, quae meruerat, metu profugit in Indiam.

CAP. VII. Iam nonnum diem stativa erant, cum externa vi non interritus modo rex, sed invictus, intestino facinore petebatur. Dymnus, modicae apud regem auctoritatis et gratiae, exoleti, cui *Nicomacho* erat nomen, amore flagrabat, obsequio uni sibi dediti corporis victus. Is, quod ex vultu quoque perspicere poterat, similis attonito, remotis arbitris cum iuvene secessit in templum, *arcana se et silenda afferre praefatus*: suspensumque expectatione *per mutam caritatem et pignora utriusque animi* rogat, *ut affirmet iureiurando; quae commisisset, silentio esse tecturum*. Et ille ratus, nihil, quod etiam cum periurio detegendum foret, indicaturum, *per pra-*

*sententes Deos iurat. Tum Dymnus aperit, in tertium diem insidias regi comparatas, eoque eius consilii fortibus viris et illustribus esse participem. Quibus iuvenis auditis, se vero fidem in parricidio dedisse constanter abnuit, nec ulla religione, ut scelus tegat, posse constringi. Dymnus, et amore et metu amens, dextram exoleti complexus, et lacrimans, orare primum, ut particeps consilii operisque fieret. Si id sustinere non posset; attamen ne proderet se, cuius erga ipsum benevolentiae praeter alia hoc quoque haberet fortissimum pignus, quod caput suum permisisset fidei adhuc inexpertae. Ad ultimum aversari scelus perseverantem metu mortis terret: ab illo capite coniuratos pulcherrimum facinus inchoaturos. Alias deinde effeminatum et muliebriter timidum, alias proditorem amatoris appellans, nunc ingentia promittens, interdumque regnum quoque, versabat animum tanto facinore procul abhorrentem. Strictum deinde gladium modo illius, modo suo admovens iugulo, supplex idem et infestus expressit tandem, ut non solum silentium, sed etiam operam polliceretur. Namque abuude constantis animi, et dignus, qui pudicus esset, nihil ex pristina voluntate mutaverat. Sed se captum Dymni amore simulabat nihil recusare. Sciscitari inde pergit, cum quibus tantae rei societatem inisset. Plurimum referre, quales viri tam memorabili operi admoturi manus essent. Ille, et amore et scelere male satus, simul gratias agit, simul gratulatur, quod fortissimus iuvenum non dubitasset se iungere Demetrio corporis custodi, Peucolao, Nicanori. Adiiicit his Aphoebetum, Loceum, Dioxenum, Archepolim, et Amyntam. Ab hoc sermone dimissus Nicomachus ad fratrem, Cebalino erat nomen, quae acceperat, desert. Placet, ipsum subsistere in tabernaculo; ne si regiam intrasset, non assuetus adire regem,*

*coniurati proditos se esse resciscerent.* Ipse Cebalinus ante vestibulum regiae, neque enim propius aditus ei patebat, consistit, operiens aliquem ex prima cohorte amicorum, quo introduceretur ad regem. Forte ceteris dimissis, unus Philotas Parmenionis filius, incertum quam ob causam, substiterat in regia. Huic Cebalinus, ore confuso magnae perturbationis notas prae se ferens, aperit, quae ex fratre compererat, *et sine cunctatione nuntiari regi* iubet. Philotas, laudato eo, protinus intrat ad Alexandrum; multoque invicem de aliis rebus consumpto sermone, nihil eorum, quae ex Cebalino cognoverat, nuntiat. Sub vesperam eum prodeuntem in vestibulo regiae excipit iuvenis, *an mandatum exsecutus foret* requirens. Ille, *non vacasse sermoni suo regem* causatus, discessit. Postero die Cebalinus venienti in regiam praesto est: intrantemque admonet *pridie communicatae cum ipso rei.* Ille *curae sibi esse* respondit: ac ne tum quidem regi, quae audierat, aperit. Coeperat, Cebalino esse suspectus. Itaque non ultra interpellandum ratus, nobili iuveni, *Metron* erat ei nomen, super armamentarium posito, *quod scelus pararetur*, indicat. Ille Cebalino in armamentario abscondito, protinus regi, corpus forte curanti, *quid ei index detulisset*, ostendit. Rex, ad comprehendendum Dymnum missis satellitibus, armamentarium intrat. Ibi Cebalinus gaudio elatus, *habeo te*, inquit, *incolumem ex impiorum manibus ereptum.* Percontatus deinde Alexander quae noscenda erant, ordine cuncta cognoscit. Rursusque institit quaerere, *quotus dies esset, ex quo Nicomachus ad eum detulisset indicium?* Atque illo fatente, *iam tertium esse*; existimans, laud incorrupta fide tanto post deferre quae audierat, *vinciri eum* iussit. Ille clamitare coepit, *eodem temporis momento, quo audisset, ad Philotam decurrisse: ab eo percontaretur.* Rex item quaerens, an

*Philotam adisset, an institisset ei, ut perveniret ad se?* perseverante eo affirmare quae dixerat; manus ad coelum tendens, manantibus lacrimis, *hanc sibi a carissimo quondam amicorum relatum gratiam* querebatur. Inter haec Dymnus, haud ignarus quam ob causam arcesseretur a rege, gladio, quo forte erat cinctus, graviter se vulnerat, occursumque satellitum inhibitus, perfertur in regiam. Quem intuens rex, *quod, inquit, in te, Dymne, tantum cogitavi nefas, ut tibi Macedonum regno dignior Philotas me quoque ipso videretur?* Illum iam defecerat vox. Itaque edito gemitu, vultuque a conspectu regis averso, subinde collapsus exstinguitur. Rex, *Philota venire in regiam iusso; Cebalinus, inquit, ultimum supplicium meritus, si in caput meum praeparatas insidias biduo texit, huius criminis reum Philotam substituit, ad quem protinus indicium detulisse se affirmat.* Quo propiore gradu amicitiae me contingis, hoc maius est dissimulationis tuae facinus; et ego Cebalino magis, quam Philotae, id convenire fateor. Faventem habes iudicem, si quod admitti non oportuit, saltem negari potest. Ad hoc Philotas haud sane trepidus, si animus vultu aestimaretur, *Cebalinum quidem scorti sermonem ad se detulisse; sed ipsum tam levi auctori nihil credidisse, respondit; veritum, ne iurgium inter amatorem et exoletum, non sine risu aliorum, detulisset.* Cum Dymnus interemerit se ipsum, *qualiacunque erant, non fuisse reticenda.* Complexusque regem orare coepit, *ut praeteritam vitam potius, quam culpam, silentii tamen, non facti ullius, intueretur.* Haud facile dixerim, credideritne ei rex, an altius iram suppresserit; dextram reconciliatae gratiae pignus obtulit, et *contemptum magis, quam celatum indicium esse, videri sibi dixit.*

CAP. VIII. Advocato tamen consilio amicorum, cui tùm Philotas adhibitus non est, *Nicomachum introduci* iubet. Is eadem, quae detulerat ad regem, ordine exposuit. Erat Craterus regi carus in paucis, et eo Philotae ob aemulationem dignitatis adversus: neque ignorabat, saepe Alexandri auribus nimia iactatione virtutis atque operae gravem fuisse; et ob ea non quidem sceleris, sed contumaciae tamen, suspectum. Non aliam premendi inimici occasionem aptiorem futuram ratus, odio suo pietatis praeferebat speciem, *Utinam, inquit, in principio quoque huius rei nobiscum deliberasses. Suavissemus, si Philotae velles ignoscere, patereris potius ignorare eum quantum deberet tibi; quam usque ad mortis metum adductum, cogeres potius de periculo suo, quam de tuo cogitare beneficio. Ille enim semper insidiari tibi poterit; tu non semper Philotae poteris ignoscere. Nec est quod existimes, eum, qui tantum facinus ausus est, venia posse mutari. Scit, eos, qui misericordiam consumserunt, amplius sperare non posse. At ego, etiamsi ipse ve poenitentia vel beneficio tuo victus quiescere velit; patrem eius Parmenionem, tanti ducem exercitus, et inveterata apud milites tuos auctoritate, haud multum infra magnitudinis tuae fastigium positum, scio non aequo animo salutem filii sui debiturum tibi. Quaedam beneficia odimus. Meruisse mortem confiteri pudet. Superest, ut malit videri iniuriam accepisse, quam vitam. Proinde scio, tibi cum illis de salute esse pugnandum. Satis hostium superest, ad quos persequendos ituri sumus: latus a domesticis hostibus muni. Hos si submoves, nihil metuo ab externo. Haec Craterus. Nec ceteri dubitabant, quin coniurationis indicium suppressurus non fuisset, nisi auctor, aut particeps. Quem enim primum et bonae*

mentis, non amicum modo, sed ex ultima plebe, auditis quae ad eum delata erant, non protinus ad regem fuisse cursurum? Ne Cebalini quidem exemplo, qui ex fratre comperta ipsi nuntiasset, Parmenionis filium, praefectum equitatus, omnium arcanorum regis arbitrum? simulasse etiam non vacasse sermoni suo regem, ne index alium internuntium quaereret. Nicomachum, religione quoque Deum adstrictum, conscientiam suam exonerare properasse: Philotam, consumto per ludum iocumque paene toto die, gravatum esse pauca verba, ad caput regis pertinentia, tam longo et forsitan supervacuo inserere sermoni. At enim non credidisse talia deferentibus pueris! cur igitur extraxisset biduum, tanquam indicio haberet fidem? dimittendum fuisse Cebalinum, si delationem eius damnabat. In suo quemque periculo magnum animum habere: cum de salute regis timeretur, credulos esse debere; vana quoque deferentes admittere. Omnes igitur quaestionem de eo, ut participes sceleris indicare cogeretur, habendam esse decernunt. Rex, admonitos, ut consilium silentio premerent, dimittit. Pronuntiari deinde iter in posterum diem iubet, ne qua novi initi consilii daretur nota. Invitatus est etiam Philotas ad ultimas ipsi epulas, et non coenare modo, sed etiam familiariter colloqui cum eo, quem damnaverat, sustinuit. Secunda deinde vigilia, luminibus extinctis, cum paucis in regiam coeunt Hephaestion, et Craterus, et Coenus, et Erigyus: hi ex amicis; ex armigeris autem Perdiccas et Leonnatus. Per hos imperatum, ut qui ad praetorium excubabant, armati vigilarent. Iam ad omnes aditus dispositi milites; equites quoque itinera obsidere iussi, ne quis ad Parmenionem, qui tum Mediae magnisque copiis praecerat, occultus evaderet. Attarras autem cum trecentis armatis in-

traverat regiam: huic decem satellites traduntur, quorum singulos deni armigeri sequebantur. Ii ad alios coniuratos comprehendendos distributi sunt: Attarras, cum trecentis ad Philotam missus, clausum aditum domus moliebatur, quinquaginta iuvenum promissimis stipatus. Nam ceteros cingere undique domum iusserat, ne occulto aditu Philotas posset elabi. Illum, sive securitate animi, sive fatigatione resolutum, somnus oppresserat; quem Attarras torpentem adhuc occupat. Tandem ei sopore discusso cum iniicerentur catenae; *Vicit, inquit, bonitatem tuam, rex, inimicorum acerbitas.* Nunc plura locutum capite velato in regiam adducunt. Postero die rex edixit, *omnes armati coirent.* Sex millia fere militum venerant: praeterea turba lixarum calonumque impleverant regiam. Philotam armigeri agmine suo tegebant, ne ante conspici posset a vulgo, quam rex allocutus milites esset. De capitalibus rebus vestusto Macedonum modo inquirebat exercitus: in pace, erat vulgi. Nihil potestas regum valebat, nisi prius valuisset auctoritas. Igitur primum Dymni cadaver infertur, plerisque, quid patrasset, quove casu extinctus esset, ignaris.

CAP. IX. Rex deinde in concionem procedit, vultu praeferens dolorem animi. Amicorum quoque moestitia expectationem haud parvam rei fecerat. Diu rex demisso in terram vultu attonito-stupentique similis stetit. Tandem recepto animo, *Paene, inquit, milites, paucorum hominum scelere vobis ereptus sum. Deum providentia et misericordia vivo. Conspectusque vestri venerabilis cogit, ut vehementius parricidis irascerer; quoniam spiritus, immo unus vitae meae fructus est, tot fortissimis viris, et de me optime meritis, referre adhuc gratiam posse.* Interrupit orationem militum gemitus, abortaeque sunt omnibus lacrimae. Tum rex, *Quanto, inquit, maiorem in animis vestris motum exci-*



*tabo, cum tanti sceleris auctores ostendero! quorum mentionem adhuc reformido; et tanquam salvi esse possint, nominibus abstineo. Sed vincenda est memoria pristinae caritatis, et coniuratio impiorum civium detegenda. Quomodo autem tantum nefas sileam? Parmenio, illa aetate, tot meis, tot parentis mei meritis devinctus, omnium nobis amicorum vetustissimus, ducem tanto sceleri se praebuit. Minister eius Philotas Pœucolaum, et Demetrium, et hunc Dymnum, cuius corpus adspicitis, ceterosque eius amentiae in caput meum subornavit.* Fremitus undique indignantium querentiumque tota concione obstrepebat: qualis solet esse multitudinis, et maxime militaris, ubi aut studio agitur, aut ira. Nicomachus deinde, et Metron, et Cebalinus producti, quae quisque detulerat, exponunt. Nullius eorum iudicio Philotas particeps sceleris destinabatur. Itaque indignatione pressa vox indicum silentio excepta est. Tum rex, *Qualis, inquit, ergo animi vobis videtur, qui huius rei delatum iudicium ad ipsum suppressit? Quod non fuisse vanum, Dymni exitus declarat. Incertam rem deferens, tormenta non timuit Cebalinus: Metron ne momentum quidem temporis distulit exonerare se, ut eo, ubi lavabar, irrumperet. Philotas solus nihil timuit, nihil credidit. O magni animi virum! Iste, si regis periculo commoveretur, vultum non mutaret? indicem tantae rei sollicitus non audiret? Subest nimirum silentio facinus, et avida spes regni praecipitem animum ad ultimum nefas impulit. Pater Mediae praest. Ipse apud multos copiarum duces meis praepotens viribus, maiora, quam capit, spirat. Orbitas quoque mea, quod sine liberis sum, spernitur. Sed errat Philotas. In vobis liberos, parentes, consanguineos habeo: vobis salvus, orbis esse non possum. Epistolam*

deinde Parmenionis interceptam, quam ad filios Nicanorem et Philotam scripserat, recitat; haud sane indicium gravioris consilii praeferentem. Namque summa eius haec erat: *Primum vestri curam agite: deinde vestrorum: sic enim quae destinavimus, efficiemus.* Adiecitque rex, *sic esse scriptam, ut sive ad filios pervenisset, a consociis posset intelligi; sive intercepta esset, falleret ignaros.* At enim Dymnus, cum ceteros participes sceleris indicaret, Philotam non nominavit! Hoc quidem illius non innocentiae, sed potentiae indicium est, quod sic ab iis timetur etiam, a quibus prodi potest, ut cum de se fateantur, illum tamen celebant. Caeterum Philotam ipsius indicat vita. Hic Amyntae, qui mihi consobrinus fuit, et in Macedonia capiti meo impias comparavit insidias, socium se et consocium adiunxit. Hic Attalo, quo graviolem inimicum non habui, sororem suam in matrimonium dedit. Illic, cum scripsissem ei, pro iure tam familiaris usus atque amicitiae, qualis sors edita esset Iovis Hammonis oraculo, sustinuit rescribere mihi: se quidem gratulari, quod in numerum Deorum receptus essem: caeterum misereri eorum, quibus vivendum esset sub eo, qui modum hominis excederet. Haec sunt etiam animi pridem alienati a me et invidentis gloriae meae indicia: quae quidem, milites, quamdiu licuit, in animo meo pressi. Videbar enim mihi partem viscerum meorum abrumpere, si, in quos tam magna contuleram, viliores mihi facerem. Sed iam non verba puniendae sunt; linguae temeritas pervenit ad gladios. Hos, si mihi creditis, Philotas in me acuit. Id si ipse admisit, quo me conferam, milites? cui caput meum credam? Equitatu, optimae exercitus parti, principibus nobilissimae iuventutis unum praefeci: salutem, spem, victoriam meam fidei eius tutelaeque commisi. Patrem in idem

*fastigium, in quo me ipsi posuistis, admovi: Mediam, qua nulla opulentior regio est, tot civium sociorumque millia imperio eius ditionique subieci. Unde praesidium petieram, periculum exstitit. Quam feliciter in acie occidissem, potius hostis praeda, quam civis victima! nunc servatus ex periculis, quae sola timui, in haec incidi, quae timere non debui. Soletis identidem a me, milites, petere, ut saluti meae parcam. Ipsi mihi praestare potestis, quod suadetis ut faciam. Ad vestras manus, ad vestra arma confugio: invitis vobis salvus esse nolo; volentibus, non possum, nisi vindicor. Tum Philotam, religatis post tergum manibus, obsoleto amiculo velatum iussit induci. Facile apparebat, motos esse tam miserabili habitu, non sine invidia paullo ante conspecti. Ducem equitatus pridie viderant: sciebant, regis interfuisse convivio. Repente non reum modo, sed etiam damnatum, immo vinctum, intuebantur. Subibat animos Parmenionis quoque, tanti ducis, tam clari civis, fortuna: qui modo duobus filiis, Hectore et Nicanore, orbatu, cum eo, quem reliquum calamitas fecerat, absens diceret causam. Itaque Amyntas, regis praetor, inclinatum ad misericordiam concionem rursus aspera in Philotam oratione commovit. Proditos eos esse barbaris: neminem ad conjugem, suam neminem in patriam, et ad parentes fuisse rediturum. Pelut truncum corpus demto capite, sine spiritu, sine nomine, aliena terra ludibrium hostis futuros. Haudquaquam pro spe ipsius, Amyntae oratio grata regi fuit; quod coniugum, quod patriae admonitos, pigriores ad caetera munia exsequenda fecisset. Tunc Coenus, quamquam Philotae sororem matrimonio secum coniunxerat, tamen acrius quam quisquam in Philotam invectus est: parricidam esse regis, patriae, exercitus, clamitans: saxumque, quod forte ante pedes iacebat, eripuit, emissurus in eum; ut pleri-*

que credere, tormentis subtrahere cupiens. Sed rex manum eius inhibuit, *dicendi prius causam debere fieri potestatem reo, nec aliter iudicari passurum se*, affirmans. Tum dicere iussus Philotas, sive conscientia sceleris, sive periculi magnitudine amens et attonitus, non attollere oculos, non hincere audebat. Lacrimis deinde manantibus, linquente animo in eum, a quo tenebatur, incubuit; abstersisque amiculo eius oculis, paullatim recipiens spiritum ac vocem, dicturus videbatur. Iamque rex, intuens eum, *Macedones*, inquit, *de te iudicaturi sunt: quaero, an patrio sermone sis apud eos usus?* Tum Philotas, *Praeter Macedonas*, inquit, *plerique adsunt, quos facilius, quae dicam, percepturos arbitror, si eadem lingua fuero usus, qua tu egisti: non ob aliud, credo, quam ut oratio tua intelligi posset a pluribus.* Tum rex, *Ecquid videtis, adeo etiam sermonis patrii Philotam taedere? solus quippe fastidit eum dicere. Sed dicat sane, utcunque cordi est; dum memineritis, aequè illum a nostro more atque sermone abhorrere.* Atque ita concione excessit.

CAP. X. Tum Philotas, *Verba*, inquit, *innocenti reperire facile est; modum verborum misero tenere difficile.* Itaque inter optimam conscientiam, et iniquissimam fortunam destitutus, ignoro quomodo et animo meo, et tempori paream. Abest quidem optimus causae meae iudex: qui cur me ipse audire noluerit, non mehercule excogito; cum illi utrimque cognita causa tam damnare me liceat, quam absolvere; non cognita vero liberari ab absente non possum, qui a praesente damnatus sum. Sed quamquam victi hominis non supervacua solum, sed etiam invisa defensio est, quae iudicem non docere videtur, sed arguere; tamen utcunque licet dicere, memet ipse non deseram, nec committam, ut damnatus etiam mea sententia videar.

*Equidem cuius criminis reus sim, non video. Inter coniuratos nemo me nominat: de me Nicomachus nihil dixit: Cebalinus plus quam audierat, scire non potuit. Atqui coniurationis caput me fuisse credit rex! potuit ergo Dymnus eum praeterire, quem sequebatur? praesertim cum quaerenti socios, vel falso fuerim nominandus; quo facilius, qui verebatur, posset impelli. Non enim detecto facinore nomen meum praeteriit, ut posset videri socio pepercisse; sed Nicomacho, quem taciturnum arcana de semetipso credebat, confessus, aliis nominatis, me unum subtrahebat. Quaeso, commilitones, si Cebalinus me non adisset, nihil me de coniuratis scire voluisset; num hodie dicerem causam nullo me nominante? Dymnus sane et vivat adhuc, et velit mihi parcere: quid ceteri? qui de se confitebuntur, me videlicet subtrahent! Maligna est calamitas; et fere noxius, cum suo supplicio crucietur, adquiescit alieno. Tot conscii, ne in equuleum quidem impositi verum fatebuntur? Atqui nemo parcat morituro; nec cuiquam moriturus, ut opinor. Ad verum crimen et ad unum revertendum mihi est. Cur rem delatam ad te tacuisti? cur tam securus audisti? Hoc qualecunque est, confesso mihi, ubicunque es, Alexander, remisisti: dextram tuam amplexus reconciliati pignus animi, convivio quoque interfui. Si credidisti mihi, absolutus sum: si pepercisti, dimissus. Vel iudicium tuum serva. Quid hac proxima nocte, qua digressus sum a mensa tua, feci? quod novum facinus delatum ad te, mutavit animum tuum? gravi sopore adquiescebam, cum me malis indormientem meis inimici vinciendo excitarunt. Unde et parricidae et proditori tam alta quies somni? Scelerrati conscientia obstrepente cum dormire non possint, agitant eos furiae, non cogitato modo, sed et*

consummato parricidio. At mihi securitatem primum innocentia mea, deinde dextra tua obtulerant: non timui, ne plus alienae crudelitati apud te liceret, quam clementiae tuae. Sed ne te mihi credidisse poeniteat, res ad me deferretur a puero, qui non testem, non pignus indicii exhibere poterat, impleturus omnes metus, si coepisset audiri. Amatoris et scorti iurgio interponi aures meas credidi infelix; et fidem eius suspectam habui, quod non ipse deferret, sed fratrem potius subornaret. Timui, ne negaret mandasse se Cebalino, et ego viderer multis amicorum regis fuisse periculi causa. Sic quoque cum laeserim neminem, inveni, qui mallet perire me, quam incolumen esse: quid inimicitiarum creditis excepturum fuisse, si insontes lacessissem? At enim Dymnus se occidit? Num igitur facturum eum divinare potui? minime. Ita quod solum indicio fidem fecit, id me, cum a Cebalino interpellatus sum, movere non poterat. At hercule, si conscius Dymno tanti sceleris fuisssem, biduo illo proditor esse nos, dissimulare non debui: Cebalinus ipse tolli de medio nullo negotio potuit. Deinde post delatum indicium, quo periturus eram, cubiculum regis solus intravi, ferro quidem cinctus. Cur distuli facinus? an sine Dymno non sum ausus? Ille igitur princeps coniurationis fuit. Sub illius umbra Philotas latebam, qui regnum Macedonum affecto. Et quis e vobis corruptus est donis? quem ducem, quem praefectum impensius colui? Mihi quidem obiicitur, quod societatem patrii sermonis asperner; quod Macedonum mores fastidiam. Sic ergo imperio, quod dedignor, immineo. Iam pridem nativus ille sermo commercio aliarum gentium exolevit: tam victoribus, quam victis, peregrina lingua discenda est. Non mehercule ista me magis laedunt, quam

quod Amyntas, Perdiccae filius, insidiatus est regi; cum quo quod amicitia fuerit mihi, non recuso defendere, si fratrem regis non oportuit diligi a nobis. Sin autem in illo fortunae gradu positum etiam venerari necesse erat; utrum, quaeso, quod non divinavi, reus sum? an impiorum amicis insontibus quoque moriendum est? Quod si aequum est, cur tamdiu vivo? si iniustum, cur nunc demum occidor? At enim scripsi, misereri me eorum, quibus vivendum esset sub eo, qui se Iovis filium crederet! Fides amicitiae, veri consilii periculosa libertas, vos me decepistis! vos, quae sentiebam, ne reticerem, impulistis! Scripsisse me haec fateor regi, non de rege scripsisse. Non enim faciebam invidiam, sed pro eo timebam. Dignior mihi Alexander videbatur, qui Iovis stirpem tacitus agnosceret, quam qui praedicatione iactaret. Sed quoniam oraculi fides certa est; sit Deus causae meae testis. Retinete me in vinculis, dum consulitur Hammon in arcanum et occultum scelus. Interim, qui regem nostrum dignatus est filium, neminem eorum, qui stirpi suae insidiati sunt, latere patietur. Si certiora oraculis creditis esse tormenta; ne hanc quidem exhibendae veritatis fidem deprecor. Solent rei capitis adhibere vobis parentes. Duos fratres ego nuper amisi; patrem nec ostendere possum, nec invocare audeo, cum et ipse tanti criminis reus sit. Parum est enim, tot modo liberorum parentem, in unico filio adquiescentem, eo quoque orbari, ni ipse in rogam meum imponitur. Ergo, carissime pater et propter me morieris, et mecum. Ego tibi vitam adimo, ego senectutem tuam exstinguo! Quid enim me procreabas infelicem adversantibus Diis? an ut hos ex me fructus perciperes, qui te manent? Nescio, adolescentia mea miserior sit, an senectus tua: ego in ipso ro-

*bore aetatis eripior; tibi carnifex spiritum adimet, quem si fortuna exspectare voluisset, natura reposcebat. Admonuit me patris mei mentio, quam timide et cunctanter, quae Cebalinus detulerat ad me, indicare debuerim: Parmenio enim, cum audisset, venenum a Philippo medico regi parari, deterrere eum voluit epistola scripta, quo minus medicamentum biberet, quod medicus dare construerat. Num creditum est patri meo? num ullam auctoritatem eius literae habuerunt? Ego ipse, quoties quae audieram detuli, cum ludibrio creditatis repulsus sum. Si et cum indicamus, invisum; et cum tacemus, suspecti sumus; quid facere nos oportet? Cumque unus e circumstantium turba exclamasset, Bene meritis non insidiari: Philotas, Recte, inquit, quisquis es, dicis. Itaque si insidiatus sum, poenam non deprecor; et finem facio dicendi, quoniam ultima verba gravia sunt visa auribus vestris. Abducitur deinde ab iis, qui custodiebant eum.*

CAP. XI. Erat inter duces manu strenuus Belon quidam, pacis artium et civilis habitus rudis, vetus miles, ab humili ordine ad eum gradum, in quo tunc erat, promotus: qui tacentibus ceteris, stolidam audaciam ferrox, adponere eos coepit, quoties quisque diversoriis, quae occupassent, proturbatus esset, ut purgamenta servorum Philotae reciperentur eo, unde commilitones expulsisset. Auro argentoque vehicula eius onusta totis vicis stetisse: ac ne in vicina quidem diversorii quemquam commilitonum receptum esse; sed per dispositos, quos ad somnum habebat, omnes procul relegatas, ne femina illa murmurantium inter se silentio verius, quam sono, excitaretur. Ludibrio ei fuisse rusticos homines, Phrygasque et Paphlagonas appellatos: quae non erubesceret, Macedo natus, homines iunguae



*suae per interpretem audire. Cur Hammonem consuli vellet? eundem Iovis arguisse mendacium, Alexandrum filium agnoscentis: scilicet veritum, ne invidiosum esset, quod Dii offerent. Cum insidiaretur capiti regis et amici, non consuluisse eum Iovem: nunc ad oraculum mittere, dum pater eius sollicitaretur, qui praesit in Media; et pecunia, cuius custodia commissa sit, perditos homines ad societatem sceleris impellat. Ipsos missuros ad oraculum, non qui Iovem interrogent, quod ex rege cognoverint; sed qui gratias agant, qui vota pro incolumitate regis optimi persolvant. Tum vero universa concio accensa est; eam corporis custodibus initium factum, clamantibus, discernendum esse parricidam manibus eorum. Id quidem Philotas, qui graviora supplicia metueret, haud sane iniquo animo audiebat. Rex in concionem reversus, sive ut in custodia quoque torqueret, sive ut diligentius cuncta cognosceret, concilium in posterum diem distulit: et quamquam in vesperam inclinabat dies, tamen amicos convocari iubet. Et ceteris quidem placebat, Macedonum more obrui saxis; Hephæstion autem et Craterus et Coenus tormentis veritatem exprimendam esse dixerunt: et illi quoque, qui aliud suaserant, in horum sententiam transeunt. Consilio ergo dimisso, Hephæstion cum Cratero et Coeno ad quaestionem de Philota habendam consurgunt. Rex Cratero accessit, et sermone habito, cuius summa non edita est, in intimam diversorii partem secessit, et remotis arbitris in multam noctem quaestionis expectavit eventum. Tortores in conspectu Philotæ omnia crudelitatis instrumenta proponunt. Et ille ultro, quid cessatis, inquit, regis inimicum, interfectorem, confitentem occidere? quid quaestione opus est? cogitavi, volui. Craterus exigere, ut, quae confiteretur, in tormentis quoque diceret.*

Dum corripitur, dum obligantur oculi, dum vestis exiitur, *Deos patrios, gentium iura*, nequidquam apud surdas aures invocabat. Per ultimos deinde cruciatus, utpote damnatus, et inimicis in gratiam regis torquentibus laceratur. Ac primo quamquam hinc ignis, illinc verbera, iam non ad quaestionem, sed ad poenam, ingerebantur; non vocem modo, sed etiam gemitus, habuit in potestate: sed postquam intumescens corpus ulceribus, flagellorum ictus nudis ossibus incussos ferre non poterat; *si tormentis adhibeturum modum essent, dicturum se, quae scire expeterent*, pollicetur. *Sed finem quaestioni fore, iurare eos per Alexandri salutem, volebat, removerique tortores.* Et utroque impetrato, Cratero inquit, *dic quid me velis dicere.* Illo indignante, *ludificari eum*, rursusque re-vocante tortores, *tempus petere coepit, dum reciperet spiritum, cuncta quae sciret, indicaturus.* Interim equites, nobilissimus quisque, et ii maxime, qui Parmenionem propinqua cognatione contingebant, postquam Philotam torqueri fama vulgaverat, legem Macedonum veriti, qua cautum erat, ut propinqui eorum, qui regi insidiati erant, cum ipsis necarentur; alii se interficiunt, alii in devios montes vastasque solitudines fugiunt: ingenti per tota castra terrore diffuso, donec rex, tumultu cognito, *legem se supplicio coniunctis sontium remittere* edixit. Philotas verone an mendacio liberare se a cruciatu voluerit, anceps coniectura est, quoniam et vera confessis, et falsa dicentibus, idem doloris finis ostenditur. Ceterum, *Pater*, inquit, *meus Hegelochus quam familiariter usus sit, non ignoratis. Illum dico Hegelochum, qui in acie cecidit: ille omnium malorum nobis causa fuit. Nam cum primum Iovis filium se salutari iussit rex, id indigne ferens ille, Hunc igitur regem agnoscimus, inquit, qui Philippum dedignatur patrem? actum est de nobis, si ista perpeti possumus. Non homines so-*

Inm, sed etiam Deos despicit, qui postulat Deus credi. Amisimus Alexandrum, amisimus regem: incidimus in superbiam, nec Diis, quibus se exaequat, nec hominibus, quibus se eximit, tolerabilem. Nostrone sanguine Deum fecimus, qui nos fastidiat? qui gravetur mortalium adire concilium? Credite mihi, et nos, si viri sumus, a Diis adoptabimur. Quis proavum huius Alexandrum, quis deinde Archelaum, quis Perdiccam occisos ultus est? hic quidem interfecto-ribus patris ignovit. *Haec Hegelochus dixit supra coenam: et postera die prima luce a patre arcessor. Tristis erat, et me moestum videbat. Audieramus enim, quae sollicitudinem incuterent. Itaque ut experiremur, utrumne vino gravatus effudisset illa, an altiore concepta consilio; arcessiri eum placuit. Venit: eodemque sermone ultro repetito adiecit, se, sive auderemus duces esse, proximas a nobis partes vindicaturum; sive deesset animus, consilium silentio esse tecturum. Parmenioni, vivo adhuc Dario, intempestiva res videbatur; non enim sibi, sed hosti esse occisuros Alexandrum: Dario vero sublato praemium regis occisi Asiam, et totum Orientem interfecto-ribus esse cessurum. Approbatoque consilio, in haec fides data est et accepta. Quod ad Dymnum pertinet, nihil scio; et haec confessus intelligo non prodesse mihi, quod prorsus sceleris expers sum. Illi rursus tormentis admotis, cum ipsi quoque hastis os oculosque eius everberarent; ut hoc quoque crimen confiteretur, expressere. Exigentibus deinde, ut ordinem cogitati sceleris exponeret; cum diu Bactra retentura regem viderentur, timuisse respondit, ne pater LXXnatus annos, tanti exercitus dux, tantae pecuniae custos, interim exstingueretur, ipsique, spoliato tantis viribus occidendi regis causa non esset. Festinasse ergo se, dum praemium haberet in manibus, repraesentare consilium, cuius*

*patrem fuisse auctorem nisi crederent, tormenta quamquam tolerare non posset, tamen non recusaret. Illi collocti satis quaesitum videri, ad regem revertuntur. Qui postero die et quae confessus erat Philotas recitari; et ipsum, quia ingredi non poterat, iussit afferri. Omnia agnoscente eodem, Demetrius, qui proximi sceleris particeps esse arguebatur, producit: multa affirmatione, animique pariter constantia, et vultu abnuens, quidquam sibi in regem cogitatum esse, tormenta etiam deposcebat in semetipsum. Cum Philotas circumlatis oculis incidere in Calin quemdam, haud procul stantem, propius eum iussit accedere. Illo perturbato, et recuante transire ad eum, patieris, inquit, Demetrium mentiri, rursusque me excruciaris? Calin vox sanguisque defecerant: et Macedones Philotam inquinare innoxios velle suspicabantur; quia nec a Nicomacho, nec ab ipso Philota, cum torqueretur, nominatus esset adolescens. Qui ut praefectos regis circumstantes se vidit, Demetrium et semetipsum id facinus cogitasse confessus est. Omnes ergo a Nicomacho nominatos, more patrio, dato signo, saxis obruerunt. Magno non modo salutis, sed etiam vitae periculo liberatus erat Alexander: quippe Parmenio et Philotas, principes amicorum nisi palam sontes, sine indignatione totius exercitus non potuissent damnari. Itaque anceps quaestio fuit: dum infitatus est facinus, crudeliter torqueri videbatur; post confessionem, Philotas ne amicorum quidem misericordiam meruit.*

---

Q. CVRTII RVFI  
DE  
REBVS GESTIS  
ALEXANDRI MAGNI  
HISTORIARVM  
LIBER VII.

---

ARGVMENTVM.

*Alexander Lyncestem maiestatis reum interfici curat. Deinde in Amyntam et Simmiam, Philotae amicos, inquit, qui suam innocentiam gravi oratione tuentur, 1. Amynta et fratribus in gratiam receptis, Polydamas a rege iussus, in Mediam celeriter profectus, Parmenionem interfici curat: unde indignatio et seditio, quae tandem exstinguitur, 2. Varios populos sub iugum mittit Alexander, ac septemdecim diebus cum exercitu Caucasum superat, 3. Bessus de bello adversus Alexandrum inter epulas consultat, sapientique Cobaris consilio minime acquiescit. Interim rex Bactra pervenit, ubi de Graecorum defectione, et Satibarzane singulari certamine occiso, advenit*

*ei nuntius, 4. Exercitus Alexandri siti liberatus Oxum amnem industrie traicit. Bessus dolo captus ad Alexandrum adducitur, a quo et Darii fratri Oxathri cruci figendus traditur, 5. Barbarorum et Macedonum benevolentia varias expugnat urbes. Sed et Alexandriam ad Tanaim condit amnem, brevissimoque temporis absolvit spatium, 6. De bello Scythis inferendo Alexander aeger ex vulnere cum suis inquit consilium. Aristander vates regis voluntati extorum accommodat significata. Menedemus a Spitamene per insidias cum duobus peditum millibus et ccc equitibus a Dahis interficitur: quod callide admodum dissimulat Alexander, 7. Dum exercitus ad bellum accingitur, Scytharum legati adveniunt, ac de pace prorsus egregiam ad Alexandrum orationem habent, 8. Alexander legatis dimissis Tanaim traicit, bellum Scythis infert, et cum victis benigne agit, 9. Sogdianorum nobilium invictus animus. Bessi supplicium. Novo milite auctus Alexandri exercitus, 10. Petram, urbem amplissimam, situ naturaque loci fere inexpugnabilem, ad deditionem cogit Alexander, 11.*

## CAPITULUM

**P**hilotam sicut recentibus sceleris eius vestigiis iure affectum supplicio censuerant milites; ita postquam desierat esse quem odissent, invidia in misericordiam vertit. Moverat et claritas iuvenis, et patris eius senectus atque orbitas. Primus Asiam aperuerat regi, omnium periculorum eius particeps; semper alterum in acie cornu defenderat: Philippo quoque ante omnes amicus; et ipsi Alexandro tam fidus, ut occidendi Attalum non alio ministro uti mallet. Horum cogitatio subibat exercitum; seditiosaeque voces referebantur

ad regem. Quis ille haud sane motus, satisque prudens, otii vitia negotio discuti, edicit, *ut omnes in vestibulo regiae praesto afforent.* Quos ubi frequentes adesse cognovit, in concionem processit. Haud dubie ex composito Apharias postulare coepit, *ut Lyncestes Alexander, qui multo ante quam Philotas regem voluisset occidere, exhiberetur.* A duobus indicibus, sicut supra diximus, delatus, tertium iam annum custodiebatur in vinculis. Eundem in Philippi quoque caedem coniurasse cum Pausania, pro comperto fuit; sed quia primus Alexandrum Regem salutarerat, supplicio magis quam crimini fuerat exemptus. Tum quoque Antipatri soceri eius preces iustam regis iram morabantur. Ceterum recruduit soporatus dolor. Quippe veteris periculi memoriam praesentis cura renovabat. Igitur Alexander ex custodia educitur, iussusque dicere quam toto triennio meditatus erat defensionem, haesitans et trepidus pauca ex iis, quae composuerat, protulit: ad ultimum non memoria solum, sed etiam mens, eum destituit. Nulli erat dubium, quin trepidatio conscientiae indicium esset, non memoriae vitium. Itaque ex iis, qui proxime adstiterant, obluctantem adhuc oblivioni lanceis confoderunt. Cuius corpore sublato, rex *introduci iussit Amyntam et Simmiam:* nam Polemon, minimus ex fratribus, cum Philotam torqueri comperisset, profugerat. Omnium Philotae amicorum hi carissimi fuerant, ad magna et honorata ministeria illius maxime suffragatione producti: memineratque rex, summo studio ab eo conciliatos sibi; nec dubitabat, *huius quoque ultimi consilii fuisse participes.* Igitur, *olim esse sibi suspectos matris suae literis, quibus esset admonitus, ut ab his salutem suam tueretur.* Ceterum *se invitum deteriora credentem, nunc manifestis indiciis victum, iussisse vinciri.* Nam *pridie quam detegeretur Philotae scelus, quin in*

*secreto cum ipso fuissent, non posse dubitari. Fratrem vero, qui profugerit, cum Philotas torqueretur, aperuisse fugae causam. Nuper praeter consuetudinem, officii specie, amotis longius ceteris, admovisse semetipsos lateri suo, nulla probabili causa: seque mirantem, quod non vice sua, tali fungerentur officio, et ipsa trepidatione eorum perterritum, strenue ad armigeros, qui proximi sequebantur, recessisse. Ad hoc accedere, quod cum Antiphanes, striba equitum, Amyntae denuntiasset, pridie quam Philotae scelus deprehensum esset, ut ex suis equis more solito daret iis, qui amississent suos, superbe respondisse, nisi incepto desisteret, brevi sciturum quis ipse esset. Iam linguae violentiam, temeritatemque verborum, quae in semetipsum iacularentur, nihil aliud esse, quam scelesti animi indicem ac testem. Quae si vera essent, idem metuisse eos, quod Philotam; si falsa, exigere ipsum ut refellant. Productus deinde Antiphanes, de equis non traditis, et adiectis etiam superbe minis, indicat. Tum Amyntas, facta dicendi potestate, Si nihil inquit, interest regis; peto, ut, dum dico, vinculis liberer. Rex solvi utrumque iubet: desiderantique Amyntae, ut habitus quoque redderetur armigero, lanceam dari iussit. Quam ut laeva comprehendit, evitato eo loco, in quo Alexandri corpus paullo ante iacuerat, Qualiscunque, inquit, exitus nos manet, rex: confitemur, prosperum eventum tibi debituros; tristiolem fortunae imputaturos. Sine praeiudicio dicimus causam, liberis corporibus animisque. Habitum etiam, quo te comitari solemus, reddidisti. Causam non possumus, fortunam timere desinemus. Te quaeso, permittas mihi id primum defendere, quod a te ultimum obiectum est. Nos, rex, sermonis adversus maiestatem tuam habiti nullius conscius sumus nobis. Di-*



cerem, iam pridem vicisse te invidiam, nisi periculum esset, ne alia maligne dicta crederes blanda oratione purgari. Ceterum etiamsi militis tui vel in agmine deficientis et fatigati, vel in acie periclitantis, vel in tabernaculo aegri et vulnera curantis, aliqua vox asperior esset accepta; merueramus fortibus factis, ut mallet ea tempori nostro imputare, quam animo. Cum quid accidit tristius, omnes rei sunt: corporibus nostris, quae utique non odimus, infestas admovemus manus; parentes liberis si occurrant, et ingrati et invidiosi sunt. Cum honori honoramur, cum praemiis onusti revertimur, quis ferre nos potest? quis illam animorum alacritatem continere? Militantium nec indignatio, nec laetitia moderata est. Ad omnes affectus impetu rapimur. Vituperamus, laudamus, miseremur, irascimur, utcunque praesens movit affectio. Modo Indiam adire et Oceanum libet; modo coniugum et liberorum patriaeque memoria occurrit. Sed has cogitationes, has inter se colloquentium voces, signum tuba datum finit; in suos ordines quisque currimus, et quidquid irarum in tabernaculo conceptum est, in hostium effunditur capita. Utinam Philotas quoque intra verba peccasset! Proinde ad id revertar, propter quod rez sumus. Amicitiam, quae nobis cum Philota fuit, adeo non eo infitias, ut expetisse confitear. An vero Parmenionis, quem tibi proximum esse voluisti, filium, omnes paene amicos tuos dignatione vincentem, cultum a nobis esse miraris? Tu hercule, si verum audire vis, rex, huius nobis periculi causa es. Quis enim alius effecit, ut ad Philotam decurrerent, qui placere vellent tibi? Ab illo traditi ad hunc gradum amicitiae tuae adscendimus. Is apud te fuit, cuius gratiam expetere, et iram timere possemus. An non propemodum in tua

*verba, tui omnes te praesente iuravimus, eisdem non inimicos amicosque habituros esse, quos tu haberes? hoc sacramento pietatis obstricti aversaremur scilicet, quem tu omnibus praeferebas. Igitur si hoc crimen est, tu paucos innocentes habes: immo hercule neminem. Omnes enim Philotae amici esse voluerunt: sed totidem, quot volebant esse, non poterant. Ita si a conscitis amicos non dividis; nec ab amicis quidem separabis illos, qui idem esse voluerunt. Quod igitur conscientiae affertur indicium? ut opinor, quia pridie familiariter et sine arbitris locutus est nobiscum! At ego purgare non possem, si pridie quidquam ex veteri vita aemore mutassem. Nunc vero, si, ut omnibus diebus, illo quoque, qui suspectus est, fecimus, consuetudo diluet crimen. Sed equos Antiphani non dedimus! et pridie quam Philotas detectus est, haec mihi cum Antiphane res erat! qui si nos suspectos facere vult, quod illo die equos non dederimus; semetipsum, quod eos desideraverit, purgare non poterit. Anceps enim crimen est inter retinentem et exigentem; nisi quod melior est causa suum non tradentis, quam poscentis alienum. Ceterum, rex, equos decem habui, e quis Antiphanes octo iam distribuerat iis, qui amiserant suos. Omnino duos ipse habebam: quos cum vellet abducere homo superbissimus, certe iniquissimus, nisi pedes militare vellem, retinere cogebar. Nec infitias eo, liberi hominis animo locutam esse me cum ignavissimo, et hoc unum militiae suae usurpante, ut alienos equos pugnaturis distribuat. Huc enim malorum ventum est, ut verba mea eodem tempore et Alexandro excusem, et Antiphani. At hercule mater de nobis inimicis tuis scripsit! Utinam prudentius esset sollicita pro filio, et non inanes quoque species anxio animo figuraret. Quare enim non adscribit*

*metus sui causam? Denique non ostendit auctorem, quo facto dictove nostro mota tam trepidas tibi literas scripsit. O miseram conditionem meam, cui forsitan non periculosius est tacere, quam dicere! Sed utcunque cessura res est, malo tibi defensionem meam displicere, quam causam. Agnosces autem, quae dicturus sum; quippe meministi, cum me ad perducendos ex Macedonia milites mitteres, dixisse te, multos integros iuvenes in domo tuae matris abscondi. Praecepisti igitur mihi, ne quem praeter te intuerer, sed detrectantes militiam perducerem ad te. Quod equidem feci, et liberius, quam expediebat mihi, exsecutus sum imperium tuum. Gorgian, Hecateum et Gorgatan, quorum bona opera uteris, inde perduxi. Quid igitur iniquius est, quam me, qui si tibi non paruissem, iure daturus fui poenas, nunc perire quia parui? Neque enim ulla alia matri tuae persequendi nos causa est, quam quod utilitatem tuam muliebri praeposuimus gratiae. Sex millia Macedonum peditum, et DC equites adduxi, quorum pars secutura me non erat, si militiam detrectantibus indulgere voluissem. Sequitur ergo, ut, quia illa propter hanc causam irascitur nobis, tu mitiges matrem, qui irae eius nos obtulisti.*

CAP. II. Dum haec Amyntas agit, forte supervenerunt, qui fratrem eius Polemonem, de quo ante dictum est, fugientem consecuti vinctum reducebant. Infesta concio vix inhiberi potuit, quin protinus suo more saxa in eum iaceret. Atque ille sane interritus, nihil inquit, pro me deprecor; modo ne fratrum innocentiae fuga imputetur mea. Haec si defendi non potest, meum crimen sit. Horum ob id ipsum melior est causa, quod ego, qui profugi, suspectus sum. At haec elocuto universa concio assensa est. Lacrimae deinde omnibus manare coeperunt, adeo in

contrarium repente mutatis, ut solum pro eo esset, quod maxime laeserat. Iuvenis erat primo aetatis flore pubescens, quem inter equites tormentis Philotae conturbatos alienus terror abstulerat. Desertum eum a comitibus, et haesitantem inter revertendi fugiendique consilium, qui secuti erant occupaverunt. Is tum flere coepit, et os suum converberare; moestus, non suam vicem, sed propter ipsum periclitantium fratrum. Moveratque iam regem, non concionem modo: sed unus erat implacabilis frater: qui terribili vultu intuens eum, *Tum, ait, demens, lacrimare debueras, cum equo calcaria subderes, fratrum desertor, et desertorum comes. Miser, quo, et unde fugiebas? Effecisti, ut reus capitis, accusatoris uterer verbis. Ille, peccasse se; sed gravius in fratres, quam in semetipsum, fatebatur.* Tum vero neque lacrimis, neque acclamationibus, quibus studia sua multitudo profitetur, temperaverunt. Una vox erat pari emissa consensu, *ut insontibus et fortibus viris parceret.* Amici quoque, data misericordiae occasione, consurgunt, flentesque regem deprecantur. Ille silentio facto, *Et ipse, inquit, Amyntam mea sententia fratresque eius absolvo. Vos autem, iuvenes, malo beneficii mei oblivisci, quam periculi vestri meminisse. Eadem fide redite in gratiam mecum, qua ipse vobiscum revertor. Nisi quae delata essent, excussissem; valde dissimulatio mea suspecta esse potuisset. Sed satius est purgatos esse, quam suspectos. Cogitate, neminem absolvi posse, nisi qui dixerit causam. Tu, Amynta, ignosce fratri tuo. Erit hoc simpliciter etiam mihi reconciliati animi tui pignus.* Concione deinde dimissa, *Polydamanta vocari iubet.* Longe acceptissimus Parmenioni erat, proximus lateri in acie stare solitus. Et quamquam conscientia fretus in regiam venerat; tamen ut iussus est *fratres suos*

*exhibere, admodum iuvenes, et regi ignotos ob aetatem, fiducia in sollicitudinem versa trepidare coepit, saepius quae nocere possent, quam quibus eluderet, reputans. Iam armigeri, quibus imperatum erat, prodixerant eos; cum exsanguem metu Polydamanta propius accedere iubet. Submotisque omnibus, Scelere, inquit, Parmenionis omnes pariter appetiti sumus. Maxime ego ac tu, quos amicitiae specie fefellit. Ad quem persequendum puniendumque (vide quantum fidei tuae credam) te ministro uti statui. Obsides, dum hoc peragis, erunt fratres tui. Proficiscere in Mediam, et ad praefectos meos literas scriptas manu mea perfer. Velocitate opus est, qua celeritatem famae antecedas. Noctu pervenire illuc te volo; postero die, quae scripta erunt, exsequi. Ad Parmenionem quoque epistolas feres; unam a me, alteram Philotae nomine scriptam. Signum anuli eius in mea potestate est. Sic pater credens a filio impressum, cum te viderit, nihil metuet. Polydamas, tanto liberatus metu, impensius etiam, quam exigebatur, promittit operam. Collaudatusque et promissis oneratus, deposita veste quam habebat, Arabica induitur. Duo Arabes, quorum interim coniuges ac liberi, vinculum fidei, obsides apud regem erant, dati comites. Per deserta etiam ob siccitatem loca camelis, undecima die, quo destinaverat, perveniunt. Et prius quam ipsius nuntiaretur adventus, rursus Polydamas vestem Macedonicam sumit, et in tabernaculum Cleandri (praetor hic regius erat) quarta vigilia pervenit. Redditis deinde literis, constituerunt prima luce ad Parmenionem coire. Namque ceteris quoque literas regis attulerat. Iam ad eum venturi erant, cum Parmenioni Polydamanta venisse nuntiaverunt. Qui dum laetatur adventu amici, simulque noscendi, quae rex ageret, avidus, (quippe longo intervallo nullam ab eo epistolam acceperat) Polydamanta-*

*ta requiri iubet.* Diversoria regionis illius magnos recessus habent, amoenosque nemoribus manu compositis: ea praecipue regum satraparumque voluptas erat. Spatiabatur in nemore Parmenion medius inter duces, quibus erat imperatum literis regis, ut occiderent. Agendae autem rei constituerant tempus, *cum Parmenion a Polydamante literas traditas legere coepisset.* Polydamas procul veniens, ut a Parmenione conspectus, vultu laetitiae speciem praeferente, ad complectendum eum cucurrit; mutuaque gratulatione functi, Polydamas epistolam ab rege scriptam ei tradidit. Parmenion vinculum epistolae solvens, *quidnam rex ageret?* requirebat. Ille *ex ipsis literis cogniturum esse* respondit. Quibus Parmenion lectis, *Rex, inquit, expeditionem parat in Arachosios. Strenuum hominem et nunquam cessantem! Sed tempus saluti suae tanta iam parta gloria parcere.* Alteram deinde epistolam, Philotae nomine scriptam haecus quod ex vultu notari poterat, legebat. Tum eius latus gladio haurit Cleander, deinde iugulum ferit; ceteri exanimem quoque confodiunt. Et armigeri, qui ad aditum nemoris adstiterant, cognita caede, cuius causa ignorabatur, in castra perveniunt, et tumultuoso nuntio milites concitant. Illi armati ad nemus, in quo perpetrata caedes erat, coeunt: et, *ni Polydamas, ceterique eiusdem noxae participes dedantur, murum circumdatum nemori eversuros* denuntiant, *omniumque sanguine duci parentaturos.* Cleander primores eorum intramitti iubet; literasque regis scriptas ad milites recitat, quibus *insidiae Parmenionis in regem, precesque, ut ipsum vindicarent,* continebantur. Igitur cognita regis voluntate, non quidem indignatio, sed tamen seditio compressa est. Dilapsis pluribus pauci remanserunt, qui, *saltem ut corpus ipsius sepelire permitterent,* precabantur. Diu id negatum est, Cleandri metu, ne offenderet re-

gem. Pertinacius deinde precantibus, materiem consternationis subtrahendam ratus, capite deciso truncum humare permisit. Ad regem caput missum est. Hic exitus Parmenionis fuit, militiae domique clari viri. Multa sine rege prospere, rex sine illo nihil magnae rei gesserat. Felicissimo regi, et omnia ad fortunae suae exigenti modum, satisfecit. LXX natus annos, iuvenis ducis, et saepe etiam gregarii militis munia explevit: acer consilio, manu strenuus, carus principibus, vulgo militum acceptior. Haec impulerint illum ad regni cupiditatem, an tantum suspectum fecerint, ambigi potest; quia Philotas ultimis cruciatibus victus verane dixerit, quae facta probari non poterant, an falsis tormentorum petierit finem, re quoque recenti, cum magis posset liquere, dubitatum est. Alexander, quos mortem Parmenionis conquestos esse compereerat, separandos a cetero exercitu ratus, in unam cohortem secrevit, ducemque his Leonidam dedit, et ipsum Parmenioni quondam intima familiaritate coniunctum. Fere iidem erant, quos alioqui rex habuerat invisos. Nam cum experiri vellet militum animos, admonuit, *qui literas in Macedoniam ad suos scripsisset, iis, quos ipse mittebat, perlaturis cum fide traderet.* Simpliciter ad necessarios suos quisque scripserat, quae sentiebat: aliis gravis erat, plerisque non ingrata militia. Ita et agentium gratias, et quorentium literae exceptae sunt. Et qui forte taedium laboris per literas erant questi, *hanc seorsum cohortem a ceteris tendere ignominiae causa iubet;* fortitudine usus in bello, libertatem linguae ab auribus credulis remoturus. Et consilium temerarium forsitan (quippe fortissimi iuvenes contumeliis irritati erant) sicut omnia alia felicitas regis excepit. Nihil illis ad bella promptius fuit. Incitabat virtutem et ignominiae demendae cupido, et quia fortiora facta in paucis latere non poterant.

CAP. III. His ita compositis, Alexander Arianorum Satrape constituto, *iter pronuntiari iubet, in Agriaspas, quos iam tunc mutato nomine Energetas appellabant; ex quo frigore victusque penuria Cyri exercitum affectum, tectis et com meatibus iuverant. Quintus dies erat, ut in eam regionem pervenerat. Cognoscit, Satibarzanem, qui ad Bessum defecerat, cum equitum manu irrupisse rursus in Arios. Itaque Caranum, et Erigyium cum Artabazo et Andronico et sex millibus Graecorum peditum, DC equites sequebantur. Ipse LX diebus gentem Energetarum ordinavit, magna pecunia ob egregiam in Cyrum fidem donata. Relicto deinde, qui iis praeesset, Amenide, (scriba is Darii fuerat) Arachosios, quorum regio ad Ponticum mare pertinet, subegit. Ibi exercitum, qui sub Parmenione fuerat, occupavit. Sex millia Macedonum erant, et CC nobiles, et quinque millia Graecorum cum equitibus ducentis; haud dubie robur omnium virium regis. Arachosius datus Menon praetor, IV millibus peditum, et DC equitibus in praesidium relictis. Ipse rex nationem, ne finitimis quidem satis notam, quippe nullo commercio volentem mutuos usus, cum exercitu intravit. *Parapamisadae* appellantur, agreste hominum genus, et inter barbaros maxime inconditum. Locorum asperitas, hominum quoque ingenia duraverat. Gelidissimum Septemtrionis axem ex magna parte spectant: Bactrianis ad Occidentem coniuncti sunt: meridiana regio ad mare Indicum vergit. Tuguria latere primo struunt, et quia sterilis est terra materiae, in nudo etiam montis dorso, usque ad summum aedificiorum fastigium eodem laterculo nituntur. Ceterum structura latior ab imo, paulatim incremento operis in arctius cogitur: ad ultimum in carinae maxime modum coit. Ibi foramine relictis superne lumen accipiunt ad medium. Vites et arbores, si quae in tanto terrae rigore durare potuerunt,*



obruunt. Penitus hieme defossae latent. Cum nive discussa aperiri humus coepit coelo solique redduntur. Ceterum adeo altae nives premunt terram, gelu et perpetuo paene rigore constrictae, ut ne avium quidem, feraeve ullius vestigium exstet. Obscura coeli verius umbra, quam lux, nocti similis premit terram, vix ut quae prope sunt, conspici possint. In hac tamen omnis humani cultus solitudine destitutus exercitus, quidquid malorum tolerari potest, pertulit, inopiam, frigus, lassitudinem, desperationem. Multos examinavit rigor insolitus nivis; multorum adussit pedes: plurimorum oculis praecipue perniciosus fuit. Fatigati quippe in ipso gelu deficientia corpora sternebant: quae cum moveri desissent, vis frigoris ita adstringebat, ut rursus ad surgendum conniti non possent. A commilitonibus torpentes excitabantur: neque aliud remedium erat, quam ut ingredi cogerentur. Tum demum vitali calore moto, membris aliquis redibat vigor. Si qui tuguria barbarorum adire potuerunt, celeriter refecti sunt. Sed tanta caligo erat, ut aedificia nulla alia res quam fumus ostenderet. Illi nunquam ante in terris suis advena viso, cum armatos repente conspicerent, exanimati metu, quidquid in tuguriis erat, afferebant, *ut corporibus ipsorum parceretur* orantes. Rex agmen circumibat pedes, iacentes quosdam erigens, et alios, cum aegre sequerentur, adminiculo corporis sui excipiens. Nunc ad prima signa, nunc in medium, nunc in ultimo agmine itineris multiplicato labore aderat. Tandem ad cultiora perventum loca est, commeatuque largo recreatus exercitus: simul et qui consequi non potuerant, in illa castra venerunt. Inde agmen processit ad Caucasum montem, cuius dorsum Asiam perpetuo iugo dividit: hinc simul mare, quod Ciliciam subit, illinc Caspium fretum, et amnem Araxem, aliaque regionis Scythiae deserta spectat. Taurus, secundae magnitudinis mons, committitur Caucaso, a Cap-

padocia se attollens Ciliciam praeterit, Armeniaeque montibus iungitur. Sic inter se tot iuga velut serie cohaerentia perpetuum habent dorsum, ex quo Asiae omnia fere flumina, alia in Rubrum, alia in Caspium mare, alia in Hyrcanum et Ponticum decidunt. XVII dierum spatio Caucasum superavit exercitus. Rupes in eo X in circumitu stadia complectitur, quatuor in altitudinem excedit, in qua *vinctum Promethea fuisse* antiquitas tradit. Condendae in radicibus montis urbi sedes electa est. VII millibus seniorum Macedonum, et praeterea militibus, quorum opera uti desisset, permissum, in novam urbem considerare. Hanc quoque *Alexandriam* incolae appellaverunt.

CAP. IV. At Bessus, Alexandri celeritate perterritus, Diis patriis sacrificio rite facto; sicut illis gentibus mos est, cum amicis ducibusque copiarum inter epulas de bello consultabat. Graves mero *suas vires* extollere: *hostium nunc temeritatem, nunc paucitatem*, spernere. Praecipue Bessus, ferox verbis et parto per scelus regno superbus, ac vix potens mentis, dicere, *Socordia Darii crevisse hostium famam. Occurrisse enim in Ciliciae angustissimis faucibus; cum retrocedendo posset perducere incautos in loca naturae situ invia, tot fluminibus obiectis, tot montium latebris inter quas deprehensus hostis, ne fugae quidem, nedum resistendi occasionem fuerit habiturus. Sibi placere in Sogdianos recedere: Oxum amnem velut murum obiecturum hosti, dum ex finitimis gentibus valida auxilia concurrerent. Venturos autem Chorasmios, et Dahas, Sacasque, et Indos, et ultra Tanaim amnem colentes Scythas; quorum neminem adeo humilem esse, ut humeri eius non possent Macedonis militis verticem aequare.* Conclamant temulenti, unam hanc sententiam salubrem esse: et Bessus circumferri merum largius iubet, debellaturus super

mensam Alexandrum. Erat in eo convivio Cobares, natione Medus, sed magicae artis (si modo ars est, non vanissimi cuiusque ludibrium) magis professione, quam scientia, celebris; alioquin moderatus et probus. Is cum praefatus esset, *scire servo utilius parere dicto, quam afferre consilium, cum illos, qui pareant; idem quod ceteros maneant; qui vero suadeant, proprium periculum*: poculum ei, quod habebat in manu, tradidit. Quo accepto Cobares, *Natura*, inquit, *mortalium hoc quoque nomine prava et sinistra dici potest, quod in suo quisque negotio hebetior est, quam in alieno. Turbida sunt consilia eorum, qui sibi suadent. Obstat metus; aliis cupiditas; nonnunquam naturalis eorum, quae cogitaveris, amor. Nam in te superbia non cadit. Expertus es, unumquemque, quod ipse reperit, aut solum aut optimum ducere. Magnum onus sustines capite regium insigne. Hoc aut moderate perferendum est; aut, quod abominor, in te ruet. Consilio, non impetu, opus est. Adicit deinde, quod apud Bactrianos vulgo usurpabant: *canem timidum vehementius latrare, quam mordere: altissima quaeque flumina minimo sono labi. Quae inserui, ut qualiscunque inter Barbaros potuit esse prudentia, traderetur. In his audientium suspensam dederat expectationem sui. Tum consilium aperit, utilius Besso, quam gratius. In vestibulo, inquit, regiae tuae velocissimus consistit rex. Ante ille agmen, quam tu mensam istam movebis. Nunc ab Tanai exercitum arcesses, et armis flumina oppones. Scilicet qua tu fugiturus es, hostis sequi non potest? iter utrique commune est; victori tutius. Licet strenuum metum putes esse; velocior tamen spes est. Quin validioris occupas gratiam, dedisque te; utcunque cesserit, meliorem fortunam deditus quam hostis habiturus? Alie*.*

*num habes regnum, quo facilius eo careas. Incipies forsitan iustus esse rex, cum ipse fecerit, qui tibi et dare potest regnum et eripere. Consilium habes fidele, quod diutius exsequi supervacuum est. Nobilis equus umbra quoque virgae regitur: ignavus ne calcari quidem concitari potest.* Bessus, et ingenio et multo mero ferox, adeo exarsit, ut vix ab amicis, quo minus occideret eum, (nam strinxerat quoque acinacem) contineretur. Certe e convivio prosilivit haudquaquam potens mentis. Cobares inter tumultum elapsus, ad Alexandrum transfugit. VIII millia Bactrianorum habebat armata Bessus: quae quamdiu propter coeli intemperiem, Indiam potius Macedonas petituros crediderant, obedienter imperata fecerunt; postquam adventare Alexandrum comperitum est, in suos quisque vicos dilapsi, Bessum reliquerunt. Ille cum clientium manu, qui non mutaverant fidem, Oxo amne superato, exustisque navigiis, quibus transierat, ne iisdem hostis uteretur, novas copias in Sogdianis contrahebat. Alexander Caucasum quidem, ut supra dictum est, transierat; sed inopia frumenti prope ad famem ventum erat. Succo ex sesama expresso, haud secus quam oleo, artus perungebant. Sed huius succi ducenis quadragenis denariis amphorae singulae; mellis, denariis trecentis nonagenis; trecentis vini aestimabantur; tritici nihil, aut admodum exiguum reperiebatur. *Siros* vocabant barbari: quos ita sollerter abscondunt, ut, nisi qui defoderunt, invenire non possint. In iis conditae fruges erant. In quarum penuria milites fluviatili pisce et herbis sustinebantur. Iamque haec ipsa alimenta defecerant; cum iumenta, quibus onera portabant, caedere iussi sunt: horum carne, dum in Bactrianos perventum, traxere vitam. Bactrianae terrae multiplex et varia natura est. Alibi multa arbor et vitis largos mitesque fructus alit; solum pingue crebri fontes ri-

gant: quae mitiora sunt, frumento conseruntur, cetera armentorum pabulo cedunt. Magnam deinde partem eiusdem terrae steriles arenae tenent: squalida siccitate regio non hominem, non frugem alit: cum vero venti a Pontico mari spirant, quidquid sabuli in campis iacet, converrunt. Quod ubi cumulatum est, magnorum collium procul species est, omniaque pristini itineris vestigia intereunt. Itaque qui transeunt campos, navigantium modo noctu sidera observant, ad quorum cursum iter dirigunt, et propemodum clarior est noctis umbra, quam lux. Ergo interdiu invia est regio, quia nec vestigium, quod sequantur, inveniunt; et nitor siderum caligine absconditur. Ceterum si quos ille ventus, qui a mari exoritur, deprehendit, arena obruit. Sed qua mitior terra est, ingens hominum equorumque multitudo gignitur. [Itaque Bactriani equites xxx millia expleverant.] Ipsa Bactra, regionis eius caput, sita sunt sub monte Parapamiso. Bactrus annis praeterit moenia. Is urbi et regioni dedit nomen. Hic regi stativa habenti nuntiatur ex Graecia *Peloponnensium Laconumque defectio*. Nondum enim victi erant, cum proficiscerentur tumultus eius principia nuntiaturi. Et alius praesens terror affertur, *Scythas, qui ultra Tanaim amnem colunt, adventare Besso ferentes opem*. Eodem tempore, *quae in gente Ariarum Caranus et Erigyius gesserant*, perferuntur. Commissum erat proelium inter Macedones Ariosque. Transfuga Sattibarzanes barbaris praecerat: qui cum pugnam se-gnem utrimque aequis viribus stare vidisset, in primos ordines adequitavit, demptaque galea, inhibitis qui tela iaciebant, si quis *viritim dimicare vellet*, provocavit ad pugnam, *nudum se caput in certamine habiturum*. Non tulit ferociam barbari dux exercitus Erigyius, gravis quidem aetate, sed et animi et corporis robore nulli juvenum postferendus. Is galea demta

canitiem ostentans, *Venit, inquit, dies, quo aut victoria, aut morte honestissima, quales amicos et milites Alexander habeat, ostendam.* Nec plura elocutus equum in hostem egit. Crederes imperatum, ut acies utraeque tela cohiberent. Protinus certe recesserunt, dato libero spatio; intenti in eventum, non duorum modo, sed etiam suae sortis, quippe alienum discrimen secuturi. Prior barbarus emisit hastam, quam Erigyus modica capitis declinatione vitavit. At ipse infestam sarissam equo calcaribus concito in medio barbari gutture ita fixit, ut per cervicem emineret. Praecipitatus ex equo barbarus adhuc tamen repugnabat. Sed ille extractam ex vulnere hastam rursus in os dirigit. Satibarzanes hastam manu complexus, quo maturius interiret, ictum hostis adiuvit. Et barbari, duce amisso, quem magis necessitate quam sponte secuti erant, tunc haud immemores meritorum Alexandri, arma Erigyio tradunt. Rex his quidem laetus, de Spartanis haudquaquam securus, magno tamen animo defectionem eorum tulit; dicens, *non ante ausos consilia nudare, quam ipsum ad fines Indiae pervenisse cognovissent.* Ipse Bessum persequens copias movit: cui Erigyus spolia barbari, ceu opimum belli decus, praeferens occurrit.

CAP. V. Igitur Bactrianorum regione Artabazo tradita, sarcinas et impedimenta ibi cum praesidio reliquit. Ipse cum expedito agmine loca deserta Sogdianorum intrat, nocturno itinere exercitum ducens. Aquarum, ut ante dictum est, penuria, prius desperatione, quam desiderio bibendi sitim accendit. Per cccc stadia, ne modicus quidem humor existit. Arenas vapor aestivi solis accendit: quae ubi flagrare coeperunt, haud secus quam continenti incendio cuncta torrentur. Caligo deinde, immodico terrae fervore excitata, lucem tegit: camporumque non alia quam vasti et profundi aequoris species est. Noctur-

num iter tolerabile videbatur, quia rore et matutino frigore corpora levabantur. Ceterum cum ipsa luce aestus oritur: omnemque naturalem absorbet humorem siccitas; ora visceraque penitus uruntur. Itaque primum animi, deinde corpora, deficere coeperunt. Pigebat et consistere, et progredi. Pauci a peritis regionis admoniti praepararant aquam. Haec paulisper repressit sitim: deinde crescente aestu rursus desiderium humoris accensum est. Ergo quidquid vini oleique erat, hominibus ingerebatur; tantaque dulcedo bibendi fuit, ut in posterum sitis non timeretur. Graves deinde avide hausto humore non sustinere arma, non ingredi poterant; et feliciores videbantur, quos aqua defecerat, cum ipsi sine modo infusam vomitu cogerentur egerere. Anxium regem tantis malis, circumfusi amici, *ut meminisset sui*, orabant; *animi sui magnitudinem unicum remedium deficientis exercitus esse: cum ex iis, qui praecesserant ad capiendum locum castris, duo occurrunt utribus aquam gestantes, ut filiis suis, quos in eodem agmine esse, et aegre pati sitim non ignorabant, occurrerent. Qui cum in regem incidissent; alter ex iis utre resoluta, vas quod simul ferebat, implet, porrigens regi. Ille accipit: percontatus quibus aquam portarent, filiis ferre cognoscit. Tunc poculo pleno, sicut oblatum est, reddito, nec solus, inquit, bibere sustineo; nec tam exiguum dividere omnibus possum. Vos currite, et liberis vestris, quod propter illos attulistis, date. Tandem ad flumen Oxum ipse pervenit prima fere vespera. Sed exercitus magna pars non potuerat consequi: in edito monte ignes iubet fieri, ut ii, qui aegre sequebantur, haud procul castris se abesse cognoscerent. Eos autem, qui primi agminis erant, mature cibo ac potione firmatos, implere alios utres, alios vasa, quibuscunque aqua possit portari, iussit, ac suis*

*opem ferra.* Sed qui intemperantius hauserant, intercluso spiritu extincti sunt: multoque maior horum numerus fuit, quam ullo amiserat proelio. At ille thoracem adhuc indutus, nec aut cibo refectus aut potu, qua veniebat exercitus, constitit. Nec ante ad curandum corpus recessit, quam praeterierant, qui agmen sequebantur: totamque eam noctem cum magno animi motu perpetuis vigiliis egit. Nec postero die laetior erat, quia nec navigia habebat, nec pons erigi poterat, circum amnem nudo solo, et materia maxime sterili. Consilium igitur, quod unum necessitas subiecerat, inquit. Utres quamplurimos stramentis refertos dividit. His incubantes transnavere amnem: quique primi transierant, in statione erant, dum traicerent ceteri. Hoc modo sexto demum die in ulteriore ripa totum exercitum exposuit. Iamque ad persequendum Bessum statuerat progredi; cum ea, quae in Sogdianis erant, cognoscit. Spitamenes erat inter omnes amicos praecipuo honore cultus a Besso. Sed nullis meritis perfidia mitigari potest: quae tamen minus in eo invisae esse poterat, quia nihil ulli nefastum in Bessum interfectorem regis sui videbatur. Titulus facinoris speciosus praeferebatur, *vindicta Darii*: sed fortunam, non scelus oderant Bessi. Nam ut Alexandrum flumen Oxum superasse cognovit; Dataphernem et Catenem, quibus a Besso maxima fides habebatur, in societatem rei adsciscit. Illi promptius adeunt, quam rogabantur; assumptisque octo fortissimis iuvenibus, talem dolum intendunt. Spitamenes pergit ad Bessum, et remotis arbitris, *comperisse ait se, insidiari ei Dataphernem et Catenem; ut vivum Alexandro traderent agitantem, a semet occupatos esse, et victos teneri.* Bessus tanto merito, ut credebat, obligatus, partim gratius agit, partim avidus explendi supplicii *adduci eos iubet.* Illi manibus sua sponte religatis, a participibus



consillii trahebantur: quos Bessus truci vultu intuens consurgit, manibus non temperaturus. At illi simulatione omissa circumstant eum, et frustra repugnantem vinciunt; direpto ex capite regni insigni, lacera-  
taque veste, quam spoliis occisi regis induerat. Ille *Deos sui sceleris ultores adesse* confessus, adiecit, *non Dario iniquos fuisse, quem sic ulciscerentur; sed Alexandro propitios, cuius victoriam semper etiam hostis adiuvisset.* Multitudo an vindictura Bessum fuerit, incertum est; nisi illi, qui vixerant, *iussu Alexandri fecisse ipsos* e mentiti, dubios adhuc animi terruissent. In equum impositum Alexandro tradituri ducunt. Inter haec rex, quibus matura erat missio, electis pœcc fere, equiti bina talenta dedit; pediti terna denariam millia: monitosque *ut liberos generarent*, remisit domum. Ceteris gratiae actae, quod *ad reliqua belli navaturos operam* pollicebantur. [Tum Bessus perducitur.] Perventum erat in parvulum oppidum; Branchidae eius incolae erant. Mileto quondam iussu Xerxis, cum e Graecia rediret, transierant, et in ea sede constiterant, quia templum, quod Didymeon appellatur, in gratiam Xerxis violaverant. Mores patrii nondum exoleverant: sed iam bilingues erant, paullatim a domestico externoque sermone degeneres. Magno igitur gaudio regem excipiunt, urbem seque dedentes. Ille *Milesios, qui apud ipsum militarent, convocari* iubet. Vetus odium Milesii gerebant in Branchidarum gentem. Proditis ergo, *sive iniuriae, sive originis meminisse malent, liberum de Branchidis* permittit arbitrium. Variantibus deinde sententiis, *se ipsum consideraturum quod optimum factu esset*, ostendit. Postero die occurrentibus, *Branchidas secum procedere* iubet. Cumque ad urbem ventum esset, ipse cum expedita manu portam intrat. *Phalaux moenia oppidi circumire* iussa; *et dato signo diripere urbem*

*proditorum receptaculum, ipsosque ad unum caedere. Illi inermes passim trucidantur; nec aut commercio linguae, aut supplicum velamentis precibusque inhiberi crudelitas potest. Tandem ut deiicerent, fundamenta murorum ab imo moliantur, ne quod urbis vestigium exstaret. Nec mora, lucos quoque sacros non caedunt modo, sed etiam extirpant, ut vasta solitudo et sterilis humus, excussis etiam radicibus, linqueretur. Quae si in ipsos prodicionis auctores excogitata essent; iusta ultio esse, non crudelitas videretur: nunc culpam maiorum posteri luere, qui ne viderant quidem Miletum, adco Xerxi non potuerant prodere. Inde processit ad Tanaim amnem. Quo perductus est Bessus non vinctus modo, sed etiam omni velamento corporis spoliatus. Spitamenes eum tenebat collo inserta catena; tam barbaris, quam Macedonibus, gratum spectaculum. Tum Spitamenes, et te, inquit, et Darium, reges meos ultus, interfectorem domini sui adduxi, eo modo captum, cuius ipse fecit exemplum. Aperiat ad hoc spectaculum oculos Darius. Exsistat ab inferis, qui illo supplicio indignus fuit, et hoc solatio dignus est. Alexander, multum collaudato Spitamene, conversus ad Bessum, Cuius, inquit, ferae rabies occupavit animum tuum, cum regem de te optime meritum prius vincire, deinde occidere sustinuisti? Sed huius parricidii mercedem falso regis nomine persolvisti. Ibi ille facinus purgare non ausus, regis titulum se usurpare dixit, ut gentem suam tradere ipsi possit: qui si cessasset, alium fuisse regnum occupaturum. At Alexander Oxathrem, fratrem Darii, quem inter corporis custodes habebat, propius iussit accedere; tradique Bessum ei, ut cruci affixum mutilatis auribus naribusque sagittis confingerent barbari; adservarentque corpus, ut ne aves quidem contingerent. Oxathres cetera sibi*

*curae fore pollicetur. Aves non ab alio, quam a Catene, posse prohiberi* adicit, eximiam eius artem cupiens ostendere: namque adeo certo ictu destinata feriebat, ut aves quoque exciperet. Nam etsi forsitan sagittandi tam celebri usu minus admirabilis videri haec ars possit; tamen ingens visentibus miraculum, magnoque honori Cateni fuit. Dona deinde omnibus, qui Bessum adduxerant, data sunt. Ceterum supplicium eius distulit, *ut eo loco, in quo Darium ipse occiderat, necaretur.*

CAP. VI. Interea Macedones, ad petendum pabulum incomposito agmine egressi, a barbaris, qui de proximis montibus decurrerunt, opprimuntur; pluresque capti sunt quam occisi: barbari autem, captivos prae se agentes, rursus in montem recesserunt. xx millia latronum erant. Fundis sagittisque pugnam invadunt. Quos dum obsidet rex, inter promptissimos dimicans sagitta ictus est, quae in medio crure fixa reliquerat spiculum. Illum quidem moesti et attoniti Macedones in castra referebant: sed nec barbaros fefellit subductus ex acie rex; quippe ex edito monte cuncta prospexerant. Itaque postero die misere legatos ad regem, quos ille *protinus* iussit *admitti*; solutisque fasciis magnitudinem vulneris dissimulans, crus barbaris ostendit. Illi iussi *considerare* affirmant, *non Macedonas, quam ipsos fuisse tristiores cognito vulnere ipsius: cuius si auctorem reperissent, dedituros fuisse; cum Diis enim pugnare sacrilegos tantum. Ceterum se gentem in fidem dedere, superatos virtute illius.* Rex, fide data, et captivis receptis, gentem in deditionem accepit. Castris inde motis lectica militari ferebatur, quam pro se quisque eques pedesque subire certabant. Equites, cum quibus rex proelia inire solitus erat, sui muneris id esse censebant. Pedites contra, cum saucios commilitones ipsi gestare adsuevissent; eripi sibi

*proprium officium tum potissimum, cum rex gestandus esset, querebantur. Rex, in tanto utriusque partis certamine, et sibi difficilem, et praeteritis gravem electionem futuram ratus, invicem subire eos iussit. Hinc quarto die ad urbem Maracanda perventum est. LXX stadia murus urbis amplectitur: arx nullo cingitur muro. Praesidio urbi relicto, proximos vicos depopulatur atque urit. Legati deinde Abiorum Scytharum superveniunt; liberi, ex quo decesserat Cyrus; tum imperata facturi. Iustissimos barbarorum constabat: armis abstinebant, nisi lacessiti: libertatis modico et aequali usu, principibus humiliores pares fecerunt. Hos benigne allocutus, ad eos Scythas, qui Europam incolunt, Penidam quemdam misit ex amicis, qui denuntiaret eis, ne Tanaim amnem regionis iniussu regis transirent. Eidem mandatum, ut contempleretur locorum situm; et illos quoque Scythas, qui super Bosphoro incolunt, viseret. Condendae urbis sedem super ripam Tanais elegerat; claustrum et iam perdomitorum, et quos deinde adire decreverat. Sed consilium distulit Sogdianorum nuntiata defectio, quae Bactrianos quoque traxit. VII millia equitum erant, quorum auctoritatem ceteri sequebantur. Alexander Spitamenum et Catenem, a quibus ei traditus erat Bessus, haud dubius quia eorum opera redigi possent in potestatem, coercendo eos, qui novaverant res, iussit accessiri. At illi defectionis, ad quam coercendam evocabantur, auctores, vulgaverant famam, Bactrianos equites a rege omnes, ut occiderentur accessiri: idque imperatum ipsis, non sustinuisse tamen exsequi, ne inexpiabile in populares facinus admitterent. Non magis Alexandri saevitiam, quam Bessi parricidium, ferre potuisse. Itaque sua sponte iam motos, metu poenae haud difficulter concitaverunt ad arma. Alexander, transfugarum defo-*

ctione comperta, *Craterum obsidere Cyropolim*  
 iubet; ipse aliam urbem regionis eiusdem corona  
 capit; signoque, ut puberes interficerentur, dato, reli-  
 qui in praedam cessere victoris: urbs diruta est, ut ce-  
 teri cladis exemplo continerentur. Memaceni, valida  
 gens, obsidionem non ut honestiorem modo, sed etiam  
 ut tutiorem, ferre decreverant. Ad quorum pertina-  
 ciam ~~mitigandam~~ rex L. equites praemisit, qui *cle-*  
*mentiam ipsius in deditos, simulque inexorabilem*  
*animum in devictos* ostenderent. Illi, *nec de fide,*  
*nec de potentia regis, ipsos aubitare* respondent;  
 equitesque *tendere extra munimenta urbis* iubent.  
 Hospitaliter deinde exceptos, gravesque epulis et  
 somno, interpesta nocte adorti interfecerunt. Ale-  
 xander haud secus, quam par erat, motus, urbem  
 corona circumdedit; munitiorem, quam ut primo  
 impetu capi posset. Itaque Meleagram et Perdiccam  
 in obsidionem iungit, Cyropolim, ut ante dictum est,  
 obsidentes. Statuerat autem parcere urbi conditae a  
 Cyro: quippe non alium gentium illarum magis ad-  
 miratus est, quam hunc regem, et Semiramim, in quib  
*et magnitudinem animi, et claritatem rerum, longe*  
*emicuisse* credebat. Ceterum pertinacia oppidano-  
 rum eius iram accendit. Itaque *captam urbem diri-*  
*pere* iussit *delectos Macedones*, haud iniuria infestos;  
 et ad Meleagram et Perdiccam redit. Sed non alia  
 urbs fortius obsidionem tulit: quippe et militum  
 promissimi cecidere; et ipse rex ad ultimum pericu-  
 lum venit: namque cervix eius saxo ita icta est, ut  
 oculis caligine offusa collaberetur, ne mentis quidem  
 compos; exercitus certe velut erepto eo ingemuit.  
 Sed invictus adversus eam, quae ceteros terrent, non-  
 dum percurato vulnere, acrius obsidioni institit, na-  
 turalem celeritatem ira concitante. Cuniculo ergo  
 suffossa moenia ingens nudavere spatium, per quod  
 irrupit, victorque urbem dirui iussit. Hinc Menede-

num cum III millibus peditum et DCCC equitibus ad urbem Maracanda misit. Spitamenes transfuga, praesidio Macedonum inde deiecto, muris urbis eius incluserat se; haud oppidanis consilium defectionis approbantibus. Sequi tamen videbantur, quia prohibere non poterant. Interim Alexander ad Tanaim amnem redit, et quantum soli occupaverant castris, muro circumdedit. LX stadiorum urbis murus fuit: hanc quoque urbem *Alexandriam* appellari iussit. Opus tanta celeritate perfectum est, ut decimo septimo die, qua munimenta excitata erant, tecta quoque urbis absolverentur. Ingens militum certamen inter ipsos fuerat, ut suum quisque munus (nam divisum erat) primus ostenderet. Incolae novae urbi dati captivi, quos reddito pretio dominis liberavit, quorum posteri nunc quoque non apud eos tam longa aetate propter memoriam Alexandri exoleverunt.

CAP. VII. Rex Scytharum, cuius tum ultra Tanaim imperium erat, ratus eam urbem, quam in ripa amnis Macedones condiderant, suis impositam esse cervicibus, fratrem Cartasim nomine cum magna equitum manu misit *ad diruendam eam, proculque amne submovendas Macedonum copias.* Bactrianos Tanais ab Scythis, quos Europaeos vocant, dividit. Idem Asiam et Europam finis interfluit. Ceterum Scytharum gens haud procul Thracia sita ab Oriente ad Septentrionem se vertit, Sarmatarumque, ut quidam credidere, non finitima, sed pars est. Recta deinde regionem aliam ultra Istrum iacentem colit: ultima Asiae, quae Bactra sunt, stringit. Quae Septentrioni proxima sunt, profundae inde silvae, vastaeque solitudines excipiunt. Rursus quae ad Tanaim et Bactra spectant, humano cultu haud disparia sunt. Primus cum hac gente non provisum bellum Alexander gesturus, cum in conspectu eius obequitaret hostis, adhuc aeger ex vulnere, praecipue voce deficiens, quam et

CVRTIVS.

O

modicus cibus et cervicis extenuabat dolor, *amicos in consilium advocari iubet*. Terrebat eum non hostis, sed iniquitas temporis. Bactriani defecerant: Scythae etiam lacescebant: ipse non insistere in terra, non equo vehi, non docere, non hortari suos poterat. Ancipiti periculo implicitus, Deos quoque incusans, querebatur, *se iacere segnem, cuius velocitatem nemo antea valuisset effugere: vix suos credere non simulari valetudinem*. Itaque qui post Darium victum ariolos et vates consulere desierat, rursus ad superstitionem, humanarum mentium ludibria, revolutus, *Aristandrum*, cui credulitatem suam addixerat, *explorare eventum rerum sacrificiis* iubet. Mos erat aruspicibus exta sine rege spectare, et quae portenderentur, referre. Inter haec rex, dum fibris pendendum explorantur eventus latentium rerum, *propius ipsum considerare amicos* iubet, *ne contentione vocis cicatricem infirmam adhuc rumperet*. Hephaestion, Craterus, et Erigyus erant cum custodibus in tabernaculum admissi. *Discrimen*, inquit, *me occupavit meliore hostium, quam meo tempore. Sed necessitas ante rationem est: maxime in bello, quo raro permittitur tempora eligere. Defecere Bactriani, in quorum cervicibus stamus; et quantum in nobis animi sit, alieno Marte experiuntur. Haud dubie, si omiserimus Scythas ultro arma inferentes, contenti ad illos, qui defecerunt, revertemur. Si vero Tanaim transierimus, et ubique invictos esse nos Scytharum pernicie ac sanguine ostenderitimus; quis dubitabit patere etiam Europam victaribus? Fallitur, qui terminos gloriae nostrae metitur spatio, quod transituri sumus. Unus annis interfuit, quem si traicimus, in Europam arma proferrimus. Et quanti aestimandum est, dum Asiam subigimus, in alio quodammodo orbe torpaeae statuere: et quae tam longo intervallo natura vi*

*detur diremissae, una victoria subito committere? At hercule si paullulum cessaverimus; in tergis nostris Scythae haerebunt. An soli sumus, qui flumina transnare possumus? Multa in nosmet ipsos recident, quibus adhuc vicimus. Fortuna, belli artem victos quoque docet. Utribus amnem traiciendi exemplum fecimus nuper: hoc ut Scythae imitari nesciant, Bactriani docebunt. Praeterea unus gentis huius adhuc exercitus venit, ceteri expectantur. Ita bellum vitando alemus; et quod inferre possemus, accipere cogemur. Manifesta est consilii mei ratio. Sed an permissuri sint Macedones animo uti meo, dubito; quia ex quo hoc vulnus accepi, non equo vectus sum, non pedibus ingressus. Sed si me sequi vultis, valeo, amici. Satis virium est ad toleranda ista: aut si iam adest vitae meae finis, in quo tandem opere melius exstinguar? Haec quassa adhuc voce subdeficiens, vix proximis exaudientibus, dixerat; cum omnes a tam praecipiti consilio regem detertere coeperunt. Erigyus maxime: qui haud sane auctoritate proficiens apud obstinatum animum, superstitionem, cuius potens non erat rex, incutere tentavit, dicendo, Deos quoque obstare consilio; magnumque periculum, si flumen transisset, ostendi. Intranti Erigyio tabernaculum regis Aristander occurrerat, tristia exta fuisse significans: haec ex vate comperta Erigyus nuntiabat. Quo inhibito, Alexander, non ira solum, sed etiam pudore confusus, quod superstitio, quam celaverat, detegebatur, Aristandrum vocari iubet. Qui ut venit, intuens eum, Non rex, inquit, sed privatus sum. Sacrificium ut faceres, mandavi; quid eo portenderetur, cur apud alium, quam apud me professus es? Erigyus arcana mea et secreta te prodente cognovit. Quem certum mehercule habeo, extorum interprete uti metu suo.*



*Tibi autem quam potest, denuntio, ipse mihi indices, quid ex extis cognoveris; ne possis infitiri dixisse, quae dixeris.* Ille exsanguis attonitoque simili stabat, per metum etiam voce suppressa: tandemque eodem metu stimulante, ne regis expectationem moraretur, Magni, inquit, laboris, non irriti discrimen instare praedixi: nec mea ars, quam benevolentia me perturbat. *Infirmi- tatem valetudinis tuae video, et quantum in uno te sit scio. Vereor, ne non prassenti fortunae tuae sufficere possis.* Rex insum confidere felicitati suae remisit. *Sibi enim ad alia gloriam concedere Deos.* Consultanti deinde cum iisdem, quonam modo flumen transirent? supervenit Aristander, non alias laetiora exta vidisse se affirmans: utique prioribus longe diversa. *Tum sollicitudinis causas apparuisse; nunc prorsus egregie litatum esse.* Ceterum quae subinde nuntiata sunt regi, continuae felicitati rerum eius imposuerant labem. Menedemum, ut supra dictum est, miserat ad obsidendum Spitamenem Bactrianae defectionis auctorem. Qui comperto hostis adventu, ne muris urbis includeretur, simul fretus excipi posse; qua venturum sciebat, consedit occultus. Silvestre iter aptum insidiis tegendis erat: ibi Dahas condidit. Equi binos armatos vehunt quorum invicem singuli repente desiliunt: equestris pugnae ordinem turbant. Equorum velocitati par est hominum pernicitas. Hos Spitamenes saltum circumire iussos pariter et a lateribus, et a fronte, et a tergo hosti ostendit. Menedemus undique inclusus, ne numero quidem par, diu tamen restitit; clamitans, *nihil aliud superesse locorum fraude deceptis, quam honestae mortis solatium ex hostium caede.* Ipsum praevalens equus vehebat, quo saepius in cuneos barbarorum effusis habenis evectus, magna strage eos fuderat. Sed cum unum omnes peterent, multis vul-

neribus exsanguis Hypsidem quendam ex amicis hortatus est, *ut in equum suum ascenderet, et se fuga eriperet.* Haec agentem anima defecit, corpusque ex equo defluxit in terram. Hypsides poterat quidem effugere; sed amisso amico mori statuit. Una erat cura, ne inultus occideret. Itaque subditis calcaribus equo in medios hostes se immisit, et memorabili edita pugna obrutus telis est. Quod ubi videre, qui caedi supererant, tumultum paullo quam cetera editiorem capiunt. Quos Spítāmenes fame in deditionem subacturus obsedit. Cecidere eo proelio peditum II millia, CCC equites. Quam cladem Alexander sollerti consilio texit, *morte denuntiata iis, qui ex proelio venerant, si acta vulgassent.*

CAP. VIII. Ceterum cum animo disparem vultum diutius ferre non posset; in tabernaculum super ripam fluminis de industria locatum secessit. Ibi sine arbitris singula animi consulta pensando, noctem vigiliis extraxit, saepe pellibus tabernaculi adlevatis, ut conspiceret hostium ignes, e quibus coniectare poterat, quanta hominum multitudo esset. Iamque lux apparebat, cum thoracem indutus procedit ad milites, tum primum post vulnus proxime acceptum. Tanta erat apud eos veneratio regis, ut facile periculi, quod horrebant, cogitationem praesentia eius excuteret. Laeti ergo et manantibus prae gaudio lacrimis, consalutant eum; et quod ante recusaverant bellum, feroces deponunt. Ille *se ratibus equitem phalangemque transportaturum esse* pronuntiat; *super utres iubet nare levius armatos.* Plura nec dici res desideravit, nec rex dicere per valetudinem potuit. Ceterum tanta alacritate militum rates iunctae sunt, ut in triduum ad XII millia effectae sint. Iamque ad transeundum omnia aptaverant; cum legati Scytharum XX, more gentis per castra equis vecti, *nuntiari iubent regi, velle ipsos ad eum mandata perferre.* Admissi in

tabernaculum, iussique *considerere*, in vultu regis defixerant oculos; credo quia magnitudine corporis animum aestimantibus modicus, haudquaquam famae par videbatur. Scythis autem non ut ceteris barbaris rudis et inconditus sensus est: quidam eorum sapientiam capere dicuntur, quantumcunque gens capit semper armata. Sicque locutos esse apud regem memoriae proditum est. Abhorrent forsitan moribus nostris, et tempora et ingenia cultiora sortitis; sed ut possit oratio eorum sperni, tamen fides nostra non debet. Quae utcunque tradita sunt, incorrupta perferemus. Igitur unum ex his maximum natu ita locutum accepimus. *Si Dii habitum corporis tui aviditati animi parem esse voluissent; orbis te non caperet: altera manu Orientem, altera Occidentem contingeres. Et hoc assecutus scire velles, ubi tanti numinis fulgor conderetur. Sic quoque concupiscis, quae non capis. Ab Europa petis Asiam; ex Asia transis in Europam: deinde si humanum genus omne superaveris, cum silvis, et nivibus, et fluminibus, ferisque bestiis gesturus es bellum. Quid tu, ignoras arbores magnas diu crescere; una hora exstirpari? Stultus est, qui fructus earum spectat, altitudinem non metitur. Vide, ne dum ad cacumen pervenire contendis, cum ipsis ramis, quos comprehenderis, decidas. Leo quoque aliquando minimarum avium pabulum fuit: et ferrum rubigo consumit. Nihil tam firmum est, cui periculum non sit etiam ab invalido. Quid nobis tecum est? nunquam terram tuam attigimus. Qui sis, unde venias, licetne ignorare in vastis silvis viventibus? Nec servire ulli possumus, nec imperare desideramus. Dona nobis data sunt, ne Scytharum gentem ignores, iugum boum, aratrum, et sagitta, et patera. His utimur et cum amicis, et adversus inimicos. Fruges amicis damus boum labore quae-*

*sitas: patera cum his vinum Diis libamus: inimicos sagitta eminus, hasta cominus petimus. Sic Syriae regem, et postea Persarum, Medorumque superavimus; patuitque nobis iter usque in Aegyptum. At tu, qui te gloriaris ad latrones persequendos venire, omnium gentium, quas adisti, latro es. Lydiam cepisti: Syriam occupasti: Persidem tenes: Bactrianos habes in potestate: Indos petisti: iam etiam ad pecora nostra avaras et instabiles manus porrigis. Quid tibi divitiis opus est, quae te esurire cogunt? Primus omnium satietate parasti famem; ut quo plura haberes, acrius, quae non habes, cuperes. Non succurrit tibi, quamdiu circum Bactra haereas? dum illos subigis, Sogdiani bellare coeperunt. Bellum tibi ex victoria nascitur. Nam ut maior fortiorque sis quam quisquam; tamen alienigenam dominum pati nemo vult. Transi modo Tanaim: scies, quam late pateant; nunquam tamen consequeris Scythas. Paupertas nostra velocior erit, quam exercitus tuus, qui praedam tot nationum vehit. Rursus cum procul abesse nos credes, videbis in tuis castris. Eadem velocitate et sequimur, et fugimus. Scytharum solitudines Graecis etiam proverbiiis audio eludi. At nos deserta et humano cultu vacua, magis quam urbes et opulentos agros sequimur. Proinde fortunam tuam pressis manibus tene. Lubrica est, nec invita teneri potest. Salubre consilium sequens quam praesens tempus ostendit melius. Impone felicitati tuae frenos, facilius illam reges. Nostri sine pedibus dicunt esse fortunam, quae manus et pennas tantum habet; cum manus porrigit, pennas quoque comprehendere non sinit. Denique si Deus es, tribuere mortalibus beneficia debes; non sua eripere: sin autem homo es; id quod es, semper esse te cogita. Stultum est eorum meminisse, pro-*

*rogationes  
biles*

*pter quae tui oblivisceris. Quibus bellum non intuleris, bonis amicis poteris uti. Nam et firmissima est inter pares amicitia; et videntur pares, qui non fecerunt inter se periculum virium. Quos videris, amicos tibi esse cave credas. Inter dominum et servum nulla amicitia est. Etiam in pace, belli tamen iura servantur. Iurando gratiam Scythas sancire ne credideris. Colendo fidem, iurant. Graecorum ista cautio est, qui acta consignant, et Deos invocant. Nos religionem in ipsa fide novimus. Qui non reverentur homines, fallunt Deos. Nec tibi amico opus est, de cuius benevolentia dubites. Ceterum nos et Asiae et Europae custodes habebis: Bactra, nisi dividat Tanais, contingimus: ultra Tanaim usque ad Thraciam colimus; Thraciae Macedoniam coniunctam esse fama est. Utrique imperio tuo finitimos, hostes an amicos velis esse, considera.*

CAP. IX. Haec barbarus. Contra rex fortuna sua et consiliis suorum se usurum esse respondet. Nam et fortunam, cui confidat, et consilium suadentium, ne quid temere et audacter faciat, secuturum. Dimissisque legatis, in praeparatas rates exercitum imposuit. In proris clypeatos locaverat, insos in genua subsidentes, quo tutiores essent adversus ictus sagittarum. Post hos qui tormenta intenderent, stabant; et ab utroque latere, et a fronte circumdati armatis. Reliqui, qui post tormenta constiterant, remigem lorica indutum scutorum testudine armati protegebant. Idem ordo in illis quoque ratibus, quae equitem vehebant, servatus est. Maior pars a puppe nantes equos loris trahebat. At illos, quos utres stramento repleti vehebant, obiectae rates tuebantur. Ipse rex cum delectis primus ratem solvit, et in ripam dirigi iussit. Cui Scythae admotos ordines equitum in primo ripae margine opponunt, ut

ne applicari quidem terrae rates possent. Ceterum praeter hanc speciem ripis praesidentis exercitus, iugens navigantes terror invaserat: namque cursum gubernatores, cum obliquo flumine impellerentur, regere non poterant; vacillantesque milites, et ne excuterentur solliciti, nautarum ministeria turbaverant. Ne tela quidem conati nixu vibrare poterant; cum prior standi sine periculo, quam hostem incessendi, cura esset. Tormenta saluti fuerunt, quibus in confertos ac temere se offerentes, haud frustra excussa sunt tela. Barbari quoque ingentem vim sagittarum infudere ratibus. Vixque ullum fuit scutum, quod non pluribus simul spiculis perforaretur. Iamque terrae rates applicabantur, cum acies clypeata consurgit, et hastas certo ictu, utpote libero nixu, mittit e ratibus. Et ut territos recipientesque equos videre; alacres mutua adhortatione in terram desilire. Turbatis acriter pedem inferre coeperunt. Equitum deinde turmae, quae frenatos habebant equos, perfregere barbarorum aciem. Interim ceteri agmine dimicantium tecti aptavere se pugnae. Ipse rex, quod vigoris, aegro adhuc corpore, deerat, animi firmitatae supplebat. Vox adhortantis non poterat audiri, nondum bene obducta cicatrice cervicis; sed dimicantem cuncti videbant. Itaque ipsi quidem ducum fungebantur officio; aliusque alium adhortati in hostem salutis immemores ruere coeperunt. Tum vero non ora, non arnia, non clamorem hostium barbari tolerare potuerunt; omnesque effusis habenis (namque equestris acies erat) capessunt fugam. Quos rex, quamquam vexationem invalidi corporis pati non poterat, per LXXX tamen stadia insequi perseveravit. Iamque linquente animo suis praecepit, *ut donec lucis aliquid superesset, fugientium tergis inhaererent*: ipse exhaustis etiam animi viribus, in castra se recepit, reliquum substitit. Transierant iam Liberi patris terminos; quorum monumen-

ta lapides erant crebris intervallis dispositi, arboresque procerae, quarum stipites hedera contexerat. Sed Macedonas ira longius provexit: quippe media fere nocte in castra redierunt, multis interfectis, pluribus captis, equosque MDCCC abegere. Ceciderunt autem Macedonum equites LX, pedites c fere, mille saucii fuerunt. Haec expeditio deficientem magna ex parte Asiam fama tam opportuna victoriae domuit. Invictos Scythas esse crediderant; *quibus fractis nullam gentem Macedonum armis parem fore confitebantur.* Itaque Sacae misere legatos, qui pollicerentur, *gentem mandata facturam.* Moverat eos regis non virtus magis, quam clementia in devictos Scythas: quippe captivos omnes sine pretio remiserat, ut fidem faceret, sibi cum ferocissimis gentium de fortitudine, non de ira fuisse certamen. Benigne igitur exceptis Sacarum legatis, comitem Excipinium dedit, admodum juvenem aetatis flore conciliatum sibi; qui cum specie corporis aequaret Hephaestionem, lepore haud sane illi par erat. Ipse, *Cratero cum maiore parte exercitus modicis itineribus sequi iusso,* ad Maracanda urbem pervenit; ex qua Spitamenes cognito eius adventu Bactra perfugerat. Itaque quadriduo rex longum itineris spatium emensus pervenerat in eum locum, in quo, Menedemo duce, II millia pedestum, et CCC equites amiserat. Horum ossa tumulo contegi iussit, et inferias more patrio dedit. Iam Craterus, cum phalange subsequi iussus, ad regem pervenerat. Itaque ut omnes, qui defecerant, pariter belli clade premerentur, copias dividit; *urique agros et interfici puberes* iussit.

CAP. X. Sogdiana regio maiori ex parte deserta est: octingenta fere stadia in latitudinem vastae solitudines tenent. Ingens spatium rectae regionis est, per quam amnis, *Polytimetum* vocant incolae, fertur torrens. Eum ripae in tenuem alveum co-

gunt; deinde caverna accipit, et sub terram rapit. Cursus absconditi indicium est aquae meantis sonus; cum ipsum solum, sub quo tantus amnis fluit, ne modico quidem resudet humore. Ex captivis Sogdianorum ad regem xxx nobilissimi, corporum robore eximio, perducti erant: qui ut per interpretem cognoverunt, iussu *regis ipsos ad supplicium trahi*, carmen laetantium more canere tripudiisque et lasciviori corporis motu gaudium quoddam animi ostentare coeperunt. Admiratus rex, tanta magnitudine animi oppetere mortem, *revocari eos iussit; causam tam effusae laetitiae, cum supplicium ante oculos haberent*, requirens. Illi, *si ab alio occiderentur, tristes morituros fuisse* respondent; *nunc a tanto rege, victore omnium gentium, maioribus suis redditos, honestam mortem, quam fortes viri voto quoque expeterent, carminibus sui moris laetitiaque celebrare*. Tum rex, *quaero itaque, inquit, an vivere velitis non inimici mihi, cuius beneficio victuri estis?* Illi, *nunquam se inimicos ei; sed bello lacessitos, hostes fuisse* respondent. *Si quis ipsos beneficio, quam iniuria experiri maluisset; certaturos fuisse, ne vincerentur officio. Interrogantique, quo pignore fidem obligaturi essent? Vitam, quam acciperent, pignori futuram esse dixerunt. Reddituros quandoque repetisset.* Nec promissum fefellerunt. Nam qui remissi domos ierant, in fide continuere populares: quatuor inter custodes corporis retenti, nulli Maedonum in regem caritate cesserunt. In Sogdianis Pencolao cum tribus millibus peditum (neque enim maiori praesidio indigebat) relicto, Bactra pervenit. Inde *Bessum Ecbatana duci* iussit, *interfecto Dario poenas capite persoluturum*. Iisdem fere diebus Ptolemaeus et Menidas peditum tria millia, et equites mille adduxerunt mercede militaturos. Alexander quoque ex Lycia cum pars



número peditum, et D equitibus venit. Totidem e Syria Asclepiodorum sequebantur: Antipater Gracorum VIII millia, in quibus D equites erant, miserat. Itaque exercitu aucto, ad ea quae defectione turbata erant, componenda processit; interfectisque consternationis auctoribus, quarto die ad flumen Oxum peruentum est. Hic quia limum vehit, turbidus semper et insalubris est potu. Itaque puteos miles coeperat fodere. Nec tamen humo alte egesta exsistebat humor; cum in ipso tabernaculo regis conspectus est fons, quem quia tarde notaverant, *subito exstitisse* sinxerunt. Rexque ipse credi voluit, *donum Dei id fuisse*. Superatis deinde omnibus Ocho et Oxo, ad urbem Marginiam pervenit. Circa eam VI oppidis condendis electa sedes est. Duo ad Meridiem versa, quatuor spectantia Orientem, modicis inter se spatiis distabant, ne procul repetendum esset mutuum auxilium. Haec omnia sita sunt in editis collibus: tum velut freni domitarum gentium; nunc originis suae oblita serviunt, quibus imperaverunt. Et cetera quidem pacaverat rex.

CAP. XI. Vna erat petra, quam Arimazes Sogdianus cum xxx millibus armatorum obtinebat, alimentis ante congestis, quae tantae multitudini vel per biennium suppetere. Petra in altitudinem xxx eminent stadia, circumitu C et L complectitur. Undique abscissa et abrupta, semita perangusta aditur. In medio altitudinis spatio habet specum, cuius os arctum et obscurum est: paullatim deinde ulteriora panduntur; ultima etiam altos recessus habent. Fontes per totum fere specum manant; e quibus collatae aquae per prona montis flumen emittunt. Rex, loci difficultate spectata, statuerat inde abire: cupido deinde incessit animo, naturam quoque fatigandi. Prius tamen quam fortunam obsidionis experiretur, Cophan (Artabazi hic filius erat) misit ad barbaros, qui suade-

ret, ut dederent rupem. Arimazes loco fractus superbe multa respondit. Ad ultimum, *an Alexander volare possit?* interrogat. Quae nuntiata regi, sic accendere animum, ut adhibitis, cum quibus consultare erat solitus, indicaret *insolentiam barbari, eludentis ipsos, quia pennas non haberent. Se autem proxima nocte effecturum, ut crederet Macedones etiam volare.* Trecentos, inquit, *pernicissimos iuvenes ex suis quisque copiis perducite ad me, qui per calles et paene invias rupes domi pecora agere consueverint.* Illi praestantes et levitate corporum, et ardore animorum, strenue adducunt: quos intuem rex, *Vobiscum,* inquit, *o iuvenes, et mei aequales, urbium invictarum ante munimenta superavi: montium iuga perenni nive obruta emensus sum: angustias Ciliciae intravi: Indiae sine lassitudine vim frigoris sum perpessus. Et mei documenta vobis dedi, et vestri habeo. Petra, quam videtis, unum aditum habet, quem barbari obsident; cetera negligunt: nullae vigiliae sunt, nisi quae castra nostra spectant. Invenietis viam, si sollerter rimati fueritis aditus ferentes ad cacumen. Nihil tam alte natura constituit, quo virtus non possit eniti. Experiendo quae ceteri desperaverunt, Asiam habemus in potestate. Evadite in cacumen: quod cum ceperitis, candidis velis signum mihi dabit. Ego copiis admotis hostem in nos a vobis convertam. Praemium erit ei, qui primus occupaverit verticem, talenta x: uno minus accipiet, qui proximus ei venerit: eademque ad decem homines servabitur portio. Certum autem habeo, vos non tam liberalitatem intueri meam, quam voluntatem.* His animis regem audierunt, ut iam cepisse verticem viderentur. Dimissique ferreos cuneos, quos inter saxa defigerent, validosque funes parabant. Rex circumvectus petram, qua minime asper

ac praeruptus aditus videbatur, secunda vigilia, quod bene verteret, ingredi iubet. Illi alimentis in biduum sumtis, gladius modo atque hastis armati subire coeperunt. Ac primo pedibus ingressi sunt: deinde ut in praerupta perventum est, alii manibus eminentia saxa complexi levare scmet; alii adiectis funium laqueis evasere, cum cuneos inter saxa defigerent, quis gradus subinde insisterent. Diem inter metum laboremque consumserunt. Per aspera enixis duriora restabant, et crescere altitudo petrae videbatur. Illa vero miserabilis erat facies, cum ii, quos instabilis gradus fefellerat, ex praecipiti devolverentur. Mox eadem in se patienda alieni casus ostendebat exemplum. Per has tamen difficultates enituntur in verticem montis, omnes fatigatione continuati laboris affecti; quidam multati parte membrorum; pariterque eos et uox et somnus oppressit. Stratis passim corporibus in invicem et in asperis saxorum, periculi instantis obliti in lucem quieverunt: tandemque velut ex alto sopore excitati, occultas subiectasque ipsis valles rimantes, ignari in qua parte petrae tanta vis hostium condita esset, fumum specus infra se ipsos evolutum notaverunt. Ex quo intellectum est, illam hostium latebram esse. Itaque hastis imposuere, quod convenerat, signum: totoque e numero duos et xxx in ascensu interiisse cognoscunt. Rex non cupidine magis potius loci, quam vicem eorum, quos ad tam manifestum periculum miserat, sollicitus, toto die cacumina montis intuens restitit. Noctu demum, cum obscuritas conspectum oculorum ademisset, ad curandum corpus recessit. Postero die nondum satis clara luce primus vela, signum capti verticis, conspexit. Sed ne falleretur acies, dubitare cogebat varietas coeli, nunc internitente lucis fulgore, nunc condito. Verum ut liquidior lux apparuit coelo, dubitatio exempta est. Vocatumque Cophan, per quem barbarorum

animos tentaverat, mittit ad eos, qui moneret, *nunc saltem salubrius consilium inirent*. Sin autem fiducia loci perseverarent, *ostendi a tergo iussit, qui ceperant verticem*. Cophas admissus suadere coepit Arimazi *petram tradere, gratiam regis inituro, si tantas res molientem in unius rupis obsidione haerere non coegisset*. Ille, ferocius superbiusque quam antea locutus, *abire Cophan iubet*. At is prehensum manu Barbarum rogat, *ut secum extra specum prodeat*: quo impetrato, iuvenes in cacumine ostendit, eiusque superbiae haud immerito illudens, *pennas ait habere milites Alexandri*. Iamque e Macedonum castris signorum concentus et totius exercitus clamor audiebatur. Ea res, sicut pleraque belli vana et inania, barbaros ad deditioem traxit. Quippe occupati metu, paucitatem eorum, qui a tergo erant, aestimare non poterant. Itaque Cophan (nam trepidantes reliquerat) strenue revocant; et cum eo xxx principes mittunt, qui petram tradant, et *ut incolumibus abire liceat, paciscantur*. Ille quamquam verebatur, ne conspecta invenum paucitate deturbarent eos barbari; tamen et fortunae suae confisus, et Arimazi superbiae infensus, *nullam se conditionem deditioem accipere* respondit. Arimazes, desperatis magis quam perditis rebus, cum propinquis nobilissimisque gentis suae descendit in castra: quos omnes *verberibus affectos sub ipsis radicibus petrae crucibus iussit affigi*. Multitudo dedititiorum incolae novarum urbium cum pecunia capta dono data est: Artabazus in petrae regionisque, quae apposita esset ei, tutela relictus.

---

---

Q. CVRTII RVFI  
DE  
REBVS GESTIS  
ALEXANDRI MAGNI  
HISTORIARVM  
LIBER VIII

---

ARGVMENTVM.

*Massagetis, Dahis, et Sogdianis subactis, Scythae sui regis filiam Alexandro coniugem offerunt: qui, leone interfecto, et quatuor millibus ferarum in venatione deiectis, Clitum sollemni convivio adhibitum, et liberius loquentem, interficit, 1. Sera Alexandri poenitentia: quam sequuntur bellicas expeditiones adversus Bactrianos transfugas et Sysimithren. Philippi item, strenuissimi iuvenis, et Erigyil, clarissimi ducis, obitus, 2. Spitamenis uxorem, interfecti mariti caput afferentem, Alexander castris excedere iubet: provincias quasdam a praefectorum suorum iniuriis vindicat, 3. Frigoris nimia vi paene opprimitur exercitus Gabazam aditurus. Alexandri constantia, et erga*

*gregarium militem humanitas, eiusdemque cum Roxane matrimonium, 4. Cogitationibus in bellum Indicum versis, adulatorum fraude, nimia superbia elatus Alexander, Iovis filius vult salutare: quod Callisthenes gravi oratione improbat, 5. Ex ignominia Hermolao nobili puero illata nascitur in caput Alexandri coniuratio. Qua detecta, inter auctores sceleris innocens Callisthenes coniicitur, 6. Hermolai, Callisthenem iustum esse asseverantis, adversus crudelem Alexandri superbiam invectiva, 7. Alexandri ad Hermolai invectivam responsio: coniuratorum item, atque innocentis Callisthenis supplicium, 8. Indi, Gangis, Dyardenis, Indiae, eius incolarum, luxu diffluentium regum, ac sapientum, luculenta descriptio, 9. Varios Indiae populos mira felicitate, non tamen sine sanguine, Alexander subiicit, 10. Aornus petra et arx inaccessa ab Alexandro oppugnatur, et ab obsessis relicta capitur, 11. Omphis, rex potentissimus, se regnumque suum Alexandro permittit. A quo in integrum restituitur: unde mutua dona regia, 12. Porum regem, Omphis suasu, Alexander ancipiti quidem et sub initia periculosissimo aggreditur bello, 13. Indorum et Macedonum insignis et cruenta pugna: Pori captivi magnanimitas, et Alexandri regia clementia, 14.*

## CAPVT L

**A**lexander maiore fama, quam gloria, in ditionem redacta petra, cum propter vagum hostem spargendae manus essent, in tres partes divisit exercitum. Hephæstionem uni, Coenon alteri duces dederat: ipse ceteris praeerat. Sed non eadem mens omnibus barbaris fuit. Armis quidam subacti; plures ante certamen imperata fecerunt: quibus eorum, qui in dese-

*ctione perseveraverant, urbes agrosque iussit attribui.* At exsules Bactriani cum ducc equitibus Massagetarum proximos vicos vastaverunt. Ad quos coërcendos Attinas, regionis eius praefectus, ccc equites, insidiarum, quae parabantur, ignarus, eduxit. Namque hostis in silvis, quae erant forte campo iunctae, armatum militem condidit; paucis propellentibus pecora, ut improvidum ad insidias praeda perduceret. Itaque incomposito agmine, solutisque ordinibus, Attinas praedabundus sequebatur; quem praetergressum silvam, qui in ea consederant, ex improvise adorti, cum omnibus interemerunt. Celeriter ad Craterum huius cladis fama perlata est; qui cum omni equitatu supervenit: et Massagetae quidem iam refugerant; Dahae mille oppressi sunt: quorum clade totius regionis finita defectio. Alexander quoque Sogdianis rursus subactis, Maracanda repetit. Ibi Berdes, quem ad Scythas super Bosphorum colentes miserat, cum legatis gentis occurrit. Phrataphernes quoque, qui Chorasmiis praeerat, Massagetis et Dahis regionum confinio adiunctus, miserat, qui *facturum imperata pollicerentur.* Scythae petebant, *ut regis sui filiam matrimonio sibi iungeret.* Si *dedignaretur affinitatem; principes Macedonum cum primoribus suae gentis connubio coire pateretur.* Ipsum quoque *regem venturum ad eum pollicebantur.* Utraque legatione benigne audita, Hephaestionem et Artabazum opperiens, stativa habuit: quibus adiunctis, in regionem, quae appellatur *Bazaria*, pervenit. Barbarae opulentiae in illis locis haud ulla sunt maiora indicia, quam magnis nemoribus saltibusque nobilium ferarum greges clausi. Spatiosas ad hoc eligunt silvas, crebris perennium aquarum fontibus amoenas. Muris nemora cinguntur, turresque habent venantium receptacula. Quatuor continnis aetatibus intactum saltum fuisse constabat. Quem Alexander cum toto exercitu

ingressus *agitari undique feras* iussit. Inter quas cum lea magnitudinis raræ ipsum regem invasurus incurreret; fortè Lysimachus, qui postea regnavit, proximus Alexandro, venabulum obiiicere feræ coeperat. Quo rex repulso, et *abire* iusso, adiecit, *tam a semet uno quam a Lysimacho leonem interfici posse*. Lysimachus enim quondam cum venaretur in Syria, occiderat eximiae magnitudinis feram solus: sed laevo humero usque ad ossa laceratus ad ultimum periculi pervenerat. Id ipsum exprobrans ei rex, fortius, quam locutus est, fecit. Nam feram non excepit modo, sed etiam uno vulnere occidit. Fabulam, quæ *obiectum leoni a rege Lysimachum* temere vulgavit, ab eo casu, quem supra diximus, ortam esse crediderim. Ceterum Macedones, quamquam prospero eventu defunctus erat Alexander, tamen scivere gentis suae more, ne pedes venaretur, aut sine delectis principum amicorumque. Ille IV millibus ferarum deiectis, in eodem saltu cum toto exercitu epulatus est. Inde Maracanda reditum est: acceptaque aetatis excusatione ab Artabazo, provinciam eius destinat Clito. Hic erat, qui apud Granicum amnem nudo capite regem dimicantem clypeo suo texit, et Rhoesacis manum capiti regis imminentem gladio amputavit: vetus Philippi miles, multisque bellicis operibus clarus. Hellanice, quæ Alexandrum educaverat, soror eius, haud secus quam mater a rege diligebatur. Ob has causas validissimam imperii partem fidei eius tutelaeque commisit. Iamque *iter parare in posterum* iussus, sollemni et tempestivo adhibetur convivio. In quo rex cum multo incauisset mero, immodicus aestimator sui, celebrare, quæ gesserat, coepit; gravis etiam eorum auribus, qui sentiebant vera memorari. Silentium tamen habuere seniores, donec Philippi res orsus obterere, *nobilem apud Chaeroneam victoriam sui operis fuisse iactavit; ademptamque sibi malignitate et invidia*



*patris tantae rei gloriam. Illum quidem, seditione inter Macedonés milites et Graecos mercenarios orta, debilitatum vulnere, quod in ea consternatione acceperat, iacuisse, non alias quam simulatione mortis tutiorem: se corpus eius protexisse clypeo suo, ruentesque in illum sua manu occisos. Quae patrem nunquam aequo animo esse confesum, invitum filio debentem salutem suam. Itaque post expeditionem, quam sine eo fecisset ipse in Illyrios, victorem scripsisse se patri fusus fugatosque hostes: nec adfuisse unquam Philippum. Laude dignos esse, non qui Samothracum initia viderent, cum Asiam uri vastari oporteret; sed eos, qui magnitudine rerum fidem antecessissent.* Haec et his similia laeti audiere iuvenes: ingrata senioribus erant, maxime propter Philippum, sub quo diutius vixerant. Tum Clitus, ne ipse quidem satis sobrius, ad eos, qui infra ipsum cubabant, conversus, Euripidis retulit carmen, ita ut sonus magis, quam sermo exaudiri posset a rege. Quo significabatur, *male instituisse Graecos, quod tropaeis regum dumtaxat nomina inscriberentur: alieno enim sanguine partam gloriam intercipi.* Itaque rex, cum suspicaretur malignius habitum esse sermonem, percontari proximos coepit, *quid ex Clito audissent.* Et illis ad silentium obstinatis, Clitus paullatim maiore voce *Philippi acta bellaque in Graecia gesta* commemorat, omnia praesentibus praeferens. Hinc inter iuniores senesque orta contentio est. Et rex, velut patienter audiret, quis Clitus obterebat laudes eius, ingentem iram conceperat. Ceterum cum animo videretur imperaturus, si finem procaciter orto sermoni Clitus imponeret, nihil eo remittente magis exasperabatur. Iamque Clitus etiam Parmenionem defendere audebat, et Philippi de Atheniensibus victoriam Thebarum praeferebat excidio; non vino modo, sed etiam animi

prava contentione proventus. Ad ultimum, *si moriendum*, inquit, *est pro te; Clitus est primus: at cum victoriae arbitrium agis, praecipuum ferunt praemium, qui procacissime patris tui memoriae illudunt. Sogdianam regionem mihi attribuis, totius rebellem, et non modo indomitam, sed quae ne subigi quidem possit. Mittor ad feras bestias, praecipua ingenia sortitas. Sed quae ad me pertinent transeo. Philippi milites spernis, oblitus, nisi hic Atharias senex iuniores pugnam detrectantes revocasset, adhuc nos circa Hallicarnasum haesuros fuisse. Quomodo ergo Asiam etiam cum istis iunioribus subiecisti? Verum est, ut opinor, quod avunculum tuum in Italia dixisse constat, ipsum in viros incidisse, te in feminas. Nihil ex omnibus inconsulte ac temere iactis regem magis moverat, quam Parmenionis cum honore mentio illata. Dolorem tamen rex pressit, contentus iussisse ut convivio excederet. Nec quidquam aliud adiecit, quam forsitan eum, si diutius locutus foret, exprobraturum sibi fuisse vitam a semetipso datam: hoc enim superbe saepe iactasse. Atque illum cunctantem adhuc surgere, qui proximi ei cubuerant, iniectis manibus iurgantes monentesque conabantur abducere. Clitus cum abstraheretur, ad pristinam violentiam ira quoque adiecta, suo pectore tergum illius esse defensum; nunc postquam tanti meriti praeterit tempus, etiam memoriam invisam esse proclamat. Attali quoque caedem obiiciebat; et ad ultimum Iovis quem patrem sibi Alexander assereret, oraculum eludens, *veriora se regi, quam patrem eius, respondisse* dicebat. Iam tantum irae conceperat rex, quantum vix sobrius ferre potuisset. Enimvero olim mero sensibus victis, ex lecto repente prosiluit. Attoniti amici ne positis quidem, sed abiectis poculis, consurgunt, in eventum rei, quam tanto impetu acturus esset,*

intenti. Alexander rapta lancea ex manibus armigeri, Clitum adhuc eadem linguae intemperantia furentem percutere conatus, a Ptolemaeo et Perdicca inhibetur. Medium complexi et obluctari perseverantem morabantur: Lysimachus, et Leonnatus etiam lanceam abstulerant. Ille militum fidem implorans, *comprehendi se a proximis amicorum, quod Dario nuper accidisset*, exclamat; *signumque tuba dari, ut ad regiam armati coirent*, iubet. Tum vero Ptolemacus et Perdiccas genibus advoluti orant, *ne in tam praecipiti ira perseveret, spatiumque potius animo det. Omnia postero die iustius exsecuturum*. Sed clausae erant aures, obstrepente ira. Itaque impotens animi percurrit in regiae vestibulum, et vigili excubanti hasta ablata constitit in aditu, quo necesse erat iis, qui simul coenaverant, egredi. Abierant ceteri. Clitus ultimus sine lumine exhibit. Quem rex, *quisnam esset?* interrogat. Eminebat etiam in voce sceleris, quod parabat, atrocitas. Et ille iam non suae, sed regis irae memor, *Clitum esse, et de convivio exire* respondit. Haec dicentis latus hasta transfixit: morientisque sanguine aspersus, *I nunc*, inquit, *ad Philippum, et Parmenionem, et Attalum*.

CAP. II. Male humanis ingeniis natura consulit, quod plerumque non futura, sed transacta perpendimus. Quippe rex, postquam ira mente decesserat, etiam ebrietate discussa, magnitudinem facinoris sera aestimatione perspexit. Videbat tunc immodica libertate abusum, sed alioqui egregium bello virum, et nisi erubesceret fateri, servatorem sui occisum. Detestabile carnificis ministerium occupaverat rex; verborum licentiam, quae vino poterat imputari, nefanda caede ultus. Manabat toto vestibulo cruor paullo ante convivae: vigiles attoniti et stupentibus similes procul stabant, liberiolemque poenitentiam solitudo exciebat. Ergo hastam ex corpore iacentis evulsam retor-

sit in semet: iamque admoverat pectori; cum advolant vigiles, et repugnant e manibus extorquent, allevatumque in tabernaculum deferunt. Ille humi prostrayerat corpus, gemitu eiulatque miserabili tota personante regia. Laniare deinde os unguibus, et circumstantes rogare, *ne se tanto dedecori superstitem esse paterentur.* In has preces tota nox exacta est. Scrutantemque, *num ira Deorum ad tantum nefas actus esset? subit anniversarium sacrificium Libero Patri non esse redditum statuto tempore. Itaque intervium et epulas caede commissa, iram Dei fuisse manifestam.* Ceterum magis eo movebatur, quod omnium amicorum animos videbat attonitos: neminem cum ipso sociare sermonem postea ausurum. Vivendum esse in solitudine velut ferae bestiae, terrenti alias, alias timenti. Prima deinde luce *tabernaculo corpus*, sicut adhuc cruentum erat, iussit inferri. Quo posito ante ipsum, lacrimis obortis, *hanc*, inquit, *nutrici meae gratiam retuli, cuius duo filii apud Miletum pro mea gloria occubuerunt mortem: hic frater unicum orbitatis solatium a me inter epulas occisus est. Quo nunc se conferet misera? Omnibus eius unus supersum, quem solum aequis oculis videre non poterit. Et ego servatorum meorum latro, revertar in patriam, ut ne dextram quidem nutrici sine memoria calamitatis eius offerre possim?* Et cum finis lacrimis querelisque non fieret; iussu amicorum corpus ablatum est. Rex triduum iacuit inclusus. Quem ut armigeri corporisque custodes ad moriendum obstinatum esse cognoverunt; universi in tabernaculum irrumpunt, diuque precibus ipsorum reluctatum aegre vicerunt, ut cibum caperet. Quoque minus caedis puderet, *iure interfectum Clitum* Macedones decernunt, sepultura quoque prohibitori, ni rex humari iussisset. Igitur decem diebus maxime ad confirmandum pudorem apud

Maracanda consumtis; cum parte exercitus Hephæstionem in regionem Bactrianam misit, com meatus in hiemem paraturum. Quam Clito autem destinaverat provinciam, Amyntae dedit: ipse Xenippa pervenit. Scythiae confinis est regio, habitaturque pluribus ac frequentibus vicis, quia ubertas terrae non indigenas modo detinet, sed etiam advenas invitat. Bactrianorum exsulum, qui ab Alexandro defecerant, receptaculum fuerat. Sed postquam regem adventare compertum est; pulsi ab incolis II millia fere et ducenti congregantur. Omnes equites erant, etiam in pace latrociniiis assueti. Tum ferocia ingenia non bellam modo, sed etiam veniae desperatio, efferaverat. Itaque ex improvise adorti Amyntam praetorem Alexandri, diu anceps proelium fecerant. Ad ultimum DCC suorum amissis, quorum CCC hostis cepit, dedere terga victoribus; haud saepe inulti, quippe LXXX Macedonum interfecerunt, praeterque eos CCC et L saucii facti sunt. Veniam tamen etiam post alteram defectionem impetraverunt. His in fidem acceptis, in regionem, quam Naura appellant, rex cum toto exercitu venit. Satrapes erat Syssimithres, duobus ex sua matre filiis genitis: quippe apud eos parentibus stupro coire cum liberis fas est. II millibus armatis popularibus fauces regionis, qua in arctissimum cogitur, valido munimento sepserant. Praeterfluebat torrens amnis; a tergo petra claudebat hanc manu perviam incolae fecerant. Sed aditus specus accipit lucem; interiora, nisi illato lumine, obscura sunt. Perpetuus cuniculus iter praebet in campos, ignotum nisi indigenis. At Alexander, quamquam angustias naturali situ munitas ac validas, manu barbari tuebantur; tamen arietibus admotis munimenta, quae manu adiuncta erant, concussit, fundisque et sagittis propugnantium plerosque deiecit: quos ubi dispersos fugavit, ruinas munimentorum supergressus ad petram admovit exercitum. Ceterum interveniebat fluvius, cõe-

antibus aquis ex superiore fastigio in vallem; magnique operis videbatur tam vastam voraginem explere. *Caedi tamen arbores et saxa congeri iussit.* Ingensque barbaros pavor rudes ad talia opera concusserat, excitam molem subito cernentes. Itaque rex ad deditio- nem metu posse compelli ratus, Oxarten misit nationis eiusdem, sed ditionis suae, qui suaderet duci, *ut traderet petram.* Interim ad augendam formidinem, et turres admovebantur, et excussa tormentis tela emicabant. Itaque verticem petrae omni alio praesidio damnato petiverunt. At Oxartes trepidum diffidentemque rebus suis Sysimithrem coepit hortari, *ut fidem, quam vim Macedonum, mallet experiri; neu moraretur festinationem victoris exercitus, in Indiam tendentis: cui quisquis semet offerret, in suum caput alienam cladem esse versurum.* Et ipse quidem Sysimithres deditio- nem annuebat: ceterum mater eademque coniux morituram se ante denuntians, quam in ullius veniret potestatem, barbari animum ad honestiora quam tutiora converterat: pudebatque, libertatis maius esse apud feminas, quam apud viros, pretium. Itaque dimisso internuntio pacis, obsidionem ferre decreverat. Sed cum hostis vires suasque pensaret; rursus muliebris consilii, quod praeceps magis quam necessarium esse credebat, poenitere cum coepit. Revocatoque strenue Oxarte, *futurum se in regis potestate respondit; unum precatus, ne voluntatem et consilium matris suae proderet, quo facilius venia illi quoque impetraretur.* Praemissum igitur Oxartem cum matre liberisque et totius cognationis grege sequebatur, ne exspectato quidem fidei pignore, quod Oxartes promiserat. Rex, equite praemisso, qui *reverti eos iuberet, opperiri- que praesentiam ipsius,* supervenit; et victimis Minervae ac Victoriae caesis imperium Sysimithri restituit, *spe maioris etiam provinciae facta, si cum fide*

*amicitiam ipsius coluisset.* Duos illi iuvenes patre tradente, *secum militaturos sequi* iussit. Relicta deinde phalange ad subigendos, qui defecerant, cum equite processit. Arduum et impeditum saxis iter primo utcunque tolerabant. Mox equorum non unguis modo attritis, sed corporibus etiam fatigatis, sequi plerique non poterant, et rarius subinde agmen fiebat, pudorem, ut fere fit, immodico labore vincente. Rex tamen, subinde equos mutans, sine intermissione fugientes insequabatur. Nobiles iuvenes comitari eum soliti defecerant praeter Philippum. Lysimachi erat frater, tum primum adultus, et, quod facile appareret, indolis rarae. Is pedes, incredibile dictu, per nonstadia vectum regem comitatus est; saepe equum suum offerente Lysimacho, nec tamen ut digrederetur a rege effici potuit, cum lorica indutus arma gestaret. Idem, cum peruentum esset in saltum, in quo se barbari abdididerant, nobilem edidit pugnam; regemque cominus cum hoste dimicantem protexit. Sed postquam barbari in fugam effusi deseruere silvas, animus, qui in ardore pugnae corpus sustentaverat, liquit; subitoque ex omnibus membris profuso sudore, arboris proximae stipiti se applicuit. Deinde ne illo quidem adminiculo sustinente, manibus regis exceptus est, inter quas collapsus exstinguitur. Moestum regem alius haud levis dolor excepit. Erigyius inter claros duces fuerat; quem extinctum esse paullo antequam reverteretur in castra, cognovit. Utriusque funus omni apparatu atque honore celebratum est.

CAP. III. Dahas deinde statuerat petere: ibi namque Spitamenem esse cognoverat. Sed hanc quoque expeditionem, ut pleraque alia, fortuna indulgendo ei nunquam fatigata, pro absente transegit. Spitamenes uxoris immodico amore flagrabat; quam aegre fugam, et nova subinde exsilia tolerantem, in omne discrimen comitem traherat. Illa malis fatiga-

ta identidem muliebres adhibere blanditias, *ut tandem fugam sisteret, victorisque Alexandri clementiam expertus, placaret quem effugere non posset.* Tres adulti erant liberi ex eo geniti: quos cum pectori patris admovisset, *ut saltem eorum misereri vellet,* orabat; et quo efficaciores essent preces, haud procul erat Alexander. Ille se prodi, non moneri ratus, et formae profecto fiducia cupere eam quamprimum dedi Alexandro, acinacem strinxit, percussurus uxorem, nisi prohibitus esset fratrum eius occurso. Ceterum *abire conspectu* iubet; addito metu *mortis, si se oculis eius obtulisset:* et ad desiderium levandum noctes inter pellices agere coepit. Sed penitus haerens amor fastidio praesentium accensus est. Itaque rursus uni ei deditus, orare non destitit, *ut tali consilio abstineret, patereturque sortem, quamcunque eis fortuna fecisset. Sibi mortem deditioe esse leviolem.* At illa purgare se, *quod quae utilia esse censebat, muliebriter forsitan, sed fida tamen mente, suasisset; de cetero futurum in viri potestate.* Spitamenes, simulato captus obsequio, de die *convivium apparari* iubet; vinoque et epulis gravis, semisomnus in cubiculum fertur. Quem ut alto et gravi somno sopitum esse sensit uxor, gladium, quem veste occultaverat, stringit, caputque eius abscissum, cruore respersa, servo suo conscio facinoris tradit. Eodem comitante, sicut erat cruenta veste, in Macedonum castra pervenit, nuntiarique Alexandro iubet, *esse, quae ex ipsa deberet cognoscere.* Ille *protinus barbaram iussit admitti.* Quam ut adpersam cruore conspexit, ratus ad deplorandam contumeliam venisse *dicere quae vellet,* iubet. At illa *servum, quem stare in vestibulo iusserat, introduci* desideravit. Qui quia caput Spitamenis veste tectum habebat; suspectus scrutantibus, quid occuleret, ostendit. Confuderat oris exsanguis notas pallor, neque quis esset, nosci satis poterat



Ergo rex certior factus *humanum caput afferre eum*, tabernaculo excessit, percontatusque *quid rei sit?* illo profitente cognoscit. Varias hinc cogitationes invicem animum diversa agitantem commoverant. Meritum ingens in semet esse credebat, quod transfuga et proditor tantis rebus, si vixisset, iniecturus moram, interfectus esset: contra facinus ingens aversabatur, cum optime meritum de ipsa, communium parentem liberorum, per insidias interemisisset. Vicit tamen gratiam meriti, sceleris atrocitas, denuntiarique iussit, ut *excederet castris; neu licentiae barbara exemplar in Graecorum mores, et mitia ingenia transferret*. Dahae Spitamenis caede comperta, Dataphernem defectionis eius participem, vinctum Alexandro seque dedunt. Ille, maxima praesentium curarum parte liberatus, convertit animum ad vindicandas iniurias eorum, quibus a praetoribus suis avare ac superbe imperabatur. Ergo Phratapherni Hyrcaniam et Mardos cum Tapuris tradidit, mandavitque, ut Phradatem, cui succedebat, ad se in custodiam mitteret. Arsani Drancarum praefecto substitutus est Stasanor. Arsaces in Mediam missus, ut Oxydates inde discederet. Babylonia, mortuo Mazaeo, Deditameni subiecta est.

CAP. IV. His compositis tertio mense ex hibernis movit exercitum, regionem, quae *Gabaza* appellatur, aditurus. Primus dies quietum iter praebuit: proximus ei nondum quidem procellosus et tristis, obscurior tamen pristino, non sine minis crescentis mali praeteriit. Tertio ab omni parte coeli emicare fulgura, et nunc internitente luce, nunc condita, non oculos modo meantis exercitus sed etiam animos, tertere coeperunt. Erat prope continuus coeli fragor, et passim cadentium fulminum species visebatur. Attonitisque auribus stupens agmen, nec progredi, nec consistere audebat. Tum repente imber grandinem

incutiens torrentis modo effunditur. Ac primo quidem armis suis tecti exceperant, sed iam nec retinere arma lubricae et rigentes manus poterant; nec ipsi destinare, in quam regionem obverterent corpora, cum undique tempestatis violentia maior, quam vitabatur, occurreret. Ergo ordinibus solutis per totum saltum errabundum agmen ferebatur; multique prius metu, quam labore, defatigati, prostraverant humi corpora, quamquam imbrem vis frigoris concreto gelu adstrinxerat. Alii se stipitibus arborum admovent. Id plurimis et adminiculum et suffugium erat. Nec fallebat ipsos morti locum eligere, cum immobiles vitalis calor linqueret: sed grata erat pigritia corporum fatigatis; nec recusabant exstingui quiescendo. Quippe non vehemens modo, sed etiam pertinax vis mali insistebat; lucemque, naturale solatium, praeter tempestatem haud disparem nocti, silvarum quoque umbra suppresserat. Rex unus tanti mali patiens circumire milites, contrahere dispersos, allevare prostratos, ostendere procul evolutum ex tuguriis fumum, hortarique *ut proxima quaeque suffugia occuparent.* Nec ulla res magis saluti fuit, quam quod multiplicato labore sufficientem malis, quibus ipsi cesserant, regem deserere erubescerent. Ceterum efficacior in adversis necessitas, quam ratio, frigoris remedium invenit. Dolabris enim silvas sternere aggressi, passim acervos struesque accenderunt. Continenti incendio ardere crederes saltum et vix inter flammam agminibus relictum locum. Hic calor stupentia membra commovit, paullatimque spiritus, quem continuerat rigor, meare libere coepit. Excepere alios tecta barbarorum, quae in ultimo saltu abdita necessitas investigaverat: alios castra, quae in humido quidem, sed iam coeli mitescente saevitia, locaverunt. Mille militum atque luxuriam calorumque pestis illa consumpsit. Memoriae proditum est quosdam applicatos arborum truncis, et

non solum viventibus, sed et inter se colloquentibus similes esse conspectos; durante adhuc habitu, in quo mors quemqueprehenderat. Forte Macedo gregarius miles seque et arma sustentans, tandem in castra pervenerat. Quo viso rex, quamquam ipse tunc maxime admoto igne refovebat artus, ex sella sua exiit, torpentemque militem, et vix compotem mentis, demtis armis *in sua sede iussit considerare*. Ille diu nec ubi requiesceret, nec a quo esset exceptus, agnovit. Tandem recepto calore vitali, ut regiam sedem regemque vidit, territus surgit. Quem intuens Alexander, *ecquid intelligis, miles, inquit, quanto meliore sorte, quam Persae, sub rege vivatis? Illis enim in sella regis consedissee capitale foret; tibi saluti fuit*. Postero die convocatis amicis copiarumque ducibus, pronuntiari iussit, *ipsum omnia, quae amissa essent, redditurum*. Et promisso fides existit. Nam Sysimithres multa iumenta, et camelorum duo millia adduxit, pecoraque et armenta: quae distributa pariter militem et damno et fame liberaverunt. Rex, *gratiam sibi relatam a Sysimithre praefatus, sex dierum cocta cibaria ferre milites iussit*, Sacas petens. Totam hanc regionem depopulatus, xxx millia pecorum ex praeda Sysimithri dono dat. Inde pervenit in regionem, cui *Cohortanus* satrapes nobilis praeerat, qui se regis potestati fideique permisit. Ille imperio ei reddito, haud amplius, quam *ut duo ex tribus filiis secum militarent*, exegit. Satrapes etiam cum, qui penes ipsum relinquebatur, tradit. Barbara opulentia convivium, quo regem accipiebat, instruxerat. Id cum multa comitate celebraret, *introduci xxx nobiles virgines iussit*. Inter quas erat filia ipsius *Roxane* nomine, eximia corporis specie et decore habitus in barbaris raro. Quae quamquam inter electas processerat, omnium tamen oculos convertit in se; maxime regis, minus iam cupiditati-

bus suis imperantis inter obsequia fortunae, contra quam non satis cauta mortalitas est. Itaque ille, qui uxorem Darii, qui duas filias virgines, quibus forma praeter Roxanem comparari nulla poterat, haud alio animo, quam parentis, adspexerat, tunc in amorem virgunculæ, si regiae stirpi compararetur, ignobilis, ita effusus est, ut diceret *ad stabiliendum regnum pertinere; Persas et Macedones connubio iungi: hoc uno modo epudorem victis, et superbiam victoribus detrahi posse. Achillem quoque, a quo genus ipse deduceret, cum captiva coisse: ne inferri nefas arbitrarentur, ita matrimonii iure velle iungi.* Insperato gaudio laetus pater sermonem eius excepit: et rex medio cupiditatis ardore iussit *afferi patrio more panem.* Hoc erat apud Macedones sanctissimum coëuntium pignus: quem divisum gladio, uterque libabat. Credo eos, qui gentis mores condiderunt, parco et parabili victu ostendere voluisse iungentibus opes, quantulo contenti esse deberent. Hoc modo rex Asiae et Europae introductam inter convivales ludos matrimonio sibi adiunxit, e captiva geniturus, qui victoribus imperaret. Pudebat amicos, super vinum et epulas socerum ex deditis esse electum: sed post Cliti caedem libertate sublata, vultu, qui maxime servit, assentiebantur.

CAP. V. Ceterum Indiam, et inde Oceanum petiturus, ne quid a tergo, quod destinata impedire posset, moveretur, *ex omnibus provinciis xxx millia iuniorum legi iussit, et ad se armata perduci;* obsides simul habiturus, et milites. Craterum autem ad persequendos Haustanem et Catenem, qui ab ipso defecerant, misit: quorum Haustanes captus est; Catenes in proelio occisus. Polypercon quoque regionem, quae *Bubacene* appellatur, in ditionem redegit. Itaque omnibus compositis cogitationes in bellum Indicum vertit. Dives regio habebatur non auro modo, sed

gemmis quoque margaritisque, ad luxum magis quam ad magnificentiam exulta. *Clypei militares auro et ebore fulgere* dicebantur: itaque, necubi vinceretur, cum ceteris praestaret, scutis argenteas laminas, equis frenos aureos addidit, loricas quoque alias auro, alias argento adornavit. cxx millia armatorum erant, quae regem ad id bellum sequebantur. Iamque omnibus praeparatis, quod olim prava mente conceperat, tunc esse maturum, *quonam modo coelestes honores usurparet*, coepit agitare. *Iovis filium* non dici tantum se, sed etiam credi volebat, tanquam perinde animis imperare posset, ac linguis: itaque more Persarum Macedonas venerabundos ipsum salutare prosternentes humi corpora. Non deerat talia concupiscenti perniciose adulatio, perpetuum malum regum, quorum opes saepius assentatio, quam hostis evertit. Nec Macedonum haec erat culpa, nemo enim illorum quidquam ex patrio more labare sustinuit; sed Graecorum, qui professionem honestarum artium malis corruerant moribus. Agis quidam Argivus, pessimorum carminum post Choerilum conditor, et ex Sicilia Cleo: hic quidem non ingenii solum, sed etiam nationis vitio adulator; et cetera urbium suarum purgamenta, quae propinquis etiam maximorumque exercituum ducibus a rege praeferebantur. Hi tum coelum illi aperiebant, *Herculemque et Patrem Liberum, et cum Polluce Castorem novo numini cessuros esse* iactabant. Igitur festo die *omni opulentia convivium exornari* iubet; cui non Macedones modo et Graeci principes amicorum, sed etiam nobiles adhiberentur. Cum quibus cum discubisset rex, paullisper epulatus convivio egreditur. Cleo, sicut praeparaverat, sermonem *cum admiratione laudum eius instituit*. Merita deinde percensuit, *quibus uno modo referri gratia posset, si quem intelligerent Deum esse, confiterentur, exigua thuris impensa tanta beneficia*

*pensaturi. Persas quidem non pie solum, sed etiam prudenter, reges suos inter Deos colere: maiestatem enim imperii salutis esse tutelam. Nec Herculem quidem et Patrem Liberum prius dicatos Deos, quam vicissent secum viventium invidiam. Tandem quoque posteros credere, quantum praesens aetas spondisset. Quod si ceteri dubitent; semetipsum, cum rex inisset convivium, prostratum humi corpus. Debere idem facere ceteros, et inprimis sapientia praeditos. Ab illis enim cultus in regem esse prodendum exemplum. Haud perplexe in Callisthenem dirigebatur oratio. Gravitas viri et prompta libertas invisae erat regi, quasi solus Macedonas paratos ad tale obsequium moraretur. Is tum silentio facto, unum illum intuentibus ceteris, Si rex, inquit, sermoni tuo affuisset; nullius profecto vox responsuri tibi desideraretur: ipse enim peteret, ne in peregrinos ritus degenerare se cogeres, ne rebus felicissime gestis invidiam tali adulatione contraheres. Sed quoniam abest, ego tibi pro illo respondeo: Nullum esse eundem et diuturnum et praecocem fructum; coelestesque honores non dare te regi, sed auferre. Intervallo enim opus est, ut credatur Deus, semperque hanc gratiam magnis viris posteri reddunt. Ego autem seram immortalitatem precor regi, ut vita diuturna sit, et aeterna maiestas. Hominem consequitur aliquando, nunquam comitatur, divinitas. Herculem modo et Patrem Liberum consecratae immortalitatis exempla referebas. Credisne illos unius convivii decreto Deos factos? Prius ab oculis mortaliu[m] amolita natura est, quam in coelum fama pervaheret. Scilicet ego et tu, Cleo, Deos facimus! a nobis divinitatis suae auctoritatem accepturus est rex! potentiam tuam experiri libet. Fac aliquem regem, si Deum potes facere: faci-*

*lius est imperium dare, quam coelum. Dii propitii sine invidia, quae Cleo dixit, audierint, eodemque cursu, quo fluxere res, ire patientur. Nostris moribus velint nos esse contentos. Non pudet patriae, nec desidero, ad quem modum rex mihi colendus sit, discere. Quos equidem victores esse confiteor, si ab illis leges, quis vivamus, accipimus. Aequis auribus Callisthenes veluti vindex publicae libertatis audiebatur. Expresserat non assensionem modo, sed etiam vocem, seniorum praecipue, quibus gravis erat inveterati moris externa mutatio. Nec quidquam eorum, quae invicem iactata erant, rex ignorabat, cum post aulaeam, quae lectos obduxerat, staret. Igitur ad Agin et Cleonem misit, ut sermone finito barbaros tantum, cum intrasset, procumbere suo more paterentur: et paullo post, quasi potiora quaedam egisset, convivium repetit. Quem venerantibus Persis, Polypercon, qui cubabat super regem, unum ex iis mento contingentem humum per ludibrium coepit hortari, ut vehementius id quateret ad terram; elicuitque iram Alexandri, quam olim animo capere non poterat. Itaque rex, Tu autem, inquit, non veneraberis me? An tibi uni digni videmur esse ludibrio? Ille, nec regem ludibrio, nec se contemptu dignum esse, respondit. Tum detractum eum lecto rex praecipitat in terram. Et cum is pronus corruisset; Videsne, inquit, idem te fecisse, quod in alio paullo ante ridebas? Et tradi eo in custodiam iusso, convivium solvit. Polyperconti quidem postea castigato diu ignovit.*

CAP. VI. In Callisthenem olim contumaciae suspectum pervicacioris irae fuit. Cuius explendae maturae obvenit occasio. Mos erat, ut supra dictum est, principibus Macedonum, adultos liberos regibus tradere, ad munia haud multum servilibus ministeriis abhorrentia. Excubabant servatis noctium vicibus proximi foribus aedis, in qua rex adquiescebat. Per

Hos pellices introducebantur alio aditu, quam quem armati obsidebant. Iidem acceptos ab agasonibus equos, cum rex ascensurus esset, admovebant; comitabanturque et venantem, et in proeliis: omnibus artibus studiorum liberalium exulti. Praecipuus honor habebatur, quod licebat seditibus vesci cum rege. Castigandi verberibus eos nullius potestas praeter ipsum erat. Haec cohors velut seminarium ducum praefectorumque apud Macedonas fuit. Hinc habuere posteri reges, quorum stirpi post multas aetates Romani opes ademerunt. Igitur Hermolaus puer nobilis ex regia cohorte, cum aprum telo occupasset, quem rex ferire destinauerat, iussu eius verberibus affectus est. Quam ignominiam aegre ferens, deslere apud Sostratum coepit. Ex eadem cohorte erat Sostratus, amore eius ardens. Qui cum laceratum corpus, in quo deperibat, intueretur, forsitan olim ob aliam quoque causam regi infestus; iuvenem sua sponte iam motum, data fide acceptaque perpulit, ut occidendi regem consilium secum iniret. Nec puerili impetu rem exsecuti sunt: quippe sollerter legerunt, quos in societatem sceleris adsciscerent. Nicostratum, Antipatrum Asclepiodorumque, et Philotam placuit assumi. Per hos adiecti sunt Anticles, Elaptonius, et Epimenes. Ceterum agenda rei haud sane facilis patebat via. Opus erat eadem omnes coniuratos nocte excubare, ne ab expertibus consilii impedirentur; forte autem alius alia nocte excubabat. Itaque in permutandis stationum vicibus, ceteroque apparatu exsequendae rei, triginta et duo dies absumpti sunt. Aderat nox, qua coniurati excubare debebant, mutua fide laeti, cuius documentum tot dies fuerant. Neminem metus spesve mutaverat: tanta omnibus vel in regem ira, vel fides inter ipsos fuit. Stabant igitur ad fores aedis eius, in qua rex vescebatur, ut convivio egressum in cubiculum deducerent. Sed fortuna ipsius, simulque epulantium comitas provexit omnes



ad largius vinum; ludi etiam convivales extraxere tempus: nunc laetis coniuratis, *quod sopitum agressuri essent*; nunc sollicitis, *ne in lucem convivium extraheretur*. Quippe alios in stationem oportebat prima luce succedere; ipsorum post VII dies reditura vice. Nec sperare poterant, in illud tempus omnibus duraturam fidem. Ceterum cum iam lux appeteret, et convivium solvitur, et coniurati exceperunt regem, laeti occasionem exsequendi sceleris admotam; cum mulier attonitae, ut creditum est, mentis, conversari in regia solita, quia instinctu videbatur futura praedicere, non occurrit modo abeunti, sed etiam semet obiecit; vultuque et oculis motum praeferens animi, *ut rediret in convivium* monuit: et ille per ludum, *bene Deos suadere*, respondit; revocatisque amicis in horam diei ferme secundam convivii tempus extraxit. Iam alii ex cohorte in stationem successerant, ante cubiculi fores excubaturi; adhuc tamen coniurati stabant vice officii sui expleta: adeo pertinax spes est, quam humanae mentes, quam ingentes concupiscentiae devoverunt. Rex benignius quam alias allocutus, *discedere eos ad curanda corpora, quoniam tota nocte perstitissent*, iubet. Data sunt singulis quinquaginta sestertia, callaudatisque, *quod etiam aliis tradita vice, tamen excubare perseverassent*. Illi tanta spe destituti, domos abeunt. Et ceteri quidem exspectabant stationis suae noctem: Epimenes, sive comitate regis, qua ipsum inter coniuratos exceperat, repente mutatus; sive quia coeptis Deos obstare credebatur; fratri suo Eurylocho, quem antea expertem esse consilii voverat, quid pararetur, aperit. Omnibus Philotae supplicium in oculis erat. Itaque protinus iniicit fratri manum, et in regiam pervenit; excitatisque custodibus corporis, *ad salutem regis pertinere, quae afferret*, affirmat. Et tempus, quo venerant, et vultus haud sane securi animi index, et moestitia e duo-

bus alterius, Ptolemæum ac Leonnatum excubantes ad cubiculi limen excitaverunt. Itaque apertis foribus, et lumine illato, sopitum inero ac somno excitant regem. Ille paullatim mente collecta, *quid afferrent*, interrogat. Nec cunctatus Eurylochus, *non ex toto domum suam aversari Deos dixit, quia frater ipsius quamquam impium facinus ausus foret, tamen et poenitentiam eius ageret, et per se potissimum profiteretur indicium. In eam ipsam noctem, quae decederet, insidias comparatas fuisse: auctores scelesti consilii esse, quos minime crederet rex.* Tum Epimenes cuncta ordine, consciorumque nomina exponit. Callisthenem non ut participem facinoris nominatum esse constabat; sed *solitum puerorum sermonibus vituperantium criminantiumque reges faciles aures praebere.* Quidam adiiciunt, *cum Hermolaus apud eum quoque verberatum se a rege quereretur, dixisse Callisthenem: meminisse debere eos iam viros esse. Idque an ad consolandam patientiam verberum, an ad incitandum iuvenum dolorem dictum esset, in ambiguo fuisse.* Rex, animi corporisque sopore discusso, cum tanti periculi, quod evaserat, imago oculis oberraret, Eurylochum L talentis et cuiusdam Tyridatis opulenti bonis donat protinus; fratremque, antequam pro salute eius precaretur, restituit. Sceleris autem auctores, interque eos Callisthenem, *vinctos asservari iubet:* quibus in regiam adductis, toto die et nocte proxima, inero ac vigiliis grayis, adquievit. Postero autem frequens consilium adhibuit, cui patres propinque eorum, de quibus agebatur, intererant, ne de sua quidem salute securi: quippe Macedonum more perire debebant, omnium devotis capitibus, qui sanguine contigissent eos. Rex *introduci coniuratos praeter Callisthenem iussit:* atque quae agitaverant, sine cunctatione confessi sunt. Increpantibus deinde universis eos; ipsaq

rex, quo suo merito tantum in semet cogitassent facturas? interrogat.

CAP. VII. Scarpentibus ceteris, Hermolans, Nos verum inquit, quoniam, quasi nescias, quaeris; occiderunt te conciliam inimicis, quia non ut ingenium imperare coepisti, sed quasi in mancipia dominaris. Primus ex omnibus pater ipseus Sopolis, patricidium etiam parentis sui clamitans esse, consurgit; et ad os manu obiecta, scelere et malis insanientem, ultra orat audiendum. Rex inhibito patre dicere Hermolans iubet, quae ex magistro didicisset Cal-  
 Lethene. Et Hermolans, Utor, inquit, beneficio tuo, et dica, quae nostris malis didici. Quota pars Macedonum sacrificiae tuae superest? quotusquisque non e vilissimo sanguine? Attalus, et Philotas, et Parmenio, et Lyncestes Alexander, et Clitus, quantum ad hostes pertinet, vivunt, stant in acie, te chypis suis protegant, et pro gloria tua, pro victoria vulnere accipiant: quibus tu egregiam gratiam retulisti. Alius mensam tuam sanguine suo edersit: alius ne simplici quidem morte defunctus est. Duces exercituum tuorum in equuleum impositi, Persis, quos viderant, fuere spectaculo. Parmenio indicta causa trucidatus est, per quem Attalum occideras. Invicem enim miserorum uteris manibus ad expetenda supplicia: et quos paullo ante ministros, caedis habuisti, subito ab aliis iubes trucidari. Obstrepuunt subinde cuncti Hermolao. Pater supremum strinxerat ferrum, percussurus haud dubie, ni inhibitus esset a rege: quippe Hermolanum dicere inssit, petitque, ut causas supplicii audentem patienter audirent. Aegre ergo coërcitis, rursus Hermolans: quam liberaliter, inquit, pueris rudibus ad dicendum agere permittis! at Callisthenes vox carcere inclusa est, quia solus potest dicere. Cur enim non producitur, cum etiam confessi au-

diuntur? nempe quia liberam vocem innocentis audire metuis, ac ne vultum quidem pateris. Atque nihil eum fecisse contendo. Sunt hic, qui mecum rem pulcherrimam cogitaverunt: nemo est, qui consciuum fuisse nobis Callisthenem dicat; cum morti olim destinatus sit a iustissimo et patientissimo rege. Haec ergo sunt Macedonum praemia, quorum ut supervacuo et sordido abuteris sanguine! At tibi xxx millia mulorum captivum aurum vehunt, cum milites nihil domum praeter gratuitas cicatrices relaturi sint. Quae tamen omnia tolerare potuimus, antequam nos barbaris dederes, et novo more victores sub iugum mitteres. Persarum te vestis et disciplina delectat: patrios mores exsus es. Persarum ergo, non Macedonum, regem occidere volumus; et te transfugam belli iure persequimur. Tu Macedonas voluisti genua tibi ponere, venerarique te ut Deum: tu Philippum patrem aversaris, et si quis Deorum ante Iovem haberetur, fastidires etiam Iovem. Miraris, si liberi homines superbiam tuam ferre non possumus? Qui speramus ex te, quibus aut insontibus moriendum est; aut, quod tristius morte est, in servitute vivendum? Tu quidem, si emendari potes, multum mihi debes. Ex me enim scire coepisti, quod ingenui homines ferre non possunt. De cetero parce, quorum orbam senectutem suppliciiis ne oneraveris. Nos iube duci, ut quod ex tua morte petieramus, consequamur ex nostra. Haec Hermolaus.

CAP. VIII. At rex: Quam falsa sint, inquit, quae iste tradita a magistro suo dixit, patientia mea ostendet. Confessum enim ultimum facinus, tamen ut vos quoque, non solum ipse, audiretis, expressi; non imprudens, cum permisisset huic latroni dicere, usurum eum rabie, qua compulsus est, ut me, quem parentis loco colere debet, vellet occi-

rex, quo suo merito tantum in semet cogitassent facinus? interrogat.

CAP. VII. Stupentibus ceteris, Hermolaus, *Nos vero, inquit, quoniam, quasi nescias, quaeris; occidendi te consilium inivimus, quia non ut ingenuus imperare coepisti, sed quasi in mancipia dominaris.* Primus ex omnibus pater ipsius Sopolis, *parricidam etiam parentis sui clamitans esse, consurgit; et ad os manu obiecta, scelere et malis insanientem, ultra negat audiendum.* Rex inhibito patre *dicere Hermolaum iubet, quae ex magistro didicisset Callisthene.* Et Hermolaus, *Utor, inquit, beneficio tuo, et dico, quae nostris malis didici.* Quota pars *Macedonum saevitiae tuae superest? quotusquisque non evilissimo sanguine? Attalus, et Philotas, et Parmenio, et Lyncestes Alexander, et Clitus, quantum ad hostes pertinet, vivunt, stant in acie, te clypeis suis protegunt, et pro gloria tua, pro victoria vulnera accipiunt: quibus tu egregiam gratiam retulisti. Alius mensam tuam sanguine suo adpersit: alius ne simplici quidem morte defunctus est. Duces exercituum tuorum in equuleum impositi, Persis, quos vicerant, fuere spectaculo. Parmenio indicta causa trucidatus est, per quem Attalum occideras. Invicem enim miserorum uteris manibus ad expetenda supplicia: et quos paullo ante ministros, caedis habuisti, subito ab aliis iubes trucidari.* Obstrepunt subinde cuncti Hermolao. Pater supremum strinxerat ferrum, percussurus haud dubie, ni inhibitus esset a rege: quippe Hermolaum *dicere iussit, petitque, ut causas supplicii augentem patienter audirent.* Aegre ergo coercitis, rursus Hermolaus: *quam liberaliter, inquit, pueris rudibus ad dicendum agere permittis! ut Callisthenis vox carcere inclusa est, quia solus potest dicere. Cur enim non producitur, cum etiam confessi au-*

diuntur? nempe quia liberam vocem innocentis audire metuis, ac ne vultum quidem pateris. Atqui nihil eum fecisse contendo. Sunt hic, qui mecum rem pulcherrimam cogitaverunt: nemo est, qui conscium fuisse nobis Callisthenem dicat; cum morti olim destinatus sit a iustissimo et patientissimo rege. Haec ergo sunt Macedonum praemia, quorum ut supervacuo et sordido abuteris sanguine! At tibi xxx millia mulorum captivum aurum vehunt, cum milites nihil domum praeter gratuitas cicatrices relaturi sint. Quae tamen omnia tolerare potuimus, antequam nos barbaris dederes, et novo more victores sub iugum mitteres. Persarum te vestis et disciplina delectat: patrios mores exsus es. Persarum ergo, non Macedonum, regem occidere voluimus; et te transfugam belli iure persequimur. Tu Macedonas voluisti genua tibi ponere, venerarique te ut Deum: tu Philippum patrem aversaris, et si quis Deorum ante Iovem haberetur, fastidires etiam Iovem. Miraris, si liberi homines superbiam tuam ferre non possumus? Quid speramus ex te, quibus aut insontibus moriendum est; aut, quod tristius morte est, in servitute vivendum? Tu quidem, si emendari potes, multum mihi debes. Ex me enim scire coepisti, quod ingenui homines ferre non possunt. De cetero parce, quorum orbam senectutem supplicii ne oneraveris. Nos iube duci, ut quod ex tua morte petieramus, consequamur ex nostra. Haec Hermolaus.

CAP. VIII. At rex: Quam falsa sint, inquit, quae iste tradita a magistro suo dixit, patientia mea ostendet. Confessum enim ultimum facinus, tamen ut vos quoque, non solum ipse, audiretis, expressi; non imprudens, cum permissem huic latroni dicere, usurum eum rabie, qua compulsus est, ut me, quem parentis loco colere debet, vellet occi-

dere. Nuper cum procacius se in venatione gessisset; more patrio, et ab antiquissimis Macedoniae regibus usurpato, eum castigari iussi. Hoc et oportet fieri, et ut a tutoribus pupilli, a maritis uxores, servis quoque pueros huius aetatis verberare concedimus. Haec est saevitia in ipsi meae, quam impia caede voluit ulcisci. Nam in ceteros, qui mihi permittunt uti ingenio meo, quam mitissim, non ignoratis, et commemorare supervacuum est. Hermolao parricidarum supplicia non probari, cum eadem ipse meruerit, minime hercule admiror. Nam cum Parmenionem et Philotam laudat, suae servit causae. Lyncesten vero Alexandrum bis insidiatum capiti meo a duobus indicibus liberavi: rursus convictum, per biennium tamen distuli; donec vos postularetis, ut tandem debito supplicio scelus lueret. Attalum, antequam rex essem, hostem meo capiti fuisse meministis. Clitus utinam non coegisset me sibi irasci. Cuius temerariam linguam probra dicentem mihi et vobis diutius tuli, quam ille eadem me dicentem tulisset. Regum ducumque clementia, non in ipsorum modo, sed etiam in illorum, qui parent, ingenis sita est. Obsequio mitigantur imperia: ubi vero reverentia excessit animis, et summa imis confundimus, vi opus est, ut vim repellamus. Sed quid ego mirer istum crudelitatem mihi obiecisse, qui avaritiam exprobrare ausus sit? Nolo singulos vestrum excitare, ne invisam liberalitatem meam faciam, si pudori vestro gravem fecero. Totum exercitum adspicite: qui paullo ante nihil praeter arma habebat, nunc argenteis cubat lectis; mensae auro onerant; greges servorum ducunt; spolia de hostibus sustinere non possunt. At enim Persae, quos vicimus, in magno honore sunt apud me! Equidem moderationis meae certissimum in-

*dicium est, quod ne victis quidem superbe impero. Veni enim in Asiam, non ut funditus everterem gentes, nec ut dimidiam partem terrarum solitudinem facerem; sed ut illos quoque, quos bello subegissem, victorias meae non poeniteret. Itaque militant vobiscum, pro imperio vestro sanguinem fundunt, qui superbe habiti rebellassent. Non est diuturna possessio, in quam gladio inducimur: beneficiorum gratia sempiterna est. Si habere Asiam, non transire volumus; cum his communicanda est nostra clementia: horum fides stabile et aeternum faciet imperium. Et sane plus habemus, quam capimus. Insatiabilis autem avaritiae est, adhuc implere velle, quod iam circumfluit. Verumtamen eorum mores in Macedonas transfundo! In multis enim gentibus esse video, quae non erubescamus imitari: nec aliter tantum imperium apte regi potest, quam ut quaedam et tradamus illis, et ab iisdem discamus. Illud paene dignum risu fuit, quod Hermolaus postulabat a me, ut adversarer Iovem, cuius oraculo agnoscor. An etiam quid Dii respondeant, in mea potestate est? Obtulit nomen filii mihi: recipere ipsis rebus, quas agimus, haud alienum fuit. Utinam Indi quoque Deum esse me credant! Fama enim bella constant; et saepe etiam, quod falso creditum est, veri vicem obtinuit. An me luxuriae insolentem putatis arma vestra auro argentoque adornasse? Adsuetis nihil vilius hoc videre materia, volui ostendere, Macedonas invictos ceteris nec auro quidem vinci. Oculos ergo primum eorum sordida omnia et humilia spectantium capiam; et docebo, nos non auri aut argenti cupidos, sed orbem terrarum subacturos venisse. Quam gloriam tu parricida intercipere voluisti, et Macedonas rege adempto devictis gentibus dedere.*



*At nunc mones me, ut vestris parentibus parcam! Non oportebat quidem vos scire, quid de his stautissem, quo tristiores periretis, si qua vobis parentum memoria et cura est: sed olim istum morem occidendi cum scelestis insontes propinquos parentesque solvi; et profiteor, in eodem honore futuros omnes eos, in quo fuerunt. Nam tuum Callisthenem, cui uni vir videris, quia latro es, scio, cur produci velis: ut coram his probra, quae modo in me iecisti, modo audisti, illius quoque ore referantur. Quem, si Macedo esset, tecum introduxissem, dignissimum te discipulo magistrum: nunc Olynthio non idem iuris est. Post haec consilium dimisit, tradique damnatos hominibus, qui ex eadem cohorte erant, iussit. Illi, ut fidem suam saevitia regi approbarent, excruciatos necaverunt. Callisthenes quoque tortus interiit: initi consilii in caput regis innoxius; sed haudquaquam aulae et assentantium accommodatus ingenio. Itaque nullius caedes maiorem apud Graecos Alexandro excitavit invidiam, quod praeditum optimis moribus artibusque, a quo revocatus ad vitam erat, cum interfecto Clito mori perseveraret, non tantum occiderit, sed etiam torserit indicta quidem causa. Quam crudelitatem sera poenitentia consecuta est.*

CAP. IX. Sed ne otium serendis rumoribus natum aleret, in Indiam movit; semper bello quam post victoriam clarior. India tota ferme spectat Orientem, minus in latitudinem, quam recte regione spatiosa. Quae Austrum accipiunt, in altius terrae fastigium excedunt; plana sunt cetera, multisque inclitis amnibus Caucaso monte ortis placidum per campos iter praebent. Indus gelidior est, quam ceteri. Aquas vehit a colore maris haud multum abhorrentes. Ganges amnis ab ortu eximius ad meridianam regionem decurrit, et magnorum montium iuga recto alveo stringit. Inde eum obiectae rupes inclinant ad Orientem.

tem. Utque Rubro mari accipitur, findens ripas, multas arbores cum magna soli parte exsorbet. Saxis quoque impeditus, crebro reverberatur. Ubi mollius solum reperit, stagnat, insulasque molitur. Acesing eum anget. Ganges decursurum in mare intercipit magnoque motu amnis uterque colliditur. Quippe Ganges asperum os influenti obiiicit; nec repercussae aquae cedunt. Dyardenes minus celebris auditu est, quia per ultima Indiae currit: ceterum non crocodilos modo uti Nilus, sed etiam delphines ignotasque aliis gentibus belluas alit. Erymanthus crebris flexibus subinde curvatus, ab accolis gigantibus carpitur. Ea causa est, cur tenues reliquias iam sine nomine in mare emittat. Multis praeter hos amnibus tota regio dividitur, sed ignobilibus, quia non adeo interfluunt. Ceterum quae propiora sunt mari, aquilones maxime deurrunt: ii cohibiti iugis montium ad interiora non penetrant, ita alendis frugibus mitia. Sed adeo in illa plaga mundus stas temporum vices mutat, ut cum alia fervore solis exaestuant, Indiam nives obruant: rursusque ubi cetera rigent, illic intolerandus aestus existat. Nec cur, ulli se naturae causa ingessit. Mare certe, quo alluitur, ne colore quidem abhorret a ceteris. Ab Erythra rege iudicatum est nomen: propter quod igne rubere aquas credunt. Terra lini ferax; inde plerisque sunt vestes. Libri arborum teneri, haud secus quam chartae literarum notas capiunt. Aves ad imitandum humanae vocis sonum dociles sunt. Animalia inusitata ceteris gentibus, nisi invecta. Eadem terra et rhinocerotas alit, non generat. Elephantorum maior est vis, quam quos in Africa domitant; et viribus magnitudo respondet. Aurum flumina vehunt, quae leni modicoque lapsu segnes aquas ducunt. Gemmas margaritasque mare litoribus infundit. Neque alia illis maior opulentiae causa est; utique postquam vitiorum commercium vulgaverit in exteras gentes:

quippe aestimantur purgamenta aestuantis freti pretio, quod libido constituit. Ingenia hominum sicut ubique, apud illos locorum quoque situs format. Corpora usque pedes carbaso velant: soleis pedes, capita linteis vinciunt. Lapilli ex auribus pendent; brachia quoque et lacertos auro colunt, quibus inter populares aut nobilitas aut opes eminent. Capillum pectunt saepius, quam tondent. Mentum semper intonsum est: reliquam oris cutem ad speciem laevitatis exaequant. Regum tamen luxuria, quam ipsi magnificentiam appellant, supra omnium gentium vitia. Cum rex se in publico conspici patitur, thuribula argentea ministri ferunt, totumque iter, per quod ferri destinavit, odoribus complent. Aurea lectica margaritis circumpendentibus recubat: distincta sunt auro et purpura carbaso, quae indutus est: lecticam sequuntur armati corporisque custodes: inter quos ramis aves pendent, quas cantu seriis rebus obstrepere docuerunt. Regia auratas columnas habet: totas eas vitis auro caelata percurrit, aviumque, quarum visu maxime gaudent, argenteae effigies opera distinguunt. Regia aduentibus patet, cum capillum pectit atque ornat: tunc responsa legationibus, tunciura popularibus reddit. Dentis soleis, odoribus illinuntur pedes. Venatus maximus labor est, inclusa vivario animalia inter vota cantus pellicum figere. Binum cubitorum sagittae sunt, quas emittunt maiore nixu quam effectu. Quippe telum, cuius in levitate vis omnis est, inhabili pondere oneratur. Brevia itinera equo conficit: longior ubi expeditio est, elephantum vehunt currum; et tantarum belluarum corpora tota contegunt auro. Ac ne quid perditis moribus desit, lecticis aureis pellicum longus ordo sequitur: separatum a reginae ordine agmen est, aequatque luxuria. Feminae epulas parant. Ab iisdem vinum ministratur, cuius omnibus Indis largus est usus. Regem mero somnoque sopitum in cubiculum pellices

referunt, patrio carmine noctium invocantes Deos. Quis credat inter haec vitia curam esse sapientiae? Unum agreste et horridum genus est, quos sapientes vocant. Apud hos occupare fati diem pulchrum; et *vivos se cremari* iubent, quibus aut segnis aetas, aut incommoda valetudo est: expectatam mortem pro dedecore vitae habent. Nec ullus corporibus, quae senectus solvit, honos redditur: inquinari putant ignem, nisi qui spirantes recipit. Illi, qui in urbibus publicis moribus degunt, siderum motus scite spectare dicuntur, et futura praedicere. Nec quemquam admovere leti diem credunt, cui expectare interrito liceat. Deos putant, quidquid colere coeperunt: arbores maxime, quas violare capitale est. Menses in quinos denos descripserunt dies. Anni plena spatia servant. Lunae cursu notant tempora, non ut plerique, cum orbem sidus implevit; sed cum se curvare coepit in cornua. Et idcirco breviores habent menses, qui spatium eorum ad hunc lunae modum dirigunt. Multa et alia traduntur, quibus morari ordinem rerum, haud sane operae videbatur.

CAP. X. Igitur Alexandro fines Indiae ingresso gentium suarum reguli occurrerunt, imperata facturi; *illum tertium Iove genitum ad ipsos pervenisse* memorantes: *Patrem Liberum atque Herculem fama cognitos esse; ipsum coram adesse cernique.* Rex benigne exceptos sequi iussit, iisdem itinerum ducibus usus. Ceterum cum amplius nemo occurreret; Hephaestionem et Perdiccam cum copiarum parte praemisit ad subigendos, qui aversarentur imperium: iussitque *ad flumen Indum procedere, et navigia facere, quae in ulteriora transportari posset exercitus.* Illi, quia plura flumina superanda erant, sic iunxere naves, ut solutae plaustris vehi possent; rursusque coniungi. *Post se Cratero cum phalange iusso sequi, equitatum ac levem armaturam*

eduxit; eosque, qui occurrerant, levi proelio in urbem proximam compulit. Iam supervenerat Craterus. Itaque ut principio terrorem incuteret genti nondum arma Macedonum expertae, praecipit *ne cui parceretur*, munimentis urbis, quam obsidebat, incensis. Ceterum dum obequitabat moenibus, sagitta ictus est. Cepit tamen oppidum, et omnibus incolis eius trucidatis etiam in tecta saevitum est. Inde domita ignobili gente, ad Nysam urbem pervenit. Forte castris ante moenia ipsa in silvestri loco positis, nocturnum frigus vehementius quam alias horrore corpora affecit, opportunumque remedium ignis oblatum est. Caesis quippe silvis flammam excitaverunt: quae igni alita oppidanorum sepulcra comprehendit. Vetusta cedro facta erant, conceptumque ignem late fudere; donec omnia solo aequata sunt. Et ex urbe primum canum latratus, deinde etiam hominum fremitus auditus est. Tum et oppidani hostem, et Macedones ipsos ad urbem venisse cognoscunt. Iamque rex eduxerat copias, et moenia obsidebat; cum hostium, qui discrimen tentaverant, obruti telis sunt. Aliis ergo deditionem, aliis pugnam experiri placebat: quorum dubitatione comperta, *circumsideri tantum eos, et abstineri caedibus* iussit. Tandemque obsidionis malis-fatigati deditere se. *A Libero Patre conditos se esse dicebant*; et vera haec origo erat. Sita est sub radicibus montis, quem *Meron* incolae appellant. Inde Graeci inveniendi traxere licentiam, *Iovis femine Liberum Patrem esse celatum*. Rex, situ montis cognito ex incolis, cum toto exercitu, praemissis com meatibus, verticem eius ascendit. Multa hedera vitisque toto gignitur monte; multae perennes aquae manant. Pomorum quoque varii salubresque succi sunt, sua sponte fortuitorum seminum fruges humo nutriente. Lauri baccaeque et multa in illis rupibus agrestis est silva. Credo equidem, non divino instinctu, sed lascivia esse

provectos, ut passim hederæ ac vitium folia decerpent, redimitique fronde toto nemore similes Bacchantibus vagarentur. Vocibus ergo tot millium, praesidem nemoris eius Deum adorantium, iuga montis collesque resonabant; cum orta licentia a paucis, ut fere fit in omnes se repente vulgasset. Quippe velut in media pace, per herbas congestamque frondem prostraverant corpora. Et rex fortuitam licentiam non aversatus, large ad epulas omnibus praebitis, per decem dies Libero Patri operatum habuit exercitum. Quis neget, eximiam quoque gloriam saepius fortunæ, quam virtutis, esse beneficium? \* quippe ne epulantes quidem et sopitos mero aggredi ausus est hostis, haud secus Bacchantium ululantiumque fremitu perterritus, quam si proeliantium clamor esset auditus. Eadem felicitas ab Oceano revertentes temulentos comessantesque inter ora hostium texit. Hinc ad regionem, quæ *Daedala* vocatur, perventum est. Deseruerant incolæ sedes, et in avios silvestresque montes confugerant. Ergo Acadera transit, aequè vasta et destituta incolentium fuga. Itaque rationem belli necessitas mutavit. Divisis enim copiis, pluribus simul locis arma ostendit; oppressique, et qui expectaverant hostem, omni clade perdomiti sunt. Ptolemaeus plurimas urbes, Alexander maximas cepit: rursusque, quas distribuerat, copias iunxit. Superato deinde Choaspe amne, Coenon in obsidione urbis opulentæ, Beziram incolæ vocant, reliquit. Ipse ad mazagas venit. Nuper Assacano, cuius regnum fuerat, demortuo, regioni urbiq; præerat mater eius Cleophes. Tringinta millia peditum tuebantur urbem, non situ solum, sed etiam opere munitam. Nam qua spectat orientem, cingitur amne torrenti, qui præruptis utrinque ripis aditum ad urbem impedit. Ad occidentem, et a meridie velut de industria rupes præaltas admolita natura est, infra quas cavernæ et voragines longa vetustate

in altum cavatae iacent: quaque desinunt, fossa ingentis operis obiecta est. XXXV stadia murus urbem complectitur, cuius inferiora saxo, superiora crudo latere sunt structa. Lateri vinculum lapides sunt, quos interposuere, ut duriori materiae fragilis incumberet, simulque terra humore diluta. Ne tamen universa consideret, impositae erant trabes validae, quibus iniecta tabulata muros et tegebant, et pervios fecerant. Haec munimenta contemplantem Alexandrum, consiliique incertum, quia nec cavernas nisi aggere poterat implere, nec tormenta aliter muris admove; quidam e muro sagitta percussit. Tum forte in suram incidit telum: cuius spiculo evulso, *admoventi equum* iussit; quo vectus ne obligato quidem vulnere, haud segnus destinata exsequeretur. Ceterum cum crus saucium penderet, et cruore siccato frigescentis vulnus aggravaret dolorem, dixisse fertur: *se quidem Iovis filium dici, sed corporis aegri vitia sentire*. Non tamen ante se recepit in castra, quam cuncta prospexit, et quae fieri vellet, edixit. Ergo, sicut imperatum erat, alii extra urbem tecta demoliebantur, ingentemque vim materiae faciendo aggeri detrahebant: alii magnarum arborum stipites cumulis ac moles saxorum in cavernas deiiciebant. Iamque agger aequaverat summam fastigium terrae: itaque turres erigebantur, quae opera ingenti militum ardore intra nonum diem absoluta sunt. Ad ea visenda rex nondum obducta vulnere cicatrice processit; laudatisque militibus, *admoventi machinas* iussit: e quibus ingens vis telorum in propugnatores effusa est! Praecipue rudes talium operum terrebant mobiles turres, tantasque moles nulla ope quae cerneretur adductas, Deorum numine agi credebant. *Pila quoque muralia, et excussas tormentis praegraves hastas* negabant *convenire mortalibus*. Itaque desperata urbis tutela concessere in arcem. Inde, quia nihil obsessis praeter

deditionem placebat, legati ad regem descenderunt veniam petitori. Qua impetrata, regina cum magno nobilium seminarum grege aureis pateris vina libantium processit. Ipsa genibus regis parvo filio admoto, non veniam modo, sed etiam pristinae fortunae impetravit decus. Quippe appellata *regina* est; et credidere quidam, *plus formae, quam miserationi, datum*. Puero quoque postea ex ea utrunque genito, *Alexandro* fuit nomen.

CAP. XI. Hinc Polypercon ad urbem Oram cum exercitu missus, inconditos oppidanos proelio vicit: intra munimenta compulsos secutus, urbem in ditionem redegit. Multa ignobilia oppida deserta a suis venire in regis potestatem: Quorum incolae armati petram *Aornon* nomine occupaverunt. Hanc *ab Hercule frustra obsessam esse; terraeque motu coactum absistere*, fama vulgaverat. Inopem consilii Alexandrum, quia undique praeceps et abrupta rupes erat, senior quidam peritus locorum cum duobus filiis adit, *si pretium operi esset, aditum se monstraturum esse* promittens. *Lxxx talenta* constituit *daturum* Alexander; et altero ex iuvenibus obside retento, ipsum ad exsequenda, quae obtulerat, dimisit. Leviter armatis dux datus est Mullinus, scriba regis. Hos enim circumitus, qui fallerent hostem, in summum iugum placebat evadere. Petra non, ut pleraeque, modicis ac mollibus clivis in sublime fastigium crescit; sed in metae maxime modum erecta est, cuius ima spatiosiora sunt, altiora in arctius coeunt, summa in acutum cacumen exsurgunt. Radices eius Indus amnis subit, praealtus utrimque asperis ripis: ab altera parte voragines eluviesque praeruptae sunt. Nec alia expugnandi patebat via, quam ut replerentur. Ad manum silva erat, quam rex *ita caedi iussit, ut nudi stipites iacerentur*: quippe rami fronde vestiti impedissent ferentes. Ipse primus truncam arborem iecit; cla-



morque exercitus, index alacritatis, secutus est, nullo detrectante munus, quod rex occupasset. Intra septimum diem cavernas expleverant; cum rex sagittarios et Agrianos iubet per ardua niti. Iuvenesque promissimos ex sua cohorte xxx delegit. Duces his dati sunt Charus et Alexander; quem rex *nominis, quod sibi cum eo commune esset*, admonuit. Ac primo, quia tam manifestum periculum erat, ipsum regem discrimen subire non placuit: sed ut signum tuba datum est, vir audacitæ promptæ conversus ad corporis custodes *sequi se* iubet, primusque *invadit in rupem*. Nec deinde quisquam Macedonum substitit; relictisque stationibus sua sponte regem sequebantur. Multorum miserabilis fuit casus, quos ex prærupta rupe lapsos amnis præterfluens hausit; triste spectaculum etiam non periclitantibus: cum vero alieno exitio, quid ipsis timendum foret, admonerentur; in metum misericordia versa, non extinctos, sed semctipsum deflebant. Et iam eo perventum erat, unde sine pernicie nisi victores redire non possent, ingentia saxa in subeuntes provolventibus barbaris, quibus percussi instabili et lubrico gradu præcipites recidebant. Evaserant tamen Alexander et Charus, quos cum xxx delectis præmiserat rex, et iam pugnare cominus coeperant: sed cum superne tela barbari iugerent, sæpius ipsi feriebantur, quam vulnerabant. Ergo Alexander, et nominis sui et promissi memor, dum acrius quam cautius dimicat, confossus undique obruitur. Quem ut Charus iacentem conspexit, ruere in hostem, omnium præter ultionem immemor, coepit; multosque hasta, quosdam gladio interemit. Sed cum tot unum incesserent manus, super amici corpus procubuit exanimis. Haud secus, quam par erat, promississimorum iuvenum ceterorumque militum interitu commotus rex signum receptui dedit. Saluti fuit, quod sensim et intrepidi se receperunt; et barbari, hostem depulsi contenti, non institere cedentibus. Ceterum Alexander cum statuisset

desistere incepto, (quippe nulla spes potiundae petrae offerebatur;) tamen speciem ostendit in obsidione perseverantis. Nam *et itinera obsideri iussit, et turres admoveri, et fatigatis alios succedere.* Cuius pertinacia cognita, Indi per biduum quidem ac duas noctes, cum ostentatione non fiducia modo, sed etiam victoriae, epulati sunt, tympana suo more pulsantes. Tertia vero nocte tympanorum quidem strepitus desierat audiri; ceterum ex tota petra faces refulgebant, quas accenderant barbari, ut tutior esset ipsis fuga, obscura nocte per invia saxa cursuris. Rex, Balacro, qui specularetur, praemisso, cognoscit *petram fuga Indorum esse desertam.* Tum dato signo, ut universi conclamarent, incomposite fugientibus metum incussit. Multique, tanquam adesset hostis, per lubrica saxa, perque invias cotes praecipitati occiderunt: plures aliqua membrorum parte mulctati, ab integris deserti sunt. Rex locorum magis quam hostium victor, tamen magnae victoriae sacrificiis et cultu Diis satisfacit. Arae in petra locatae sunt Minervae Victoriaeque. Ducibus itineris, quos subire iusserat leviter armatos, etsi promissis miora praestiterant, pretium cum fide redditum est. Petrae regionisque ei adiunctae Siso-costo tutela permissa.

CAP. XII. Inde processit Echolima: et cum *angustias itineris obsideri xx millibus armatorum ab Eryce quodam comperisset;* gravius agmen exercitus Coeno ducendum modicis itineribus tradidit. Ipse praegressus cum funditore ac sagittario, deturbatis, qui obsederant saltum, sequentibus se copiis viam fecit. Indi, sive odio ducis, sive gratiam victoris regis initari, Erycem fugientem adorti interemerunt, caputque eius atque arma ad Alexandrum detulerunt. Ille facto impunitatem dedit; honorem denegavit exemplo. Hinc ad flumen Indum sextisdecumis castris pervenit, omniaque, ut praeceperat, ad traiciendum praeparata

ab Hephaestione reperit. Regnabat in ea regione Omphis, qui patri quoque fuerat auctor dedendi regnum Alexandro. Et post mortem parentis legatos miserat, qui consulerent eum, *regnare se interim vellet; an privatam opperiri eius adventum*. Permissoque ut regnaret, non tamen ius datum usurpare sustinuit. Is benigne quidem exceperat Hephaestionem, gratuitum frumentum copiis eius admensus: non tamen ei occurrerat, ne fidem ullius nisi regis experiretur. Itaque venienti obviam cum armato exercitu egressus est: elephantum quoque per modica intervalla militum agminum immixti, procul castellorum fecerant speciem. Ac primo Alexander non socium, sed hostem, adventare credebat. Iamque et ipse *arma milites capere, et equites discedere in cornua* iusserat, paratos ad pugnam. At Indus, cognito Macedonum errore, iussis subsistere ceteris, ipse concitat equum, quo vehebatnr: idem Alexander quoque fecit, sive hostis, sive amicus occurreret, vel sua virtute, vel illius fide tutus. Convere, quod ex utriusque vultu posset intelligi, amicis animis: ceterum sine interprete non poterat conseri sermo. Itaque adhibito eo, barbarus *occurrisse se dixit cum exercitu, totas imperii vires protinus traditurum; nec expectasse, dum per nuntios daretur fides. Corpus suum et regnum permittere illi, quem sciret gloriae militantem, nihil magis quam famam timere perfidiae*. Laetus simplicitate barbari rex, et dextram fidei suae pignus dedit, et regnum restituit. LVI elephantum erant, quos tradidit Alexandro, multaque pecora eximiae magnitudinis: tanros ad III millia, pretiosum in ea regione acceptumque animis regnantium armentum. Quaerenti Alexandro, *plures agricultores haberet an milites? Cum duobus regibus bellanti sibi maiore militum quam agrestium manu opus esse* respondit. Abisares et Porus erant; sed in Poro eminebat auctoritas. Uter-

que ultra Hydaspem amnem regnabat; et belli fortunam, quisquis arma inferret, experiri decreverat. Omphis, permittente Alexandro, et regium insigne sumsit, et more gentis suae nomen quod patris fuerat *Taxilen* appellavere populares, sequente nomine imperium in quemcunque transiret. Ergo cum per triduum hospitaliter Alexandrum accepisset, quarto die, et *quantum frumenti copiis, quas Hephæstion duxerat, praebitum a se esset*, ostendit; et aureas coronas ipsi amicisque omnibus, praeter haec signati argenti **LXXX** talenta dono dedit. Qua benignitate eius Alexander mire lactus, et quae is dederat, remisit, et mille talenta ex praeda, quam vehebat, adiecit, multaque convivalia ex auro et argento vasa, plurimum Persicae vestis, **XXX** equos ex suis, cum iisdem insignibus, quibus adsueverant, cum ipsum veherent. Quae liberalitas, sicut barbarum obstrinxerat, ita amicos ipsius vehementer offendit. E quibus Meleager, super coenam largiore ~~quo~~ usus, *gratulari se Alexandro dixit, quod saltem in India reperisset dignum talentis mille.* Rex, haud oblitus quam aegre tulisset, quod Clitum ob linguae temeritatem occidisset, iram quidem tenuit, sed dixit, *invidos homines nihil aliud, quam ipsorum esse tormenta.*

CAP. XIII. Postero die legati Abisarae adiere regem. *Omnia ditioni eius, ita ut mandatum erat, permittebant*: firmataque invicem fide, remittuntur ad regem. Porum quoque nominis sui fama ratus ad deditionem posse compelli, misit ad eum Cleocharem, qui denuntiaret ei, *ut stipendium penderet, et in primo finium suorum aditu occurreret regi.* Porus alterum ex his facturum sese respondit, *ut intranti regnum suum praesto esset, sed armatus.* Iam Hydaspem Alexander superare decreverat; cum Barzentes defectionis Arachosii auctor viuctus, trigintaque elephantum simul capti perducuntur, opportunum ad-

versus Indos auxilium: quippe plus in bellis, quam in exercitu spei ac virium illis erat. Gamaxusque, rex exiguae partis Indorum, qui Barzenti se coniunxerat, victus adductus est. Igitur transfuga et regulo in custodiam, elephantis autem Taxili traditis, ad amnem Hydaspem pervenit, in cuius ulteriore ripa Porus consederat, transitu prohibiturus hostem. LXXXV elephantos obiecerat eximio corporum robore; ultraque eos currus CCC, et peditum XXX fere millia, in quibus erant sagittarii, sicuti ante dictum est, gravioribus telis, quam ut apte excuti possent. Ipsum vehebat elephans super ceteras belluas eminens; armaque auro et argento distincta corpus rarae magnitudinis honestabant. Par animus robori corporis, et quanta inter rudes poterat esse sapientia. Macedonas non conspectus hostium solum, sed etiam fluminis, quod transeundum erat, magnitudo terrebant. Quatuor in latitudinem stadia diffusum, profundo alveo, et nusquam vada aperiente, speciem vasti maris fecerat. Nec pro spatio aquarum late stagnantium impetum coercerebat; sed quasi in arctum coeuntibus ripis, torrens, et elisus ferebatur: occultaque saxa inesse ostendebant pluribus locis undae repercussae. Terribilior erat facies ripae, quam equi virique compleverant. Stabant ingentes vastorum corporum moles, et de industria irritatae horrendo stridore auras fatigabant. Hinc hostis, hinc amnis, capacia quidem bonae spei pectora, et saepe se experta, improviso tamen pavore percusserant. Quippe instabiles rates nec dirigi ad ripam, nec tuto applicari posse credebant. Erant in medio amne insulae crebrae, in quas et Indi et Macedones nantes levatis super capita armis transibant. Ibi levia proelia conserebant; et uterque rex parvae rei discrimine, summae experiebatur eventum. Ceterum in Macedonum exercitu temeritate atque audacia insignes fuere Symmachus et Nicanor, nobiles iuvenes, et perpetua

partium felicitate ad spernendum omne periculum accensi. Quis ducibus promptissimi iuvenum lanceis modo armati transnavere in insulam, quam frequens hostis tenebat; multosque Indorum, nulla re magis quam audacia armati, interemerunt. Abire cum gloria poterant, si unquam temeritas felix inveniret modum; sed dum supervenientes contemtim et superbe quoque exspectant, circumventi ab iis, qui occulti enataverant, eminus obruti telis sunt. Qui effugerant hostem, aut impetu amnis ablati sunt, aut vorticibus impliciti. Ea-que pugna multum fiduciam Pori erexit, cuncta cernentis e ripa. Alexander, inops consilii, tandem ad fallendum hostem talem dolum intendit. Erat insula in flumine amplior ceteris, silvestris eadem et tegendis insidiis apta. Fossa quoque praealta haud procul ripa, quam tenebat ipse, non pedites modo, sed etiam cum equis viros poterat abscondere. Igitur ut a custodia huius opportunitatis oculos hostium averteret, Ptolemaeum *cum omnibus turmis obequitare iussit procul ab insula, et subinde Indos clamore terrere, quasi flumen transnaturus foret.* Per complures dies Ptolemaeus id fecit; eoque consilio Porum quoque agmen suum ei parti, quam se petere simulabat, coëgit advertere. Iam extra conspectum hostis insula erat. Alexander *in diversa parte ripae statui suum tabernaculum iussit, adsuetamque comitari ipsum cohortem ante id tabernaculum stare; et omnem apparatus regiae magnificentiae, hostium oculis de industria ostendi.* Attalum, et aequalem sibi, et haud disparem habitu oris et corporis, utique cum procul viseretur, veste regia exornat, praebiturum speciem ipsum regem illi ripae praesidere, nec agitare de transitu. Huius consilii effectum primo morata tempestas est, mox adiuvit; incommoda quoque ad bonos eventus vertente fortuna. Traicere amnem cum ceteris copiis in regionem insulae, de

inquit, *Ptolemaeo Perdiccaque, et Hephaestione comitatus in laevum hostium cornu impetum fecero, viderisque me in medio ardore certaminis; ipse dextrum move, et turbatis signa infer. Tu Antigones, et tu Leonnate, et Tauron, invehimini in mediam aciem, et urgebitis frontem. Hastae nostrae praelongae et validae non alias magis quam adversus belluas rectorisque earum usui esse poterunt: deturbate eos, qui vehuntur, et ipsas confundite. Anceps genus auxilii est, et in suos acrius furit. In hostem enim imperio, in suos pavore agitur.* Haec elocutus concitat equum primus. Iamque, ut destinatum erat, invaserat ordines hostium; cum Coenus ingenti vi in laevum cornu invehitur. Phalanx quoque in mediam Indorum aciem uno impetu prorupit. At Porus, qua equitem invehit senserat, *belluas agi* iussit: sed tardum et paene immobile animal equorum velocitatem aequare non poterat. Ne sagittarum quidem ullus erat barbaris usus. Quippe longae et praegraves, nisi prius in terra statuerent arcum, haud satis apte et commode imponunt. Tum humo lubrica, et ob id impediende conatum, molientes ictus, celeritate hostium occupabantur. Ergo spreto regis imperio, (quod fere fit, ubi turbatis acrius metus quam dux imperare coepit) totidem erant imperatores, quot agmina errabant. Alius *iungere aciem*, alius *dividere, stare* quidam, et nonnulli *circumvehi terga hostium* iuebant. Nihil in medium consulebatur. Porus tamen cum paucis, quibus metu potior fuerat pudor, colligere dispersos, obvius hosti ire pergit, *elephantosque ante agmen suorum agi* iubet. Magnum belluae iniecere terrorem; insolitusque stridor non equos modo, tam pavidum ad omnia animal, sed viros quoque ordinesque, turbaverat. Iam fugae circumspiciebant locum paullo ante victores; cum Alexander Agrianos et Thracas leviter armatos, meliorem con-

cursatione quam cominus militem, emisit in belluas. Ingentem ii vim telorum iniocere et elephantis, et regentibus eos. Phalanx quoque instare constanter territis coepit. Sed quidam avidius persecuti belluas in semet irritavere vulneribus. Obtriti ergo pedibus earum, ceteris, ut parcius instarent, fuere documentum. Praecipue terribilis illa facies erat, cum manu arma virosque corripere, et super se regentibus traderent. Anceps ergo pugna nunc sequentium, nunc fugientium elephantos, in multum diei varium certamen extraxit; donec securibus (id namque genus auxilii praeparatum erat) pedes amputare coeperunt. *Copidas* vocant gladios leviter curvatos falcibus similes, quis appetebant belluarum manus. Nec quidquam inexpertum non mortis modo, sed etiam in ipsa morte novi supplicii timor omittebat. Ergo elephantis vulneribus tandem fatigati suos impetu sternunt, et qui rexerant eos praecipitati in terram, ab ipsis obterebantur. Itaque pecorum modo magis pavidi, quam infesti, ultra aciem exigebantur; cum Porus, destitutus a pluribus, tela multo ante praeparata in circumfusos ex elephanto suo coepit ingerere, multisque eminus vulneratis, expositus ipse ad ictus undique petebatur. Novem iam vulnera hinc tergo, illinc pectore exceperat, multoque sanguine profuso languidis manibus magis elapsa, quam excussa, tela mittebat. Nec segnius bellua, instincta rabie, nondum saucia invehebatur ordinibus; donec rector belluae regem conspexit fluentibus membris omnisque armis vix competentem mentis. Tum belluam in fugam concitat, sequente Alexandro: sed equum eius multis vulneribus confossus deficiensque procubuit, posito magis rege, quam effuso. Itaque dum equum mutat, tardius insecutus est. Interim frater Taxilis, regis Indorum, praemissus ab Alexandro, monere coepit Porum, *ne ultima experiri perseveraret, dederetque se victori*. At ille, quamquam exhaustae erant



vires, deficiebatque sanguis, tamen ad notam vocem excitatus, *Agnosco*, inquit, *Taxilis fratrem, imperii regnique sui proditorem*: et telum, quod unum forte non effluserat, contorsit in eum; quod per medium pectus penetravit ad tergum. Hoc ultimo virtutis opere edito, fugere acrius coepit: sed elephante quoque, qui multa exceperat tela, deficiebat. Itaque sistit fugam, peditemque sequenti hosti obiecit. Iam Alexander consecutus erat, et, pertinacia Pori cognita, *vetabat resistentibus parci*. Ergo undique et in pedites, et in ipsum Porum, tela congesta sunt: quis tandem gravatus labi ex bellua coepit. Indus, qui elephantum regebat, descendere eum ratus, more solito elephantum *procumbere iussit in genua*: qui ut se submitit, ceteri quoque, ita enim instituti erant, demisere corpora in terram. Ea res et Porum, et ceteros, victoribus tradidit. Rex *spoliari corpus Pori*, interentum esse credens, iussit, et qui detraherent lorica vestemque, concurrere; cum bellua dominum tueri, et spoliantes coepit appetere, levatumque corpus eius rursus dorso suo imponere. Ergo telis undique obruitur; confossoque eo, in vehiculum Porus imponitur. Quem rex ut vidit allevantem oculos, non odio, sed miseratione commotus, *quae malum*, inquit, *amentia te coegit, rerum mearum cognita fama, belli fortunam experiri; cum Taxiles esset in deditos clementiae meae tam propinquum tibi exemplum?* At ille, *quoniam*, inquit, *percontaris, respondebo ea libertate, quam interrogando fecisti. Neminem me fortiorem esse censebam. Meas enim noveram vires, nondum expertus tuas: fortiorem esse te, belli docuit eventus. Sed ne sic quidem parum felix sum, secundus tibi*. Rursus interrogatus, *quid ipse victorem statuere debere censeret; quod hic*, inquit, *dies tibi suadet, quo expertus es, quam caduca felicitas esset*. Plus monendo profecit, quam si precatus esset. Quippe magnitudinem animi eius in-

territam, ac ne fortuna quidem infractam, non misericordia modo, sed etiam honore, excipere dignatus est. Aegrum curavit haud secus, quam si pro ipso pugnas-  
set: confirmatum contra spem omnium in amicorum numerum recepit: mox donavit ampliore regno, quam tenuit. Nec sane quidquam ingenium eius solidius aut constantius habuit, quam admirationem verae laudis et gloriae: simplicius tamen famam aestimabat in hoste, quam in cive. Quippe a suis credebat magnitudinem suam destrui posse; eandem clariorem fore quo maiores fuissent, quos ipse vicisset.

---



Q. CVRTII RVFI  
DE  
REBVS GESTIS  
ALEXANDRI MAGNI  
HISTORIARVM  
LIBER IX.

---

ARGVMENTVM.

*Devicto Poro, in Indiam penetrat Alexander, variasque gentes et urbes, quarum mores describuntur, sibi subiicit, 1. Gangaridas et Pharrasios aggressurus, milites, fatigatos et bellum detrectantes, proluxa oratione ad perseverantiam hortatur, 2. Coenus, militum nomine, Alexandro respondet, et paullo post morbo exstinguitur, 3. Sobiis, et aliis expugnatis, regionem Oxydracarum et Mallorum ingreditur. Oratione ad milites habita, barbaros fugat, eorumque oppidum, contempto Demophoonte vate, obsidet, 4. Praecipiti saltu in Oxydracarum oppidum se immittens, graviter vulneratur, et fortissimis quibusdam ducibus desideratis, oppidoque post aliquot dies expugnato, sibi*

*suisque restituitur, 5. Ab amicis rogatus, ut salutis suae publicaeque parceret, generose respondet, in instituto suo de domando orbe perseverans, 6. Graecorum quorundam in Baotris defectio repressa. Dum Indorum legatos convivio excipit Alexander, inter Horratham et Dioxippum, qui tandem imparibus armis duello certant, rixa oritur. Paulo post Dioxippus, inimicorum calumniis ultra modum irritatus, semetipsum interimit, 7. Donis a legatis Indorum acceptis, Sabracas, Musicanos, Praestos, aliosque populos debellat; Ptolemaeo venenata plaga accepta curato, ope cuiusdam herbae, cuius species in somnis Alexandro est oblata, 8. Cupidine visendi Oceani correptus, non sine periculis propter nautarum imperitiam, tandem voti sui compos redditur, 9. Ab Oceano in Arabitarum, Gedrosiorum et Indorum fines revertitur: ubi cum fame et pestilentia luctatur exercitus: deinde liberatur, planeque restituitur. Inde secutus est probrosus bacchantium lusus, supplicio Aspastis Satrapis cruentatus, 10.*

## CAPUT I.

**A**lexander, tam memorabili victoria laetus, qua sibi Oricutis fines apertos esse censebat, Soli victimis caesis, milites quoque, quo promptioribus animis reliqua belli munia obirent, pro concione laudatos docuit, *quidquid Indis virium fuisset, illa dimicatione prostratum. Ceteram opimam praedam fore, celebratasque opes in ea regione eminere, quam peterent. Proinde iam vilia et obsoleta esse spolia de Persis: gemmis margaritisque, et auro atque ebore Macedoniam Graeciamque, non suas tantum domos, repleturum. Avidi milites et pecuniae et gloriae, simul quia nunquam affirmatio eius fefellerat eos, pollicentur operam: dimissisque cum bona spe, navigia ae-*

*dificari iubet, ut cum totam Asiam percurrissent, finem terrarum mare inviseret.* Multa materia navalis in proximis montibus erat: quam caedere aggressi, magnitudinis inusitatae reperere serpentes. Rhinoceros quoque, rarum alibi animal, in iisdem montibus erant. Ceterum hoc nomen belluis eis iudicatum a Graecis: sermonis eius ignari aliud lingua sua usurpant. Rex, duabus urbibus conditis in utraque fluminis, quod superaverat, ripa, copiarum duces coronis et mille aureis singulos donat: ceteris quoque pro portione aut gradus, quem in militia obtinebant, aut navatae operae, honos habitus est. Abisares, qui prius quam cum Poro dimicaretur, legatos ad Alexandrum miserat, rursus alios misit, pollicentes, *omnia facturum, quae imperasset, modo ne cogere corpus suum dedere: neque enim aut sine regio imperio victurum, aut regnaturum esse captivum.* Cui Alexander nuntiari iussit, *si gravaretur ad se venire, ipsum ad eum esse venturum.* Hinc Poro amneque superato ad interiora Indiae processit. Silvae erant prope in immensum spatium diffusae, procerisque et in eximiam altitudinem editis arboribus umbrosae. Plerique rami instar ingentium stipitum flexi in humum; rursus, qua se curvaverant, erigebantur adeo, ut species esset non rami resurgentis, sed arboris ex sua radice generatae. Coeli temperies salubris: quippe et vim solis umbrae levant, et aquae largae manant e fontibus. Ceterum hic quoque serpentium magna vis erat, squamis fulgorem auri reddentibus. Virus haud ullum magis noxium est, quippe morsum praesens mors sequebatur; donec ab incolis remedium oblatum est. Hinc per deserta ventum est ad flumen Hydraoten. Iunctum erat flumini nemus, opacum arboribus alibi iansitatis, agrestiumque pavonum multitudine frequens. Castris inde motis, oppidum haud procul postium corona capit, obsidibusque acceptis stipendium imponit. Ad ma-

gnam deinde, ut in ea regione, urbem pervenit, non muro solum, sed etiam palude munitam. Ceterum barbari vehiculis inter se iunctis dimicaturi occurrerunt: aliis tela, aliis hastae, aliis secures erant; transliebantque in vehicula strenuo saltu, cum succurrere laborantibus suis vellent. Ac primo insolitum genus pugnae Macedonas terruit, cum eminus vulnerarentur: deinde spreto tam incondito auxilio, ab utroque latere vehiculis circumfusi repugnantes fodere coeperunt. Et *vincula, quae conserta erant, iussit incidere, quo facilius singula circumvenirentur.* Itaque VIII millibus suorum amissis in oppidum refugerunt. Postero die scalis undique admotis muri occupantur: paucis pernicitas saluti fuit. Qui, cognito urbis excidio, paludem transavere, et in vicina oppida ingentem intulere terrorem, *invictum exercitum, et Deorum profecto, advenisse memorantes.* Alexander, ad vastandam eam regionem Perdicca cum expedita manu misso, partem copiarum Eumeni tradit, ut is quoque barbaros ad deditioem compelleret: ipse ceteros ad urbem validam, in quam aliarum quoque confugerant incolae, duxit. Oppidani, missis, qui regem deprecarentur, nihilominus bellum parabant. Quippe orta seditio in diversa consilia diduxerat vulgum: alii omnia deditioe potiora, quidam nullam opem in ipsis esse ducebant. Sed dum nihil in commune consulitur, qui deditioe imminebant, apertis portis hostem recipiunt. Alexander, quamquam belli auctoribus iure poterat irasci, tamen omnibus venia data, et obsidibus acceptis, ad proximam deinde urbem castra movit. Obsides ducebantur ante agmen. Quos cum e muris agnovissent, utpote gentis eiusdem, in colloquium convocaverunt. Illi, *clementiam regis simulque vim commemorando,* ad deditioem eos compulere: ceterasque urbes simili modo deditas in fidem accepit. Hinc in regnum

Sophitis perventum est. Gens, ut barbari, sapientia excellit, bonisque moribus regitur. Genitos liberos non parentum arbitrio tollunt aluntque; sed eorum, quibus spectandi infantium habitum cura mandata est. Si quos insignes aut aliqua membrorum parte inutiles notaverunt, necari iubent. Nuptiis coeunt, non genere ac nobilitate coniunctis, sed electa corporum specie; quia eadem aestimatur in liberis. Huius gentis oppidum, cui Alexander admoverat copias, ab ipso *Sophite* obtinebatur. Clausae erant portae; sed nulli in muris turribusque se armati ostendebant: dubitabantque Macedones, deseruissentne urbem incolae, an fraude se occiderent; cum, subito patefacta porta, rex Indus cum duobus adultis filiis occurrit, multum inter omnes barbaros emipens corporis specie. Vestis erat auro purpuraque distincta, quae etiam crura velabat: aureis soleis inseruerat gemmas: lacerti quoque et brachia margaritis ornata erant. Pendebant ex auribus insignes candore et magnitudine lapilli. Baculum aureum berylli distinguebant: quo tradito precatus, *ut sospes acciperet*, se liberosque et gentem suam dedit. Nobiles ad venandum canes in ea regione sunt: *latratu abstinere* dicuntur, *cum videre feram*, leonibus maxime infesti. Horum vim ut ostenderet Alexandro, in conspectu leonem eximia magnitudinis iussit emitti, et IV omnino admoveri canes, qui celeriter occupaverunt feram; cum ex iis, qui adsueverant talibus ministeriis, unus, canis leoni cum aliis inhaerentis crus avellere, et, quia non sequebatur, ferro amputare coepit: nec sic quidem pertinacia victa, rursus aliam partem secare institit; et deinde non segnius inhaerentem ferro subinde caedebat. Ille in vulnere ferae dentes moribundus quoque infixerat. *Tantam in illis animalibus ad venandum cupiditatem ingenerasse naturam* memoriae proditum est. Equidem plura transcribo, quam credo: nam nec affirmare sustineo, de qui-

bus dubito; nec subducere, quae accepi. Relicto igitur Sophite in suo regno, ad fluvium Hypasin processit, Hephaestione, qui diversam regionem subegerat, coniuncto. Phegelas erat gentis proximae rex: qui, popularibus suis *colere agros, ut adsueverant*, iussis, Alexandro cum *cum donis occurrit, nihil quod imperaret detrectans.*

CAP. II. Biduum apud eum substitit rex: tertio die annum superare decreverat, transitu difficilem, non spatium solum aquarum, sed etiam saxi impeditum. Percontatus igitur Phegelam, quae noscenda erant, *xi dierum ultra flumen per vastas solitudines iter esse cognoscit: excipere deinde Gangem, maximum totius Indiae fluminum: ulteriorem ripam colere gentes Gangaridas et Pharrasios; eorumque regem esse Aggrammen, xx millibus equitum ducentisque peditum obsidentem vias. Ad haec quadrigarum duo millia trahere, et praecipuum terrorem elephantos, quos trium millium numerum explere dicebat. Incredibilia regi omnia videbantur. Igitur Pori (nam cum eo erat) percontatur, an vera essent, quae dicerentur? Ille, vires quidem gentis et regni haud falso iactari, affirmat: ceterum qui regnaret, non modo ignobilem esse, sed etiam ultimae sortis; quippe patrem eius tonsorem, vix diurno quaestu propulsantem famem, propter habitum haud indecorum, cordi fuisse reginae. Ab ea in propiorem eius, qui tum regnasset, amicitiae locum admotum, interfecto eo per insidias, sub specie tutelae liberum eius invasisse regnum; necatisque pueris hunc, qui nunc regnat, generasse, invisum vilemque popularibus, magis paternae fortunae, quam suae, memorem. Afirmatio Pori multiplicem animo regis iniecerat curam. Hostem belluasque spernebat: situm locorum, et vim fluminum extimescebat: relegatos in ultimum paene rerum humanarum persequi terminum, et eruere, arduum vido-*



batur. Rursus avaritia gloriae, et insatiabilis cupido fa-  
 mae, nihil inivium, nihil remotum videri sinebat. Et  
 interdum dubitabat, *an Macedones, tot eménsi  
 spatia terrarum, in acie et in castris senes facti,  
 per obiecta flumina, per tot naturae obstantes dif-  
 ficultates secuturi essent? abundantes onustosque  
 praeda, magis parta frui velle, quam acquirenda  
 fatigari. Non idem sibi et militibus animi esse: se  
 totius orbis imperium mente complexum, adhuc in  
 operum suorum primordio stare: militem, labore  
 defatigatum, proximum quemque fructum finito  
 tandem periculo expetere.* Vicit ergo cupido ratio-  
 nem, et ad concionem vocatis militibus ad hunc maxi-  
 me modum disseruit. *Non ignoro, milites, multa,  
 quae terrere vos possent, ab incolis Indiae per hos  
 dies de industria esse iactata: sed non est impro-  
 visa vobis mentientium vanitas. Sic Ciliciae fau-  
 ces, sic Mesopotamiae campos, Tigrim et Euphra-  
 tem, quorum alterum vado transivimus, alterum  
 ponte, terribilem fecerant Persae. Nunquam ad  
 liquidum fama perducitur: omnia, illa tradente,  
 maiora sunt vero. Nostra quoque gloria, cum  
 sit ex solido, plus tamen habet nominis, quam  
 operis. Modo quis belluas offerentes moenium  
 speciem, quis Hydaspem amnem, quis cetera au-  
 ditu maiora, quam vero, sustinere posse crede-  
 bat? Olim hercule fugissemus ex Asia, si nos fa-  
 bulae debellare potuissent. Creditisne elephanto-  
 rum greges maiores esse, quam usquam armento-  
 rum sunt? cum et rarum sit animal, nec facile ca-  
 piatur, multoque difficilius mitigetur. Atqui eadem  
 vanitas copias peditum equitumque numeravit.  
 Nam flumen, quo latius fusum est, hoc placidius sta-  
 gnat: quippe angustis ripis coërcita, et in angu-  
 stio rem alveum elisa, torrentes aquas invehunt;  
 contra spatium alvei seignior cursus est. Praeterea in*

*ripa omne periculum est, ubi applicantes navigia hostis exspectat. Ita quantumcunque flumen intervenit, idem futurum discrimen est evadentium in terram. Sed omnia ista vera esse fingamus. Utrumne vos magnitudo belluarum, an multitudo hostium terret? Quod pertinet ad elephantos, praesens habemus exemplum: in suos vehementius, quam in nos incurrerunt: tam vasta corpora securibus falcibusque mutilata sunt. Quid autem interest, totidem sint, quot Porus habuit, an tria millia? cum uno aut altero vulneratis ceteros in fugam declinare videamus. Deinde paucos quoque incommode regunt: congregata vero tot millia ipsa se elidunt, ubi nec stare, nec fugere potuerint inhabiles vastorum corporum moles. Equidem sic animalia ista contemsi, ut cum haberem, ipse non opposuerim; satis gnarus, plus suis, quam hostibus periculi inferre. At enim equitum peditumque multitudo vos commovet! cum paucis enim pugnare soliti estis, et nunc primum inconditam sustinebitis turbam. Testis adversus multitudinem invicti Macedonum roboris Granicus amnis, et Cilicia inundata cruore Persarum, et Arbela, cuius campi devictorum a nobis ossibus strati sunt. Sero hostium legiones numerare coepistis, postquam solitudinem in Asia vincendo fecistis: cum per Hellespontum navigaremus, de paucitate nostra cogitandum fuit. Nunc nos Scythae sequuntur; Bactriana auxilia praesto sunt; Dahae Sogdianique inter nos militant. Nec tamen illi turbae confido. Vestras manus intueor; vestram virtutem rerum, quas gesturus sum, vadem praedemque habeo. Quamdiu vobiscum in acie stabo, nec meos nec hostium exercitus numeravero: vos modo animos mihi plenos alacritatis ac fiduciae adhibete. Non in limine operum laborumque nostrorum, sed in*

*exitu stamus: pervenimus ad solis ortum et Oceanum, nisi obstat ignavia: inde victores, perdomito sine terrarum, revertemur in patriam. Nolite, quod pigri agricolae faciunt, maturos fructus per inertiam amittere e manibus. Maiora sunt particulis praemia: dives eadem, et imbellis est regio. Itaque non tam ad gloriam vos duco, quam ad praedam. Digni estis, qui opes, quas illud mare litoribus invehit, referatis in patriam: digni, qui nihil inexpertum, nihil metu omisum relinquatis. Per vos gloriamque vestram, qua humanum fastigium exceditis, perque et mea in vos, et in me vestra merita, quibus invicti contendimus, oro quae-soque, ne humanarum rerum terminos adeuntem glumnum commilitonemque vestrum, ne dicam regem, deseratis. Cetera vobis impetavi; hoc unum debiturus sum. Et is vos rogo, qui nihil unquam vobis praecepi, quin primus me periculis obtulerim: qui saepe aciem clypeo meo texi: ne infregeritis in manibus meis palmam, qua Herculem Liberumque patrem, si invidia abfuerit, aequabo. Date hoc precibus meis, et tandem obstinatum silentium rumpite. Ubi est ille clamor, alacritatis vestrae index? ubi ille meorum Macedonum vultus? Non agnosco vos, milites; nec agnosci videor a vobis. Surdas iamdudum aures pulso: aversos animos et infractos excitare conor. Cumque illi in terram demissis capitibus tacere perseverarent: Nescio quid, inquit, imprudens in vos deliqui, quod me ne intueri quidem vultis! in solitudine mihi videor esse. Nemo respondet; nemo saltem negat. Quos alloquor? quid autem postulo? vestram gloriam et magnitudinem vindicamus. Ubi sunt illi, quorum certamen paullo ante vidi contendentium, qui potissimum vulnerati regis corpus exciperent? desertus, destitutus sum, hostibus deditus. Sed so-*

*his quoque ire perseverabo. Obiicite me fluminibus, et belluis, et illis gentibus, quarum nomina horretis. Inveniam, qui desertum a vobis sequantur: Scythae Bactridique erunt mecum; hostes paullo ante, nunc milites nostri. Mori praestat, quam precario imperatorem esse. Ite reduces domos; ite deserto rege ovantes. Ego hic a vobis desperatae victoriae, aut honestae morti locum inveniam.*

CAP. III. Ne sic quidem ulli militum vox exprimi potuit. Expectabant, ut duces principesque ad regem perferrent, *vulneribus et continuo labore militiae fatigatos non detrectare munia, sed sustinere non posse.* Ceterum illi metu attoniti in terram ora defixerant. Ergo primo fremitus sua sponte, deinde gemitus quoque oritur; paullatimque liberius dolor erigi coepit, manantibus lacrimis, adeo ut rex, ira in misericordiam versa, ne ipse quidem, quamquam cuperet, temperare oculis potuerit. Tandem universa concione effusus flente, Coenus ausus est, cunctantibus ceteris, propius tribunal accedere, significans se loqui velle. Quem ut videre milites detrahentem galeam capiti, (ita enim regem alloqui mos est,) hortari coeperunt, *ut causam exercitus ageret.* Tum Coenus, *Dii prohibeant, inquit, a nobis impias mentes; et profecto prohibent. Idem animus est tuis, qui fuit semper, ire quo iusseris, pugnare, periclitari, sanguine nostro commendare prosteritati tuum nomen. Proinde si perseveras, inermes quoque et nudi et exsanguis, utcunque tibi cordi est, sequimur, vel antecedimus. Sed si audire vis non fictas tuorum militum voces, verum necessitate ultima expressas; praebe, quaeso, propitias aures imperium atque auspiciam tuam constantissime secutis, et quocunque pergis secuturis. Vicisti, rex, magnitudine rerum non hostes modo, sed etiam milites.*

Quidquid mortalitas capere poterat, implevimus, Emensis maria terrasque melius nobis, quam incolis, omnia nota sunt. Paene in ultimo mundi fine consistimus. In alium orbem paras ire, et Indiam quaeris Indis quoque ignotam: inter feras serpentesque degentes eruere ex latebris et cubilibus suis expetis, ut plura, quam sol videt, victoria lustres. Digna prorsus cogitatio animo tuo; sed altior nostro. Virtus enim tua semper in incremento erit; nostra vis in fine iam est. Intuere corpora exsanguia, tot perfossa vulneribus, tot cicatricibus putria. Iam tela hebetia sunt: iam arma deficiunt. Vestem Persicam induimus, quia domestica subvehi non potest. In externum degeneravimus cultum. Quoto cuique lorica est? quis equum habet? iube quaeri, quam multos servi ipsorum persecuti sunt, quid cuique supersit ex praeda. Omnium victores, omnium inopes sumus. Nec luxuria laboramus, sed bello instrumenta belli consumsimus. Hunc tu pulcherrimum exercitum nudum obiicies belluis? quarum ut multitudinem augeant de industria barbari, magnum tamen esse numerum etiam ex mendacio intelligo. Quod si adhuc penetrare in Indiam certum est; regio a Meridie minus vasta est. Qua subacta licebit decurrere in illud mare, quod rebus humanis terminum voluit esse natura. Cur circumitu petis gloriam, quae ad manum posita est? hic quoque occurrit Oceanus. Nisi mavis errare, pervenimus, quo tua fortuna ducit. Haec tecum, quam sine te cum his, loqui malui: non uti inirem circumstantis exercitus gratiam; sed ut vocem loquentium potius, quam ut gemitum murmurantium audires. Ut finem orationi Coenus imposuit, clamor undique cum ploratu oritur, regem, patrem, dominum, confusis appellantium vocibus. Iamque et alii duces, praecipue-

que seniorès, quìs ob aetatem et excusatio honestior erat, et auctoritas maior, eadem praecabantur. Ille nec castigare obstinatos, nec mitigare poterat iratos. Itaque inops consilii desiluit e tribunali, *claudique regiam* inasit, omnibus, praeter assuetos, adire prohibitis. Biduum irae datum est: tertio die processit, erigique XII aras ex quadrato saxo, monumentum expeditionis suae, *munimenta quonque castrorum* iussit extendi, *cubiliaque amplioris formae, quam pro corporum habitu, relinqui*, ut speciem omnium augetet, posteritati fallax miraculum praeparans. Hinc repetens quae emensus erat, ad flumen Acesinem locat castra. Ibi forte Coenus morbo extinctus est. Cuius morte ingemuit rex quidem; adiecit tamen, *propter paucos dies longam orationem eum exorsum, tanquam solus Macedoniam visurus esset*. Iam in aqua classis, quam aedificari iusserat, stabat. Inter haec Memnon ex Thracia in supplementum equitum sex millia, praeter eos ab Harpalo peditum septem millia adduxerat; armaque XXV millia auro et argento caelata pertulerat, quìs distributis vetera cremari iussit. Mille navigiis aditurus Oceanum, discordes et vetera odia retractantes Porum et Taxilem, Indiae reges, firmata per affinitatem gratia reliquit in suis regnis; summo in aedificanda classe amborum studio usus. Oppida quoque duo condidit, quorum alterum *Nicaeam* appellavit, alterum *Bucephalon*, equi, quem amiserat, memoriae ac nomini dedicans urbem. *Elephantis* deinde, et *impedimentis terra sequi* iussis, secundo amne defluxit; quadraginta ferme stadia singulis diebus procedens, ut opportunis locis exponi subinde copiae possent.

CAP. IV. Perventum erat in regionem, in qua Hydaspes amnis Acesini committitur. Hinc decurrit in finès Sobiorum. Hi de exercitu *Herculis maiores suos esse* commemorant: *aegros relictos esse; ce-*

*pisse sedem, quam ipsi obtinebant.* Pelles ferarum pro veste, clavae pro telo erant: multaque, etiam cum Graeci morès exolevisent, stirpis ostendebant vestigia. Hic exscensione facta, CC et L stadia processit, depopulatusque regionem, oppidum caput eius corona cepit. XL peditum millia alia gens in ripa fluminum opposuerat: quam amne superato in fugam compulsi, inclusosque moenibus expugnat. Puberes *interfecti* sunt, ceteri venierunt. Alteram deinde urbem *expugnare* adortus, magnaque vi *defendentium pulsus*, multos Macedonum amisit. Sed cum in obsidione perseverasset, oppidani, desperata salute, ignem subiecere tectis, se quoque ac liberos coniugesque incendio cremant. Quod cum ipsi auerent, hostes *extinguerent*, nova forma pugnae erat. Delebant incolae urbem; hostes defendebant: adeo etiam naturae iura bellum in contrarium mutat. Arx erat oppidi intacta, in qua praesidium dereliquit: ipse navigio circumvectus est arcem. Quippe III flumina tota India praeter Gangem maxima munimento arcis applicant undas. A septentrionè Indus alluit; a meridie Acesines Hydaspis confunditur. Ceterum annuum coitus maritimis similes fluctus movent, multoque ac turbido limo, quod aquarum concursu subinde turbatur, iter, qua meant navigia, in tenuem alveum cogitur. Itaque cum crebri fluctus se invehent, et navium hinc proras, hinc latera pulsarent; subducere nautae coeperunt. Sed ministeria eorum hinc metu, hinc praerapida celeritate fluminum occupantur. In oculis duo maiora omnium navigia submersa sunt; leviora, cum et ipsa nequirent regi, in ripam tamen innoxia expulsa sunt. Ipse rex in rapidissimos vortices incidit: quibus intorta navis, obliqua, et gubernaculi impatiens agebatur. Iam vestem detraxerat corpori, proiecturus semet in flumen; amicumque, ut exciperent eum, haud procul nabant: apparbatque anceps periculum tam nataturi, quam navi-

gare perseverantis. Ergo ingenti certamine concitant remos, quantaque vis humana esse poterat admota est, ut fluctus, qui se invehebant, everberarentur. Findi crederes undas, et retro gurgites cedere. Quibus tandem navis erepta, non tamen ripae applicabatur, sed in proximum vadum illiditur. Cum amne bellum fuisse crederes. Ergo aris pro numero fluminum positus, sacrificioque facto, xxx stadia processit. Inde ventum est in regionem Oxydracarum Mallorumque, quos alias bellare inter se solitos tunc periculi societas iunxerat. Nonaginta millia iuniorum peditum in armis erant; praeter hos equitum x millia, nongentaeque quadrigae. At Macedones, qui omni discrimine iam defunctos se esse crediderant, postquam integrum bellum cum ferocissimis Indiae gentibus superesse cognoverunt, improvise metu territi, rursus seditiosis vocibus regem increpare coeperunt. *Gangem amnem, et quae ultra essent, coactos transmittere; non tamen finisse, sed mutasse bellum. Indomitis gentibus se obiectos, ut sanguine suo aperirent ei Oceanum. Trahi extra sidera et solem, cogique adire, quae mortalium oculis natura subduxerit. Novis identidem armis novos hostes existere. Quos ut omnes fundant fugentque, quod praemium ipsos manere? caliginem, ac tenebras, et perpetuam noctem profundo incubantem; repletum immanium belluarum gregibus fretum; immobiles undas, in quibus emoriens natura defecerit.* Rex non sua, sed militum sollicitudine anxius, concione advocata docet, *imbelles esse, quos metuant. Nihil deinde praeter has gentes obstare, quo minus terrarum spatia emensi ad finem simul mundi laborumque perveniant. Cessisse illis metuentibus Gangem, et multitudinem nationum, quae ultra amnem essent: declinasse iter eo, ubi par gloria, minus periculum esset. Iam prospicere se Oceanum: iam perflare ad ipsos au-*



*ram maris: ne inviderent sibi laudem, quam peteret. Herculis et Liberi patris terminos transituros illos, regi suo, parvo impendio, immortalitatem famae daturos. Paterentur se ex India redire, non fugere. Omnis multitudo, et maxime militaris, mobili impetu fertur. Ita seditionis non remedia quam principia maiora sunt. Non alias tam alacer clamor quam exercitu est redditus, iubentium, duceret Diis secundis, et aequaret gloria, quos aemularetur. Laetitia his acclamationibus ad hostes protinus castra movit. Validissimae Indorum gentes erant, et bellum impigre parabant; ducemque ex natione Oxydracarum spectatae virtutis elegerant, qui sub radicibus montis castra posuit, lateque ignes, ut speciem multitudinis auget, ostendit; clamore quoque ac sui moris ululatu identidem adquiescentes Macedonas frustra terrere conatus. Iam lux apparebat, cum rex fiduciae ac spei plenus alacres milites arma capere, et exire in aciem iubet. Sed metum, an seditione oborta inter ipsos, subito profugerunt barbari. Certe avios montes et impeditos occupaverunt. Quorum agmen rex frustra persecutus, impedimenta cepit. Perventum deinde est ad oppidum Oxydracarum, in quod plerique confugerant, haud maiore fiducia moenium, quam armorum. Iam admovebat rex, cum vates monere eum coepit, ne committeret, aut certe differret obsidionem. Vitae eius periculum ostendi. Rex Demophoonta (is namque vates erat) intuens, si quis, inquit, te arti tuae intentum et exta spectantem sic interpellet; non dubitem, quin incommodus ac molestus videri tibi possit. Et cum ille ita prorsus futurum respondisset; Censesne, inquit, tantas res, non pecudum fibras ante oculos habenti, ullum esse maius impedimentum, quam vatem superstitione captum? Nec diutius quam respondit moratus, admoventi iubet scalas: cunctantibusque ceteris evadit in murum. Augusta*

muri corona erat: non pinnae sicut alibi fastigium eius distinxerant; sed perpetua lorica obducta transitum sepserat. Itaque rex haerebat magis, quam stabat in margine, clypeo undique incidentia tela propulsans; nam ubique eminus ex turribus petebatur. Nec subire milites poterant, quia superne vi telorum obruebantur. Tandem magnitudinem periculi pudor vicit: quippe cernebant, cunctatione sua dedi hostibus regem. Sed festinando morabantur auxilia. Nam dum pro se quisque certat evadere, oneravere scalas; quis non sufficientibus devoluti unicam spem regis sefellerunt. Stabat enim in conspectu tanti exercitus, velut in solitudine destitutus. -

CAP. V. Iamque laevam, qua clypeum ad ictus circumferebat, lassaverat, clamantibus amicis, *ut ad ipsos desiliret*, stabantque excepturi; cum ille rem ausus incredibilē atque inauditam, multoque magis ad famam temeritatis, quam gloriae, insignem. Namque in urbem hostium plenam praecipiti saltu semetipse immisit; cum vix sperare posset dimicantem certe, et non inultum esse moriturum: quippe antequam assurgeret, opprimi poterat, et capi vivus. Sed forte ita libraverat corpus, ut se pedibus exciperet. Itaque stans in init pugnam; et ne circumiri posset, fortuna providebat. Vetusta arbor, haud procul muro, ramos multa fronde vestitos, velut de industria regem protegentes, obiecerat: huius spatioso stipiti corpus, ne circumiri posset, applicuit; clypeo tela, quae ex adverso ingerebantur, excipiens. Nam cum unum procul tot manus peterent, nemo tamen audebat propius accedere; missilia ramis plura, quam clypeo incidebant. Pugnat pro rege primum celebrati nominis fama; deinde desperatio, magnum ad honeste moriendum incitamentum. Sed cum subinde hostis afflueret, iam ingentem vim telorum exceperat clypeo; iam galeam saxa perforaverant; iam continuo labore gravia genua succide-

rant. Itaque contemtim et incaute, qui proximi steterant, incurrerunt: e quibus duos gladio ita excepit, ut ante ipsum exanimis procumberent. Nec cuiquam deinde propius incessendi eum animus fuit: procul iacula sagittasque mittebant. Ille ad omnes ictus expositus, aegre iam exceptum poplitibus corpus tuebatur; donec Indus duorum cubitorum sagittam (namque Indis, ut antea diximus, huius magnitudinis sagittae erant) ita excussit, ut per thoracem paullum super latus dextrum infigeretur. Quo vulnere afflictus, magna vi sanguinis emicante, remisit arma moribundo similis, adeoque resolutus, ut ne ad vellendum quidem telum sufficeret dextra. Itaque ad exspoliandum corpus, qui vulneraverat alacer gaudio accurrit. Quem ut iniicere corpori suo manus sensit, credo, ultimi dedecoris indignitate commotus, liquentem revocavit animum, et nudum hostis latus subiecto mucrone hausit. Iacebant circa regem tria corpora, procul stupentibus ceteris: ille ut, antequam ultimus spiritus deficeret, dimicans iam exstingueretur, clypeo se allevare conatus est; et postquam ad connitendum nihil supererat virium, dextra impendentes ramos complexus tentabat assurgere. Sed ne sic quidem potens corporis, rursus in genua procumbit; manu provocans hostes, si quis congrederi auderet. Tandem Peucestas per aliam oppidi partem deturbatis propugnatoribus muri vestigia persequens regi supervenit. Quo conspecto Alexander, iam non vitae suae, sed mortis solatium supervenisse ratus, clypeo fatigatum corpus excepit. Subit inde Timaeus: et paullo post Leonnatus: huic Aristonus supervenit. Indi quoque, cum intra moenia regem esse comperissent, omissis ceteris illuc concurrerunt, urgebantque protegentes. Ex quibus Timaeus, multis adverso corpore vulneribus acceptis, egregiaque edita pugna, cecidit: Peucestas quoque tribus iaculis confossus non se tamen scuto, sed regem tuebatur: Leonna-

tus, dum avide ruentes barbaros submovet, cervice graviter icta semianimis procubuit ante regis pedes. Iam et Peucestas vulneribus fatigatus submiserat clypeum: in Aristono spes ultima haerebat. Hic quoque graviter saucius tantam vim hostium ultra sustinere non poterat. Inter haec ad Macedonas *regem cecidisse* fama perlata est. Terruisset alios, quod illos incitavit. Namque periculi omnis immemores dolabris perfregere murum; et qua moliti erant aditum, irrupere in urbem, Indosque plures fugientes, quam congregi ausos, ceciderunt. Non senibus, non feminis, non infantibus parcitur: quisquis occurrerat, ab illo vulneratum regem esse credebant. Tandemque inter-  
*331*  
 necione hostium *iustae* irae parentatum est. *Ptolemaeum, qui postea regnavit, huic pugnae adfuisse,* auctor est Clitarchus, et Timagenes. Sed ipse, scilicet gloriae suae non refragatus, *adfuisse, missum in expeditionem,* memoriae tradidit. Tanta componentium vetusta rerum monumenta, vel securitas, vel par huic vitium, credulitas fuit! Rege in tabernaculum relato, medicum lignum hastae corpori infixum, ita ne spiculum moveretur, abscindunt. Corpore deinde nudato animadvertunt hamos inesse telo; nec aliter id sine pernicie corporis extrahi posse, quam ut secando vulnus augerent. Ceterum ne secantes profluvium sanguinis occuparet, verebantur; quippe ingens telum adactum erat, et penetrasse in viscera videbatur. Critobulus, inter medicos artis eximiae, sed in tanto periculo ter-  
 ritus, manus admovere metuebat, ne in ipsius caput parum prosperae curationis recideret eventus. Lacrimantem eum ac metuentem, et sollicitudine propemodum exsanguem, rex conspexerat. *Quid, inquit, quodve tempus exspectas, et non quamprimum hoc dolore me saltem moriturum liberas? An times, ne reus sis, cum insanabile vulnus acceperim?* At Critobulus tandem vel finito, vel dissimulato metu, hor-

tari cum coepit, *ut se continendum praeberet, dum spiculum evelleret: etiam levem corporis motum noxium fore.* Rex cum affirmasset, *nihil opus esse iis, qui semet continerent;* sicut praeceptum erat, sine motu praebeuit corpus. Igitur patefacto latius vulnere, et spiculo evulso, ingens vis sanguinis manare coepit; linquique animo rex, et caligine oculis offusa, veluti moribundus extendi. Cumque profluvium medicamentis frustra inhiberent; clamor simul atque ploratus amicorum oritur, regem exspirasse credentium. Tandem constitit sanguis, paullatimque animum recepit, et circumstantes coepit agnoscere. Toto eo die ac nocte, quae secuta est, armatus exercitus regiam obsedit, confessus omnes unius spiritu vivere. Nec prius recesserunt, quam compertum est, somno paullisper adquiescere. Hinc certiores spem salutis eius in castra retulerunt.

CAP. VI. Rex septem diebus curato vulnere, necdum obducta cicatrice, cum audisset, *convalescere apud barbaros famam mortis suae; duobus navigiis iunctis, statui in medium undique conspicuum tabernaculum iussit, ex quo se ostenderet perisse credentibus.* Conspectusque ab incolis spem hostium falso nuntio conceptam inhibuit. Secundo deinde amne defluxit, aliquantum intervalli a cetera classe praeciens, ne quies corpori invalido adhuc necessaria pulsus remorum impediretur. Quarto, postquam navigare coeperat die, pervenit in regionem desertam quidem ab incolis, sed frumento et pecoribus abundantem. Placuit is locus et ad suam, et ad militum requiem. Mos erat principibus amicorum, et custodibus corporis, excubare ante praetorium, quoties regi adversa valetudo incidisset. Hoc tum more quoque servato universi cubiculum eius intrant. Ille sollicitus, ne quid novi afferrent, quia simul venerant, percontatur, *num hostium recens nuntiaretur ad-*

*ventus. At Craterus, cui mandatum erat, ut amicorum preces perferret ad eum, Credisne, inquit, adventu magis hostium, ut iam in vallo consisterent, quam cura salutis tuae, ut nunc est tibi vilis, nos esse sollicitos? Quantalibet vis omnium gentium conspiraret in nos; impleat armis virisque totum orbem; classibus maria consternat; inusitatas belluas inducat: tu nos praestabis invictos. Sed quis Deorum hoc Macedoniae columen ac sidus diuturnum fore polliceri potest; cum tam avide manifestis periculis offeras corpus, oblitus tot civium animas trahere te in casum? Quis enim tibi superstes aut optat esse, aut potest? Eo pervenimus, auspiciam atque imperium secuti tuum, unde nisi te reduce nulli ad penates suos iter est. Qui si adhuc de Persidis regno cum Dario dimicares; etsi nemo vellet, tamen ne admirari quidem posset, tam promptae esse te ad omne discrimen audaciae: nam uti paria sunt periculum ac praemium, et secundis rebus amplior fructus est, et adversis solatium maius. Tuo vero capite ignobilem vicum emi, quis ferat, non tuorum modo militum, sed ullius etiam gentis barbarae civis, qui tuam magnitudinem novit? Horret animus cogitatione rei, quam paullo ante vidimus. Eloqui timeo, invicti corporis spoliis intertissimos manus fuisse iniecturos, nisi te interceptum misericors in nos fortuna servasset. Totidem proditores, totidem desertores sumus, quot te non potuimus persequi. Universos licet milites ignominia notes; nemo recusabit luere id, quod ne admitteret, praestare non potuit. Patere nos, quaeso, alio modo esse viles tibi. Quocumque iusseris, ibimus. Obscura bella et ignobiles pugnas nobis deprecimur: temetipsum ad ea serva pericula, quae magnitudinem tuam capiunt. Cito gloria obsoleat in sordidis hostibus: nec quidquam in-*

*dignius est, quam consumi eam, ubi non possi ostendi. Eadem fere Ptolemaeus, et similia iis ceteri lamque confusis vocibus flentes eum orabant, ut tandem exsatiatae laudi modum faceret, ac salutis suae, id est, publicae parceret. Grata erat regi pietas amicorum. Itaque singulos familiariter amplexus considerare iubet. Altiusque sermone repetito, Vobis quidem, inquit, o fidissimi piissimique civium atque amicorum, grates ago habeoque, non solum eo nomine, quod hodie salutem meam vestrae praeponeitis; sed quod a primordiis belli nullum erga me benevolentiae pignus atque indicium omisistis. Adeo ut confitendum sit, nunquam mihi vitam meam fuisse tam caram, quam esse coepit, ut vobis diu frui possim. Ceterum non eadem est cogitatio eorum, qui pro me mori optant, et mea: qui quidem hanc benevolentiam vestram virtute meruisse me iudico. Vos enim diuturnum fructum ex me, forsitan etiam perpetuum, percipere cupitis: ego me metior non aetatis spatio, sed gloriae. Licuit paternis opibus contento intra Macedoniae terminos per otium corporis exspectare obscuram et ignobilem senectutem. Quamquam ne pigri quidem sibi fata disponunt; sed unicum bonum diuturnam vitam aestimantes saepe acerba mors occupat. Verum ego, qui non annos meos, sed victorias numero; si munera fortunae bene computo, diu vixi. Orsus a Macedonia imperium, Graeciam teneo: Thraciam, et Illyrios subegi: Triballis, Medisque imperito: Asiam, qua Hellesponto, qua rubro mari alluitur, possideo. Iamque haud procul absum a fine mundi, quem egressus, aliam naturam, alium orbem aperire mihi statui. Ex Asia in Europae terminos momento unius horae transivi. Victor utriusque regionis post nonum regni mei, post vigesimum atque octavum aetatis annum, videor*

vobis in excolenda gloria, cui me uni devovi, posse cessare? Ego vero non deero, et ubicunque pugnabo, in theatro terrarum orbis esse me credam. Dabo nobilitatem ignobilibus locis: aperiam cunctis gentibus terras, quas natura longe submoverat. In his operibus exstingui me, si fors ita feret, pulchrum est: ea stirpe sum genitus, ut multam prius, quam longam vitam debeam optare. Obsecro vos, cogitate nos pervenisse in terras, quibus feminae ob virtutem celeberrimum nomen est. Quas urbes Semiramis condidit? quas gentes redegit in potestatem? quanta opera molita est? Nondum feminam aequavimus gloria, et iam nos laudis satietas cepit? Dii faveant, maiora adhuc restant. Sed ita nostra erunt, quae nondum attigimus, si nihil parvum duxerimus; in quo magnae gloriae locus est, Vos modo me ab intestina fraude et domesticorum insidiis praestate securum: belli Martisque discrimen impavidus subibo. Philippus in acie tutior, quam in theatro, fuit: hostium manus saepe vitavit; suorum effugere non valuit. Aliorum quoque regum exitus si reputaveritis, plures a suis, quam ab hoste, interemtis numerabitis. Ceterum quoniam olim rei agitatae in animo meo nunc promendae occasio oblata est; mihi maximus laborum atque operum meorum erit fructus, si Olympias mater immortalitati consecretur, quandoque excesserit vita. Si licuerit, ipse praestabo hoc: si me praeceperit fatum, vos mandasse mementote. Ac tum quidem amicos dimisit: ceterum per complures dies ibi stativa habuit.

CAP. VII. Haec dum in India geruntur, Graeci milites nuper in colonias a rege deducti Garabactra, orta inter ipsos seditione, defecerant; non tam Alexandro infensi, quam metu supplicii. Quippe occisis quibusdam popularium, qui validiores erant, arma spectare coepe-



runt; et Bactriana arce, quae casu negligentius *asservata* erat, occupata, barbaros quoque in societatem *defectionis* impulerant. Athenodorus erat princeps eorum, qui regis quoque nomen assumserat; non tam imperii cupidine, quam in patriam revertendi cum iis, qui auctoritatem ipsius sequebantur. Huic Bicon quidam nationis eiusdem, sed ob aemulationem infestus, comparavit insidias, invitatumque ad epulas per Boxum quendam *Macerianum* in convivio occidit. Postero die *concione advocata* Bicon *ultra insidiatum sibi Athenodorum plerisque* persuaserat: sed aliis suspecta *fraus* erat Biconis; et paulatim in plures coepit manare suspicio. Itaque Graeci milites arma capiunt, occisuri Biconem, si daretur occasio. Ceterum principes eorum iram multitudinis mitigaverunt. Praeter spem suam Bicon praesenti periculo ereptus, paullo post insidiatus auctoribus salutis suae est: cuius dolo cognito, et ipsum comprehenderunt, et Boxum. Ceterum *Boxum protinus placuit interfici: Biconem etiam per cruciatum necari*. Iamque corpori tormenta admovebantur; cum Graeci milites, incertum ob quam causam, lymphatis similes ad arma discurrunt. Quorum fremitu exaudito, qui torquere Biconem iussi erant, omisere; veriti, ne id facere tumultuantium vociferatione prohiberentur. Ille, sicut nudatus erat, pervenit ad Graecos; et miserabilis facies supplicio destinati in diversum animos repente mutavit, *dimittique eum* iusserunt. Hoc modo poena bis liberatus, cum ceteris, qui colonias a rege attributas reliquerunt, revertit in patriam. Haec circa Bactra et Scytharum terminos gesta. Interim regem duarum gentium, de quibus ante dictum est, centum legati adeunt. Omnes curru vehebantur, eximia magnitudine corporum, decoro habitu, lineae vestes intextae auro, purpuraque distinctae. *Ei se dedere ipsos, urbes agrosque, referebant; per tot aetates inviolatam libertatem illius primum fidei ditioni-*

*que permissuros. Deos sibi deditiois auctores, non metum; quippe intactis viribus iugum excipere.* Rex consilio habito deditos in fidem accepit; stipendio, quod Arachosiiis utraque natio pensitabat, imposito. Praeterea *II millia et D equites* imperat: et omnia obedienter a barbaris facta. Invitatis deinde ad epulas legatis gentium regulisque, *exornari convivium* iussit. Centum aurei lecti modicis intervallis positi erant; lectis circumdederat aulaea, purpura auroque fulgentia; quidquid aut apud Persas vetere luxu, aut apud Macedonas nova immutatione corruptum erat, confusis utriusque gentis vitiis in illo convivio ostendens. Intererat epulis Dioxippus Atheniensis, pugil uobilis, et ob eximiam virtutem virium regi pernotus et gratus. Invidi malignique increpabant per seria et ludum, *saginati corporis sequi inutilem belluam. Cum ipsi proelium inirent, oleo madentem praeparare ventrem epulis.* Eadem igitur in convivio Horras Macedo iam temulentus exprobrare ei coepit, et postulare, *ut si vir esset, postero die secum ferro decerneret: regem tandem vel de sua temeritate, vel de illius ignavia, iudicaturum.* Et a Dioxippo, contemptim militarem eludente ferociam, accepta conditio est. Ac postero die rex, cum etiam acrius certamen exposcerent, quia deterrere non poterat, destinata exsequi passus est. Ingens hic militum, inter quos erant Graeci, qui Dioxippo studebant, convenerat multitudo. Macedo iusta arma sumserat; aereum clypeum, hastam, quam *sarissam* vocant, laeva tenens, dextra lanceam: gladioque cinctus, velut cum pluribus simul dimicaturus. Dioxippus oleo nitens, et coronatus, laeva puniceum amiculum, dextra validum nodosumque stipitem praeferebat. Ea ipsa res omnium animos expectatione suspenderat: quippe armato congregi nudum, dementia non temeritas videbatur. Igitur Macedo, laud dubius eminus interfici

posse, lanceam emisit; quam Dioxippus cum exigua corporis declinatione vitasset, antequam ille hastam transferret in dextram, assiluit, et stipite mediam eam fregit. Amisso utroque telo, Macedo gladium coeporat stringere: quem occupatum complexu, pedibus repente subductis Dioxippus arietavit in terram; ereptoque gladio pedem super cervicem iacentis imposuit, stipitem intentans, elisurusque eo victum, *ni prohibitus esset a rege*. Tristis spectaculi eventus, *non Macedonibus modo, sed etiam Alexandro fuit; maxime quia barbari assuerant: quippe celebratam Macedonum fortitudinem ad ludibrium recidisse verebatur*. Hinc ad criminationem invidorum adaperatae sunt aures regis. Et post paucos dies inter epulas aureum poculum ex composito subducitur: ministrique, quasi amisissent, quod amoverant, regem adeunt. Saepe minus est constantiae in rubore, quam in culpa. Coniectum oculorum, quibus ut fur destinabatur, Dioxippus ferre non potuit: et cum excessisset convivio, literis conscriptis, quae regi redderentur, ferro se interemit. Graviter mortem eius tulit rex, existimans indignationis esse, non poenitentiae testem: utique postquam falso insimulatum eum, nimium invidorum gaudium ostendit.

CAP. VIII. Indorum legati dimissi domos, paucis post diebus cum donis revertuntur. Trecenti erant equi, mille triginta currus, quos quadriungi equi ducebant, lineae vestis aliquantum, mille scuta Indica, et ferri candidi talenta centum; leonesque rarae magnitudinis et tigres, utrumque animal ad mansuetudinem domitum; lacertarum quoque ingentium pelles, et dorsa testudinum. Cratero deinde imperat rex, *haud procul amne, per quem erat ipse navigaturus, copias duceret*: eos autem, qui comitari eum solebant, imponit in naves, et in fines Mallorum secundo amne devehitur. Inde Sabraca; adiit, validam Indiae gen-

em, quae populi, non regum imperio regebatur. Sexaginta millia peditum habebant, equitum sex millia: has opias currus quingenti sequebantur. Tres duces spectatos virtute bellica elegerant. At qui in agris erant proximi flumini, (frequentes autem vicos, maxime in ripa habebant) ut videre totum amnem, qua prospici poterat, navigiis constratum, et tot millium arma fulgentia; terrili nova facie, Deorum exercitum, et alium liberum patrem, celebre in illis gentibus nomen, advenire credebant. Hinc militum clamor, hinc remotum pulsus, variaeque nautarum voces hortantium, pauidas aures impleverant. Ergo universi ad eos, qui in armis erant, currunt, *furere clamitantes, cum Quis proelium inituros. Navigia non posse numerari, quae invictos veherent.* Tantumque in exercitum suorum intulere terroris, ut legatos mitterent gentem dedituros. His in fidem acceptis, ad alias deinde gentes quarto die pervenit. Nihilo plus animi his fuit, quam ceteris fuerat. Itaque oppido ibi condito, quod *Alexandriam* appellari iusserat, fines eorum, qui *Musicanis* appellantur, intravit. Hic de Teriothe satrape, quem Paropamisadis praefecerat, iisdem arguentibus cognovit: multaque avare ac superbe fecisse convictum interfici iussit. Oxathres praetor Bactrianorum, non absolutus modo, sed etiam iure amplioris imperii donatus est. Finibus Musicanis deinde in ditionem redactis, urbi eorum praesidium imposuit. Inde Praestos et ipsam Indiae gentem perventum est. Oxycanus rex erat, qui se munitae urbi cum magna manu popularium incluserat. Hanc Alexander tertio die, quam coeperat obsidere, expugnaavit. Et Oxycanus, cum in arcem confugisset, legatos de conditione deditiois misit ad regem: sed antequam adirent eum, duae turres cum iugenti fragore prociderant, per quarum ruinas Macedones evasere in arcem; qua capta Oxycanus cum paucis repugnans occiditur. Diruta igitur arce, et omni-

bus captivis venundatis, Sabi regis fines ingressus est; multisque oppidis in fidem acceptis, validissimam gentis urbem cuniculo cepit. Barbaris simile monstri visum est, rudibus militarium operum; quippe in media ferme urbe e terra exsistebant, nullo suffossi specus ante vestigio facto. *Octoginta millia Indorum in ea regione caesa* Clitarchus est auctor, *multosque captivos sub corona venisse*. Rursus Musicani defecerunt, ad quos opprimendos missus est Pithon, qui captum principem gentis, eundemque defectionis auctorem, adduxit ad regem. Quo Alexander in crucem sublato, rursus annum, in quo classem exspectare se iusserat, repetit. Quarto deinde die secundo anno pervenit ad oppidum, qua iter in regnum erat Sabi. Nuper se ille dederat, sed oppidani detrectabant imperium, et clausurant portas. Quorum paucitate contemta rex, *quingentos Agrianos moenia subire iusserat, et sensim recedentes elicere extra muros hostem, secuturum profecto, si fugere eos crederet*. Agriani; sicut imperatum erat, lacessito hoste subito terga vertunt; quos barbari effuse sequentes in alios, inter quos ipse rex erat, incidunt. Renovato ergo proelio, ex tribus millibus barbarorum quingenti caesi sunt, mille capti, ceteri moenibus urbis inclusi. Sed non ut prima specie laeta victoria, ita eventu quoque fuit: quippe barbari veneno tinxerant gladios. Itaque saucii subinde expirabant; nec causa tam strenuae mortis excogitari poterat a medicis, cum etiam leves plagae insanabiles essent. Barbari autem speraverant incautum et temerarium regem excipi posse. Et forte inter promptissimos dimicans intactus evaserat. Praecipue Ptolemaeus, laevo humero leviter quidem saucius, sed maiore periculo quam vulnere affectus, regis sollicitudinem in se converterat. Sanguine coniunctus erat, et quidam Philippo genitum esse credebant; certe pellice eius ortum constabat. Idem corporis cu-

stos, promissimusque bellator; et pacis artibus quam militiae maior et clarior, modico civilique cultu, liberalis in primis, adituque facilis, nihil ex fastu regio assumserat. Ob haec regi an popularibus carior esset, dubitari poterat: tum certe primum expertus suorum animos, adeo ut fortunam, in quam postea ascendit, in illo periculo Macedones ominati esse videantur. Quippe non levior illis Ptolemaei fuit cura, quam regis: qui et proelio et sollicitudine fatigatus cum Ptolemaeo consideret, *lectum, in quo ipse adquiesceret, iussit inferri.* In quem ut se recepit, protinus altior insecutus est somnus. Ex quo excitatus, *per quietem vidisse se exponit speciem draconis oblatam herbam ferentis ore, quam veneni remedium esse monstrasset. Colorem quoque herbae referebat, agniturum, si quis reperisset,* affirmans. Inventamque deinde, quippe a multis erat requisita, vulneri imposuit: protinusque dolore finito, intra breve spatium cicatrix quoque obducta est. Barbaros ut prima spes fefellerat, se ipsos urbemque dederunt. Hinc in proximam gentem Pathaliam perventum est. Rex erat Moeris, qui urbe deserta in montes profugerat. Itaque Alexander oppido potitur, agrosque populatur. Magnae inde praedae actae sunt pecorum armentorumque, magna vis reperta frumenti. Ducibus deinde sumtis amnis peritis, defluxit ad insulam medio ferme alveo enatam.

CAP. IX. Ibi diutius subsistere coactus, quia duces socordius asservati profugerant, misit qui conquirerent alios; nec repertis, pervicax cupido incessit visendi Oceanum, adeundique terminos mundi, sine regionis peritis, flumini ignoto caput suum, totque fortissimorum virorum salutem permittere. Navigabant ergo omnium per quae ferebantur ignari. Quantum inde abesset mare, quae gentes colerent, quam placidum amnis os, quam patiens longarum navium esset, anceps et caeca aestimatio angurabatur. Unum erat

temeritatis solatium perpetua felicitas. Iam cccc stadia processerant; cum gubernatores *agnoscere ipsos auram maris, et haud procul videri sibi Oceanum abesse*, indicant regi. Laetus ille hortari nauticos coepit, *incumberent remis. Adesse finem laboris omnibus votis expetitur. Iam nihil gloriae deesse; nihil obstare virtuti: sine ullo Martis discrimine, sine sanguine orbem terrae ab illis capi. Ne naturam quidem longius posse procedere. Brevi incognita nisi immortalibus esse visuros.* Paucos tamen navigio emisit in ripam, qui agrestes vagos exciperent, e quibus certiora nosci posse sperabat. Illi scrutati omnia tuguria, tandem latentes reperere. Qui interrogati, *quam procul abesset mare?* responderunt, *nullum ipsos mare ne fama quidem accepisse: ceterum tertio die perveniri posse ad aquam amaram, quae corrumperet dulcem.* Intellectum est, mare destinari ab ignaris naturae eius. Itaque ingenti alacritate nautici remigant, et proximo quoque die, quo propius spes admovebatur, crescebat ardor animorum. Tertio iam die mixtum flumini subibat mare, leni adhuc aestu confundente dispares undas. Tum aliam insulam medio amni sitam evecti paullo lentius, quia cursus aestu reverberabatur, applicant classem, et ad com meatus petendos discurrunt, securi casus eius, qui supervenit ignaris. Tertia ferme hora erat, cum stata vice Oceanus exaestuans in velis coepit, et retro flumen urgere. Quod primo coërcitum, deinde vehementius pulsus, maiore impetu adversum agebatur, quam torrentia praecipiti alveo incurrunt. Ignota vulgo freti natura erat, monstraque et irae Deum indicia cernere videbantur. Identidem intumescere mare, et in campos paullo ante siccos descendere superfluum. Iamque levatis navigiis, et tota classe dispersa, qui expositi erant, undique ad naves trepidi et improviso malo attoniti recurrunt. Sed in tumultu festinatio quoque tarda est. Hi contis navigia appellebant;

i dum remos aptari prohibebant, conserant. Quam enavigare properantes, sed non exspectatis, qui simul esse debebant, clauda et inhabilia navigia languide moliebantur: aliae navium inconsulte ruentes non receperant; pariterque et multitudo, et paucitas estuantes morabatur. Clamor hinc *expectare*, hinc *re* iubentium, dissonaeque voces nusquam idem ac unum tendentium, non oculorum modo usum, sed etiam aurium abstulerant. Ne in gubernatoribus quidem quidquam opis erat, quorum nec exaudiri vox a tumultuantibus poterat, nec imperium a territis incompotisque servari. Ergo collidi inter se naves, abstergerique invicem remi, et alii aliorum navigia urgere coeperunt. Crederes non unius exercitus classem velli, sed duorum navale inisse certamen. Incutiebantur puppibus prorae; premebantur a sequentibus, qui antecedentes turbaverant: iurgantium ira perveniebat etiam ad manus. Iamque aestus totos circa flumen campos inundaverat, tumultis dumtaxat eminentibus, velut insulis parvis; in quos plerique trepidi omissis navigiis enare coeperunt. Dispersa classis partim in praecalta aqua stabat, qua subsederant valles; partim in vado haerebat, utcumque inaequale terrae fastigium occupaverant undae: cum subito novus, et pristino maior terror incutitur. Reciprocare coepit mare, magno tractu aquis in suum fretum recurrentibus; redibatque terras paullo ante profundo salo mersas. Igitur destituta navigia alia praecipitantur in proras, alia in latera procumbunt. Strati erant campi sarcinis, armis, avulsarum tabularum remorumque fragmentis. Miles nec egredi in terram, nec in naves subsistere audebat; identidem praesentibus graviora, quae sequerentur, exspectans. Vix quae perpetiebantur, videre ipsos credebant, in sicco naufragia, in amni mare. Nec finis malorum. Quippe aestum paullo post mare relaturum, quo navigia allevarentur, ignari, famem



et ultima sibi met ominabantur. Belluae quoque fluctibus destitutae terribiles vagabantur. Iamque nox appetebat, et regem quoque desperatio salutis aegritudine affecerat. Non tamen invictum animus curae obruunt, quin tota nocte praesideret in speculis, equitesque praemitteret ad os amnis, ut, cum mare rursus exaestuare sensissent, procederent. *Navigia quoque lacerata refici, et eversa fluctibus erigi iubet, paratosque esse et intentos, cum rursus mare terras inundasset.* Tota ea nocte inter vigilias adhortationesque consumpta, celeriter et equites ingenti cursu refugere, et secutus est aestus. Qui primo aquis leni tractu subeuntibus coepit levare navigia, mox totis campis inundans etiam impulit classem. Plaususque militum nauticorumque, insperatam salutem inmodico celebrantium gaudio, litoribus ripisque resonabat. *Unde tantum redisset subito mare? quo pridie refugisset? quoniam esset eiusdem elementi natura, modo discors, modo imperio temporum obnoxia,* mirabundi requirebant. Rex cum ex eo, quod acciderat, coniectaret, post solis ortum statum tempus esse; media nocte, ut aestum occuparet, cum paucis navigiis secundo amne defluxit. Evectusque os eius quadringenta stadia processit in mare, tandem voti sui compos: praesidibusque maris et locorum Diis sacrificio facto, ad classem rediit.

CAP. X. Hinc adversum flumen subiit classis, et altero die appulsa est haud procul lacu salso, cuius ignota natura plerosque decepit temere ingressos aquam. Quippe scabies corpora invasit, et contagium morbi etiam in alios vulgatum est. Oleum remedio fuit. Leonnato deinde praemisso, ut puteos foderet, qua terrestri itinere ducturus exercitum videbatur, quippe sicca erat regio; ipse cum copiis substitit, vernum tempus exspectans. Interim et urbes plerasque condidit. Nearchus atque Onesicritus nauticae rei peritis im-

eravit, ut validissimas navium deducerent in Oceanum, progressique quoad tuto possent, naturam maris noscerent: vel eodem amne, vel Euphrate subire eos posse, cum reverti ad se vellent. lamque mitigata hieme, et navibus, quae inutiles videbantur, crematis, terra ducebat exercitum. Nonis castris in regionem Arabitarum, inde totidem diebus in Gedrosiorum regionem perventum est. Liber hic populus concilio habito dedit se; nec quidquam deditis praeter commeatus imperatum est. Quinto hinc die venit ad flumen, Arabum incolae appellant. Regio deserta et aquarum inops excipit: quam emensus, in Horitas transit. Ibi maiorem exercitus partem Hephæstioni tradidit; levem armaturam cum Ptolemaeo Leonnatoque partitus est. Tria simul agmina populabantur Indos; magnaëque praedae actae sunt: maritimos Ptolemaeus, ceteros ipse rex, et ab alia parte Leonnatus urebant. In hac quoque regione urbem condidit, deductique sunt in eam Arachosii. Hinc pervenit ad maritimos Indos. Desertam vastamque regionem late tenent, ac ne cum finitimis quidem ullo commercii iure miscentur. Ipsa solitudo natura quoque immitia efferavit ingenia: prominent ungues nunquam recisi; comae hirsutae et intonsae sunt. Tuguria conchis, et ceteris purgamentis maris, instrunt. Ferrarum pellibus tecti, piscibus sole duratis, et maiorum quoque belluarum, quas fluctus eiicit, carne vescuntur. Consumtis igitur alimentis Macedones primo inopiam, deinde ad ultimum famem sentire coeperunt; radices palmarum, namque sola ea arbor gignitur, ubique rimantes. Sed cum haec quoque alimenta defecerant, iumenta caedere aggressi, ne equis quidem abstinebant; et cum deessent quae sarcinas veherent, spolia de hostibus, propter quae ultima Orientis peragraverant, cremabant incendio. Famem deinde pestilentia secuta est: quippe insalubrium ciborum novi succi, ad hoc itineris labor, et aegritudo animi, vul-

gaverant morbos; et nec manere sine clade, nec progredi poterant: mæmentes famæ, progressos acrior pestilentia urgebat. Ergo strati erant campi paene pluribus semivivis, quam cadaveribus. Ac ne levius quidem ægri sequi poterant: quippe agmen raptim agebatur, tantum singulis ad spem salutis ipsos proficere credentibus, quantum itinervis festinando præriperent. Igitur qui defecerant, *notos ignotosque, ut allevarentur*, orabant. Sed *nec iumenta erant, quibus excipi possent*; et miles vix arma portabat, *imminentisque etiam ipsis facies mali ante oculos erat*. Ergo sæpius revocati, ne respicere quidem suos sustinebant, misericordia in formidinem versa. Illi relictis *Deos testes, sacra communia, regisque implorabant opem*: cumque frustra surdas aures fatigarent, in rabiem desperatione versi, *parem suo exitum, similesque ipsis amicos et contubernales* precabantur. Rex, dolore simul ac pudore anxius, quia causa tantæ cladis ipse esset, ad Phrataphernem Parthorum satrapem misit, qui iuberet *camelis cocta cibaria afferre*: alios quoque finitimarum regionum præfectos certiores necessitatis suæ fecit. Nec cessatum est ab his. Itaque fame dumtaxat vindicatus exercitus, tandem in Gedrosiæ fines perducitur. Omnium rerum sola fertilis regio est, in qua stativa habuit, ut vexatos milites quiete firmaret. Hic Leonnati literas accipit, *conflixisse ipsum cum octo millibus peditum et quingentis equitibus Horitarum, prospero eventu*. A Cratæro quoque nuntius venit, *Ozinem et Zariaspem, nobiles Persas, defectionem molientes oppressos a se, in vinculis esse*. Præposito igitur regioni Sibyræ, (namque Menon præfectus eius nuper interierat morbo) in Carmaniam ipse processit. Aspastes erat satrapes gentis, suspectus res novare voluisse, dum in India rex esset. Quem occurrentem dissimulata ira comiter allocutus, dum exploraret quæ delata erant, in eodem honore habuit. Cum Indiæ præfecti, sicut

imperatum erat, equorum iumentorumque iugalium vim ingentem ex omni, quae sub imperio erat, regione misissent; quibus deerant impedimenta, restituit. Arma quoque ad pristinum resecta sunt cultum: quippe haud procul a Perside aberant, non pacata modo, sed etiam opulenta. Igitur, ut supra dictum est, aemulatus Patris Liberi non gloriam solum, quam ex illis gentibus deportaverat, sed etiam famam, (sive illud triumphus fuit ab eo primum institutus, sive bacchantium Iusus) statuit imitari, animo super humanum fastigium elato. *Vicos, per quos iter erat, floribus coronisque sterni iubet: liminibus aedium crateras vino repletos, et alia eximiae magnitudinis vasa disponi: vehicula deinde constrata, ut plures capere milites possent, in tabernaculorum modum ornari, alia candidis velis, alia veste pretiosa.* Primi ibant amici et cohors regia, variis redimita floribus coronisque; alibi tibicinum cantus, alibi lyrae sonus audiebatur: item in vehiculis, pro copia cuiusque adornatis, comessabundus exercitus, armis quae maxime decora erant circumpendentibus. Ipsum convivasque currus vehebat, crateris aureis eiusdemque materiae ingentibus poculis praegravis. Hoc modo per dies septem bacchabundum agmen incessit; parta praeda, si quid victis saltem adversus comessantes animi fuisset: mille hercule, viri modo et sobrii, septem dierum crapula graves in suo triumpho, capere potuerunt. Sed fortuna, quae rebus famam pretiumque constituit, hic quoque militiae probrum vertit in gloriam. Et praesens aetas, et posteritas deinde mirata est, *per gentes nondum satis domitas incessisse temulentos, barbaris, quod temeritas erat, fiduciam esse credentibus.* Hunc apparatus carnifex sequebatur: quippe satrapes Aspastes, de quo ante dictum est, interfici iussus est. Adeo nec luxuriae quidquam crudelitas, nec crudelitati luxuria obstat.

---

Q. CVRTII RVFI  
DE  
REBVS GESTIS  
ALEXANDRI MAGNI  
HISTORIARVM  
LIBER X.

---

ARGVMENTVM.

*Cleander et alii duces delictorum veniam impetrant, dum nonnulli minus facinorosi puniuntur. Alexandri consilium de Occidentali Europae parte perlustranda: liberalitas erga Abisaris filium, et in Orsinem, nobilissimum Satrapam, crudelitas, 1. Dum turbatum Graeciae statum pacare, et ex militibus, aere alieno liberatis, alios remittere domum, alios retinere cogitat, in castris oritur seditio: quam gravi oratione et regia auctoritate compescit, 2. Seditiosis supplicio affectis, totius exercitus dissipat consilia, et Persis credit corporis sui custodiam, 3. Oratio Macedonis militis victi. Coniuratio in Alexandrum, qui veneno extinguitur, 4. Dicta et gesta eiusdem ante obitum. Quantum a suis fuerit desideratus, praecipue vero a Darii matre; quae dolori succumbens, paullo post extincta est. Alexandri elogium, 5. De successore Alexandri inter Magnates consultatio, et variae sententiae, 6. Aridaeus, Philippo genitus, Meleagro promovente, a quibusdam rex salutatur. Unde civilis belli semina, 7. Primarii*

*duces Meleagri artibus occurrunt. Aridaeus autem, pacis studiosus, tumultum componere media quadam ratione conatur, 8. Perdiccas Meleagrum et trecentos fere alios, qui eum secuti fuerant, dolo opprimit, 9. Alexandri imperium in partes divisum: cuius summa Aridaeo tributa, provinciae autem Magnatibus. Defuncti corpus ab amicis curatum, et tandem Alexandriam Aegypti translatum est, 10.*

## CAPVT L

**I**isdem fere diebus Cleander et Sitalces, et cum Agathone Heracon superveniunt, qui Parmenionem iussu regis occiderant; quinque millia peditum cum equitibus mille. Sed et accusatores eos e provincia, qui praefuerant, sequebantur; nec tot facinora, quot admiserant, compensare poterant caedis perquam gratae regi ministerio. Quippe cum omnia profana spoliassent, ne sacris quidem abstinerant: virginesque et principes feminarum, stupra perpressae, corporum ludibria deslebant. Invisum Macedonum nomen avaritia eorum ac libido barbaris fecerat. Inter omnes tamen eminebat Cleandri furor, qui nobilem virginem constupratam servo suo pellicem dederat. Plerique amicorum Alexandri non tam criminum, quae palam obiciebantur, atrocitatem, quam memoriam occisi per eos Parmenionis, quod tacitum prodesse reis apud regem poterat, intuebantur: laeti recidisse iram in irae ministros, nec ullam potentiam scelere quaesitam cuiquam esse diuturnam. Rex cognita causa pronuntiavit, *ab accusatoribus unum, et id maximum crimen esse praeteritum, desperationem salutis suae: nunquam enim talia ausuros, qui ipsum ex India sospitem aut optassent reverti, aut credidissent reversurum.* Igitur hos quidem vinxit; *de autem militum, qui saevitiae eorum ministri fuerant, interfici iussit.*

Eodem die sumtum est supplicium de iis quoque, quos auctores defectionis Persarum Craterus adduxerat. Haud multo post Nearchus et Onesicritus, quos *longius in Oceanum procedere* iusserat, superveniunt. Nuntiabant autem quaedam audita, alia comperta: *insulam ostio amnis subiectam auro abundare, inopem equorum esse: singulos equos ab iis, qui ex continenti traicere auderent, singulis talentis emi. Plenum esse belluarum mare; aestu secundo eas ferri magnarum navium corpora aequantes: truci cantu deterritas sequi classem: cum magno aequoris strepitu, velut demersa navigia, subisse aquas.* Cetera incolis crediderant: inter quae, *Rubrum mare non a colore undarum, ut plerique crederent, sed ab Erythra rege appellari. Esse haud procul a continenti insulam palmis frequentibus consitam, et in medio fere nemore columnam eminere, Erythrae regis monumentum, literis gentis eius scriptam.* Adiuciebant, *navigia, quae lixas mercatoresque vexissent, famam auri secutis gubernatoribus in insulam esse transmissa, nec deinde ab his postea visa.* Rex, cognoscendi plura cupidine accensus, *rursus eos terram legere iubet, donec ad Euphraten appellerent classem; inde adverso amne Babylonem subituros.* Ipse, animo infinita complexus, statuerat omni ad Orientem maritima regione perdomita, ex Syria petere Africam, Carthagini infensus: inde Numidiae solitudinibus peragratis cursum Gades dirigere. *Ibi namque columnam Herculis esse fama vulgaverat.* Hispanias deinde, quas *Iberiam* Graeci a flumine Ibero vocabant, adire; et praetervehi Alpes, Italiaeque oram, unde in Epirum brevis cursus est. *Igitur Mesopotamiae praetoribus imperavit, materia in Libano monte caesa, devectaque ad urbem Syriae Thapsacum, ingentium carinas navium ponere: septiremes omnes esse, deducique Babylonem. Cypriorum*

*regibus imperatum, ut aes stuppamque et vela praeberent.* Haec agenti Pori et Taxilis regum literae traduntur, *Abisarem morbo, Philippum praefectum ipsius ex vulnere interisse, oppressosque qui vulnerassent eum.* Igitur Philippo substituit Eudaemonem. Dux erat Thracum. Abisaris regnum filio eius attribuit. Ventum est deinde Persagadas. Persica est gens, cuius satrapes Orsines erat, nobilitate ac divitiis inter omnes barbaros eminens. Genus ducebat a Cyro, quondam rege Persarum: opes et a maioribus traditas habebat, et ipse longa imperii possessione cumulaverat. Is regi cum omnis generis donis, non ipsi modo ea, sed etiam amicis eius daturus, occurrit. Equorum domiti greges sequebantur, currusque argento et auro adornati, pretiosa suppellex, et nobiles gemmae, aurea magui ponderis vasa, vestesque purpureae, et signati argenti talentum quatuor millia. Ceterum tanta benignitas barbaro causa mortis fuit. Nam cum omnes amicos regis donis super ipsorum vota coluisset; Bagoae spadoni, qui Alexandrum obsequio corporis devinxerat sibi, nullum honorem habuit. Admonitusque a quibusdam, *quam Alexandro cordi esset, respondit, amicos regis, non scorta, se colere: nec moris esse Persis, mares ducere, qui stupro effeminarentur.* His auditis spado potentiam, flagitio et dedecore quaesitam, in caput nobilissimi et insontis exercuit. Namque gentis eiusdem levissimos falsis criminibus adstruxit, monitos tum demum ea deferre, cum ipse iussisset. Interim quoties sine arbitris erat, credulas regis aures implebat; dissimulans causam irae, quo gravior criminantis auctoritas esset. Nondum suspectus erat Orsines, iam tamen vilior. Rens enim in secreto agebatur, latentis periculi ignarus: et importunissimum scortum, ne in stupro quidem et dedecoris patientia fraudis oblitum, quoties amorem regis in se accenderat, Orsinem modo *avari-*



*ritias, interdum etiam defectionis, arguebat. Im-  
matura erant in perniciem innocentis mendacia, et fa-  
tum, cuius inevitabilis sors est, appetebat. Forte enim  
sepulcrum Cyri Alexander iussit aperiri, in quo erat  
conditum eius corpus, cui dare volebat inferias. Auro  
argentoque repletum esse crediderat, quippe ita fama  
Persae vulgaverant; sed praeter clypeum eius putrem,  
et arcus duos Scythicos, et acinacem, nihil reperit. Ce-  
terum corona aurea inposita amiculo, cui assueverat  
ipse, solium, in quo corpus iacebat, velavit; miratus,  
tanti nominis regem, tantis praeditum opibus, haud  
pretiosius sepultum esse, quam si fuisset e plebe.  
Proximus erat lateri spado, qui regem intuens, quid  
mirum, inquit, est, inania sepulcra esse regum, cum  
satraparum domus aurum inde egestum capere  
non possint? Quod ad me attinet, ipse hoc bustum  
antea non videram: sed ex Dariò ita accepi, tria  
millia talentum condita esse cum Cyro. Hinc illa  
benignitas in te; ut quod impune habere non pote-  
rat Orsines, donando etiam gratiam iniret. Con-  
citaverat iam animum in iram: cum ii, quibus nego-  
tium idem dederat, superveniunt. Hinc Bagoas, hinc  
ab eo subornati, falsis criminibus occupant aures. An-  
tequam accusari se suspicaretur Orsines, in vincula est  
traditus. Non contentus supplicio insontis spado, ipse  
morituro manum iniecit. Quem Orsines intuens, au-  
dieram, inquit, in Asia olim regnasse feminas; hoc  
vero novum est, regnare castratum! Hic fuit exitus  
nobilissimi Persarum, nec insontis modo, sed eximiae  
quoque benignitatis in regem. Eodem tempore Phra-  
dates, regnum affectasse suspectus, occiditur. Coepe-  
rat esse praecipuus ad representanda supplicia; idem  
ad deteriora credenda. Scilicet res secundae valent  
commutare naturam; et raro quisquam erga bona su-  
satis cautus est. Idem enim paullo ante Lyncester  
Alexandrum delatum a duobus indicibus damnare no*

ustinuerat: humiliores quoque reos contra suam voluntatem, quia ceteris videbantur insontes, passus ab-olvi: hostibus victis regna reducerat. Ad ultimum a semetipso degeneravit usque adeo, ut adversus libidinem animi, arbitrio scortis aliis regna daret, aliis ad-neret vitam. Iisdem fere diebus literas a Coeno ac-cepit de rebus in Europa et Asia gestis, dum ipse In-diam subigit. Zopyrio Thraciae praepositus, dum ex-peditionem in Getas faceret, tempestatibus procellis-que subito coortis, cum toto exercitu oppressus erat. Qua cognita clade, Seuthes Odrysas populares suos ad-fectionem compulerat. Amissa propemodum Thra-cia, ne Graecia quidem \* \*

#### IO. FREINSEMI SUPPLEMENTUM.

*tumultibus inconcussa mansit. Nam Alexander, punita satraparum quorundam insolentia, quam, dum in extremo orbe Indorum armis attinetur, per summa scelera atque flagitia in provinciales exer-cuerant, ceterorum metum intenderat: qui in pa-ribus delictis idem admissorum praemium exspe-ctantes, in mercenariorum militum fidem confugie-bant, illorum manibus, si ad supplicium posceren-tur, salutem suam tutaturi; aut pecunia, quanta poterat, coacta, fugam inibant. Ea re cognita literae ad omnes Asiae praetores missae sunt, quibus inspectis e vestigio omnes peregrinos milites, qui stipendia sub ipsis facerent, dimittere iuebantur. Erat inter eos Harpalus, quem Alexander, quod ob ipsius amicitiam olim a Philippo eiectus solum vertisset, inter fidissimos habebat, et post Mazaei mortem satrapia Babyloniae donaverat, thesaurorumque custodiae praefecerat. Is igitur cum fidu-ciam, quam in propensissima regis gratia habere poterat, magnitudine flagitiorum consumsisset, quinque talentorum millia ex gaza regia rapit,*

gaverant morbos; et nec manere sine clade, nec progredi poterant: maerentes fames, progressos acrior pestilentia urgebat. Ergo strati erant campi paene pluribus semivivis, quam cadaveribus. Ac ne levius quidem aegri sequi poterant: quippe agmen raptim agebatur, tantum singulis ad spem salutis ipsos proficere credentibus, quantum itineris festinando praeriperent. Igitur qui defecerant, notos ignotosque, *ut allevarentur*, orabant. Sed *nec iumenta erant, quibus excipi possent*; et miles vix arma portabat, *imminentisque etiam ipsis facies mali ante oculos erat*. Ergo saepius revocati, ne respicere quidem suos sustinebant, misericordia in formidinem versa. Illi relictis *Deos testes, sacra communia, regisque implorabant opem*: cunque frustra surdas aures fatigarent, in rabiem desperatione versi, *parem suo exitum, similesque ipsis amicos et contubernales* precabantur. Rex, dolore simul ac pudore anxius, quia causa tantae cladis ipse esset, ad Phrataphernem Parthorum satrapem misit, qui iuberet *camelis cocta cibaria afferre*: alios quoque finitimarum regionum praefectos certiores necessitatis suae fecit. Nec cessatum est ab his. Itaque fame dumtaxat vindicatus exercitus, tandem in Gedrosiae fines perducitur. Omnium rerum sola fertilis regio est, in qua stativa habuit, ut vexatos milites quiete firmaret. Hic Leonnati literas accipit, *conflixisse ipsum cum octo millibus peditum et quingentis equitibus Horitarum, prospero eventu*. A Cratero quoque nuntius venit, *Ozinem et Zariaspem, nobiles Persas, defectionem molientes oppressos a se, in vinculis esse*. Praeposito igitur regioni Sibyratio, (namque Menon praefectus eius nuper interierat morbo) in Carmaniam ipse processit. Aspastes erat satrapes gentis, suspectus res novare voluisse, dum in India rex esset. Quem occurrentem dissimulata ira comiter allocutus, dum exploraret quae delata erant, in eodem honore habuit. Cum Indiae praefecti, sicut

Imperatum erat, equorum iumentorumque iugalium vim ingentem ex omni, quae sub imperio erat, regione misissent; quibus deerant impedimenta, restituit. Arma quoque ad pristinum resecta sunt cultum: quippe haud procul a Perside aberant, non pacata modo, sed etiam opulenta. Igitur, ut supra dictum est, aemulatus Patris Liberi non gloriam solum, quam ex illis gentibus deportaverat, sed etiam famam, (sive illud triumphus fuit ab eo primum institutus, sive bacchantium lusus) statuit imitari, animo super humanum fastigium elato. *Vicos, per quos iter erat, floribus coronisque sterni iubet: liminibus aedium crateras vino repletos, et alia eximiae magnitudinis vasa disponi: vehicula deinde constrata, ut plures capere milites possent, in tabernaculorum modum ornari, alia candidis velis, alia veste pretiosa.* Primi ibant amici et cohors regia, variis redimita floribus coronisque; alibi tibicinum cantus, alibi lyrae sonus audiebatur: item in vehiculis, pro copia cuiusque adornatis, comessabundus exercitus, armis quae maxime decora erant circumpendentibus. Ipsum convivasque currus vehebat, crateris aureis eiusdemque materiae ingentibus poculis praegravis. Hoc modo per dies septem bacchabundum agmen incessit; parta praeda, si quid victis saltem adversus comessantes animi fuisset: mille hercule, viri modo et sobrii, septem dierum crapula graves in suo triumpho, capere potuerunt. Sed fortuna, quae rebus famam pretiumque constituit, hic quoque militiae probrum vertit in gloriam. Et praesens aetas, et posteritas deinde mirata est, *per gentes nondum satis domitas incessisse temulentos, barbaris, quod temeritas erat, fiduciam esse credentibus.* Hunc apparatus carnifex sequebatur: quippe satrapes Aspastes, de quo ante dictum est, interfici iussus est. Adeo nec luxuriae quidquam crudelitas, nec crudelitati luxuria obstat.

---

Q. CVRTII RVFI  
DE  
REBVS GESTIS  
ALEXANDRI MAGNI  
HISTORIARVM  
LIBER X.

---

ARGVMENTVM.

*Cleander et alii duces delictorum veniam impetrant, dum nonnulliminus facinorosi puniuntur. Alexandri consilium de Occidentali Europae parte perlustranda: liberalitas erga Abisaris filium, et in Orsinem, nobilissimum Satrapam, crudelitas, 1. Dum turbatum Graeciae statum pacare, et ex militibus, aere alieno liberatis, alios remittere domum, alios retinere cogitat, in castris oritur seditio: quam gravi oratione et regia auctoritate compescit, 2. Seditiosis supplicio affectis, totius exercitus dissipat consilia, et Persis credit corporis sui custodiam, 3. Oratio Macedonis militis victi. Coniuratio in Alexandrum, qui veneno extinguitur, 4. Dicta et gesta eiusdem ante obitum. Quantum a suis fuerit desideratus, praecipue vero a Darii matre; quae dolori succumbens, paulo post exstincta est. Alexandri elogium, 5. De successore Alexandri inter Magnates consultatio, et variae sententiae, 6. Aridaeus, Philippo genitus, Meleagro promovente, a quibusdam rezs salutatur. Unde civilis belli semina, 7. Primarij*

*duces Meleagri artibus occurrunt. Aridaeus autem, pacis studiosus, tumultum componere media quadam ratione conatur, 8. Perdiccas Meleagrum et trecentos fere alios, qui eum secuti fuerant, dolo opprimit, 9. Alexandri imperium in partes divisum: cuius summa Aridaeo tributa, provinciae autem Magnatibus. Defuncti corpus ab amicis curatum, et tandem Alexandriam Aegypti translatum est, 10.*

## CAPVT I.

**I**isdem fere diebus Cleander et Sitalces, et cum Agathone Heracon superveniunt, qui Parmenionem iussu regis occiderant; quinque millia peditum cum equitibus mille. Sed et accusatores eos e provincia, cui praefuerant, sequebantur; nec tot facinora, quot admiserant, compensare poterant caedis perquam gratae regi ministerio. Quippe cum omnia profana spoliassent, ne sacris quidem abstinerant: virginesque et principes feminarum, stupra perpessae, corporum ludibria deslebant. Invisum Macedonum nomen avaritia eorum ac libido barbaris fecerat. Inter omnes tamen eminebat Cleandri furor, qui nobilem virginem constupratam servo suo pellicem dederat. Plerique amicorum Alexandri non tam criminum, quae palam obiiciebantur, atrocitatem, quam memoriam occisi per eos Parmenionis, quod tacitum prodesse reis apud regem poterat, intuebantur: laeti recidisse iram in irae ministros, nec ullam potentiam scelere quaesitam cuiquam esse diuturnam. Rex cognita causa pronuntiavit, *ab accusatoribus unum, et id maximum crimen esse praeteritum, desperationem salutis suae: nunquam enim talia ausuros, qui ipsum ex India sospitem aut optassent reverti, aut credidissent reversurum.* Igitur hos quidem vinxit; *de autem militum, quos saevitiae eorum ministri fuerant, interfici iussit.*

Eodem die surtum est supplicium de iis quoque, quos auctores defectionis Persarum Craterus adduxerat. Haud multo post Nearchus et Onesicritus, quos *Longius in Oceanum procedere* iusserat, superveniunt. Nuntiabant autem quaedam audita, alia comperta: *insulam ostio amnis subiectam auro abundare, inopem equorum esse: singulos equos ab iis, qui ex continenti traicere auderent, singulis talentis emi. Plenum esse belluarum mare; aestu secundo eas ferri magnarum navium corpora aequantes: truci cantu deterritas sequi classem: cum magno aequoris strepitu, velut demersa navigia, subisse aquas.* Cetera incolis crediderant: inter quae, *Rubrum mare non a colore undarum, ut plerique crederent, sed ab Erythra rege appellari. Esse haud procul a continenti insulam palmis frequentibus consitam, et in medio fere nemore columnam eminere, Erythrae regis monumentum, literis gentis eius scriptam.* Adiiciebant, *navigia, quae lixas mercatoresque vexissent, famam auri secutis gubernatoribus in insulam esse transmissa, nec deinde ab his postea visa.* Rex, cognoscendi plura cupidine accensus, *rursus eos terram legere iubet, donec ad Euphraten appellerent classem; inde adverso amne Babylonem subituros.* Ipse, animo infinita complexus, statuerat omni ad Orientem maritima regione perdomita, ex Syria petere Africam, Carthagini infensus: inde Numidiae solitudinibus peragratis cursum Gades dirigere. *Ibi namque columnam Herculis esse fama vulgaverat.* Hispanias deinde, quas *Iberiam* Graeci a flumine Ibero vocabant, adire; et praetervehi Alpes, Italiaeque oram, unde in Epirum brevis cursus est. Igitur Mesopotamiae praetoribus imperavit, *materia in Libano monte caesa, devectaque ad urbem Syriae Thapsacum, ingentium carinas navium ponere: septiremes omnes esse, deducique Babylonem. Cypriorum*

*regibus imperatum, ut aes stuppamque et vela praeberent.* Haec agenti Pori et Taxilis regum literae traduntur, *Abisarem morbo, Philippum praefectum ipsius ex vulnere interisse, oppressosque qui vulnerassent eum.* Igitur Philippo substituit Eudaemonem. Dux erat Thracum. Abisaris regnum filio eius attribuit. Ventum est deinde Persagadas. Persica est gens, cuius satrapes Orsines erat, nobilitate ac divitiis inter omnes barbaros eminens. Genus ducebat a Cyro, quondam rege Persarum: opes et a maioribus traditas habebat, et ipse longa imperii possessione cumulaverat. Is regi cum omnis generis donis, non ipsi modo ea, sed etiam amicis eius daturus, occurrit. Equorum domiti greges sequebantur, currusque argento et auro adornati, pretiosa suppellex, et nobiles gemmae, aurea magni ponderis vasa, vestesque purpureae, et signati argenti talentum quatuor millia. Ceterum tanta benignitas barbaro causa mortis fuit. Nam cum omnes amicos regis donis super ipsorum vota coluisset; Bagoae spadoui, qui Alexandrum obsequio corporis devinxerat sibi, nullum honorem habuit. Admonitusque a quibusdam, *quam Alexandro cordi esset,* respondit, *amicos regis, non scorta, se colere: nec moris esse Persis, mares ducere, qui stupro effeminarentur.* His auditis spado potentiam, flagitio et dedecore quaesitam, in caput nobilissimi et insontis exercuit. Namque gentis eiusdem levissimos falsis criminibus adstruxit, monitos tum demum ea deferre, cum ipse iussisset. Interim quoties sine arbitris erat, credulas regis aures implebat; dissimulans causam irae, quo gravior criminantis auctoritas esset. Nondum suspectus erat Orsines, iam tamen vilior. Reus enim in secreto agebatur, latentis periculi ignarus: et importunissimum scortum, ne in stupro quidem et dedecoris patientia fraudis oblitum, quoties amorem regis in se accenderat, Orsinem modo *avari-*



*ritias, interdum etiam defectionis, arguebat. Iam matura erant in perniciem innocentis mendacia, et factum, cuius inevitabilis sors est, appetebat. Forte enim sepulcrum Cyri Alexander iussit aperiri, in quo erat conditum eius corpus, cui dare volebat inferias. Auro argentoque repletum esse crediderat, quippe ita fama Persae vulgaverant; sed praeter clypeum eius putrem, et arcus duos Scythicos, et acinacem, nihil reperit. Ceterum corona aurea imposita amiculo, cui assueverat ipse, solium, in quo corpus iacebat, velavit; miratus, tanti nominis regem, tantis praeditum opibus, haud pretiosius sepultum esse, quam si fuisset e plebe. Proximus erat lateri spado, qui regem intuens, quid mirum, inquit, est, inania sepulcra esse regum, cum satraparum domus aurum inde egestum capere non possint? Quod ad me attinet, ipse hoc bustum antea non videram: sed ex Dariò ita accepi, tria millia talentum condita esse cum Cyro. Hinc illa benignitas in te; ut quod impune habere non poterat Orsines, donando etiam gratiam iniret. Concitaverat iam animum in iram: cum ii, quibus negotium idem dederat, superveniunt. Hinc Bagoas, hinc ab eo subornati, falsis criminibus occupant aures. Antequam accusari se suspicaretur Orsines, in vincula est traditus. Non contentus supplicio insontis spado, ipse morituro manum iniecit. Quem Orsines intuens, audieram, inquit, in Asia olim regnasse feminas; hoc vero novum est, regnare castratum! Hic fuit exitus nobilissimi Persarum, nec insontis modo, sed eximiae quoque benignitatis in regem. Eodem tempore Phradatae, regnum affectasse suspectus, occiditur. Coepert esse praecepta ad repraesentanda supplicia; idem ad deteriora credenda. Scilicet res secundae valent commutare naturam; et raro quisquam erga bona satis cautus est. Idem enim paullo ante Lyncester Alexandrum delatum a duobus indicibus damnare no*

ustinuerat: humiliores quoque reos contra suam voluntatem, quia ceteris videbantur insontes, passus absolvi: hostibus victis regna reducerat. Ad ultimum a semetipso degeneravit usque adeo, ut adversus libidinem animi, arbitrio scorti aliis regna daret, aliis adimeret vitam. Iisdem fere diebus literas a Coeno accepit de rebus in Europa et Asia gestis, dum ipse Indiam subigit. Zopyrio Thraciae praepositus, dum expeditionem in Getas faceret, tempestatibus procellisque subito coortis, cum toto exercitu oppressus erat. Qua cognita clade, Sentes Odrysas populares suos ad defectionem compulerat. Amissa propemodum Thracia, ne Graecia quidem \* \*

#### IO. FREINSHEMII SUPPLEMENTUM.

*tumultibus inconcussa mansit. Nam Alexander, punita satraparum quorundam insolentia, quam, dum in extremo orbe Indorum armis attinetur, per summa scelera atque flagitia in provinciales exercuerant, ceterorum metum intenderat: qui in paribus delictis idem admissorum praemium expectantes, in mercenariorum militum fidem confugiebant, illorum manibus, si ad supplicium poscerentur, salutem suam tutaturi; aut pecunia, quanta poterat, coacta, fugam inibant. Ea re cognita literae ad omnes Asiae praetores missae sunt, quibus inspectis e vestigio omnes peregrinos milites, qui stipendia sub ipsis facerent, dimittere iuebantur. Erat inter eos Harpalus, quem Alexander, quod ob ipsius amicitiam olim a Philippo eiectus solum vertisset, inter fidissimos habebat, et post Mazaei mortem satrapia Babyloniae donaverat, thesaurorumque custodiae praefecerat. Is igitur cum fiduciam, quam in propensissima regis gratia habere poterat, magnitudine flagitiorum consumsisset, quinque talentorum millia ex gaza regia rapit,*

*conductaque sex millium mercenariorum manu, in Europam evadit. Iampridem enim luxu et libidinibus in praecipuus tractus, desperataque apud regem venia, adversus iram ipsius in alienis opibus subsidium circumspicere coeperat; et Athenienses, quorum non contemnendam potentiam, et apud ceteros Graecos auctoritatem, tum occultum in Macedonas odium norat, sedulo coluerat. Itaque spem suis faciebat, Athenienses adventu suo cognito, copiisque et pecuniis, quas adduceret, coram inspectis, protinus arma consiliaque sociaturos esse. Nam apud populum imperitum et mobilem, per homines improbos et avaritia venales, omnia se muneribus consecuturum existimabat.*

CAP. II. Igitur triginta navibus Sunium transmittunt. Promontorium est Atticae terrae, unde portum urbis petere decreverant. His cognitis, rex Harpalo Atheniensibusque iuxta infestus classem parari iubet, Athenas protinus petiturus. Quod consilium dum agit clam, literae ei redduntur, Harpalum intrasse quidem Athenas, pecunia conciliasse sibi principum animos: mox concilio plebis habito iussum urbe excedere, ad Graecos milites pervenisse, a quibus interceptum et trucidatum a quodam viatore per insidias. His laetus in Europam traieciendi consilium omisit: sed exsules, praeter eos, qui civili sanguine adpersi erant, recipi ab omnibus Graecorum civitatibus, quis pulsus erant, iussit. Et Graeci, haud ausi imperium aspernari, quamquam solvendarum legum id principium esse censebant; bona quoque, quae exstarent, restituere damnatis. Solum Athenienses, non suae modo, sed etiam publicae vindices libertatis, colluvionem hominum, quia aegre ferrebant, non regio imperio, sed legibus moribusque patrii regi assueti, prohibere finibus; omnia potius to-

leraturi, quam purgamenta quondam urbis suae, tunc etiam exsili, admitterent. Alexander, senioribus militum in patriam remissis, *tredecim millia peditum, et duo millia equitum, quae in Asia retineret, eligi* iussit: existimans, modico exercitu continere posse Asiam, quia pluribus locis praesidia disposuisset; nuperque conditas urbes, quas colonis replisset, res renovare cupientibus obstare. Ceterum priusquam scerneret, quos erat retenturus, edixit, *ut omnes milites aes alienum profiterentur.* Grave plerisque esse compererat: et quamquam ipsorum luxu contractum erat, dissolvere tamen ipse decreverat. Illi, tentari ipsos rati, quo facilius ab integris sumtuosos discerneret, prolatando aliquantum extraxerant temporis. Et rex satis gnarus, professioni aeris pudorem, non contumaciam obstare; *mensas totis castris poni iussit, et decem millia talentorum proferri.* Tum demum fide facta professi sunt, nec amplius ex tanta pecunia quam centum et triginta talenta superfuere. Adeo ille exercitus, tot ditissimarum gentium victor, plus tamen victoriae, quam praedae, deportavit ex Asia. Ceterum ut cognitum est, *alios mitti domum, alios retineri;* perpetuam eum regni sedem in Asia habiturum rati, vecordes et disciplinae militaris immemores, seditiosis vocibus castra complent, regemque ferocius quam alias adorti, omnes simul *missionem* postulare coeperunt, deformia ora cicatricibus, canitiemque capitum ostentantes. Nec aut praefectorum castigatione, aut verecundia regis deterriti, tumultuoso clamore et militari violentia volentem loqui inhibebant; palam professi, *nusquam inde, nisi in patriam, vestigium esse moturos.* Tandem silentio facto, magis quia motum esse credebant, quam quia ipsi moveri poterant, quidnam acturus esset, expectabant. Ille, *quid haec, inquit, repens consternatio, et tam procax atque effusa licentia denuntiat? Eloqui timeo; palam*

*certe rupistis imperium, et precario rex sum; cui non alloquendi, non noscendi monendique, aut in-  
 tuendi vos ius reliquistis. Equidem cum alios di-  
 mittere in patriam, alios mecum paullo post depor-  
 tare statuerim; tam illos acclamantes video, qui  
 abituri sunt, quam hos, cum quibus praemissos  
 subsequi statui. Quid hoc est rei? dispari in cau-  
 sa idem omnium clamor est! Perverlim scire,  
 utrum qui discedunt, an qui retinentur, de me que-  
 rantur. Crederes imo ore omnes sustulisse clamo-  
 rem; ita pariter ex tota concione responsum est,  
 omnes queri. Tum ille, non hercule, inquit, potest  
 fieri, ut adducar, querendi simul omnibus hanc  
 causam esse, quam ostenditis; in qua maior pars  
 exercitus non est, utpote cum plures dimiserim,  
 quam retenturus sum. Subest nimirum altius ma-  
 lum, quod omnes avertit a me. Quando enim re-  
 gem universus exercitus deseruit? Ne servi qui-  
 dem uno grege profugiunt dominos; sed est qui-  
 dam in illis pudor a ceteris destitutos relinquendi.  
 Verum ego tam furiosae consternationis oblitus,  
 remedia insanabilibus conor adhibere. Omnem  
 hercule spem, quam ex vobis conceperam, damno;  
 nec ut cum militibus meis, iam enim esse destiti-  
 stis, sed ut cum ingratis operis, agere de-  
 crevi. Secundis rebus, quae circumfluunt vos, in-  
 sanire coepistis; obliti status eius, quem beneficio  
 exuistis meo. Digni hercule, qui in eodem conse-  
 nescatis; quoniam facilius est vobis adversam,  
 quam secundam, regere fortunam. En tandem! Il-  
 lyriorum paullo ante et Persarum tributariis Asia,  
 et tot gentium spolia fastidio sunt. Modo sub  
 Philippo seminudis, amicula ex purpura sordent;  
 aurum et argentum oculi ferre non possunt; lignea  
 enim vasa desiderant, et ex cratibus scuta, ru-  
 biginemque gladiatorum. Hoc cultu nitentes vos*

*accepi, et quingenta talenta aeris alieni: cum omnis  
 regia supellex haud amplius quam sexaginta talen-  
 torum esset, meorum operum fundamenta. Quibus  
 tamen (absit invidia) imperium maximae terrarum  
 partis imposui. Asiaene pertaesum est, quae vos  
 gloria rerum gestarum Diis pares fecit? In Eu-  
 ropam ire properatis, rege deserto, cum pluribus  
 vestrum defuturum viaticum fuerit, ni aes alie-  
 num luissem: nempe in Asiatica praeda. Nec  
 pudet profundo ventre devictarum gentium spolia  
 circumferentes, reverti velle ad liberos coniuges-  
 que, quibus pauci praemia victoriae potestis osten-  
 dere. Nam ceterorum, dum etiam spei vestrae  
 obviam istis, arma quoque pignori sunt. Bonis  
 vero militibus cariturus sum, pellicum suarum con-  
 cubinis: quibus hoc solum ex tantis opibus super-  
 est, quod impenditur. Proinde fugientibus me pa-  
 teant limites: facessite hinc ocius; ego cum Per-  
 sis abeuntium terga tutabor. Neminem teneo: li-  
 berate oculos meos, ingratissimi cives. Laeti vos  
 excipient parentes liberique, sine vestro rege re-  
 deuntes! obviam ibunt desertoribus transfugis-  
 que! Triumphabo mehercule de fuga vestra, et  
 ubicunque ero, expetam poenas; hos, cum quibus  
 me relinquitis, colendo, praeferendoque vobis. Iam  
 autem scietis, et quantum sine rege valeat exerci-  
 tus, et quid opis in me uno sit. Desiluit deinde  
 frendens de tribunali, et in medium armatorum agmen  
 se immisit; notatos quoque, qui ferocissime oblocuti  
 erant, singulos manu corripuit: nec ausos repugnare,  
 tredecim asservandos custodibus corporis tradidit.*

CAP. III. Quis crederet, saevam paullo ante con-  
 cionem obtorpuisse subito metu, et cum ad suppli-  
 cium videret trahi nihil ausos gravitra quam ceteros  
 [tam effusam antea licentiam, atque seditiosam mi-

litum violentiam ita compressam, ut non modo nullus ex omnibus irruenti regi restiterit; verum etiam cuncti pavore exanimati, attonitis similes, quid de ipsis quoque rex statuendum censeret, suspensa mente expectarent. Itaque \*] sive nominis, quod gentes, quae sub regibus sunt, inter Deos colunt, sive propria ipsius veneratio, sive fiducia tanta vi exercentis imperium conterruit eos: singulare certe ediderunt patientiae exemplum; adeoque non sunt accensi supplicio commilitonum, cum sub noctem interfectos esse nossent, ut nihil omiserint, quod singuli magis obedienter ac pie facerent. Nam cum postero die prohibiti aditu venissent, Asiaticis modo militibus admissis, lugubrem totis castris edidere clamorem, denuntiantes, *se protinus esse morituros, si rex perseveraret irasci.* At ille pervicacis ad omnia, quae agitasset, animi, *peregrinorum militum concionem advocari iubet, Macedonibus intra castra cohibitis: et cum frequentes coissent, adhibito interprete talem orationem habuit. Cum ex Europa traicerem in Asiam, multas nobiles gentes, magnam vim hominum imperio meo me additurum esse sperabam. Nec deceptus sum, quod de his credidi famae. Sed ad illa hoc quoque accessit, quod video fortes viros erga reges suos pietatis invictae. Luxu omnia fluere credideram, et nimia felicitate mergi in voluptates. At hercule munia militiae hoc animorum corporumque robore aequae impigre toleratis; et cum fortes viri sitis, non fortitudinem magis, quam fidem colitis. Hoc ego nunc primum profiteor, sed olim scio. Itaque et delectum e vobis iuniorum habui; et vos meorum militum corpori immiscui. Idem habitus; eadem arma sunt vobis: obsequium vero et patientia imperii longe praestantior est, quam ceteris. Ergo ipse Oxathris Persae filiam mecum in matrimonio iunxi, non dedignatus ex captiva liberos*

*ollere. Mox deinde cum stirpem generis mei la-  
 ius propagare cuperem, uxorem Darii filiam du-  
 xi; proximisque amicorum auctor fui ex captivis  
 generandi liberos: ut hoc sacro foedere omne dis-  
 crimem victi et victoris excluderem. Proinde ge-  
 nitos esse vos mihi, non adscitos milites credite.  
 Asiae et Europae unum atque idem regnum est.  
 Macedonum vobis arma do. Inveteravi peregrini-  
 nam novitatem, et civis mei estis et milites, omnia  
 eundem ducunt colorem. Nec Persis Macedonum  
 morem adumbrare, nec Macedonibus Persas imi-  
 tari indecorum est. Eiusdem iuris esse debent,  
 qui sub eodem rege victuri sunt. \*\*\**

## SUPPLEMENTUM.

*Hac oratione habita, Persis corporis sui custo-  
 diam credidit, Persas satellites, Persas apparito-  
 res fecit. Per quos cum Macedones, qui huic se-  
 ditioni occasionem dedissent, vincti ad supplicia  
 traherentur; unum ex iis, auctoritate et aetate  
 gravem, ad regem ita locutum ferunt:*

CAP. IV. *Quousque, inquit, animo tuo etiam  
 per supplicia, et quidem externi moris, obseque-  
 ris? Milites tui, cives tui, incognita causa, ca-  
 ptivis suis ducentibus, trahuntur ad poenam! Si  
 mortem meruisse iudicas, saltem ministros suppli-  
 cii muta. Amico animo, si veri patiens fuisset, ad-  
 monebatur; sed in rabiem ira pervenerat. Itaque  
 rursus (nam parumper, quibus imperatum erat, dubi-  
 taverant,) mergi in amnem, sicut vincti erant, ius-  
 sit. Nec hoc quidem supplicium seditionem militum  
 movit. Namque copiarum duces atque amicos eius,  
 manipuli adeunt, petentes, ut si quos adhuc pristina  
 noxa iudicaret esse contactos, iuberet interfici, of-  
 ferre se corpora irae, trucidaret. \*\*\**



## SUPPLEMENTUM.

*Postquam vero cognitum est, Persis ducatus  
 datos, barbaros in varios ordines distributos, at-  
 que Macedonica iis imposita nomina, se vero igno-  
 miniose penitus reiectos esse, non iam amplius  
 conceptum animis dolorem perferre potuerunt;  
 sed, concursu in regiam facto, interiori dumtaxat  
 retenta tunica, arma ante ianuam, poenitentiae  
 signum, proiecerunt, ac prae foribus stantes, in-  
 tromitti se, sibi que ignosci suppliciter atque flen-  
 tes orabant, utque rex supplicii suis potius satu-  
 ret se, quam contumeliis: ipsos, nisi venia impe-  
 trata, non discessuros. Quae cum Alexandro  
 nuntiata essent, apertis regiae foribus ad ipsos est  
 egressus. Postquam vero ipsorum eiulatum at-  
 que poenitentiam, nec non miserandum atque af-  
 flictum habitum vidisset, diu quoque collacrimatus  
 est. Eaque modestia, ut ipsis ignosceret, obtinue-  
 runt. Eis deinde nunc modeste incusatis, nunc  
 comiter appellatis, complures bello inutiles exau-  
 ctoravit, magnificentissimeque donatos dimisit.  
 Scribens quoque ad Antipatrum, Macedoniae  
 praefectum, eis ad spectanda certamina priores in  
 theatro sedes assignari, coronatosque sedere ius-  
 sit. Defunctorum quoque liberos pupillos paterna  
 contrahere stipendia voluit, Cratero iis praeposito,  
 quem etiam, Antipatri loco, Macedonibus, Thessa-  
 lis Thracibusque praeesse iussit: Antipatrumque  
 cum supplemento tironum in Crateri locum voca-  
 vit. Iam pridem quidem Alexandro literae, et ab  
 Olympiade matre et ab Antipatro redditae erant,  
 ex quibus mutuam inter ipsos simultatem perce-  
 perat. Mater Antipatrum affectati regni insimu-  
 labat. Antipater Olympiadem multa praeter ipsius  
 decorum gerere scripserat. Itaque evocari se*

valde iniquo ferens animo, Alexandrum veneno interficere statuit. Peractis his rebus omnibus, Alexander ad Ecbatana Mediae profectus regni necessaria disposuit, spectacula denuo et sollemnes indixit dies. Illis forte diebus Hephaestion, quem rex unice ac fratris loco diligebat, febricitans moritur. Ex quo Alexander incredibili affectus dolore, multa, quae regiam maiestatem minime decerent, admisisse dicitur. Miserum quippe medicum, tanquam in curando negligentior fuisset, suspendi iussit. Super amici corpus exanime eiulans procubuit, vixque inde ab amicis abstractus est. Diem atque noctem luctum continuavit. Aliaque nonnulla feruntur, quae quidem ego minime credo. Illud tamen verum est, quod Alexander Hephaestioni, tanquam Heroi, sacrificari iusserit. In funus atque monumentum ei faciendum, plus quam duodecim millia talentorum impensa sunt. Revertenti Babylonem, Chaldaei vates occurrerunt, monentes, ne Babylonem ingrederetur. Projectionem enim eius per id tempus, vitae periculum ei portendere. Quibus spretis, quo destinaverat ire pergit. Nuntiabatur enim ei, legatos ex diversis terrarum orbis partibus, undique Babylonem confluisse, eiusque adventum expectare. Adeo totum orbem nominis eius terrore invaserat, ut cunctae gentes, velut destinato sibi regi, adularentur. Igitur tanquam conventum universi orbis acturus, Babylonem pervenire festinabat. Quo cum venisset, legatos omnes benigne susceptos domum remisit. Iisdem fere diebus convivium apud Thessalum medicum institutum est, ad quod rex quoque cum sodalibus vocatus venit. Ibi nondum Herculis scypho epoto, repente, velut telo confixus, ingemuit. Elatus e convivio semianimis, tanto dolore cruciatus est, ut

*ferrum in remedia posceret. Amici causam morbi, intemperiem ebrietatis, divulgaverunt; re vera autem insidiae fuerunt, quarum infamiam successorum potentia oppressit. Antipater enim praeparatum venenum Cassandro filio, qui cum fratribus Philippo et Iolla regi ministrare solebat, dederat, praemonito eo, ne aliis quam Thessalo et fratribus crederet. Philippus itaque et Iollas, potum regis praegustare soliti, in aqua frigida venenum habentes, eam praegustatae potioni regis supermisserunt. Quarto deinde die, cum milites partim mortuum suspicarentur, idque celari crederent, partim eius desiderium ferre non possent, moesti sese in regiam contulerunt, ut sibi regis videndi copia fieret orantes, atque a custodibus ex mandato regis intromissi sunt.*

#### IO. FREINSEMI SUPPLEMENTUM ALIUD.

*Tandem prae dolore vix mentis compotes universi concurrunt ad regiam, armisque ante fores proiectis, tunicati adstantes, nuda et obnoxia poenis corpora admitti flentes orabant. Non se deprecari, quin suppliciiis solum expiarentur, quae per contumaciam deliquissent. Regis iracundiam sibi morte tristiores esse. Cumque dies noctesque ante regiam persistentes, miserabili clamore habituque poenitentiam suam approbarent; biduum tamen adversus humillimas suorum preces iracundia regis duravit. Tertio die victus constantia supplicium, processit; incusataque leniter exercitus immodestia, non sine multis utrinque lacrimis, in gratiam se cum ipsis redire professus est. Digna tamen res visa est, quae maioribus hostiis expiaretur. Itaque sacrificio magnifice perpetrato, Macedonum simul Persarumque primores invitavit ad epulas. Novem millia eo convivio exceperunt, pro-*

*litum est memoriae, eosque omnes invitante rege ex eodem cratere libavisse, Graecis barbarisque vatibus tum alia fausta vota praecuntibus, tum inprimis ut ea utriusque imperii in idem corpus coalita societas perpetua foret. Maturata deinde est missio et infirmissimus quisque exauctorati. Amicorum quoque seniorum quibusdam commeatum dedit. Ex quis Clitus cognomento Albus, Gorgiasque et Polydamas, et Antigenes fuere. Abeuntibus non modo praeteriti temporis stipendium cum fide persolvit, verum etiam talentum adiecit in singulos milites, viatici nomine. Filios ex Asiaticis uxoribus susceptos (ad decem millia fuisse traditur) apud se relinqui iussit, ne in Macedoniam cum parentibus transgressi, et coniugibus liberisque prioribus permixti, familias singulorum contentionibus et discordiis implerent; sibi curae fore pollicitus, ut patrio more instituti militiae artes edocerentur. Ita supra decem veteranorum millia dimissa sunt; additusque est Craterus, qui eos deduceret, ex praecipuis regis amicis. Isti si quid humanitus contigisset, Polyperchonti parere iussi sunt. Literis etiam ad Antipatrum scriptis, honorem emeritis haberi praecepit, ut quoties ludi atque certamina ederentur, in primis ordinibus coronati spectarent; utque fato functorum liberi, etiam impuberes, in paterna stipendia succederent. Craterum Macedoniae continentibusque regionibus cum imperio praeesse placuit; Antipatrum cum supplemento iuniorum Macedonum ad regem pergere. Verebatur enim, ne per discordiam praefecti cum Olympiade gravis aliqua clades acciperetur. Nam multas ad Alexandrum epistolas mater, multas Antipater miserat; vicissimque alter alterum arguenter et acerbe pleraque facere criminabantur, quae ad dedecus, aut detrimentum regiae maiestatis pertinerent. Postquam enim rumor occisi*

regis temere vulgatus in Macedoniam penetravisset, mater eius sororque Cleopatra tumultuatas fuerant; et haec quidem paternum regnum, Olympias Epirum invaserat. Fortè dum eiusmodi literae redduntur, Hephæstion, adsuetus omnium arcanorum se participem haberi, resignatas ab Alexandro simul inspiciebat. Neque vetuit eum rex; sed detractum digito anulum ori legentis admovit, nihil eorum, quae perscripta essent, in alios efferendum significans. Incusasse autem ambos fertur, et matris insolentia permotum exclamasse, eam pro habitatione decem mensium, quam in utero sibi praebuisset, gravem mercedem exigere: Antipatrum vero suspectum habuisse, quasi parta ex Spartanis victoria tollentem animos, et imperio tot iam in annos prorogato supra praefecti modum elatum. Itaque cum eius gravitas atque integritas a quibusdam praedicaretur; subiecit, exterius quidem album videri, sed si penitus introspectiatur, totum esse purpureum. Pressit tamen suspicionem suam, neque ullum manifestius ab alienati animi indicium praetulit. Credidere tamen plerique, Antipatrum, evocari se supplicii causa ratum, impiis machinationibus, regiae mortis, quae paullo post secuta est, auctorem exstitisse. Interea rex, ut imminuti exercitus detrimenta sarciret, optimum quemque Persarum in Macedonicos ordines allegit: mille etiam praestantissimos segregavit ad propiorem sui corporis custodiam: aliam hastatorum manum, haud pauciores decem millibus, circa regium tabernaculum excubias agere iussit. Haec agenti Peucestes supervenit cum viginti sagittariorum funditorumque millibus, quos ex sua provincia coegerat. His per exercitum distributis profectus est Susis, Tigrique amne transmissis, apud Carrhas castra metatus est: inde quadriduo per Sittacenen

*luctis copiis Sambana processit; ubi per septem  
 dies quietum agmen tenuit. Tridui deinde itinere  
 immenso Celonas perventum est. Oppidum hoc te-  
 nent Boeotia profecti, quos Xerxes sedibus suis  
 excitos in Orientem transtulit: servabantque ar-  
 gumentum originis peculiari sermone, ex Graecis  
 plerumque vocibus constante; ceterum ob commer-  
 ciorum necessitatem finitimorum barbarorum lin-  
 gua utebantur. Inde Bagistanen ingressus est,  
 regionem opulentam, et abundantem arborum  
 amoeno et fecundo foetu, ceterisque ad vitae non  
 usum modo, verum etiam delectationem pertinen-  
 tibus. Gravis inter haec Eumeni cum Hephae-  
 stione similtas inciderat. Nam servos Eumenis  
 diversorio, quod pro hero suo anteceperant, He-  
 phaestio proturbavit, ut Evius tibicen eo recipere-  
 tur. Neque diu post, cum iam sopita odia viderentur,  
 nova exorta contentione adeo recrudue-  
 runt, ut etiam in atrox iurgium, et acerba utrinque  
 convicia prorumperent. Sed Alexandri interventu  
 imperioque inimicitiae saltem in speciem abolitae  
 sunt: cum ille quidem Hephaestioni etiam minatus  
 esset, qui in flagrantissima regis gratia posi-  
 tus, quamquam cupidum reconciliationis Eume-  
 nem, pertinacius aversabatur. Perventum deinde  
 est in Mediae campos, ubi maxima equorum ar-  
 menta pascebantur. Nisaeos appellant, magnitu-  
 dine et specie insignes. Supra quinquaginta millia  
 ibi reperta, cum Alexander eo transiret, a comitibus  
 illius annotatum est: olim triplo plures fuisse; sed  
 inter bellorum turbas maximam eorum partem praedones  
 abegisse. Ad triginta dies ibi substitit rex.  
 Eo Atropates Mediae satrapa centum barbaras  
 mulieres adduxit, equitandi peritas, peltisque et  
 securibus armatas: unde quidam crediderunt,  
 Amazonum ex gente reliquias fuisse. Septimis deinde*

castris Ecbatana attingit, Mediae caput. Ibi sollemnia Diis sacrificia fecit; ludosque edidit, et in convivia festosque dies laxavit animum, ut mos in novorum operum curam atque ministeria validior intenderetur. Sed ista volentem, velut iniecta manu, fatum alio traxit, vitamque carissimo amicorum eius, neque multo post, ipsi quoque regi extorsit. Pueros in stadia certantes spectabat, cum nuntiatur deficere Hephaestionem, qui morbo ex crapula contracto septimum iam diem decumbebat. Exterritus amici periculo statim consurgit, et ad hospitium illius celeriter pergit: neque tamen prius eo pervenit, quam illum mors occupasset. Id regi omnium, quae in vita pertulerat, adversorum luctuosissimum accidisse certum habetur: eumque magnitudine doloris in lacrimas et lamenta victum, multa animi de gradu deiecti argumenta edidisse. Sed ea quidem varie traduntur: illud inter omnes constat, ut quam decentissimas exsequias ei duceret, non voluisse Ecbatanis sepeliri; sed Babylonem, quo ipse concessurus erat, a Perdicca deferri curasse: ibique funus inaudito antehac exemplo duodecim talentum millibus locavisse. Per universum certe imperium iugem eum iussit: et ne memoria eius in exercitu exolesceret, equitibus, quis praefuerat, nullum praefecit ducem, sed Hephaestionis alam appellari voluit, et quae ille signa instituisset, ea non immutari. Funebria certamina ludosque, quales nunquam edui fuissent, meditatus, tria artificum millia coegit: qui non multo post in ipsius exsequiis certasse feruntur. Nec amici tum effuso affectu ad conciliandam eius gratiam segniter usi, certatim reperere, per quae memoria defuncti clarior honoratiorque fieret. Igitur Eumenes, cum se ob simultatem cum Hephaestione regis indignationem incurrisse

*sensisset, multis auctor fuit, seque et arma sua Hephaestioni consecrandi; pecuniasque ad coonestandum funus large contulit. Hoc exemplum imitati sunt ceteri: eaque mox processit assentationum impudentia; ut regi moerore et desiderio defuncti insanienti persuasum tandem fuerit, Deum esse Hephaestionem. Quo quidem tempore ex copiarum ducibus Agathocles Samius ad extremum periculi venit, quod illius tumulum praeteriens illacrimasse visus esset. Ac nisi Perdicas, venanti sibi Hephaestionem apparuisse ementitus, per Deos omnes, ipsumque Hephaestionem deierasset, ex ipso se cognovisse, Agathoclem non ut mortuum, et vanae divinitatis titulis frustra ornatum flevisse, verum ob memoriam pristinae sodalitatis lacrimas non tenuisse; vir fortis, et de rege bene meritus, pietatis in amicum graves poenas innoxio capite pependisset. Ceterum ut paullisper a luctu avocaret animum, in Cossaeorum gentem expeditionem suscepit. Iuga Mediae vicina Cossaei tenent, asperum et acre genus, et praedando vitam tolerare solitum. Ab his Persarum reges annuo tributo pacem redimere consueverant, ne in subiecta decurrentes infestam latrociniis regionem facerent. Nam vim tentantes Persas facile repulerant, asperitate locorum defensi, in quae se recipiebant, quoties armis superabantur. Iidem muneribus quotannis placabantur, ut regi Ecbatanis, ubi aestiva solebat agere, Babylonem remigranti, tutus per ea loca transitus esset. Hos igitur Alexander bipartito agmine aggressus, intra quadraginta dies perdomuit. Nam ab ipso rege, et Ptolemaeo, qui partem exercitus ducebat, saepe caesi, ut captivos suos reciperent, permisere se victori. Ille validas urbes opportunis locis extrui iussit, ne abducto exercitu fera gens obedientiam exeret. Motis inde*



castris, ut militem expeditione recenti fessum reficeret, lento agmine Babylonem procedebat. Iamque vix triginta ab urbe stadiis aberat; cum Nearchus occurrit, quem per Oceanum et Euphratis ostia Babylonem praemiserat: orabatque, ne fatalem sibi urbem vellet ingredi. Compertum id sibi ex Chaldaeis, qui multis iam praedictionum eventibus artis suae certitudinem abunde probavissent. Rex, fama eorum hominum, constantique asseveratione motus, dimissis in urbem amicorum plerisque, alia via praeter Babylonem ducit; ac ducentis inde stadiis stativa locat. Sed ab Anaxarcho persuasus, contemtis Chaldaeorum monitis, quorum disciplinam inanem aut supervacuum arbitratur, urbem intrat. Legationes eo ex universo ferme orbe confluerant. Quibus per complures dies studiose auditis, deinceps ad Hephæstionis exsequias adiecit animum. Quae summa omnium studio ita celebratae sunt, ut nullius ad id tempus regis feralia, magnitudine sumtum, apparatusque celebritate non vicerint. Post haec cupido incessit regi per Pallacopam amnem ad Arabum confinia navigandi: quo delatus, urbi condendae comoda sede reperta, Graecorum aetate aut vulneribus invalidos, et si qui sponte remanserant, ibi collocat. Quibus ex sententia perfectis, iam futuri securus Chaldaeos irridebat, quod Babylonem non ingressus tantum esset incolumis, verum etiam excessisset. Enimvero revertenti per paludes, quas Euphrates in Pallacopam effusus efficit, foedum omen oblatum est. Quippe rami desuper impendentes detractum capiti regio diadema proiecerunt in fluctus. Cum deinde alia super alia prodigiosa et minacia nuntiarentur, procurandis iis Graeco simul barbaroque ritu continua sacra facta sunt. Neque tamen expiari praeterquam morte regis potuere. Qui

*cum Nearchum excepisset convivio, iamque cubitum iturus esset, Medii Larissaei obnixis precibus dedit, ut ad eum comessatum veniret. Ubi postquam tota nocte perpotasset, male habere coepit. Ingravescens deinde morbus, adeo omnes vires intra sextum diem exhausit, ut ne vocis quidem potestas esset. Interea milites, sollicitudine desiderioque eius anxii, quamquam obtestantibus ducibus, ne valetudinem regis onerarent, expresse-  
runt, ut in conspectum eius admitterentur.*

CAP. V. Intuentibus lacrimae obortae praebuere speciem iam non regem, sed funus eius visentis exercitus. Moeror tamen circumstantium lectum eminebat: quos ut rex adspexit, *Invenietis, inquit, cum excessero, dignum talibus viris regem?* Incredibile dictu audituque, in eodem habitu corporis, in quem se composuerat, cum admissurus milites esset, durasse, donec a toto exercitu illo ad ultimum persalutatus est: dimissoque vulgo, velut omni vitae debito liberatus, fatigata membra reiecit. *Propiusque adire iussit amicis, nam et vox deficere iam coeperat; detractum anulum digito, Perdiccae tradidit, adiectis mandatis, ut corpus suum ad Hammonem ferri iuberet. Quaerentibus his, cui relinqueret regnum?* respondit, *ei, qui esset optimus. Ceterum providere iam, ob id certamen magnos funebres ludos parari sibi.* Rursus Perdicca interrogante, *quando coelestes honores haberi sibi vellet?* dixit, *tum velle, cum ipsi felices essent.* Suprema haec vox fuit regis, et paullo post exstinguitur. Ac primo ploratu lamentisque et planctibus tota regia personabat: mox velut in vasta solitudine omnia tristi silentio muta torpebant; ad cogitationes, quid deinde futurum esset, dolore converso. Nobiles pueri, custodiae corporis eius assueti, nec doloris magnitudinem capere, nec se ipsos intra vestibulum regiae retinere potuerunt: vagique, et fu-

rentibus similes, totam urbem luctu ac moerore compleverant; nullis questibus omissis, quos in tali casu dolor suggerit. Ergo qui extra regiam adstiterant Macedones pariter barbarique concurrunt; nec poterant victi a victoribus in communi dolore discerni. Persae *iustissimum ac mitissimum dominum*; Macedones *optimum ac fortissimum regem* invocantes, certamen quoddam moeroris edebant. Nec moestorum solum; sed etiam indignantium voces exaudiebantur, *tam viridem, et in flore aetatis fortunaeque invidia Deum ereptum esse rebus humanis*. Vigor eius et vultus educens in proelium milites, obsidentis urbes, evadentis in muros, fortes viros pro concione donantis, occurrebant oculis. Tum Macedones *divinos honores negasse* ei poenitebat: *impiosque et ingratos fuisse* se confitebantur, *quod aures eius debita appellatione fraudassent*. Et cum diu nunc in veneratione, nunc in desiderio regis haesissent; in ipsos versa miseratio est. Macedonia profecti ultra Euphraten mediis hostibus novum imperium aspernantibus destitutos se esse cernebant; sine certo regis herede, sine herede regni publicas vires ad se quemque tracturum. Bella deinde civilia, quae secuta sunt, mentibus augurabantur: *iterum, non de regno Asiae, sed de rege, ipsis sanguinem esse fundendum; novis vulneribus veteres rumpendas cicatrices; senes, debiles, modo petita missione a iusto rege, nunc morituros pro potentia forsitan satellitis alicuius ignobilis*. Has cogitationes volventibus nox supervenit, terroremque auxit. Milites in armis vigilabant: Babylonii alius e muris, alius culmine sui quisque tecti prospectabant, quasi certiora visuri. Nec quisquam lumina audebat accendere. Et quia oculorum cessabat usus, fremitus vocesque auribus captabant: ac plerumque vano metu territi per obscuras semitas, alius alij occurrentes, hancem suspecti et solliciti ferebantur. Persae, comis

suo more detonsis, in lugubri veste, cum coniugibus  
 ac liberis, non ut victorem et modo hostem, sed ut  
 gentis suae iustissimum regem vero desiderio lugebant.  
 Assueti sub rege vivere, *non alium, qui imperaret  
 ipsis, digniorem fuisse* confitebantur. Nec muris  
 urbis luctus continebatur; sed proximam regionem ab  
 ea, deinde magnam partem Asiae cis Euphratem tanti  
 mali fama pervaserat. Ad Darii quoque matrem ce-  
 leriter perlata est. Abscissa ergo veste, qua induta  
 erat, lugubrem sumpsit; laceratisque crinibus humi  
 corpus abiicit. Assidebat ei altera ex neptibus, nuper  
 amissum Hephaestionem, cui nupserat, lugeus; pro-  
 priasque causas doloris in communi moestitia retra-  
 ctabat. Sed omnium suorum mala Sisygambis una  
 capiebat. Illa suam, illa neptium vicem flebat. Recens  
 dolor etiam praeterita revocaverat. Crederes modo  
 amissum Darium, et pariter miseræ duorum filiorum  
 exsequias esse ducendas. Flebat mortuos simul, vi-  
 vosque. *Quem enim puellarum acturum esse cu-  
 ram? quem alium futurum Alexandrum? iterum  
 se captas; iterum excidisse regno. Qui mortuo  
 Dario ipsas tueretur reperisse; qui post Alexan-  
 drum respiceret, utique non reperturas.* Subibat  
 inter haec animum, *octoginta fratres suos eodem  
 die ab Ocho saevissimo regum trucidatos, adiec-  
 tumque stragi tot filiorum patrem: e septem libe-  
 ris, quos genuisset ipsa, unum superesse: ipsum  
 Darium floruisse paullisper, ut crudelius posset  
 extinguere.* Ad ultimum dolori succumbit, obvolu-  
 toque capite accidentes genibus suis neptem nepotem-  
 que aversata, cibo pariter abstinuit et luce. Quinto,  
 postquam mori statnerat, die extincta. Magnum  
 profecto Alexandro indulgentiae in eam, iustitiaeque  
 in omnes captivos, documentum est mors huius; quae  
 cum sustinisset post Darium vivere, Alexandro esse  
 superstes erubuit. Et hercule, iuste aestimantibus

regem liquet, bona naturae eius fuisse; vitia vel fortunae, vel aetatis. Vis incredibilis animi: laboris patientia propemodum nimia; fortitudo non inter reges modo excellens, sed inter illos quoque, quorum haec sola virtus fuit: liberalitas saepe maiora tribuentis, quam a Diis petuntur: clementia in devictos, tot regna aut reddita, quibus ea demserat bello, aut dono data: mortis, cuius metus ceteros exanimat, perpetua contentio: gloriae laudisque ut iusto maior cupido, ita ut iuveni et in tantis admittenda rebus. Iam pietas erga parentes, quorum Olympiada immortalitati consecrare decreverat; Philippum ultus erat: iam in omnes fere amicos benignitas; erga milites benevolentia; consilium par magnitudini animi, et quantam vix poterat aetas eius capere, sollertia: modus immodicorum cupiditatum, Veneris intra naturale desiderium usus, nec ulla nisi ex permissio voluptas; ingentes profecto dotes erant. Illa fortunae: Diis aequare se, et coelestes honores arcessere, et talia suadentibus oraculis credere, et dedignantibus venerari ipsum vehementius quam par esset irasci; in externum habitum mutare corporis cultum, imitari devictarum gentium mores, quas ante victoriam spreverat. Nam iracundiam et cupidinem vini sicuti iuventa irritaverat, ita senectus mitigare potuisset. Fatendum est tamen, cum plurimum virtuti debuerit, plus debuisse fortunae; quam solus omnium mortalium in potestate habuit. Quoties illum a morte revocavit? quoties temere in pericula vectum perpetua felicitate protexit? Vitae quoque finem eundem illi, quem gloriae statuit. Expectavere eum fata, dum Oriente perdomito, aditoque Oceano, quidquid mortalitas capiebat, impleret. Huic regi ducique successor quaerebatur: sed maior moles erat, quam ut tuus subire eam posset. Itaque nomen quoque eius et fama rerum in totum propemodum orbem, reges ac regna diffudit; clarissimique sunt habiti,

qui etiam minimae parti tantae fortunae adhaeserunt.

CAP. VI. Ceterum Babylone (inde enim divertit oratio) corporis eius custodes, in regiam principes amicorum, ducesque copiarum advocaverunt. Secuta est militum turba, cupientium scire, in quem Alexandri fortuna esset transitura. Multi duces frequentia militum exclusi regiam intrare non poterant; cum praeco, *exceptis, qui nominatim citarentur, adire prohibuit.* Sed precarium spernebatur imperium. Ac primum eiulatus ingens, ploratusque renovatus est: deinde futuri expectatio inhibitis lacrimis silentium fecit. Tunc Perdicca, regia sella in conspectum vulgi data, in qua diadema vestisque Alexandri cum armis erant, annulum sibi pridie traditum a rege in eadem sede posuit; quorum adpectu rursus obortae omnibus lacrimae integraverunt luctum. Et Perdicca, *Ego quidem, inquit, annulum, quo ille regni atque imperii vires obsignare erat solitus, traditum ab ipso mihi, reddo vobis. Ceterum quamquam nulla clades huic, qua affecti sumus, par ab iratis Diis excogitari potest; tamen magnitudinem rerum, quas egit, intuentibus credere licet, tantum virum Deos accommodasse rebus humanis, quarum sorte completa, cito repeterent eum suae stirpi. Proinde quoniam nihil aliud ex eo superest, quam quod semper ab immortalitate subducitur, corpori nominique quam primum iusta solvamus; haud oblitus, in qua urbe, inter quos simus, quali rege ac praeside spoliati. Tractandum est, commilitones, cogitandumque, ut victoriam partam inter hos, de quibus parta est, obtinere possimus. Capite opus est. Hocne uno, an pluribus, in vestra potestate est. Illud scire debetis, militarem sine duce turbam corpus esse sine spiritu. Sextus mensis est, ex quo Roxane praegnant est: optamus, ut marem enite-*

*tur: eius regnum Diis approbantibus futurum, quando adoleverit. Interim, a quibus regi velitis, destinate. Haec Perdicca. Tum Nearchus, Alexandri modo sanguinem ac stirpem regiae maiestati convenire, neminem, ait, posse mirari. Ceterum expectari nondum ortum regem, et qui iam sit praeteriri, nec animis Macedonum convenire, nec tempori rerum. Esse e Barsine filium regis: huic diadema dandum. Nulli placebat oratio. Itaque suo more hastis scuta quatientes obstrepere perseverabant. Iamque prope seditionem pervenerant, Nearchus per-  
 vicacius tuente sententiam. Tum Ptolemaeus, *Digna prorsus est soboles, inquit, quae Macedonum imperet genti, Roxanes vel Barsinae filius; cuius nomen quoque Europam dicere pigebit, maiore ex parte captivi. Cur Persas vicerimus, ut stirpi eorum serviamus? quod iusti illi reges Darius et Xerxes tot millium agminibus, tantisque classibus nequidquam petiverunt. Mea sententia haec est, ut sede Alexandri in regia posita, qui consiliis eius adhibebantur, coeant, quoties in commune consulto opus fuerit: eoque, quod maior pars eorum decreverit, stetur. Duces, praefectique copiarum his pareant. Ptolemaeo quidam, potiores Perdiccae assentiebantur. Tum Aristonus orsus est dicere, Alexandrum consultum, cui relinqueret regnum, voluisse optimum deligi. Iudicatum autem ab ipso optimum, Perdiccam, cui annulum tradidisset. Neque enim unum eum assedissee morienti; sed circumferentem oculos, ex turba amicorum delegisse, cui traderet. Placere igitur, summam imperii ad Perdiccam deferri. Nec dubitare, quin vera censeret. Itaque universi, proceres in medium Perdiccam, et regis annulum tollere, iuebant. Haerebat inter cupiditatem pudoremque, et quo modestius, quod expectabat, appeteret, pervicacius oblaturos**

esse credebat. Itaque cunctatus, diuque, quid ageret, incertus, ad ultimum tamen recessit, et post eos, qui ederant proximi, constitit. At Meleager, unus e dubiis, confirmato animo, quem Perdiccae cunctatio rexerat, *nec Dii siverint*, inquit, *ut Alexandri fortuna, tantique regni fastigium in istos humeros uat: homines certe non ferent. Nihil dico de no-tilioribus, quam hic est, sed de viris tantum; qui-  
us inuitis nihil perpeti necesse est. Nec vero in-  
erest, Roxanes filium, quandoque genitus erit, an  
Perdiccam regem habeatis; cum iste sub tutelae  
pecie regnum occupaturus sit. Itaque nemo ei  
ex placet, nisi qui nondum natus est: et in tanta  
mnium festinatione, non iusta modo, sed etiam  
ecessaria, exactos menses solus exspectat, et iam  
iwinat marem esse conceptum; quem vos dubitatis  
aratum esse vel subdere. Si mediusfidius Alex-  
nder hunc nobis regem pro se reliquisset, id so-  
m ex iis, quae imperasset, non faciendum esse  
enserem. Quin igitur ad diripiendos thesauros  
iscurritis? harum enim opum regiarum utique  
opulus est heres. Haec elocutus per medios armatos  
upit, et qui abeunti viam dederant, ipsum ad pro-  
ntiatam praedam sequebantur.*

CAP. VII. Iamque armatorum circa Meleagrum  
equens globus erat, in seditionem ac discordiam  
rsa concione; cum quidam, plerisque Macedonum  
notus ex infima plebe, *Quid opus est*, inquit, *armis,  
vilique bello, habentibus regem, quem quaeritis?  
ridaeus, Philippo genitus, Alexandri paulò ante  
gis frater, sacrorum caerimoniarumque consors  
do, nunc solus heres, praeteritur a vobis. Quo  
rito suo? quidve fecit, cur etiam gentium com-  
ni iure fraudetur? Si Alexandro similem quae-  
is, nunquam reperietis; si proximum, hic solus  
. His auditis concio primo silentium velut iussa*



habuit: conclamant deinde pariter, *Aridaeum vocandum esse, mortemque meritos, qui concionem sine eo habuissent.* Tum Pithon pleues criminarum orditur dicere, *Nunc vel maxime miserabilem esse Alexandrum, qui tam bonorum civium militumque fructu et praesentia fraudatus esset. Nomen enim memoriamque regis suitantum intuentes, ad cetera caligare eos.* \* Haud ambigue in iuvenem, cui regnum destinabatur, impensa probra; quae magis ipsi odium, quam Aridaeo contemptum attulerunt: quippe dum miscerentur, etiam favere coeperunt. Igitur *non alium se, quam eum, qui ad hanc spem geuitus esset, regnare passuros,* pertinaci acclamatione declarant, *vocarique Aridaeum* iubent. Quem Meleager infestus inuisusque Perdiccae strenue perducit in regiam; et milites *Philippum* consalutatum, *regem* appellant. Ceterum haec vulgi erat vox; principum alia sententia. E quibus Pithon consilium Perdiccae exsequi coepit, *tutoresque* destinat *filio ex Roxane futuro, Perdiccam et Leonnatum, stirpe regia genitos.* Adiecit, *ut in Europa Craterus et Antipater res administrarent.* Tum iusiurandum a singulis exactum, *futuros in potestate regis geniti Alexandro.* Meleager, haud iniuria metu supplicii territus, cum suis secesserat. Rursus Philippum trahens secum irrupit regiam, clamitans *suffragari reipublicae de novo rege paullo ante concepto: robur aetatis experirentur; modo stirpem Philippi, et filium, ac fratrem regum duorum sibimetipsis potissimum crederent.* Nullum profundum mare, nullum vastum fretum et procellosum tantos ciet fluctus, quantos multitudo motus habet, utique si nova et brevi duratura libertate luxuriat. Pauci Perdiccae modo electo, plures Philippo, quam speraverat, imperium dabant. Nec velle, nec nolle, quidquam diu poterant; poenitebatque modo consilii, modo poeni-

entiae ipsius. Ad ultimum tamen in stirpem regiam inclinare studiis. Cesserat ex concione Aridaeus, principum auctoritate conterritus; et abeunte illo conclicuerat magis, quam languerat, militaris favor. Itaque revocatus vestem fratris, cum ipsam, quae in sella posita fuerat, induitur. Et Meleager thorace sumto capit arma, novique regis satelles sequitur. Phalanx, hastis clypeos quatiens, *expleturam se sanguine illorum, qui affectaverant nihil ad ipsos pertinens regnum*, minabatur. In eadem domo familiaque imperii vires remansuras esse gaudebant; hereditarium imperium stirpem regiam vindicaturam; assuetos se nomen ipsum colere venerarique, nec quemquam id capere, nisi genitum ut regnaret. Igitur Perdicca territus, *conclave, in quo Alexandri corpus iacebat, asservari iubet*. Sexcenti cum ipso erant, spectatae virtutis: Ptolemaeus quoque se adiunxerat ei, puerorumque regia cohors. Ceterum haud difficulter a tot millibus armatorum claustra perfracta sunt. Et rex quoque irruerat stipatus satellitum turba, quorum princeps erat Meleager. Iratusque Perdicca, *hos, qui Alexandri corpus tueri vellent*, revocat: sed qui irruerant, eminus tela in ipsum iaciebant. Multisque vulneratis, tandem seniores demtis galeis, quo facilius nosci possent, precari, qui cum Perdicca erant, coepere, *ut abstinerent bello, regique et pluribus cederent*. Primus Perdicca arma deposuit; ceterique idem fecere. Melcagro deinde suadente, *ne a corpore Alexandri discederent*; insidiis locum quaeri rati, diversa regiae parte ad Euphraten fugam intendunt. Equitatus, qui ex nobilissimis iuvenum constabat, Perdiccam et Leonnatum frequens sequebatur; placebatque *excedere urbe, et tendere in campos*. Sed Perdicca ne pedites quidem secuturos ipsum desperabat: itaque ne abdicendo equites abruptisse a cetero exercitu videretur, in urbe substitit.

CAP. VIII. At Meleager regem monere non destitit, *ius imperii Perdiccae morte sancendum esse: ni occupetur impotens animus, res novaturum. Meminisse eum quid de rege meruisset: neminem autem ei satis fidum esse, quem metuat.* Rex patiebatur magis, quam assentiebatur. Itaque Meleager silentium pro imperio habuit, misitque regis nomine, qui Perdiccam arcesserent. *Iisdem mandatum, ut occiderent, si venire dubitaret. Perdicca, nuntiato satellitum adventu, sexdecim omnino pueris regiae cohortis comitatus in limine domus suae constitit; castigatosque, et Meleagri mancipia identidem appellans, sic animi vultusque constantia terruit, ut vix mentis compotes fugerent.* Perdicca pueros equos iussit conscendere, et cum paucis amicorum ad Leonatum pervenit; iam firmiore praesidio vim propulsaturus, si quis inferret. Postero die indigna res Macedonibus videbatur, Perdiccam ad mortis periculum adductum; et Meleagri temeritatem armis ultum ire decreverant. Atque ille seditione provisa, cum regem adisset, interrogare eum coepit, *an Perdiccam comprehendi ipse iussisset.* Ille *Meleagri instinctu se iussisse* respondit. *Ceterum non debere tumultuari eos; Perdiccam enim vivere.* Igitur concione dimissa Meleager, equitum maxime defectione perterritus, inopsque consilii, (quippe in ipsum periculum reciderat, quod inimico paullo ante intenderat) triduum fere consumsit incerta consilia volvendo. Et pristina eadem regiae species manebat: nam et legati gentium regem adibant, et copiarum duces aderant, et vestibulum satellites armatique compleverant. Sed ingens sua sponte moestitia ultimae desperationis index erat: *inspectique invicem non adire propius, non colloqui audebant, secretas cogitationes intra se quoque volventes, et ex comparatione regis novi, desiderium excitabatur amissi. Ubi ille esset, cuius imperium,*

*plus auspiciam secuti erant, requirebant. Destitutos se inter infestas indomitasque gentes, expecturas tot cladum suarum poenas, quodcumque oblata esset occasio. His cogitationibus animos cedebant, cum annuntiatum, equites, qui sub Perdicca essent, occupatis circa Babylonem campis, umentum, quod in urbem invehatur, retinuisse. aque inopia primum, deinde fames esse coepit; et si in urbe erant, aut reconciliandam gratiam cum Perdicca, aut armis certandum esse, censebant. Urbe ita acciderat, ut qui in agris erant, populationem illarum vicorumque veriti, confugerent in urbem; Epidauri, cum ipsos alimenta deficerent, urbe excederent; et utrique generi tutior aliena sedes, quam sua, videretur. Quorum consternationem Macedones percipiti, in regiam coeunt; quaeque ipsorum sententia esset, exponunt. Placebat autem legatos ad equites Perdicca de finienda discordia, armisque ponendis. Legitur a rege legatur Padas Thessalus, et Amissas Meleopolitamus, et Perilaus: qui cum mandata regis edidissent; non aliter posituros arma equites, quam si rex discordiae auctores dedidisset, tulere responsum. His renuntiatis sua sponte milites arma capiunt. Quorum tumultu e regia Philippus excitus, Nihil, inquit, seditione est opus. Nam inter se certantium discordia, qui quieverint, occupabunt. Simul mentote rem esse cum civibus; quibus spem gratiae cito abrumpere, ad bellum civile properantium est. Altera legatione an mitigari possint, experiamur: tunc credo, nondum regis corpore sepulto, ad praestanda ei iusta omnes esse edituros. Quod ad me attinet, reddere hoc imperium malo, quam exercere civium sanguine: et si nulla alia concordiae spes est, oro quaesoque, eligite potiozem. Obortis deinde acrimis, diadema detrahit capiti; dextram, qua id tenebat, protendens, ut si quis se digniorem profite-*

*retur, acciperet.* Ingentem spem indolis, ante eum diem fratris claritate suppressam, ea moderata excitavit oratio. Itaque cuncti instare coeperunt, *ut, quod dignitasset, exsequi vellet.* Eisdem rursus legat petituros, *ut Meleagrum tertium ducem acciperent.* Haud acre id impetratum est. Nam et abducere Meleagrum Perdicca a rege cupiebat; et unum duobus imparem futurum esse censebat. Igitur Meleagro cum phalange obviam egresso, Perdicca equitum turma antecedens occurrit. Utrumque agmen *mutua salutatione* facta coit; in perpetuum, ut arbitrabantur, *concordia* et pace firmata.

CAP. IX. Sed iam fatis admovebantur Macedonum genti bella civilia. Nam et insociabile est regnum, et a pluribus expetebatur. Primum ergo collegere vires, deinde disperserunt: et cum pluribus corpus, quam capiebat, onerassent, cetera membra deficere coeperunt: quodque imperium sub uno stare potuisset, dum a pluribus sustinetur, ruit. Proinde iure meritoque populus Romanus *salutem se principi suo debere* profitetur, cui noctis, quam paene supremam habuimus, novum sidus illuxit. Huius hercule, non solis ortus, lucem caliganti reddidit mundo; cum sine suo capite discordia membra trepidarent. Quot illum exstinxit faces! quot condidit gladios! quantam tempestatem subita serenitate discussit! Non ergo revirescit solum, sed etiam floret imperium. Absit modo invidia, excipiet huius seculi tempora, eiusdem domus utinam perpetua, certe diuturna posteritas. Ceterum ut ad ordinem, a quo me contemplatio publicae felicitatis averterat, redeam; Perdicca unicam spem salutis suae in Meleagri morte deponebat: *vanum eundem et infidum, celeriterque res novaturum, et sibi maxime infestum occupandum esse.* Sed alta dissimulatione consilium premebat, ut opprimeret incau-

rum. Ergo clam quosdam ex copiis, quibus praeerat, subornavit, *ut quasi ignoraret ipse, conquererentur palam, Meleagrum aequatum esse Perdiccae.* Quorum sermone Meleager ad se relato, furcens ira, Perdiccae, quae comperisset, exponit. Ille, velut nova re exterritus, admirari, queri, dolentisque speciem ostentare ei coepit; ad ultimum convenit, *ut comprehenderentur tam seditiosae vocis uectores.* Agit Meleager gratias, amplexusque Perdiccam, *fidem eius in se ac benevolentiam* collaudat. Tum communi consilio rationem opprimendi noxios ineunt. Placet *exercitum patrio more lustrari.* Et probabilis causa videbatur praeterita discordia. Macedonum reges ita lustrare soliti erant milites, ut discissae canis viscera ultimo in campo, in quem deduceretur exercitus, ab utraque abiicerentur parte; intra id spatium armati omnes starent, hinc equites, illinc phalanx. Itaque eo die, quem huic sacro destinaverant, rex cum equitibus elephantisque constiterat contra pedites, quibus Meleager praeerat. Iam equestre agmen movebatur, et pedites subita formidine ob recentem discordiam, haud sane pacati quidquam exspectantes, parumper addubitavere, *an in urbem subducerent copias?* quippe pro equitibus planities erat. Ceterum veriti, ne temere commilitonum fidem damnarent, substitere, praeparatis ad dimicandum animis, si quis vim inferret. Iam agmina coibant, parvumque intervallum erat, quod aciem utramque divideret. Itaque rex cum una ala obequitare peditibus coepit, *discordiae auctores,* quos tueri ipse debebat, instinctu Perdiccae *ad supplicia* deprecens: *minabaturque omnes turmas cum elephantis inducturum se in recusantes.* Stupebant improvise malo pedites: nec plus in ipso Meleagro erat aut consilii, aut animi. Tutissimum ex praesentibus videbatur, exspectare potius, quam movere fortunam. Tum Perdicca, ut torpentes et obnoxios vidit,

ccc fere, qui Meleagram erumpentem ex concione, quae prima habita est post mortem Alexandri, secuti erant, a ceteris discretos, elephantis in conspectu totius exercitus obiicit; omnesque belluarum pedibus obtriti sunt, nec prohibente Philippo, nec auctore: apparebatque, id modo pro suo vindicaturum, quod approbasset eventus. Hoc bellorum civilium Macedonibus et omen et principium fuit. Meleager, sero intellecta fraude Perdiccae, tum quidem, quia ipsius corpori vis non afferebatur, in agmine quietus stetit: at mox, damnata spe salutis, cum eius nomine, quem ipse fecerat regem, in perniciem suam abutentes videret inimicos, confugit in templum: ac ne loci quidem religione defensus, occiditur.

CAP. X. Perdicca, perducto in urbem exercitu consilium principum virorum habuit, in quo imperium ita dividi placuit, ut rex quidem summam eius obtineret; satrapes Ptolemaeus Aegypti et Africae gentium, quae in ditione erant. Laomedonti Syria cum Phoenice data est: Philotae Cilicia destinata Lyciam cum Pamphylia et maiore Phrygia obtinere iussus Antigonus: in Cariam Cassander, Menander in Lydiam missi. Phrygiam minorem Hellesponto adiunctam Leonnati provinciam esse iusserunt Cappadocia Eumeni cum Paphlagonia cessit. Praeceptum est, ut regionem eam usque ad Trapezunta defenderet, bellum cum Ariarathe gereret. Solus hic detrectabat imperium. Pithon Mediam, Lysimachus Thraciam, appositaeque Thraciae Ponticas gentes obtinere iussi. Qui Indiae, quique Bactris et Sogdianis, ceterisque aut Oceani aut Rubri maris accolis praerant, quibus quisque finibus habuisset, imperii etiam ius obtineret. Decretum est, ut Perdicca cum rege esset, copiisque praeesset, quae regem sequebantur. Credidere quidam, testamento Alexandri distributas esse

provincias; sed famam eius rei, quamquam ab autoribus tradita est, vanam fuisse comperimus. Et quidem suas quisque opes divisim imperii partibus tueantur: quas ipsi fundaverant, si unquam adversus immodicas cupiditates terminus staret. Quippe paulo ante regis ministri, specie imperii alieni procurandi, singuli ingentia invaserant regna; sublatis certaminum causis, cum et omnes eiusdem gentis essent, et a ceteris sui quisque imperii regione discreti. Sed difficile erat eo contentos esse, quod obtulerat occasio: quippe ordent prima quaeque, cum maiora sperantur. Itaque omnibus expeditius videbatur augere regna, quam videret accipere. Septimus dies erat, ex quo corpus regis iacebat in solio; curis omnium ad formandum publicum statum a tam sollemni munere aversis. Et non aliis quam Mesopotamiae regione fervidior aestus existit, adeo ut pleraque animalia, quae in nudo solo leprehendit, extinguat; tantus est vapor solis et coeli, quo cuncta velut igne torrentur. Fontes aquarum et vari sunt, et incolentium fraude celantur: ipsis usus patet, ignotus est advenis. Ut tandem curare corpus exanimum amicis vacavit; nulla tamen, ne minimo quidem livore corruptum videre, qui intraverant. Vigor quoque, qui constat ex spiritu, non destituerat vultum. Itaque *Aegyptii Chaldaei que, iussi corpus suo more curare*, primo non sunt ausi admovere velut spiranti manus: deinde precati, *ut ius fasque esset mortalibus attrectare eum*, purgaverunt corpus; repletumque est odoribus aureum solium, et capiti adiecta fortunae ius insignia. *Veneno necatum esse credidere plerique: filium Antipatri inter ministros, Iollam nomine, patris iussu dedisse.* Saepe certe audita erat vox Alexandri, *Antipatrum regium affectare fastidium; maioremque esse praefecti opibus, ac titulo partanae victoriae inflatum, omnia a se data asserentem sibi.* Credebant etiam, *Craterum cum*



*veterum militum manu ad interficiendum eum missum.* Vim autem veneni, quod in Macedonia gignitur, talem esse constat, ut ferrum quoque exurat, ungulae iumentum dumtaxat patiens. *Stygem appellant fontem, ex quo pestiferum virus emanat. Hoc per Cassandrum allatum, traditumque fratri Iollae, et ab eo supremæ regis potioni inditum.* Haec utcumque sunt tradita, eorum, quos rumor adperserat, mox potentia exstinxit. Regnum enim Macedoniae Antipater, et Graeciam quoque invasit. *Soboles deinceps cepit, interfectis omnibus, quicumque Alexandrum etiam longinqua cognatione contigerant.* Ceterum corpus eius a Ptolemaeo, cui Aegyptus cesserat, Memphis, et inde paucis post annis Alexandriam translatum est: omnisque memoriae ac nomini honos habetur.

---

I. FREINSHEMII  
S V P P L E M E N T O R V M

IN  
Q. C V R T I V M

LIBER I.

---

C A P V T I.

Alexandri, qui ademptum Persis imperium in Graeciam intulit, vitam atque res gestas plurimi Graecorum memoraverunt: ex quibus plerosque operum suorum spectatores, quosdam etiam socios atque ministros habuit; nonnullos, ut erat avidus mansurae post mortem gloriae, ad hoc ipsum evocavit, ut res suas traderent posteritati. Ceterum praeter ipsam rerum magnitudinem, innata genti fabularum cupido effecit, ut eorum complures monstris quam vero similia proderent: fide autem diguissimi videnter Ptolemaeus, qui postea regnavit, et Aristobulus. Etenim extincto iam Alexandro sua edentibus metus et assentationis causae decesserant, quibus fere narrandarum rerum veritas corrumpi solet: nam Ptolemaeum etiam regii nominis dignitatem mendaci historia polluere voluisse, quis crederet? Uterque autem cum multis ad res Alexandri pertinentibus negotiis non interfuerint modo, verum etiam praefuerint, verissima prae aliis tradere potuisse liquet. Quoties igitur consentiunt, ceteris autelabuimus: ubi in diversum abeunt, ex copia re-

rum ea potissimum secrevimus, quae diligenter Intese composita proxime ad rerum gestarum fidem videbantur accedere. Quod etiam post aetatem Alexandri alios Graecorum secutos video, quibus aliqua veri cura fuit; et nuper ex Sicilia Diodorum. Nam qui ex Romanis animum ad historiam applicuerunt, ii patriis rebus contenti, externa neglectui habuere: quia victoris populi gesta componentibus neque maiestas rerum deerat, et plus utilitatis allatura videbantur in eadem republica degentibus. Quorum studium ut laude dignissimum arbitror, sic extra reprehensionem fore confido, si nostris etiam hominibus ostendam eum regem, qui unus omnium mortalium, intra brevissimum aevi spatium, plurimum terrarum occupavit: quo appareat, non forte neque temere res humanas ferri; sed plerumque fortunam pro moribus; neque diuturnam esse felicitatem, quae virtute destituatur. Igitur Alexandrum omnibus ingenii fortunaeque dotibus abunde auctum ornatumque fuisse comperio, quibus fatalem tantae potentiae virum oportebat instrui. Genus ab Hercule repetebant Macedonum reges: Olympias, Alexandri mater, initia suae gentis ad Achillem referebat. Pnero neque incitamenta exemplaue gloriae, neque virtutis magister aut exercitatio deerant. Quippe Philippus pater continuis bellis contemtam ante Macedonum gentem extulit, et coacta in ordinem Graecia, cunctis formidabilem fecit. Denique non solum operum post se gestorum fundamenta posuit; verum etiam cum decederet, Persico bello intentus, delectus habuerat, com meatius, pecuniam, exercitum paraverat; et Parmenionis opera iam Asiam aperuerat. Sed in eo rerum momento subductus est, ut et maxima gerendi belli subsidia filio, et plenam gesti gloriam reliqueret: quadam fortunae industria, quam unus hic perpetuo obsequentem sibi habuit. Cuius admiratione non postea modo, sed sta-

tim ab initio dubitatum est, rectiusne foret, non per Aeacidam aut Herculem, sed ab ipso protinus Iove, tanto homini divinae stirpis originem asserere. Ipse quidem, cum Hammonem Libycum adiret, eius filium se appellari voluit, ut postea trademus. Ceterum *draconem in cubili matris eius visum, quem Iuppiter induerit, eoque genitum fuisse Alexandrum*, multi crediderunt: *insomniis etiam, vatumque responsis fidem generis factam: et cum Philippus Delphos sciscitatum misisset, oraculo monitum*, ut Hammonem inprimis revereretur. Nec desunt, qui *fabulosum id quidem, non tamen adulterium matris falso iactatum* asserant. Quippe pulsum Aegypti regno Nectanebum, non, ut vulgo arbitrantur, in Aethiopia concessisse; sed cum adversus vim Persicam in Philippo maxime praesidium speraret, in Macedoniam vectum, magicis praestigiis illuisse Olympiadi, torumque hospitis temeravisse. Suspectam quidem exinde Philippo, neque aliam tam intimam divortii, quod inter eos secutum est, causam, pro comperto postea fuisse. Etiam quo die Philippus Cleopatram domum deduxerat, Attalum, sponsae avunculum, Alexandro natalium dedecus exprobrare ausum, ipso quoque rege ex sese genitum negante: denique de Olympiadis adulterio non in nostro solum orbe, sed apud devictas quoque nationes, pertinacem rumorem obtinuisse. Verum velandae ignominiae repetitum ex antiquis fabulis de dracone commentum: idem enim olim de Aristomene Messenios, de Aristodama Sicyonios iactavisse. Sane apud maiores nostros de Scipione, qui Carthaginem prior afflixit, eadem ferme fama fuit; similisque divinitatis opinionem Romani modo principis ortus habuit: nam de conditore Urbis Romulo quid attinet dicere, cum nulla gens tam vilis reperiat, quae sui generis auctorem non faciat Deum, aut

Deo editum? Ceterum Nectanebi fuga temporibus hisce non congruit: sexennis enim iam erat Alexander, cum ille ab Ocho victus, avitis opibus excideret. Nec ideo minus vanum est, quod de Iove fertur. Ipsa quidem Olympias, demto post mariti necem metu, asseverationem filii Iove se genitum credi volentis irrisisse dicitur, missaque epistola petivisse, *ne se, nihil tale commeritam, odiis Iunonis obiectare pergeret.* Antea enim ipsa maximo fabulam confirmasse creditur, proficiscentemque in Asiam Alexandrum monuisse, *ut memor originis digne tanto genitore capesseret.* Verum tamen ostentis Deum variisque praesagiis inter conceptum editumque partum significatum fuisse, quantus homo nasceretur, consensu traditur. Obsignatam Olympiadis alvum annulo, cuius sculptura leonem praeferebat, per quietem Philippus vidit. Cuius rei memoriam servavit Alexandria, quam in Aegypto conditam, aliquamdiu Leontopolim appellavere. Nam de Alexandri magnanimitate et robore somnium illud interpretatus erat Aristander, peritissimus vatum, qui postea comes ei haesit, sacrisque eius praefuit. Qua autem nocte Olympias peperit, maximi per Asiam nominis templum Ephesiae Dianae ignis hausit. Intulerat eum cuiusdam hominis perditii furor; qui comprehensus tortusque, non alia mente id commisisse fassus est, quam ut magno aliquo facinore memoriam sui diurnam efficeret. Ergo tam foedi exempli cladem non istius tantum aedis damno aestimavere Magi, qui tum Ephesi degebant; verum pro maioris ruinae praesagio habentes, totam urbem moestis implevere clamoribus: *exortam alicubi facem, cuius incendio, similem ob causam, totus olim Oriens conflagraturus esset.* Forte per idem tempus Potidaeam Atheniensium coloniam Philippus subegerat, cum et Olympia quadrigis se vicisse cognovit, et a Parmenione, quem in Illyrios miserat, maioris momenti nuntius

venit, *fusis ingenti proelio barbaris, Macedonas prospere pugnasse.* Exsultanti tam laeto ubique votorum exitu etiam de Olympiadis partu renuntiatum est: nec dubitavere vates, *invictum fore, qui inter tot victoriarum palmas nasceretur.* Ferunt tot simul prosperarum rerum cumulo attonitum regem, et invidiam Deum veritum, oravisse Nemesin, *ut hoc fortunae obsequium, modica aliqua calamitate ulcisci contenta foret.* Proditum etiam est memoriae, *in oppido Pella duas aquilas in culmine donus, ubi puerum enixa erat regina, tota die persequisse.* Gemini per Europam Asiamque imperii augurium id fuisse, post eventum facile interpretati sunt. *Terram quoque tum movisse, magnamque tonitruorum fulminumque vim erupisse coelo,* auctores habeo. Natus est autem, ut accuratius tractant, incipiente Olympiade sexta supra centesimam, praetore Athenis Elpine, A. D. XII Kalend. Sextil. quem tum mensem Macedones *Loum* vocabant: quo tempore populus Romanus quadringentesimum ferme annum agens, vicinorum bellis exercebatur, et subiugando terrarum orbi quotidianis incrementis praeulebat.

CAP. II. At Philippus, auctus filio, de quo propter blata tot omina spem amplissimam conceperat, in ducationem curamque eius omnes cogitationes convertit. Quippe vir prudens et amans patriae, nihil nolationibus suis profectum facile sentiebat, si rebus indigne motis, hominem imperium aut segnem Macedoniae post se relinqueret: suam quoque gloriam laud durabilem futuram, si maximarum rerum instrumenta, quae tanta industria parabat, successoris inertia corrumpisset. Leguntur inter epistolas eius, venustatis et prudentiae plenas, literae, quas tum ad Aristotelem, qui cum Platone exercebatur, Athenas misit, in nunc fere modum scriptae. *Philippus Aristoteli sa-*

*lutem dicit. Certiorem te facio, filium mihi genitum esse. Nec perinde Diis gratiam habeo, quod omnino natus est, quam quod te florente nasci illum contigit: a quo educatum institutumque neque nobis indignum spero evasurum, neque successioni tantarum rerum imparem. Satius enim existimo carere liberis, quam opprobria maiorum suorum tollentem, in poenam genuisse. Neque fefellit eum opinio: quippe puer, Aristotele doctore diu usus, ad res in ea aetate gerendas insigne praesidium sibi comparavit. Sed haec postea acciderunt. Interim constituti sunt infanti nutritores atque paedagogi, Leonidas, Olympiadis propinquus, et Lysimachus Acarnan. Philippus nationis eiusdem adiectus, qui valetudinem pueri regeret: Hellanicae (Dropidis erat filia, ex illustrioribus Macedonum feminis) corporis et morum recta temperie probatae nutricis munus demandatum est. Hac cura paucos intra annos effectum est, ut iam tum polliceri videretur eum regem, quem postmodum exhibuit. Nam et in puerilibus membris indomitus eminebat vigor; et eximiae indolis argumenta aetatem longe praevenerant. Excellens nativa et genuina venustate corporis, cultum aspernabatur, *anxiam formae curam feminis convenire* dictitans, *quae nulla alia dote aequae commendarentur: si virtutis potiri contigisset, satis se speciosum fore.* Fuit autem, cum adolevisset, iusta membrorum proportionem conspicuus, artubus robustis, probeque compactis: vi tamen, quam specie, validior; quippe corporis eius habitus intra proceritatem stetit. Cutem habuit candidam, nisi quod in malis, itemque pectore, grato rubore suffundebatur: capillum flavum, leniter intortum: nasum aquilinum: oculos varios, nam laevus glaucus fuisse traditur, altero nigerrimo. Inerat autem ipsis occulta quaedam vis, ut sine veneratione atque horrore quodam intuentium non adspiceretur. Pernicitate*

pedum admirabili fuit; quam ut magnae in expeditionibus utilitatis, etiam rex non omisit exercere, saepeque cum velocissimis suorum cursu certare visus est: patientia laboris supra fidem eximia; qua saepe una, difficillimis temporibus, sibi exercitibusque suis salutem peperit. Exercitationibus crebris, et calidissima corporis temperie, adeo, quidquid vitiosi humoris sub cute colligi solet, expugnavit, ut suavem ex ore nembrisque exhalaret odorem, eoque etiam tunicas, quibus uteretur, impletet: ob easdem causas, ut quidam putant, ad vinum iramque proclivior. Visuntur adhuc imagines eius statuaeque, summorum artificum opera: ne enim vulgarium sculptorum pictorumve temeritate oris sui honor obsolesceret, studiose cavit; poenam comminatus, si quis iniussu suo conaretur. Ergo abundante tum artificum copia, volentem unus Apelles pinxit, sculpsit Pyrgoteles, Lysippus et Polydorus aere duxerunt. *Citatiorem gressum Leonidae vitium fuisse, ferunt; ex ipsius consuetudine id haesisse Alexandro: quod postea, cum enixe vellet, corrigere non potuerit.* Equidem educationi plurimum tribui debere, non infiteor; ceterum hoc quidem naturae potius adolescentis, quam assuetudini, depono: tenim in homine velocissimae mentis necessum erat, ut ardorem animi, corporis etiam motus sequeretur. Quem adeo non in vitio posuere successores ipsius, ut tiam studiose aemularentur; simul depressiore in aevum collo, obtutum eius vibrantem, et elatiorem vocem imitati, cum animum non exprimerent: quippe lurimorum ex illis longa vita vix quidquam habuit ignum, quod cum huius pueritia compararetur. Neque enim quidquam aut loquebatur, aut agebat humiliter; sed dictis factisque par fortunae suae, vel etiam supra erat. Nam cum esset laudis avidissimus, non indecunquae eam affectabat, sed optimis quibusque comparari gaudebat; ingloriam ex vilibus palmam in-



telligens, tantoque illustriorem victoriam, quanto quos vicisset pluris haberentur. Ergo dicentibus, *quoniam cursu plurimum valerët, debere profiteri nomen suum inter eos, qui Olympicis ludis certaturi essent, cognominis sibi regis exemplo; magnam esse per Graeciam sibi famam comparaturum: Facerem, inquit, si reges haberem adversarios.* Quoties aut praeclara aliqua pugna Philippus vicerat, *ut oppidum opulentum in potestatem redegerat; laetantibus aliis, ipse haud obscure indolescebat: exceptaque vox est querentis inter aequales, nihil reliqui facturum patrem sibi ipsisque, cum adolevissent.* Quippe deperiturum gloriae verebatur, quidquid accessisset opibus: nec tam harum possessione, quam istius cupidine movebatur. Somni natura parcissimus, etiam arte vigilantiam adiuuabat. Si quid occurrisset, quod seria meditatione dignum videretur; comprehensa pila argentea, brachium extra lectum porrigebat, ut in subiectam pelvim illapsa, excitato sonitu, torporem in somnum deficientis discuteret. Deos ab inenitate aetate magnifice coluit. Sacro quodam ita liberaliter thura flammis intulit, ut Leonidas, vir severus et parcus, profusionem istam non ferens, exclamaret, *sic adolebis, cum regiones subegeris, ubi haec nascuntur.* Cuius vocis memor, cum postea thuriferam Arabiam pacaret, multa otlorum talenta misit Leonidæ, cum mandatis, *ne posthac in Deorum honoribus adstrictior esse vellit, quos intelligeret dona hilariter oblata tam larga manu rependere.* Animi sublimis et magna conaturi documenta mature dedit. Persis ea tempestate Artaxerxes, cognomento Ochus, praeerat. Eum Artabazus et Menapis Satrapae, Memnonque Rhodius, egregius dux, belló lacesiverant; sed potentia regis oppressi, deserta Asia ad Philippum profugerant. His tum Alexander septenni minor mire delectabatur, crebroque de rebus Persicis interrogabat:

nihil quidem puerile et sordidum, sed quibus maxime firmamentis opes regiae niterentur? quis armorum usus, quae audacia viris, quanta equis pernicitas esset? quot dierum itinere Macedonia distaret Susis? quae regi morum via, quaeque exercitatio corporis, atque opinio virtutis foret? Postea, cum deprecante fratre Memnonis Mentore, cuius sororem in matrimonio Artabazus habebat, cum exsulis in gratiam rediisset Ochus, eosque a Philippo repeteret; Alexander legatos eximiae in tantilla aetate indolis admiratione ita percussit, ut unus eorum in haec verba prorumperet, *Hic quidem puer magnus est rex; noster vero, dives.* Haec autem cum merito quidem naturae suae debere videretur, haud minus institutioni debuit. Nam pater, satis gnarus, quantum Epaminondae commercium sibi profuisset, quantoque plura eloquentia, quam vi, confecisset, summa cura incubuerat, ut a tenera statim aetate liberalium artium studiis probe imbueretur. Igitur Aristotelem, magni nominis philosophum, ingentibus praemiis evocatum perpulit, ut etiam prima literarum elementa puero traderet. Nec abnuvit vir doctissimus, cum intelligeret, quantum esset a principio recte instrui multis imperaturum; frustra que contemni pro parvis, sine quibus ad maiora profectus non esset. Variis deinde magistris, ut alius alia arte excellebat, usus, non modo mentem egregiis implevit disciplinis; verum etiam corpus omnis generis exercitationibus, ad usum bellorum, et patientiam laboris edomuit: ne tum quidem vacuus, cum otari videretur; quippe pila, vel saltatione virili, non tam laxabat animum, quam seriis obsequiis membra praeparabat.

CAP. III. Postquam deinde aetas et ingenium paullisper adolevit, iamque severioribus studiis idoneus visus est, revocatum, qui tum apud Mitylenaeos agebat, Aristotelem continuo secum habuit, donec

post mortem patris rerum potitus, in *Asiam* transiiret. Quo temporis spatio, quidquid a tanto praeceptore tradi potuit, perdidicit. Cognoscendae rerum naturae tanto avidius incubuit, quanto pertinaciore spe imperium universi orbis praeceperat. Cuius indagacionem postea quoque adiuvit, plane regio et animo, et sumtu. Aristoteli, quo naturas animalium certius atque perspectius commentari posset, tota *Asia Graeciaque* parere iussit, quotquot venatu, aucupio, piscativae vitam tolerabant, aut aliquam in eiusmodi negotiis peritiam assecuti fuerant. Constat, in eius operis impensas octingenta talenta philosophum accepisse. Adeo autem cognitionem illam dilexit, ut in eam sumtum faceret, curamque impenderet, cuius fructum visurus non erat. Post centum annos capti sunt cervi cum torquibus aureis, quos addiderat, ut vel posterii cognoscerent, quanta fides habenda foret iis, quae de istorum animalium longaevitae ferebantur. Sublimioribus quoque disciplinis, quas *acroamaticas* appellant, eruditum fuisse, ipsius testatur epistola, qua queritur, Aristotelem dignitatem earum evulgatis praeceptis profanasse. Et ille excusavit, rescribens, ita libros illos esse editos, ut haberi possint pro ineditis: nec enim quemquam sententiam ipsorum magnopere percepturum esse, nisi quae iis continerentur, iam antea didicisset. Idem, cum *Rhetorica* ab eo exigeret, sollicitate vetuit, ne aliorum etiam in manus pervenire pateretur. Neque enim minus honestis artibus, quam potentia, ceteros praestare cupiebat: indignabaturque, communicari laudem illam cum humillimis. Medicinae quoque studio imbutum ab Aristotele, filio medici, ex gente *Asclepiadarum*, fidem ipsius epistolae faciunt. Eam autem philosophiae partem, quae sibi aliisque probe imperare docet, ita coluit, ut magnanimitate, prudentia, temperantia, fortitudine, quam armis et opibus instructor, tantam imperii Persici mo-

lem subruere aggressus censeatur. Ipse quidem praedicavit, *non minus se debere Aristoteli, quam Philippo: huius enim munus fuisse, quod viveret; illius, quod honeste viveret.* Ingenium tamen ardens ambitione, nimia honoris gloriaeque praedicatione, quam inter genera honorum referendam esse Aristoteles sciverat, elatum fuisse, ut non modo imperii prorogandi gratia bella ex bellis sereret, verum etiam Deus haberi vellet, quidam non immerito credidere. Ceterum, non solum imperante Alexandro, eximio honore maximisque muneribus affectus est Aristoteles; sed et vivo adhuc Philippo ingens institutionis suae pretium tulerat, impetrato, ut in ipsius gratiam patria instauraretur. Olynthios Philippus acerrimos hostes expertus fuerat: nam vicini Macedoniae, et potentia hactenus haud impares, aegerrime tulerant, sub rege bellicoso vastoque regni opes crescere, accolis perniciem aut servitium allaturas. Ergo quo infensioribus inimicis certatum est, eo asperior victoria fuit. Urbem captam direptamque solo aequavit Philippus: cives veniere. In reliqua etiam ditionis eorum oppida saevitum est. Inter quae Stagiram, unde Aristoteles genus ducebat, par calamitas obruerat. Eam tum regia permissu atque opibus ex integro condidit; restitutaque leges tulit, quibus postmodum usa est. Ita quam tantem florentemque tot fortium virorum manus ab excidio prohibere non potuerant, eam incensam atque dirutam unius civis excitavit ingenium. Quanti autem Aristotelem fecerit Philippus, hinc etiam aestimari potest, quod saepe filium monuit, ut sub tam idoneo magistro sapientiae gravam operam daret, ne mox multa committeret, qualium causa ipse pudore et poenitentia angeretur. Igitur postea quoque maximis reus intentus Alexander, non omisit magistrum venerari; crebroque per literas compellavit hominem, non disciplinarum modo arcana, sed et morum remedia

post mortem  
ret. Quo t  
tradi pot  
tanto a  
rium  
post  
Ar

scripsit, quibus ipsius atque sub  
sultum opinabatur, meminisset  
essam esse potentiam, ut prode  
non ut eos laederet: irae quoque  
praecepitem noverat, modum pone  
enim irascendum inferioribus: para  
post esse neminem. Ad postremum tam  
iam elatior spernere eum coepit: praesertim  
ob Callisthenis exitum infestum sibi, et praec  
sapientiae praeccepta, etiam vindictae causa, ambitio  
nem humanum fastigium despicientis, disputationibus  
exagitare crederet. Certe paullo ante mortem, Cas  
sandro obiecta patri suo crimina purgante, exclamasse  
fertur, *Aristotelicae versutiae machinationibus in  
structum venisse, ut iustas aliorum querelas fal  
lacibus argutiis eluderet: deinde utriusque, si vera  
quae deferrentur comperisset, malum minatum esse,*  
tam vehementi vultu, ut diu post eius interitum, cum  
forte Cassander, tum rerum in Graecia potens, ima  
ginem Alexandri Delphis positam intueretur, revocatus  
in periculi sui memoriam, toto corpore cohorrerit.  
Quae res Aristoteli etiam magnae infamiae occasio  
fuit: quippe venenum, quo Alexander periisse creditus  
est, non alterius ingenio equinae unguulae inditum, et  
Babylonem deportatum, rumor suspicatus est. Ada  
mavit et musicam, eique seriam initio operam dedit:  
donec contumeliosa interrogatione patris, *ecquid pe  
deret tam scite canere?* velut artem suae maiestati  
indecoram, negligentius tractare coepit. Quo quidem  
tempore magistro chordam quandam ex artis praes  
cripto pulsare iubenti, *quid autem referat,* inquit,  
*si hanc pulsavero!* in aliam intendens digitum. At  
ille, *nihil referre futuri regis, futuri autem citha  
roedi referre,* respondit. Delectatus deinceps est  
masculo cantu, cum mollos fractasque modulationes  
ut perniciosam morum aversaretur. Quo nomine ma

time amplexus est Timotheum, artis eius professionem celebrem. Ille enim, accommodata ad ingenium illius ingenia, modo, quem *Phrygium* appellant, ita aliando eum rapuit, ut tanquam divino instinctu exarsceret animo, et, velut propinquo iam hoste, ad arma capienda prosiliret. Eloquentiae etiam sub Anaximene Lampsaceno studuit: quae res postmodum incolumitatem urbi attulit, cum Persarum opibus studentem Alexander diruere constituisset. Conspicatus enim Anaximenem extra moenia prodeuntem, nec dubitans, quin pro patria deprecatum venisset, *Graecorum Deos* testatus est, *non facturum se, quod petisset*. Quo audito callidus ille rogavit, *ut Lampsacum dirueret*. Ille, et iurisiurandi religione adstrictus, et magis etiam praeceptoris olim sui sagacitate delinitus, gratiam delictorum Lampsacenis fecit. Comoedos, ut instituto suo parum congruentia tractantes, corrumpendisque moribus natos, contempsit. Neglexit et pugiles, quamquam maximi tum in Graecia fierent: forte quod otiosos et saginae addictos, valida membra spectaculorum potius ludibriis, quam patriae necessitatibus commodare, non probabat. Reliquas artes, etiam quas ipse non attigerat, impense fovit. Unde ex toto fere orbe passim ad ipsum confluebant, quicumque insigni aliqua peritia praecellere sibi videbantur: eique vel ingenii sui monumenta dedicabant, vel exhibitio artis suae specimine; a munificentissimo regum, et cuius animo fortuna responderet, immensas plerumque divitias consequentur. Etiam quos procul positos praeclara eruditio aut virtus commendabat, iis ingenia munera ultro largiri consueverat. Igitur tantus ea tempestate doctorum atque sollertium hominum proventus fuit, ut vix ulla aetas bonis artibus copiosior existerit. Solent enim ingenia moresque componi ad principum mentem; omnisque fere temporum inclinatio regnantium infamia, vel decus est.

CAP. IV. Ex veterum monumentis nihil antehabuit Homero, quem unum omnem sapientiam, qua imperis constant, optime complexum esse autumabat: adeoque eum cordi habuit, ut Graeco cognomento *amator Homeri* diceretur. Libros eius semper secum ferre solitus, etiam cum quiesceret, una cum pugione sub cervicali reponebat; *militiae suae viaticum*, et *institutionem bellicae virtutis* appellans. *Achillem* praedicabat *felicem*, quod tantum virtutis suae praecognitionem invenisset. Reperto inter Damascenam praedam materiae curaeque exquisitissimae scrinio, et disquirentibus amicis, *cuinam usui convenientissime destinaretur?* ipse, Homero, inquit, *dedicabimus*, ut *pretiosissimum humani ingenii monumentum elegantissimo etiam opere servetur*. Inde obtinuit, ut emendatissima poetae editio, quam magna cura comparaverat Alexander, *e narthecio* vocaretur: quippe scrinium illud, cum adhuc Persarum esset, unguentis et odoribus asservandis serviverat. Quidam prospere gestae rei nuntius, cum citato cursu ad eum ferretur, dextramque porrigeret, vultu maximae laetitiae notas praeferente, *Quid mihi nuntiaturus es tanto gaudio dignum*, inquit, *nisi forsitan Homerus revixit!* Sed tum eo iam felicitatis pervenerat, ut propemodum exsatiatae gloriae nihil deesse putaret, praeter idoneum buccinatorem. Crebra autem lectione totum fere edidicit, ut nemo neque promptius eo familiariusque uteretur, neque exactius de eo iudicaret. Ex omnibus autem eius carminibus maxime probabat versum, quo boni simul imperatoris, robustique militis laudes Agamemnoni tribuuntur; eumque praecipuum virtutis incitamentum, et veluti morum suorum magistrum habuit. His itaque disciplinis imbutus, summae fortunae vim atque dignitatem egregie tutatus est: superbia et licentia, qua quidam sola principes agunt, abstinnit. Cultu curaque corporis haud inultum supra privati

nodum eminens, virtute potius, quam vestium ornatu, nteire suos imperatorium censebat: hilaris, humanus, stabilis; ut tamen contemptum excluderet: vino deditus, sed citra ebrietatem. Nam si otium nactus esset, ermonibus magis, quam comotatione, tempus exrahebat. Voluptates ita contempsit, ut matri curam nuiceret, ne plane ad generandum inhabilis esset. Ilud imprimis religiose tenuit, ne cuius thorum violaret. Quibus vitae morumque institutis diu inhaesit, mannumque et memorabilem regem egit: donec impetu quodam, et velut torrente fortunae convulsus et mutatus, pristinam animi moderationem paullatim exueret. Animi robur cum insigni dexteritate, magna patris et aliorum admiratione, ostendit in equo Bucephala: nam id nomen bubuli capitis figura insignitus acceperat. Plurimum tum equestri laude pollebat Thessalia, nobiliumque equorum greges multis locis alebantur. Eminebat tamen inter omnes viribus et specie Bucephalas, quem Philonicus, ex Pharsalia oriundus, maximo in illis regionibus principe dignum existimans, ad Philippum adduxerat, sedecim talentis venalem. Cum autem velocitatem equi obsequiumque experturi in campum descendissent, nemo amicorum satellitumque regis tractare eum potuit: quin insurgebat in omnes, et conscendere conatos ferocia exterrebat. Iamque pro indomito, et ob feritatem inutili, relinquebatur; cum suspirans Alexander, *Qualem isti equum perdunt, per mollitiem animi, et tractandi imperitiam!* Quo saepius repetito, a patre increpitus, *quod ob negotium, quod emendare non posset, maiores peritioresque conviciis incesset; Ego vero, inquit, emendabo, pater, si permiseris.* Atque illo subiiciente, *frustratus autem quam poenam pendes? Equi, inquit, pretium luam;* exortoque omnium risu, convenit, *ut victor equum patre emente haberet, victus amitteret pecuniam.* Tum Alexander, comprehensis equi habo-



nis, eum ita statuit, ut in adversos solis radios conversus, umbram suam conspiciere non possét: ea enim antea exterritum acrius ferocissime observaverat: cumque nihilominus aestuaret, iubam demulcens, dimissaque sensim chlamyde, in saevientem adhuc insilit. Ille parendi insolens cervicem et calces iactare, multaque pervicacia contra frenum niti; denique proripere se conari, et ingenti violentia cursum moliri. *Spatiosa* et equitabilis planities suberat: ergo ferocientem exsultantemque effusis in collum habenis, adactisque calcaneis cum ingenti clamore in cursum permittit. Iugens deinde campi spatium evectus, iam lassatum et consistere volentem impellere non antea destitit, quam exhaustum cursu, et labore domitum mansuetiorem iam mitioremque reduxisset. Descendentem manantibus gaudio lacrimis complexus est pater; osculoque capiti impresso, *maius imperium sibi circumspicere iussit, nec enim Macedoniae regnum tantam indolem capere*. Post haec Bucephalas, cum in ceteros ferociam suam retineret, uni Alexandro mira submissione paruit, multorumque mox laborum atque discriminum socius, in proelio adversus Porum periit. Dignum id argumentum visum est, quo illustrarent opera sua nobilissimi artifices. Duas ex marmore statuas equum domantis ostentant, Praxitelis et Phidiae certamen. Alexandri eas imagines esse, quamvis ambigi possit, auctores haud obscuri crediderunt.

CAP. V. His atque talibus ingenii animique experimentis eam apud Philippum existimationem nactus est, ut, cum ipse Byzantinos obsidione urgeret, idoneum iam crediderit filium, cui libera cum potestate Macedoniae curam committeret, annos omnino sedecim habentem. Quo comperto, Medarorum quidam, Thracia natio, Macedoniae subiecta, opportunum defectioni, quam dudum agitabant, tempus advenisse

rati, consilia nudavere. Sed adolescens, ostentandae virtutis occasione laetus, cum ducibus a patre relictis prope in eos movit: victisque et eiectis, rebellibus, urbem eorum varii generis convenis habitandam dedit. Illi Alexandropolim ex nomine auctoris sui appellavere. Philippus, eventu rei gaudens, ceterum sollicitus, ne suo arbitrio permissus adolescentis animus, maiora viribus cum exitio capesseret, evocavit eum, ut se magistro ardorem prudentia temperare disceret: et in subigendis Chersonesi oppidis, strenua promptaque opera eius usus est. Ceterum cum ad Byzantium, validam urbem, haereret obsidio, civibus egregie pro libertate pugnantibus; *iisque Graeci barbarique, quibus incrementa Philippi suspecta erant, certatim auxilio venturi* nuntiarentur: desperata victoria, id unum agitabat, quam ratione quam minimo copiarum atque famae damno ab obsidione discederet. Imperabat eo tempore Getis, Scythico populo, Atheas: qui armis Istriarum pressus, auxilium a Philippo petiverat, spe adoptionis facta, si fessis Getarum rebus succurreret. Idem, cum hostium imperator decessisset, belli metu liberatus, Macedonas vacuos remiserat, negans, *vel ipsorum auxilio, vel adoptione Philippi eguisse; cui adversus hostes satis propriarum virium, et in successionem regni filius esset.* Eam barbari contumeliam ulturum ferens Philippus, omisso Byzantio in Scythiam convertit agmen. Ubi conserto proelio, cum numero superiores Scythae essent, nec virtutis poeniteret, arte Philippi Macedonibus victoria cessit. Cuius omne pretium pecorum equorumque maximi greges, et infirmioris aetatis sexusque captivi fuere: ceterae praedae nihil exceptum est. Quippe opibus minime studebant Getae, sed quotidiano victu contenti, paupertatem inter vitae comoda numerabant. Ceterum cum ex Scythia regrediens, longo impedimentorum agmine, per Triballos iter faceret, illi

opportunitis locis occupatis transitum negabant, nis praedae partem accepturi. Erant in exercitu Philippi mercenarii Graecorum milites, qui et ipsi, cum in discriminis partem venissent, commodorum exsortes haberi moleste ferebant. Inde orta seditione ad manus ventum est, tam acri certamine, ut multis utrinque cadentibus etiam rex sauciaretur, transosso femore, eodemque vulnere interfecto equo: *tanta vis adacti teli, tantaque virtus inferentis ictum fuit. Ibi tum ante omnes prosiluit Alexander, iacentemque clypeo protegens, irruentium in eum alios occidit, alios avertit in fugam. Ita filii pietate servatus est, abscedentibus qui oppressuri fuerant, eo promptius, quod interfectum crediderant: sic ipsi vulneris atrocitati vitam debuisse visus, mortis opinione mortem effugit. Praeda inter consternationem amissa est. Ceterum ex vulnere claudicare coactus, cum initio eam corporis deformationem aegro animo ferret, memorabili ad posteritatem adolescentis voce monitus est, *non irasci vulnere, cuius opera ad singulos gressus suae virtutis admoneretur.* Satis iam gloriae potentiaeque Philippo quaesitum erat, satis etiam periculorum atque vulnorum pertulerat, si quietem pati posset animus ambitione vecors. Tributarios Illyriorum Macedonas, omnium non vicinorum modo, sed etiam longe dissitorum dominos effecerat: Triballos subegerat: Thraciam habebat in potestate: multis Graecorum populis imperabat; alios metu, aut largitionibus tenebat obnoxios. Thessalos Daochus, Cineas, Thrasydaeus, cum Endico et Simo Larissaeis; Arcades Cercidas, Hieronymus, Eucalpidas; Argivos Myrtis, Teledamnus Mnaeas; Eleos Euxitheus, Cleotimus, Aristaechnus, regio iugo subdiderant: Messenios Philiadae liberi, Neon et Thrasylochus; Sicyonios Aristratus et Demaratus; Megarenses Ptoeodorus, Helixus, Perilaus; Euboenses Hipparchus, Clitarchus, et Sosistratus, suae*

quique civitatis principes, conciliabant: Olynthum Euhyrates et Lasthenes prodiderant. Una Spartanorum civitas veteris disciplinae egregiae tenax, et proditionis immunis fuit. Sed cum imperio totius Graeciae immineret, Atheniensium maxime opes morari destinata cernebat. Nec deerant in civitate, qui res ad ipsum traherent: sed populus, qui omnia poterat, impellente Demosthene contra Macedonum opes nitebatur; crebrisque, ut inter potentes vicinos, contentionibus, ingenium Philippi callidum, audax, et ob dominationem ideae famaeque negligens cognoverat. Maxime urebat regem recens dolor, quod ad Byzantium, Atheniensium opera, spe sua excidisset: qui non modo centum et viginti navium classem obsessis auxilio miserant, sed et Chiiis Rhodiisque eadem audendi auctores fuerant. Igitur dum percuratur vulnus in Triballis acceptum, omnia occulte praeparabat, quo Athenienses improvisus opprimeret. Exercitum retinenti obtentus erant Illyriorum nationes, quae ingenio feroces, et servitutis insuetae, impositum nuper iugum excutere tentabant. In eos Alexander missus, barbaris fuis fugatisque, eam de fortuna atque virtute sua spem et reliquis fecit, et ipse concepit, ut iam sine patre rebus gerundis se parem existimaret. Haec per biennium gesta. Philippus autem, praeparatis omnibus, quae olim destinaverat exsequi maturum ratus, exoptatissima occasione oblata, ante initium veris cum exercitu in Graeciam venit, convocatis etiam ex Peloponneso copiis sociorum. Quippe Amphictyonum decreto creatus erat imperator Graecorum, ut insolentiam Locrorum, qui Amphissam incolunt, castigaret: namque Eyrhaecum agrum Apollini dicatum, Amphictyonum auctoritate contempta, colere perseverabant, ducemque ab his creatum, interemtis quibusdam, vulneraverant. Erat tum Philippo foedus cum Atheniensibus; sed parum in eo praesidii futurum arbitrabantur, si regi

post mortem patris rerum potitus, in Asiam transiiret. Quo temporis spatio, quidquid a tanto praeceptore tradi potuit, perdidit. Cognoscendae rerum naturae tanto avidius incubuit, quanto pertinaciore spe imperium universi orbis praeceperat. Cuius indagacionem postea quoque adiuvit, plane regio et animo, et sumtu. Aristoteli, quo naturas animalium certius atque perspectius commentari posset, tota Asia Graeciaeque parere iussit, quotquot venatu, aucupio, piscatve vitam tolerabant, aut aliquam in eiusmodi negotiis peritiam assecuti fuerant. Constat, in eius operis impensas octingenta talenta philosophum accepisse. Adeo autem cognitionem illam dilexit, ut in eam sumtum faceret, curamque impenderet, cuius fructum visurus non erat. Post centum annos capti sunt cervi cum torquibus aureis, quos addiderat, ut vel posteri cognoscerent, quanta fides habenda foret iis, quae de istorum animalium longaevitae ferebantur. Sublimioribus quoque disciplinis, quas *acroamaticas* appellant, eruditum fuisse, ipsius testatur epistola, qua queritur, Aristotelem *dignitatem earum evulgatis praeceptis profanasse*. Et ille excusavit, rescribens, ita libros illos esse editos, ut haberi possint pro ineditis: nec enim quemquam sententiam ipsorum magnopere percepturum esse, nisi quae iis continerentur, iam antea didicisset. Idem, cum Rhetorica ab eo exigeret, sollicitate vetuit, ne aliorum etiam in inanus pervenire pateretur. Neque enim minus honestis artibus, quam potentia, ceteros praestare cupiebat: indignabaturque, communicari laudem illam cum humillimis. Medicinae quoque studio imbutum ab Aristotele, filio medici, ex gente Asclepiadarum, fidem ipsius epistolae faciunt. Nam autem philosophiae partem, quae sibi aliisque probe imperare docet, ita coluit, ut magnanimitate, prudentia, temperantia, fortitudine, quam armis et opibus instructior, tantam imperii Persici mo-

subnuere aggressus censeatur. Ipse quidem prae-  
 vixit, *non minus se debere Aristoteli, quam Phi-*  
*lippo: huius enim munus fuisse, quod viveret; il-*  
*lis, quod honeste viveret.* Ingenium tamen ardens  
 ambitione, nimia honoris gloriaeque praedicatione,  
 iam inter genera bonorum referendam esse Aristo-  
 tes sciverat, elatum fuisse, ut non modo imperii pro-  
 andi gratia bella ex bellis sereret, verum etiam  
 ut fieri vellet, quidam non immerito credidere.  
 Verum, non solum imperante Alexandro, eximia  
 munere maximisque muneribus affectus est Aristoteles;  
 et vivo adhuc Philippo ingens institutionis suae  
 pretium tulerat, impetrato, ut in ipsius gratiam patria  
 restitueretur. Olynthios Philippus acerrimos hostes  
 perturbatus fuerat: nam vicini Macedoniae, et potentia  
 aequo haud impares, aegerrime tulerant, sub rege  
 illicoso vasroque regni opes crescere, accolis perniti-  
 m aut servitium allaturas. Ergo quo infensioribus  
 armis certatum est, eo asperior victoria fuit. Urbem  
 totam direptamque solo aequavit Philippus: cives  
 perire. In reliqua etiam ditionis eorum oppida saepe  
 peritum est. Inter quae Stagiram, unde Aristoteles ge-  
 nus ducebat, par calamitas obruerat. Eam tum regia  
 remissa atque opibus ex integro condidit; restituta  
 et leges tulit, quibus postmodum usa est. Ita quam  
 vitam florentemque tot fortium virorum manus ab  
 sidio prohibere non potuerant, eam incensam atque  
 peritum unius civis excitavit ingenium. Quanti autem  
 Aristotelem fecerit Philippus, hinc etiam aestimari  
 potest, quod saepe filium monuit, ut sub tam idoneo  
 magistro sapientiae gravam operam daret, ne mox  
 culpa committeret, qualium causa ipse pudore et poe-  
 nitentia angeretur. Igitur postea quoque maximis re-  
 bus intentus Alexander, non omisit magistrum vene-  
 ri; crebroque per literas compellavit hominem, nec  
 disciplinarum modo arcana, sed et morum remedia

petiit. Atque ille rescripsit, quibus ipsius atque subditorum felicitati consultum opinabatur, *meminisset tantam ipsi concessam esse potentiam, ut prodesset hominibus, non ut eos laederet: irae quoque, in quam maxime praecipitem noverat, modum poneret; neque enim irascendum inferioribus: parem autem ipsi esse neminem.* Ad postremum tamen animo iam elatior spernere eum coepit: praesertim cum ob Callisthenis exitum infestum sibi, et practe sapientiae praecepta, etiam vindictae causa, ambitionem humanum fastigium despicientis, disputationibus exagitare crederet. Certe paullo ante mortem, Cassandro obiecta patri suo crimina purgante, exclamasse fertur, *Aristotelicae versutiae machinationibus instructum venisse, ut iustas aliorum querelas fallacibus argutiis eluderet: deinde utrique, si vera quae deferrentur comperisset, malum minatum esse, tam vehementi vultu, ut diu post eius interitum, cum forte Cassander, tum rerum in Graecia potens, imaginem Alexandri Delphis positam intueretur, revocatus in periculi sui memoriam, toto corpore cohorrerit.* Quae res Aristoteli etiam magnae infamiae occasio fuit: quippe venenum, quo Alexander periisse creditus est, non alterius ingenio equinae ungulae inditum, et Babylonem deportatum, rumor suspicatus est. Adamavit et musicam, eique seriam initio operam dedit: donec contumeliosa interrogatione patris, *ecquid puderet tam scite canere?* velut artem suae maiestati indecoram, negligentius tractare coepit. Quo quidem tempore magistro chordam quandam ex artis praescripto pulsare iubenti, *quid autem referat,* inquit, *si hanc pulsavero!* in aliam intendens digitum. At ille, *nihil referre futuri regis, futuri autem citharoedi referre,* respondit. Delectatus deinceps est masculo cantu, cum mollos fractasque modulationes ut perniciosam morum aversaretur. Quo nomine ma-

ne amplexus est Timotheum, artis eius professionem lebrem. Ille enim, accommodata ad ingenium illius ientia, modo, quem *Phrygium* appellant, ita alitando eum rapuit, ut tanquam divino instinctu exarsceret animo, et, velut propinquo iam hoste, ad arma capienda prosiliret. Eloquentiae etiam sub Anaximene Lampsaceno studuit: quae res postmodum in obumbratam urbi attulit, cum Persarum opibus studentem Alexander diruere constituisset. Conspicatus enim Anaximenem extra moenia prodeuntem, nec ubitans, quin pro patria deprecatum venisset, *Graecorum Deos testatus est, non facturum se, quod peccasset.* Quo audito callidus ille rogavit, *ut Lampsacum dirueret.* Ille, et iurisiurandi religione adstrictus, et magis etiam praeceptoris olim sui sagacitate deliniquus, gratiam delictorum Lampsacensis fecit. Comoedos, et instituto suo parum congruentia tractantes, contempnendisque moribus natos, contempsit. Neglexit et iugiles, quamaquam maximi tum in Graecia fierent: arte quod otiosos et saginae addictos, valida membra spectaculorum potius ludibriis, quam patriae necessitatibus commodare, non probabat. Reliquas artes, etiam quas ipse non attigerat, impense fovit. Unde ex toto fere orbe passim ad ipsum confluebant, quicumque insigni aliqua peritia praecellere sibi videbantur: eique vel ingenii sui monumenta dedicabant, vel exhibitio artis suae specimine, a munificentissimo regum, et cuius animo fortuna responderet, immensas plerumque divitias consequabantur. Etiam quos procul positos praecleara eruditio aut virtus commendabat, iis ingentia munera ultro largiri consueverat. Igitur tantus ea tempestate doctorum atque sollertium hominum proventus fuit, ut vix ulla aetas bonis artibus copiosior exstiterit. Solent enim ingenia moresque componi ad principum mentem; omnisque fere temporum inclinatio regnantium infamia, vel decus est.



CAP. IV. Ex veterum monumentis nihil antehabuit Homero, quem unum omnem sapientiam, qua imperia constant, optime complexum esse autinabat: adeoque eum cordi habuit, ut Graeco cognomento *amator Homeri* diceretur. Libros eius semper secum ferre solitus, etiam cum quiesceret, una cum pugione sub cervicali reponebat; *militiae suae viaticum, et institutionem bellicae virtutis* appellans. *Achillem praedicabat felicem, quod tantum virtutis suae praecognem* invenisset. Reperto inter *Damascenam praedam* materiae curaeque exquisitissimae scrinio, et disquirentibus amicis, *cuinam usui convenientissime destinaretur?* ipse, *Homero*, inquit, *dedicabimus, ut pretiosissimum humani ingenii monumentum elegantissimo etiam opere servetur.* Inde obtinuit, ut emendatissima poëtae editio, quam magna cura comparaverat Alexander, *e narthecio* vocaretur: quippe scrinium illud, cum adhuc Persarum esset, unguentis et odoribus asservandis serviverat. Quidam prospere gestae rei nuntius, cum citato cursu ad eum ferretur, dextramque porrigeret, vultu maximae laetitiae notas praeferente, *Quid mihi nuntiaturus es tanto gaudio dignum,* inquit, *nisi forsitan Homerus revixit!* Sed tum eo iam felicitatis pervenerat, ut propemodum exsatiatae gloriae nihil deesse putaret, praeter idoneum buccinatorem. Crebra autem lectione totum fere edidit, ut nemo neque promptius eo familiariusque uteretur, neque exactius de eo iudicaret. Ex omnibus autem eius carminibus maxime probabat versum, quo boni simul imperatoris, robustique militis laudes Agamemnoni tribuuntur; eumque praecipuum virtutis incitamentum, et veluti morum suorum magistrum habuit. His itaque disciplinis imbutus, summae fortunae vim atque dignitatem egregie tutatus est: superbia et licentia, qua quidam sola principes agunt, abstinnit. Cultu curaque corporis haud inultum supra privati

modum eminens, virtute potius, quam vestium ornatu, anteire suos imperatorium censebat: hilaris, humanus, affabilis; ut tamen contemptum excluderet: vino deditus, sed citra ebrietatem. Nam si otium nactus esset, sermonibus magis, quam comotatione, tempus extrahebat. Voluptates ita contempsit, ut matri curam iniiceret, ne plane ad generandum inhabilis esset. Illud imprimis religiose tenuit, ne cuius thorum violaret. Quibus vitae morumque institutis diu inhaesit, magnamque et memorabilem regem egit: donec impetu quodam, et velut torrente fortunae convulsus et mutatus, pristinam animi moderationem paullatim exueret. Animi robur cum insigni dexteritate, magna patris et aliorum admiratione, ostendit in equo Bucephala: nam id nomen bubuli capitis figura insignitus acceperat. Plurimum tum equestri laude pollebat Thessalia, nobiliumque equorum greges multis locis alebantur. Eminebat tamen inter omnes viribus et specie Bucephalas, quem Philonicus, ex Pharsalia oriundus, maximo in illis regionibus principe dignum existimans, ad Philippum adduxerat, sedecim talentis venalem. Cum autem velocitatem equi obsequiumque experturi in campum descendissent, nemo amicorum satellitumque regis tractare eum potuit: quin insurgebat in omnes, et conscendere conatos ferocia exterrebat. Iamque pro indomito, et ob feritatem inutili, relinquebatur; cum suspirans Alexander, *Qualem isti equum perdunt, per mollitiem animi, et tractandi imperitiam!* Quo saepius repetito, a patre increpitus, *quod ob negotium, quod emendare non posset, maiores peritioresque conviciis incesseret; Ego vero, inquit, emendabo, pater, si permiseris.* Atque illo subiiciente, *frustratus autem quam poenam pendes? Equi, inquit, pretium luam;* exortoque omnium risu, convenit, *ut victor equum patre emente haberet, victus amitteret pecuniam.* Tum Alexander, comprehensis equi habo-

nis, eum ita statuit, ut in adversos solis radios conversus, umbram suam conspicere non posset: ea enim antea exterritum acrius ferocisse observaverat: cumque nihilominus aestuaret, iuham demulcens, dimissaque sensim chlamyde, in saevientem adhuc insilit. Ille parendi insolens cervicem et calces iactare, multaque pervicacia contra frenum niti; denique proripere se conari, et ingenti violentia cursum moliri. *Spatiosa* et equitabilis planities suberat: ergo *ferocientem exsultantemque effusis in collum habenis, adactisque calcancis cum ingenti clamore in cursum permittit.* Ingens deinde campi spatium evectus, iam lassatum et consistere volentem impellere non antea destitit, quam exhaustum cursu, et labore domitum mansuetiorem iam mitioremque reduxisset. Descendentem manantibus gaudio lacrimis complexus est pater; osculoque capiti impresso, *maius imperium sibi circumspicere iussit, nec enim Macedoniae regnum tantam indolem capere.* Post haec Bucephalas, cum in ceteros ferociam suam retineret, uni Alexandro mira submissione paruit, multorumque mox laborum atque discriminum socius, in proelio adversus Porum periiit. Dignum id argumentum visum est, quo illustrarent opera sua nobilissimi artifices. Duas ex marmore statuas equum domantis ostentant, Praxitelis et Phidiae certamen. Alexandri eas imagines esse, quamvis ambigi possit, auctores haud obscuri crediderunt.

CAP. V. His atque talibus ingenii animique experimentis eam apud Philippum existimationem nactus est, ut, cum ipse Byzantinos obsidione urgeret, idoneum iam crediderit filium, cui libera cum potestate Macedoniae curam committeret, annos omnino sedecim habentem. Quo comperto, Medarorum quidam, Thracia natio, Macedoniae subiecta, opportunum defectioni, quam dudum agitabant, tempus advenisse

rati, consilia nudavere. Sed adolescens, ostentandae virtutis occasione laetus, cum ducibus a patre relictis prope in eos movit: victisque et eiectis, rebellibus, urbem eorum varii generis convenis habitandam dedit. Illi Alexandropolim ex nomine auctoris sui appellavere. Philippus, eventu rei gaudens, ceterum sollicitus, ne suo arbitrio permissus adolescentis animus, maiora viribus cum exitio capesseret, evocavit eum, ut se magistro ardorem prudentia temperare disceret: et in subigendis Chersonesi oppidis, strenua promptaque opera eius usus est. Ceterum cum ad Byzantium, validam urbem, haereret obsidio, civibus egregie pro libertate pugnantibus; *iisque Graeci barbarique, quibus incrementa Philippi suspecta erant, certatim auxilio venturi nuntiarentur*: desperata victoria, id unum agitabat, quam ratione quam minimo copiarum atque famae damno ab obsidione discederet. Imperabat eo tempore Getis, Scythico populo, Atheas: qui armis Istriarum pressus, auxilium a Philippo petiverat, spe adoptionis facta, si *sessis* Getarum rebus succurreret. Idem, cum hostium imperator decessisset, belli metu liberatus, Macedonas vacuos remisit, negans, *vel ipsorum auxilio, vel adoptione Philippi eguisse; cui adversus hostes satis propriarum virium, et in successionem regni filius esset*. Eam barbari contumeliam ulturum ferens Philippus, omisso Byzantio in Scythiam convertit agmen. Ubi conserto proelio, cum numero superiores Scythae essent, nec virtutis poeniteret, arte Philippi Macedonibus victoria cessit. Cuius omne pretium pecorum equorumque maximi greges, et infirmioris aetatis sexusque captivi fuere: ceterae praedae nihil exceptum est. Quippe opibus minime studebant Getae, sed quotidiano victu contenti, paupertatem inter vitae commoda numerabant. Ceterum cum ex Scythia regrediens, longo impedimentorum agmine, per Triballos iter faceret, illi

opportunitis locis occupatis transitum negabant, nis praedae partem accepturi. Erant in exercitu Philippi mercenarii Graecorum milites, qui et ipsi, cum in discriminis partem venissent, commodorum exsortes haberi moleste ferebant. Inde orta seditione ad manus ventum est, tam acri certamine, ut multis utrinque cadentibus etiam rex sauciaretur, transosso femore, eodemque vulnere interfecto equo: *tanta vis adacti teli, tantaque virtus inferentis ictum fuit. Ibi tum ante omnes prosiluit Alexander, iacentemque clypeo protegens, irruentium in eum alios occidit, alios avertit in fugam.* Ita filii pietate servatus est, abscedentibus qui oppressuri fuerant, eo promptius, quod interfectum crediderant: sic ipsi vulneris atrocitati vitam debuisse visus, mortis opinione mortem effugit. Praeda inter consternationem amissa est. Ceterum ex vulnere claudicare coactus, cum initio eam corporis deformationem aegro animo ferret, memorabili ad posteritatem adolescentis voce monitus est, *non irasci vulnere, cuius opera ad singulos gressus suae virtutis admoneretur.* Satis iam gloriae potentiaeque Philippo quaesitum erat, satis etiam periculorum atque vulnorum pertulerat, si quietem pati posset animus ambitione vecors. Tributarios Illyriorum Macedonas, omnium non vicinorum modo, sed etiam longe dissitorum dominos effecerat: Triballos subegerat: Thraciam habebat in potestate: multis Graecorum populi imperabat; alios metu, aut largitionibus tenebat obnoxios. Thessalos Daochus, Cineas, Thrasydacus, cum Eudico et Simo Larissaeis; Arcades Cercidas, Hieronymus, Eucalpidas; Argivi Myrtis, Teledamns Mnaseas; Eleos Euxitheus, Cleotimus, Aristaechnus, regio iugo subdiderant: Messenios Philiadae liberi, Neon et Thrasylachus; Sicyonios Aristratus et Demaratus; Megarenses Ptoeodorus, Helixus, Perilaus; Euboenses Hipparchus, Clitarchus, et Sosistratus, suae

quique civitatis principes, conciliabant: Olynthum Euhycrates et Lasthenes prodiderant. Una Spartanorum civitas veteris disciplinae egregiae tenax, et proditionis immunis fuit. Sed cum imperio totius Graeciae immineret, Atheniensium maxime opes morari destinata cernebat. Nec deerant in civitate, qui res ad ipsum traherent: sed populus, qui omnia poterat, impellente Demosthene contra Macedonum opes nitebatur; crebrisque, ut inter potentes vicinos, contentionibus, ingenium Philippi callidum, audax, et ob dominationem fidei famaеque negligens cognoverat. Maxime urebat regem recens dolor, quod ad Byzantium, Atheniensium opera, spe sua excidisset: qui non modo centum et viginti navium classem obsessis auxilio miserant, sed et Chiis Rhodiisque eadem audendi auctores fuerant. Igitur dum percuratur vulnus in Triballis acceptum, omnia occulte praeparabat, quo Athenienses improvisus opprimeret. Exercitum retinenti obtentum erant Illyriorum nationes, quae ingenio feroces, et servitutis insuetae, impositum nuper iugum excutere tentabant. In eos Alexander missus, barbaris fuis fugatisque, eam de fortuna atque virtute sua spem et reliquis fecit, et ipse concepit, ut iam sine patre rebus gerundis se parem existimaret. Haec per biennium gesta. Philippus autem, praeparatis omnibus, quae olim destinaverat exsequi maturum ratus, exoptatissima occasione oblata, ante initium veris cum exercitu in Graeciam venit, convocatis etiam ex Peloponneso copiis sociorum. Quippe Amphictyonum decreto creatus erat imperator Graecorum, ut insolentiam Locrorum, qui Amphissam incolunt, castigaret: namque Cynrhaeum agrum Apollini dicatum, Amphictyonum auctoritate contemta, colere perseverabant, ducemque ab his creatum, interemis quibusdam, vulneraverant. Erat tum Philippo foedus cum Atheniensibus; sed parum in eo praesidii futurum arbitrabantur, si regi

violandae fidei merces affulsisset. Igitur legatos a ipsum mittunt, petituos, *ut pactis staret; aut certe ante ver adultum nihil hostile moliretur: deliberaturum interea populum Atheniensem, qua ratione controversiae, quae inciderant, componi possent.* Thebas quoque legationem decernunt, quae exposito communi periculo, hortaretur, *ut simul cum ipsa tutelam Graeciae susciperent.* Sed Philippus per hospites et amicos, quorum Timolauus, Theogitonque et Anemoetas plurimum apud cives suos poterant, Thebanos in amicitia Macedonum continuit. Ratusque, si cum solis Atheniensibus futura res esset, facile se superiorem fore, victis ad Amphissam Locris eorumque sociis; in Phocidem raptim ducto agmine, Elateam, sinibus Thebanorum simul Atheniensiumque imminentem, occupat, impositoque praesidio, velut in belli sedem, operibus munit. Eius rei nuntius noctu Athenas perlatum tanta trepidatione urbem implevit, ut cum primo diluculo populus in concionem venisset, invitante ex more praecone, *qui salutare patriae consilium haberet, uti diceret, nemo surrexit: donec Demosthenes, congruentia temporis disserens, persuasit, ut e vestigio classis et exercitus educerentur; et legati tum ad ceteros Graecos, tum inprimis ad Thebanos, mitterentur.* In hanc sententiam decreto facto, Chares et Lysicles copiarum imperatores constituti; Demosthenes legationis ad Thebanos princeps ire iussus est. Non fefellerat ea res Macedonibus sollertiam, satisque prospiciebat, quanta belli moles oritura esset, si inter istos populos foedus convenisset. Quippe Atheniensium civitas tunc etiam opibus et auctoritate satis pollebat; nec Thebanorum aut potentia contemnenda erat, aut opinio: necdum exoleverat memoria Leuctricae pugnae, qua principatum Graeciae Lacedaemoniis extorserant. Igitur ut et sociorum confirmaret animos, et diversae factionis machinationes

aeverteret, Amyntam et Clearchum Macedonas eo-  
 isit, addito, cuius eloquentiae plurimum fidebat,  
 ythone Byzantio: quem in concilio Boeotorum ita  
 cutum accepimus.

CAP. VI. *Si Philippo in Macedonia desidente, lateam Atheniensis exercitus haberet, neque vo-  
 is ullum cum rege foederis aut amicitiae ius esset: im-  
 men dubitare non debeo, quin illius societatem  
 ssetis optaturi. Quis enim illum, tanta potentia,  
 ntisque rebus gestis, civitati fama quam viribus  
 alidiori non praeponeret? Nunc autem, cum illo  
 ui victricibus copiis velut vestibulum urbis vestrae  
 obtinet, socio atque amico utamini; ab Athenien-  
 sibus multis veteribus atque novis iniuriis affecti  
 sitis: horum amicitiam, neglecto rege, vobis sua-  
 lere, profecto contumelia est, Thebani. Sed su-  
 perbiissimi mortalium sibi solis ingenium consilium-  
 que superesse autumant; reliquos, et inprimis  
 Boeotos, (vobis enim prae ceteris insultant) ineptos  
 et rudes esse, nec quae utilia honestaque factu  
 sint, dignoscere. Itaque, quo nihil est dementius,  
 id se vobis persuasuros putant, ut ex ipsorum po-  
 tius arbitrio, quam utilitate vestra, hostes atque  
 amicos habeatis; verbis confisi, in quibus omnis  
 ipsorum vis est. Sed verba nemo sanus ante facta  
 habuit, praesertim in bello: ubi res manu geritur,  
 linguae promptitudo supervacanea est. Ut sibi  
 disertis videantur: virtus et fortuna Philippi, tan-  
 tis suis sociorumque viribus subnixi, plus poterit.  
 Nec enim facile dixerim, stolidior an impudentior  
 sit eorum postulatio. Intentatum Atticae fulmen ex-  
 cipite, Thebani: socio atque amico regi bellum cum  
 exitio vestro facite, ut nos in tuto simus: vestros agros,  
 vestra corpora obiiicite, ne iniuriarum suarum vindi-  
 ctam ab Atheniensibus Philippus exigat. Haecine  
 sunt postulata hominum, qui aut ipsi sano iudicio*



*utantur, aut alios uti credant? Qui modo nullam  
 premendi vos occasionem praetermiserunt; qui  
 vos contumeliis, iniuriis, armis, quantum potue-  
 runt, persecuti, vestras clades atque pericula fel-  
 citatem suam rati sunt: ii nunc a vobis petere au-  
 dent, ut cum ipsis malitis, quam cum Philippo  
 vincere. At iste hospes et alumnus vester, educa-  
 tus in contubernio Epaminondae, clarissimi impe-  
 ratoris, sanctissimique viri, cum ipsius moribus a  
 tenera aetate caritatem urbis vestrae imbibit: ve-  
 stras et Apollinis iniurias Phocensi bello ultus est,  
 cum Athenienses odio vestri sacrilegis auxilia  
 mitterent: iterum communi Amphictyonum decreto  
 exoratus, eiusdem numinis contumeliam in Locros  
 vindicavit: huc quoque profectus est, ut vestris  
 commodis consuleret, non abscessurus, donec vos  
 metu aemulae inimicaeque civitatis solverit. Id  
 sive communibus consiliis viribusque lubet exse-  
 qui; non vetat, quo minus in praedae verius quam  
 belli societatem veniatis: sive quiescitis, transitum  
 concedite; ipse communium iniuriarum idoneus  
 ultor erit. Neque minus ad vos redibit emolumentum  
 victoriae: greges, armenta, mancipia, quae  
 ex hostibus capientur, maxima ex parte penes vos,  
 ut vicinos, erunt: inde Phocensis belli damna sar-  
 cietis. Id magis ex usu vestro sit, an vestros agros  
 uri, vestra oppida expugnari, incendi, diripi, ve-  
 stras denique res agi ferrique, quod Athenienses  
 optant, expendite. Nam iracunda res est suspec-  
 tus immerito candor, quoque pronior benevolentia  
 fuerit, acrioribus stimulis in vindictam agitur.  
 Ceterum haec ita refero, non quo vobis ingratitu-  
 dinem exprobrem, de qua nihil vereor; nec ut for-  
 midinem incutiam, qua nihil opus futurum existi-  
 mo: sed ut Philippi in vos beneficia, et vicissim in  
 illum vestra, cogitantes, admoneamini, ea demum*

*arma atque perpetua esse foedera, quae servari  
triusque intersit. Quod si maiora sunt illius me-  
rita, vobis curae erit, ut mutuo in illum animo si-  
is: ille maximum laborum praemium putat, sub-  
enisse Graeciae, pro cuius salute atque dignitate  
perpetua cum barbaris bella gerit. Atque utinam  
illum Atheniensium furor ingenio suo uti passus  
sset: iam in Asia audiretis arma ipsius esse, quae  
unc coercendis improborum motibus, invitus per  
Graeciam circumferre cogitur. Poterat quidem  
amicis Atheniensibus uti, nisi huic Demostheni,  
etque aliis quibusdam, qui imperitam multitudi-  
nem, ut expositum ventis mare, orationum suarum  
iura, quo volunt, impellunt, vectigalem se facere  
indignum, usuque et exemplo foedum existimasset.  
Quippe si apud illos honestati pretium esset, gra-  
tuito boni forent. Quibus honesta vendere mos  
est, si eadem flagitii merces detur, utilia a noxiis,  
recta ab inhonestis non distinguunt: lucro, non  
affectu virtutis aut patriae, neque Deorum homi-  
numve reverentia ducuntur. Nolite honesti ali-  
quid aut egregii expectare ab his hominibus: ve-  
stris utilitatibus non moventur, qui patriae tam-  
nale consulunt. Implicare vos volunt iisdem ca-  
lamitatibus, ex quibus modo Macedonum virtute  
etque fide liberati estis; tantoque maioribus,  
quanto formidabilior hostis futurus esset Philip-  
pus, quam Philomelus, aut Onomarchus fuere.  
Nam in precario imperio etiam boni ducis conatus  
haud minus cives quam hostes praepediunt: regum  
iussis nemo intercedit, nemo refragatur: unius  
arbitrio cuncti reguntur. In quo quantum in re-  
bus bellicis momentum sit, non ignoratis. Nec iam  
in uno corpore Macedonibus id praesidium est.  
Philippum etsi fatum auferret, Alexander rege-  
nerat, qui iam in adolescenti hac aetate, ea animi*

ingeniique documenta edidit, ut prope consummis imperatoribus parem esse futurum. Con apud Athenienses pacis bellique arbitrium, quod penes omnes est, velut in medio positum audacitatem quisque ad se trahit: impetu magis, quam consilio, cuncta aguntur: homines maligni succedunt, imperiti decernunt: bellum sumitur unius, quam geritur: foedera haud minori facilitate quam iunxere, violant. Nam et cum Philippo foedus ipsis est: quod quam sancte servant, re ipsa declarant. Nec enim pro se fidem violasse satis habent, nisi per ipsos latius serpat ista contagio. Vestra autem constantia, Thebani, qua non minus quam rebus fortiter feliciterque gestis, magni clarique habemini, non sinit ambigere, quin nulli experimentis cognitam regis amicitiam, semper infestae aemulaeque civitati praelaturi sitis. Nisi que vero averruncator malorum Hercules siverit, ut quem indigenam civemque Deum praecipua religione colitis, eius sanguinem impio iniustoque bello persequamini. Nam ceteros quidem sociorum quam amicitiae regiae non poeniteat, ex ipsis re malo cognoscere. Haec Python. Auditi dein sociorum legati, prolixè commendato regis animo, petierunt, ut ipsum potius Graeciae vindicem, quam perturbatores eius Athenienses, sequerentur.

CAP. VII. At Demosthenes, facta dicendi potestas Non ignorabam, inquit, istos Philippi mercenarii neque laudibus in ipsum, neque in nos convitiis esse temperaturos. Nam qui pudorem consummaverunt, quid loquantur aut faciant parum pensant habent, dum cupitis potiantur. Sed illi quidem, bene vos novi, Thebani, spe sua egregie factum dignum virtute vestra, Graecorumque moribus responsum ad Macedonem referent: vos autem ad ea quae nunc agenda sunt, animum diligenter adverte

e. Nam vestrorum quoque negotiorum summam inc agi, ipsis rerum argumentis ostendemus, non rborum praestigiis, quibus isti vereri se dicunt e capiamini. Sed quando sic pro vobis sunt solviti, ponant metum: nihil faciemus, quo eloquentiores videamur. Malam quandoque causam adavit facundia: ubi nudam veritatem spectari dientis interest, verba nemo prudens appendit. Nec e Philippo laboramus: sit sane per nos, qualem ti fingunt: sit etiam pulcher, eloquens, atque deo in conviviis etiam hilaris. Nam et hinc eum commendavere quidam: adeo inanem verae gloriae utebantur. Ceterum legatos eius miror ea civitati nostrae coram vobis obiecissee, quae si criminaunt, non magis Atheniensibus, quam Thebanis, efendenda esse, in confesso est. Popularis enim latus incommoda exagitant: quae licet non ignoemus utrique, tamen regio dominatui merito praeerimus. Atqui illi sic locuti sunt, tanquam in irculis et conviviis Macedonum adulatione gratiam quaerent; non apud liberam civitatem officio legatorum fungerentur. Scimus quidem rerum regionumque mancipiorum adversus gentes rbesque liberas pertinacia odia; et simpliciter referunt isti, qui detegunt: sed eo magis annitentum nobis est, Thebani, ut iura legesque nostras ueamur. Et optandum inproxiis esset, ut qui rempublicam attigerunt, iis unum idemque pulcherrium certamen foret, quinam rectius civitati suae onsulerent, aut consulta exsequerentur: nemo ommunia commoda posthaberet privatis; nemo cciperet munera; nemo istorum exemplo patriam hilippo proderet. Verum, Thebani, nulli unquam on civitati modo, sed etiam homini, integra perfectaque felicitas obtigit: beatissimus habetur, uius fortuna minimum ex adverso trahit. Malos

*autem nobis cives esse, neminem fugit: ne  
 quidem caruistis, aut caretis, Thebani: nam  
 eo esset, non iam Elateae Philippus libertati  
 strae plagas tenderet, sed de regno Macedoniae  
 nobiscum decertaret. Habemus tamen et bonos  
 eosque plures malis, et potiores. Argumenta  
 poscis? liberi sumus: non servimus Philippo, si-  
 tu, Python, Byzantios tuos servire voluisti; tu  
 tem, Daoche, et tu, Thrasidaeae, Thessalos res  
 vendidisti. Thessaliam enim servitute Philippi  
 premi videtis, Thebani, et nisi fallor, iuxta nobis  
 cum ingemiscitis: Byzantium, quantum in Python  
 fuit, idem manebat exitium, quod Olynthus per-  
 pessa est: nos liberavimus. Quippe Graecam ci-  
 vitatem, cum maxime sociam atque foederatam  
 ille religiosus atque venerabilis assertor Graeciae  
 nec opinantem opprimere aggressus fuerat. Haec  
 est nimirum praeclara ipsius prudentia. Calliditas  
 pro ingenio habet: periurium artem putat.  
 perfidia tanquam virtute utitur. Aut dicat deni-  
 que, quo alio pacto formidabilem illam potentiam  
 nactus est, si Graecos fraudibus, insidiis, prodi-  
 tione non cepit; si barbaros etiam non auro magis  
 quam ferro, vicit; si denique cuiquam mortali  
 aut fidem dare gravatus est, aut datam fallere  
 non sustinuit. Istis tamen ille Graeciae vindex  
 nos perturbatores sumus! Sed quid istos pudeat  
 qui sua crimina nobis obiectare malunt, quam nos  
 admonere vos eorum, quorum ipsi manifesti sumus.  
 Si quis captorum munerum aut prodicionis reus  
 set, illum tuendo, propugnando, legibus et poe-  
 nariis eripiendo, vestrum negotium ageritis: nunc aliter  
 accusando, in vos sententiam dicitis. Quod  
 ignari, quorsum ea res pertineret, id admisistis  
 prudentiam in vobis requiro: si scientes prudente-  
 que, verecundiam. Pro mea, quique in eadem ma-*

*In causa sunt, innocentia suffecerit, quod nos a Philippo nihil accepisse ipsi fatemini. Nec enim, si quid petivissemus, vacuos abire passus esset liberalissimus rex, ut a vobis quidem praedicatur. An qui vos corrupisse operae pretium putavit, nobis, etiam petentibus, non largiretur? At Thebanos modo monuistis, ne consilium eorum sequerentur, qui patriae male consuluerunt. Ego vero lesino adversari illis, Thebani, si ita sentiunt: in ipsorum opinionem transeo, vosque, quanto maximo potest opere, hortor, oro, obsecro, perque vestram et communem Graeciae salutem obtestor, ut hoc ipsorum decretum amplectamini. Id si feceritis, neque pecorum atque armentorum gratia vos ipsos venire patiemini; neque ut ergastulis ager vester frequentetur, inter cetera Philippi mancipia Paeoniis et Triballis servietis. Nam isti greges et mancipia intueri vos iubent, egregia servitutis praemia: uxores, liberos, parentes, libertatem, famam, fidem denique et fas Graecorum vilia habere. Haec enim profecto perdidistis, Thebani, nisi fraudi violentiaeque Philippi una nobiscum resistitis. Quod si alienis laboribus tutos vos fore persuasum habetis, vereor ne magnopere decipiamini. Etenim (quod abominor) Philippo victore, cui dubium est, quin neque vos, neque quisquam Graecorum libertatem tueri possitis, (nam in fide Philippi multum reponere, eorum est, qui perire elint;) at si nos Victoria respexerit, quid ab hominibus, quos in extremo salutis atque dignitatis discrimine deserueritis, expectandum vobis putatis, considerate. Nam quaecunque vobis sententia sederit, Atheniensibus certe omnia experiri, eque libertatem prius, quam vitam, amittere decretum est. Quamquam etiam viribus non diffidimus: quibus si + + + + + sociatis, coniuncti utique*

*superiores erimus hosti, cui singuli pares esse  
 sumus. Non ignoramus potentiam eius Atheni-  
 ses, quam olim nascentem augescentemque pro-  
 vidimus; et, si ceteris Graecorum eadem me-  
 fuisset, praecaveramus. Diu enim bellum cum  
 gessimus, non de Amphipoli, aut Haloneso, ut ple-  
 risque credebatur; sed pro salute et libertate  
 Graeciae: donec destituti ab omnibus, a nonnullis  
 etiam oppugnati, pacem necessariam magis quam  
 honestam fecimus. Sed nunc, opinor, praeses arci  
 nostrae Minerva, et Apollo Pythius, patrium nobis  
 numen, ceterique Graecorum Dii aperuerunt o-  
 culos, et in vindictam avitae libertatis populorum  
 suorum animos excitant. Certe Herculem non sine  
 indignatione verba legatorum audivisse arbitror.  
 Philippo stirpem ab illo Deo repetentium. Ille enim  
 agnoscat Deus, omnium religionum contemptorem:  
 Graecus, Macedonem; tyrannum, osor, punitor,  
 extirpator tyrannidis? Nullo enim alio argu-  
 mento clariora sunt Herculis opera. At ille Grae-  
 ciam dominatu premit; quibusdam etiam civitati-  
 bus domesticos tyrannos imposuit, Philistidem  
 Oreo, Hipparchum Eretriae, Chalcidi Taurosthe-  
 nem. Ergo iam Euboei, Achaei, Corinthii, Megar-  
 enses, Leucadii, Corcyraei nobis favent: alii for-  
 tunam spectant, quae hactenus unicum Macedo-  
 nicae potentiae vinculum fuit, quo leviter abrupto  
 ultro dilabatur. Quippe Thessali, unde Philippus  
 robur equitatus est, neminem unquam diu foverit.  
 Illyrii ceterique Macedoniam accolentes barbari  
 quorum et natura ferox est animus, et indignatio-  
 ne recentis servitii irritatus, si principia belli  
 Philippo sequius evenerint, reliqua pro nobis con-  
 ficient. Vos modo nobiscum acriter in hanc curam  
 incumbite, sepositis interim contentionibus, quae  
 inter vicinas urbes saepe levis occasio concitat*

*dia privata, post rem bene gestam, communis  
 etitia in benevolentiam vertet; aut cum porro  
 sanire vacabit, cum dedecore forte damnoque  
 trorumque, sed tamen citra exitium, resumentur.  
 neque dolos Philippi timueritis: modo promissis  
 ius aures occludite, manus continete a muneribus.  
 i nihil ante libertatem habueritis, calliditas et  
 irgitiones frustra erunt. Potentiam ut discordiae  
 Graecorum extulerunt, ita consensus obruet. Quin  
 t ipse, ut est temerarius, excipi potest: quod si  
 occidat, nihil a ceteris est periculi. Nam ipse  
 gloriam atque dominationem; qui sub eo sunt,  
 quietem expetunt. Nisi forte Alexandrum vere-  
 nini: quoniam isti quidem ita vos contemnunt, ut  
 doneos putent, quibus etiam pueri nomen formi-  
 linem possit incutere.*

CAP. VIII. Crederes, alios repente factos Theba-  
 nos: qui modo regios legatos attente, atque etiam cum  
 assensu audierant, adeo in contrarium mutati sunt,  
 ut Philippum hostem iudicaret, ni quamprimum suis  
 ociorumque finibus decederet: Macedonicae factionis  
 homines urbe pellerent, et Atheniensium copias eo  
 recipere. At Philippus, inopinata Thebanorum de-  
 ceptione turbatus magis, quam territus, insistere desti-  
 natis non omisit. Duobus levibus proeliis commissis,  
 cum Athenienses successus non poeniteret, tandem  
 utrique ad Chaeroneam Boeotiae oppidum totis viri-  
 bus consedere. Graecos decora maiorum, et cura li-  
 bertatis accendebant: Philippus egregiis copiis, totque  
 bellorum victoribus, fidebat. In se quoque non parum  
 momenti collocabat, quod imperatoriis artibus ipse  
 praecelleret; Graecorum celebratissimi duces iam de-  
 cesserant. Theagenes Thebanis praeerat, modico mi-  
 litiae usu, neque satis firmus adversus pecuniam:  
 Atheniensium quoque imperatorum virtutem atque  
 peritiam ipse animo usuque rerum longe anteibat. Sed



duorum potentium populorum in unum conversae vires, quorum auctoritatem Corinthii quoque aliique sequebantur, iniecerant curam, minima unius diei parte, de capite fortunisque omnibus dimicaturus. Ne Thebanorum quidem principes a pacis consiliis abhorrebant; sed Atheniensium ardor evicit, ut omnes Graeciae spes opesque unius proelii fortunae permitterentur. Alexander etiam immodicus animi testabatur patrem, ne tantam gloriae occasionem e manibus elabi sineret: eoque tandem impulso, primus in hostem impetum fecit. Pugnatum est acriter ambigua diu victoria, donec adolescens, quem cum delectis alteri cornuum praefecerat pater, summa animi viriumque contentione connixus, sacra Thebanorum cohorte, quae ex optimis constabat, loco mota, victoriae viam aperuit. Nam et Athenienses, sociorum calamitate fracti, aestuque et vulneribus fatigati, non amplius sustinere Macedonum impetum: quippe Philippus aemulatione, et pudore, si filio adolescente deterior videretur, gravis intolerandusque incubuerat. Ita de libertate Graeciae ista pugna decretum est. Ceciderunt ex Atheniensibus amplius mille, supra duo millia capti fuere: sociorum quoque multi aut pugnando mortem occubuerunt, aut vivi venerunt in potestatem victoris. Missus post haec Athenas Alexander *veniam delictorum pacemque Atheniensibus Philippus dare pronuntiavit; captivos etiam gratis reddere; nec vetare, quin occisi tumularentur*: quippe rex intentus in Persicum bellum, Graecorum fidem atque studia, clementia et moderatione provocabat. Imperio tamen maris et insularum Athenienses exiit: in Thebanos immitior, quorum subita defectione in summum rerum omnium discrimen se adductum fuisse meminerat; nec indicabat, veteribus sociis post beneficia sua causam fuisse contra ipsum cum Atheniensibus sentiendi. Ergo cum urbem dedidissent, praesidi

Macedonum imposito, interfectisque, quos maxime in-  
 isos suspectosque habuerat, aliis solum vertere iussis,  
 eductis suae factionis exsulis magistratus et iudicia  
 radidit. Reliquos deinde populos, qui adversus ipsum  
 arma ceperant, eodem victoriae impetu perdomuit.  
 Nec quisquam tota Graecia, praeter Spartanos et Ar-  
 cades, dominationis eius expers mansit: alios armis,  
 alios impari societate imperiis suis obnoxios habebat.  
 Igitur conventu totius Graeciae Corinthum indicto, *de*  
*bello Persis inferendo* disseruit. *Obviam eundum esse*  
*barbaris, imperium orbis immani superbia sibi desti-*  
*nantibus: aut parendum semper, aut mature resi-*  
*stendum esse. Nec enim hoc agi, bellum an pacem*  
*habere Graeci; sed utrum in hostiles agros id*  
*transferre malint, an domi accipere. Non veteres*  
*tantum iniurias vindicandas esse; sed praesens*  
*dedecus amolendum, ereptis ex Persarum servi-*  
*tute Graecis civitatibus, quae Asiam incolerent.*  
*Commodissime id fieri posse, dum compositis in*  
*Graecia rebus, universas vires in transmarinum*  
*bellum convertere liberum esset. Domesticae etiam*  
*quieti ea ratione prospectum iri, amotis occupatis-*  
*que longinqua militia, qui otiosi discordiis et au-*  
*dacia res turbare consuevissent. Constituerent*  
*igitur, quo imperatore, quibusque copiis bellum*  
*istud administrandum videretur. Non fallebat ple-*  
 rosque, quantum e republica peteretur: sed armis  
 amissam libertatem intempestivum videbatur verbis  
 repetere. Nihil ergo dubitatum est, quin faustis accla-  
 mationibus *Philippus imperator Graeciae ad libe-*  
*randum orbem terrarum in Asiam proficisci* iube-  
 retur. Descriptae deinde singulorum opes; et quan-  
 tum quisque militum, frumentique et pecuniae mitte-  
 ret, in tabulas relatum est. Ducenta peditum, quin-  
 decim equitum millia promissa fuisse reperio; cum in

eo numero neque Macedones, neque parentes Macedonibus barbari censerentur.

CAP. IX. Ceterum, ut sine mixtura calamitatis nulla in rebus humanis felicitas est, res foris prosperas domesticae turbae exceperunt. Animum coniugis, olim, ut diximus, alieniorem, Olympias morositate et arrogantia in dies magis magisque avertibat. Inde *repudiatam* nonnulli tradunt: ego in eodem matrimonio manenti Cleopatram *superinductam comperio*. Nec enim Alexander in tanto dedecore *dulcissimae* matris, cuius pudor ad ipsum quoque pertineret, (nam *ob stupri suspicionem expulsam* addunt) interfuisset novercae nuptiis: interfuit autem, et demum post contentionem, quae in eo convivio exarserat, matrem abduxit. Quippe cum avunculus sponsae Attalus, post longam computationem spem male tegens, *orandos Macedonibus Deos diceret, ut ex nova nupta legitimum regni successorem Philippus tolleret*: Alexander, in iram alioqui praeceps, et tunc iniuria irritator, *nos ergo, sceleste, spurii tibi videmur?* inquit: simul calicem, quem forte dextra tenebat, in os illius impexit; ille quoque invicem coniecit poculum. Exorto tumultu, Philippus, qui in alio lecto accubuerat, eius dici laetitiam turbari moleste ferens, ense stricto Alexandrum petit: occideratque filium, nisi claudicantem ex vulnere pridem accepto gressura ira vinumque praepedivissent. Prolapsus amicis subita re exterritis spatium dedit, ut precibus, et utrisque medios interponendo, Alexandrum eriperent. Nec minoris operae fuit illum exorare, ut salvus esse vellet. Multiplici iniuria affectus sibi videbatur; et quamquam *patris regisque nomina, naturaeque et gentium decreta* ingererentur, non abstinuit, quin insultans Philippo iuberet *intueri Macedonas egregium transmittendi in Asiam belli auctorem, qui ex lecto in lectum transiliens procidisset*. Inde sibi matrique

iuxta timens, in Epiro, cui frater Olympiadis praeerat, eam reliquit: ipse ad Illyriorum regem profectus est. Postea quoque, cum reconciliatore Demarato Corinthio in Macædoniam reversi essent, pervicacis ingenii mulier filium, suoapte ingenio potentiae anxium, incitare non destitit, *ut, quos posset, humanitate aut pecunia in amicitiam illiceret, et adversus iracundiam patris, etiam affinitate potentium hominum se muniret.* Sane olim monuerat Philippus, ut affabilitate sibi conciliaret hominum studia; largitiones autem non usquequaque probaverat, etiam per literas increpito instituto eius, *quod benevolentiam auferret sperare ab hominibus, quos muneribus corrupisset. Falli, qui regium id putaret: ministri et diribitoris officium esse.* Verum cum ipse pecuniae omnia penetrabilia iactaret, eaque haud minus saepe, quam armis, uteretur, non tam recta praecipienda studio ita scripsisse visus est, quam metu, ne ab adolescente filio suis artibus oppugnaretur. Idem obiurgavit Alexandrum, quod Pexodori filiam, quam Aridaeo destinaverat pater, ambivisset, *degenerem, et fortuna, in cuius spem educaretur, indignum appellando, qui Carem barbarum, barbaroque regi-subiectum, socerum optaret.* Sed ipse, ut potentiam suam firmaret, nullam conditionem aspernatus erat, quin ex asperrima barbarie Illyrias Geticasque mulieres matrimonio iungeret: quamquam ex aliis etiam uxoribus pellicibusque complures liberos suscepisset. Quod cum Alexandro molestum accideret, urbane adolescentem corripuit, hortatus, *ut, multos imperii aemulos habiturus, operam daret, quo omnibus melior praestantiorque, non ob Philippum patrem, sed ex suo merito, rerum potiri videretur.* Cum autem ob has similesque causas crebra inciderent iurgia, nec abrupta semel benevolentia fido affectu coalesceret, ad extrema prolapsi sunt; praecipua Olympiadis violentia, in qua

contumaciam sexus ingenium vastum et vehemens virili scelere in vindictam armabat. Stimulaverat ea fratrem Alexandrum, ut Philippo bellum faceret. Id ne alieno tempore excipere cogeretur, callidus rex, quamquam viribus plus poterat, firmata per novam affinitatem gratia praevenire studuit, desponsa Epirotæ Alexandri germana, Cleopatra. Ad istas nuptias celebrandas finitimarum gentium reguli, Graecarumque civitatum legati frequentes Aegæa convenerant. Id oppidum elegerat Philippus, non sine quodam omine eorum, quæ postea accidere: nam ibi Macedonum reges sepeliri mos erat. Ferunt etiam, Apollinem Delphicum de bello Persico consulenti maturum interitum cecinisse. Sed ambiguum, ut mos oraculis, responsun Philippus ad barbarorum exitum blanda interpretatione traxerat. Alia quoque præsagia, quæ tum nemo animadverterat, eventus monstravit. Erat inter custodes regii corporis Pausanias quidam, quem in solatium acceptæ ab Attalo iniuriæ, rex in eum dignitatis gradum provexerat. Quippe Pausaniam Attalus mero onustum nefariis convivarum ludibriis exposuerat. Huius ultionem cum a rege peteret, honorem accepit. Etenim Philippus virum spectatæ in bello fortitudinis, ad hoc nuper propinqua affinitate coniunctum, punire adeo non sustinuit, ut insuper copiarum parti præfectum cum Parmenione et Amynta in Asiam præmitteret, opera eius usurus in expeditione Persica. Pausaniam autem rogatum, ut ipsi temporibusque reipublicæ dolorem suum condonaret, comitate alloqui et honestiore stipendio placare conatus est. Sed adolescens maiorem contumelias, quam beneficii, rationem habuit, odiumque ab auctore iniuriæ, in negligentem eius vindicem convertit. Cum iis etiam, quos infensos Attali domui, nec Philippo concordēs esse noverat, consilia communicasse non præter rationem creditum est, postquam

ab Olympiade parricidae in cruce pendenti coronam auream impositam nemo dubitavit, aliaque facinora perpetrata sunt, ex quibus totius sceleris ordo causaeque haud obscure perspicerentur. Dubia adhuc luce theatrum ingens hominum multitudo impleverat, spectatura ludos, qui superiorum dierum spectacula luxu et magnificentia longe superaturi dicebantur. Inter alia, quibus divitiis illudere solent opulenti reges, et fortunae suae magnitudinem non capientes, duodecim Deorum effigies eminebant, in quibus artificum industria cum materiae dignitate certaverat. Tertiadecima Philippi thensa accesserat, nulla in re ceteris vilior. Id mortalitatis fastidium matura ultio consecuta est: et successu rerum insolescentem, seque Diis immortalibus aequantem, priusquam indebito honore frueretur, fatum occupavit. Pausanias theatrum intrare volentem observaverat: utque praemissis amicis, qui eum deduxerant, relictisque a tergo satellitibus, (nam in tanta omnium benevolentia nihil iis opus esse volebat ostendere) solus ingrediebatur; percussor improvisus adsilit, gladioque barbarico, quem sub veste habuerat, latus nihil tale exspectantis haurit. Hic fuit exitus maximi aetatis suae regum. Macedoniae regnum magnum ex inopi reddiderat: circumiectam barbariem domuerat: Graeciae imposuerat iugum: tum etiam Persico imperio imminebat. Iam auxilia Graecorum coibant: iam in Asiam transicerant praemissi ab eo duces; cum in ipso rerum gerendarum articulo, prolixum victoriae fructum sibi pollicentem vita destituit. Ita maxima quaeque in lubrico sunt; et audacissimas spes hominum quilibet ex improviso casus eludit. Olympias, comperta morte regis, Cleopatram Attali sorore genitam ad suspendium dedegit: natum ex ea paucis ante patris necem diebus puerum in aenea pelvi torruit: in clientes etiam propinquoque eius atrocibus suppliciis saeviit, et occa-

sione vindictae per muliebrem impotentiam crudelissime usa est.

CAP. X. Sed Alexander, per cuius absentiam mater ista perpetraverat, tanquam salutare sidus, componendis tantis fluctibus tempestivus affulsit. Quippe erectis in spem libertatis Graecorum animis, quos Philippus oppresserat, et tumultuantibus in vicinia barbaris, ne Macedoniae quidem tranquillae res erant. Attalus, haud spernendi exercitus praetor, ambitioso imperio mirum sibi favorem apud militum vulgus conciliaverat: principibus Macedonum propinquitate innexus, etiam Philotae sororem sibi desponderat: neque post tantas utrinque offensas invisio infestoque fides haberi poterat. Amyntas, quem fratre Perdicca genitum, data in matrimonium Cyna Philippus generum legerat, ad paterni regni successionem per Alexandri caedem adspirabat. Populi magna pars, Olympiadis tyrannidem exosa, alii rerum novarum cupidine, varie in hunc aut illum inclinabant studiis: nec deerant, qui *Alexandro Aeropi filio restituendum dicerent fastigium, quod, excluso legitimo regni herede, Amyntas prius, deinde Philippus, vi ac fraude invasissent*. Exercitus quoque, variis ex nationibus compositus, ut cuique animus aut spes erat, discordibus consiliis et sermonibus agitabatur. Contra Alexandro novum imperium, ac subito Philippi casu nihil adversus ingruentes motus provisum erat: et quamquam indolis haud poeniteret, aetas spernebatur. Viginti annorum adolescentem tantae rerum molis humeris subiecturum, aut, si recepisset, parem futurum, non arbitrabantur. Etiam nervus gerendarum rerum pecunia defecerat; qua abundantes Persae in omnem fere Graeciam corruptores miserant: et, ne quid malis deesset, Macedoniae maritima Tusci piratae depraedabantur. Convocatis amicis, cum de praesenti rerum statu deliberatio instituta esset, non de-

uerunt, qui censerent, *omissa Graeciae cura, quanta  
 posset lenitate deficientes barbaros in officio con-  
 inendos esse: postquam intestini motus consedis-  
 ent, longinqua facilius compositurum.* Verum  
 dolescens insigni animi magnitudine, cauta consilia  
 pro ignavis fastidiebat. *Perpetuo omnium contemptui  
 obnoxium fore, si in principio regni impune se  
 perni pateretur. Ad omnem deinceps vitam per-  
 tinere, qualem de se opinionem in animis hominum  
 incipiens imperator excitet. Philippi necem haud  
 magis sibi, quam rebellibus, inexpectatam acci-  
 disse: trepidantes adhuc, et consilii incertos, nullo  
 negotio opprimi posse: per Macedonum cunctatio-  
 nem erigi seditionis auctores; et qui nunc etiam  
 mutarent animis, tumultuantibus accessuros.* Ita  
 contra paratos confirmatosque anceps discrimen  
 subeundum: nunc celeritatis magis, quam virium,  
 certamen esse. *Quod si adversus singulos auda-  
 cia non esset; quid deinde futurum, si metum con-  
 cesso omnes uno impetu superfunderentur? His  
 einde congruentia ad populum locutus, adiecit, ef-  
 fecturum se, ut cives hostesque fateri cogerentur,  
 cepto patre corpus nomenque regis mutatum esse,  
 consilium animumque non desiderari. Eam rerum  
 inversionem nonnullos occasionem tumultuandi  
 statuisse; sed brevi poenas duros: modo Mace-  
 dones eisdem animos, eisdem lacertos sibi commo-  
 trent, quos tanta cum ipsorum gloria, tantoque  
 gloriae fructu, patri suo per tot annos praesti-  
 tissent. Id quo promptius alacriusque facerent,  
 animum praeter militiae vacationem ipsis conce-  
 re.* Consilium regis fortuna comprobavit. Non  
 prius, quam locutus fuerat, singula aggressum feli-  
 cissimus omnium exitus secutus est. Et Amyntam  
 idem, patefactis, quas ille struxerat, insidiis, occu-  
 pit: Attalum per Hecataeum et Parmenionem su-



stulit. Ex iis, quos in Philippi necem consensisse rumor arguebat, unum Alexandrum Lyncestem exemi supplicio, quod imperium suscipienti adfuisset, primisque *regem* salutasset: ceteros occidit. Ea severitate suam salutem in vindicta Philippi muniri credebat; simul aboleri famam, qua ut conscius paternae caedis notabatur. Crebrae inter eos discordiae fidem suspicioni fecerant; et questum iniurias Pausaniam ad facinus confirmasse ferebatur, *prologo ex Tragoedia carmine, quo Medea pariter pellici suae, quique eam in matrimonium Iasoni tradidisset, et cuius in manum convenisset, idem exitium minabatur.* Verum ipse, cum aliquando Darii epistolae responderet, invidiam in Persas transferre conatus est: *illorum auro percussores Philippo comparatos fuisse.* Quoque magis omnem culpae suspicionem extegeret, postremo vitae tempore magnificum Philippo templum extruere cogitaverat: id inter alia, in commentariis eius reperta, successores neglexere.

CAP. XI. Cum autem ad perficienda, quae animo agitabat, maximum in eo momentum positum arbitraretur, ut Graeciae principatum, quem Philippus comparaverat, retineret; raptim exercitu ducto Thessaliam improvisus irrupit. Sustulerant animos Thessalorum quidam, et insessis ad Tempe angustiis iter ex Macedonia venienti occludebant. Quippe eas regiones Olympus atque Ossa celebrati montes dirimunt: per quorum convalles Peneus amnis labitur, mira amoenitate sollemnia gentis sacrificia meritis. Lactis utriusque nemoribus obumbratus incedit; multoque cum fremitu ruenti, ex vicinis arboribus avicularum garrulus obstreperit. Angusta semita per quinque fere millia passuum protenditur, vix ontio iumento sufficiens iter praebens, quod adversus quaecumque numerum hominum vel decem armati seſtiant. Sed ille, qui minime perviae rupes existimabantur, scalarum in

modum exciso montis Ossae latere, circumitu penetravit; adeoque celeritate sua cunctos exterruit, ut *omnia ei vectigalia reditusque, simul universae gentis imperium, quibus id legibus Philippus habuisset, nullo iam repugnante decernerentur*. Phthiam, quae generis sui auctorem Achillem protulisset, immunem esse iussit: eumque heroem expeditionis adversus Persas socium atque commilitonem eligere se dixit. Ex Thessalia Thermopylas petiit, publicum Graeciae concilium, *Pylaicum* appellant. Ibi cum frequens per eos dies conventus esset, in locum patris Amphictyonum decreto summus Graecorum imperator creatus, *Ambraciotis ratam esse libertatem iussit*, quam nuper expulso Macedonum praesidio receperant: *ultra redditurum fuisse* dictitans, *ni paucis diebus ipsum antevertissent*. Exinde Thebis admoto exercitu, fractaque Boeotorum et Atheniensium contumacia, qui populi maxime suis consiliis obstabant, *apud Corinthum Graecorum legatos occurrere sibi iussit*. Ibi confirmato Amphictyonum decreto, communi omnium sententia, in Philippi patris locum imperator Graeciae suffectus est, et in bellum Persicum auxilia decreta. Forte in eadem urbe Diogenes legebat, qui Cynico instituto spontaneam paupertatem amplexus, liberum et sui iuris animum opibus urisque praetulerat. Apricabatur ille in Craneo, Corinthi suburbio, ubi cupressorum lucus est. Eo cum Alexander videndi eius desiderio venisset, optionemque faceret, *quae vellet, ab ipso petendi; parumper recedere iussit regem, ne solem interciperet*. Inopinatum responsum, hominemque, in quem in tanta fortuna ne beneficii quidem ius haberet, admiratus lacedo dixisse fertur, *Diogenem esse voluisse, si Alexander esset*. Scilicet magnitudo animi, qui ex alto despiceret omnia, quorum causa reliqui mortales emetipsum cupide perduat, non plane fallebat mentem

acerrimū iuvenis; sed obcaecata cupiditatibus pervidēre non poterat, quanto melius esset carere supervacuis opibus, quam habere necessarias. Ex Peloponneso Delphos invisit, Apollinem de eventu belli, quod moliebatur, consulturus. Sed virgo fatidica negabat *per eos dies adiri Deum fas esse: donec ipse eo profectus, vi corripuit virginem, et ad templum traxit.* Sed cum inter eundem illa, *patrium morem pertinacia regis victum reputans, exclamasset, invictus es, fili; accipere omen dixit, nec alio oraculo sibi opus esse.* His rebus celeriter confectis, in regnum regressus, summo studio in vindictam spretae Macedonum maiestatis incubuit. Iamque praeparatis omnibus, vere novo ex Amphipoli movens adversus liberas Thraciae gentes, decimis castris ad montem Aemum pervenit. Magna Thracum manus iugum occupaverat, transitu prohibitorum regem. Castra planstris in modum valli circumdederant; propulsuri in hostem, si vis inferretur. Alexander, barbarorum astu cognito, edixit militibus, *ut plaustris irruentibus, diducta phalange innoxia dilabi paterentur; aut, si deprehensi essent, humi strati, clypeis arcte commissis, testudine se protegerent.* Ita hostium dolus irritus fuit. Magna plaustrorum pars per intervalla ordinum devoluta est: quae armatis incidere, clypeis impacta, suoque impetu subsilentia nihil ponderis ad obtendum habuere: omnisque illa tempestas citra noxam detonuit. Quo metu liberati Macedones, alacri clamore edito, impressionem faciunt. Procurrentes barbaros praegressi a dextro cornu sagittarii frequentibus telis incessebant. Ita sine periculo phalanx in verticem enisa, ut primum aequo loco consistere pertuit, haud ambigua victoria hostem nudum aut leviter armatum disiecit. Sed eadem res, quae barbaros in proelio prodiderat, in fuga adiuvit. Armis haud sane onerati per nota loca facile dilapsi sunt. Ita desideratis

ex omni numero mille quingentis, ceteros fuga abstulit: mulierum puerorumque ingenti multitudine, praedaeque pro locorum conditione satis ampla, victor potitus est. Sic aperto montis Aemi transitu, in interiora Thraciae penetratum est. Lucus est in iis gentibus, quem Libero Patri dicatum prisca religione colunt. Ibi cum Alexander, barbaro ritu sacrificans, vinum aris infunderet, tanta flammae vis erupit, ut superato aedis culmine, in coelum emicare videretur. *Eosdem gloriae fines regi ostendi, omnes credidere.* Alia subinde res nuntiata prioris prodigii fidem affirmavit. In Thracibus, qui *Odrysaë* appellantur, *Libethrus* mons et civitas est, *Orphei* natalibus inclyta: *eius sacram effigiem ex cupresso fabricatam multo sudore manasse, qui viderant, ad regem retulere.* De interpretatione sollicitis *Aristander* exemit metum, *ad res Alexandri pertinere asseverans, quibus decantandis alumni filique Musarum multum desudaturi essent.* *Triballi*, valida natio, trans montem *Aemum* colunt. In eos cum descenderet Alexander, regis *Syrmus* in *Peucen Istri* insulam confugerat, expeditione *Macedonis* multo ante comperta; seque et quidquid aetate vel sexu invalidum erat, obiecto amnis munimento tuebatur. Quippe *Alexandro* paucae nares erant; et in aspera praeruptaque ripa difficilis ex-censio, ab hoste intento validoque haud aegre impelliebatur. Ita *Macedones* re infecta discesserunt, contenti illata paucis ante diebus clade. Nam priusquam o processissent, alium *Triballorum* exercitum adorti, ix quinquaginta suorum amissis, tria hominum millia occiderant.

CAP. XII. *Syrmo* rege nequidquam oppugnato, in *Setas* convertit impetum, qui in ulteriore ripa quatuordecim milia instruxerant. Id periculum non tam ex usu belli sumsit, quam cupidine amae, ut *maximum Europae flumen, defendentibus*

*ferocissimis gentibus, transivisse gloriari posse*. Igitur equitibus, quotquot capere navigia poterant impositis, pedestrium copiarum partem intribus quorum ibi magna erat copia, alios utribus transduxit. Improvisa Macedonum impressione (quippe transmittentes nox, et in ripa, quam petebant, densa frumentis seges texerat) territi Getae vix primum emissi equitatus impetum tulere. Ut deinde cum *phalange Nican* successit, effuso cursu urbem *quatuor ferme passuum* millibus a flumine distantem petiverunt: mox, instanti Alexandro, avectis coniugibus liberisque, quot eorum equis eripere potuerant, ceteros reliquere victori. Eos rex Meleagro et Philippo abducendos dedit: excisaeque urbe, et in ripa fluminis Iovi Herculi que et ipsi Istri, qui transeunti propitius fuisset, aris consecratis, eodem die reduxit exercitum, incruenta victoria potitus. Venerunt deinde finitimarum gentium Syrmique regis oratores cum donis, quae apud ipsos in pretio habentur. Germani quoque, qui usque a fontibus Istri terras ad sinum Adriaticum spectantes habitant, legatos miserant. Nam Ister in Germania oritur: ipsi patrio vocabulo *Danubium* appellant. Magnitudinem corporum animorumque alacritatem admiratus Alexander interrogavit, *quidnam omnium maxime vererentur*? putans suam potentiam formidabilem ipsis esse, eamque se confessionem expressurum. Illi, *nihil se magno opere vereri*, responderunt, *nisi forte, ne coelus in ipsos rueret: ceterum virorum fortium amicitiam plurimi facere*. Percussus improvise responsu paullum reticuit; deinde hoc unum effatus, *Germanos arrogantes esse*, foedus, ut petiere, iunxit; Syrmique et reliquis pacem dedit: satis gloriae ea expeditione partum existimans, et in Persicum bellum animus conversus, unde cum leviori discrimine longe maius operae pretium expectabatur. Taxasse id avunculum eius Alexandrum constat, cum paullo post bello

talia gerendo fatigaretur: nam *inaequalem utrius-  
 ue sortem questus, sibi cum viris pugnam evenisse*  
*ixit, Macedoni cum mulieribus.* Ceterum regulos  
 Thracum, quique alii ad res novandas opibus aut ani-  
 mis idonei videbantur, specie honoris, tanquam com-  
 militones adversus Persas adscisceret, abduxit; capi-  
 aque ademit factionibus, sine principibus nihil ausu-  
 is. Per Agrianos et Paeonas Macedoniam repetenti  
 Illyriorum motus nuntiatur. Bardylis, ex carbonario  
 nultarum in eo tractu nationam rex, etiam Macedo-  
 niae gravis incubuerat; donec magno proelio a Philip-  
 po victus, atque instaurato deinde bello fractis omnino  
 viribus, in ditionem victoris concederet. Atque ille  
 am obierat, vita ad nonagesimum aetatis annum pro-  
 ducta: ceterum filius eius Clitus, *opportunitatem recu-  
 perandae libertatis tempus advenisse* dicitans,  
*illum asperrimarum gentium armis Alexander trans-  
 strum attineretur,* populares ad arma capienda im-  
 pulsit, inita societate cum Glaucia rege Illyriorum, qui  
 Aulantiis vocantur. Autariatae alia natio iter facien-  
 tes Macedonas aggressuri fuerant: sed Langarus,  
 Agrianorum rex, Alexandro fidus, petiit, *ut sibi cu-  
 am eam permitteret: sese domi eorum tantum ne-  
 otii ipsis comparaturum, ut animum a vexandis*  
*Macedonibus ad sua tuenda conversuri essent.*  
 collaudatum donisque magnifice cultum iuvenem di-  
 ditit rex; etiam sororis Cynae nuptias pollicitus,  
 iam ex Illyria muliere susceptam Amyntae in ma-  
 trimonium dederat pater. Et Agrianus quidem pro-  
 missam operam praestitit; sed morbo correptum, ne-  
 cta mercede frueretur, brevi consecuta mors prae-  
 nit. Ita cohibitis Autariatis, sine certamine Pelium  
 adventum est, Dessaretiae oppidum, Eordaiō flumini  
 iminens. Speciem pugnam expetentium praehebant  
 hostes, et velut manus conserturi extra praesidia sua  
 rocciter procurrerant. Sed priusquam proelium com-

mitti posset, refugerunt; licet opportuna loca, silvaque et collibus impedita praecepissent. Foedum illud spectaculum Macedonum oculis obiectum est. Trecenti pueri, totidemque puellae cum tribus nigris arietibus confusa strage iacebant, quos barbari sacrilego sacris Diis suis immolaverant, quo pugnaturis audaciam inspirarent. Sed vindex numen scelestis mentibus pro virtute recordiam iniecit. Rex intra moenibus compulsos ducto exteriori muro intercludere statuerat; cum postridie cum magis Taulantiorum copiis Glaucias advenit. Ita spe capiendae urbis abiecta quomodo tuto discederet, cogitabat. Interim Philotas cum iumentis castrensibus, et praesidio equitum frumentatum misso, comperit, suos in discrimine versari; quippe Glaucias colles campo circumdatos occupaverat, in occasionem gerendae rei intentus. Igitur adversus oppidanorum eruptionem parte exercitus in castris relicta, cum ceteris copiis impigre profectus est; territisque Illyriis, suos recepit incolumes. Ceterum iter facturo maximum periculum imminerebat. Hinc flumen, inde praerupti arduique colles viam coarctabant, relicto itinere, quod multis locis vix quatuor ternos armatos caperet: montium iugis Clitus atque Glaucias sagittariorum et funditorum cohortes, magnamque gravis armaturae manum, imposuerant. Alexander, ducentis equitibus ante utrumque phalangis cornu collocatis, imperat, ut erigerent hastas, mox signo dato versus hostes, tanquam impetum facturi, infestas protenderent, modo in dextram modo in sinistram latus invicem conversi. Suspensis eo commento hostibus, phalangem raptim progressam nunc in plures acies diducit, nunc divisam colligit; ad extremum cuneo facto, in laeva Illyriorum praesidia strenue infert. Illi, celeritate et peritia Macedonum in stuporem versi, desertis, quos tenuerant montibus, versus urbem refugerunt. Pauci restiterunt

in edito colle, qua iam transierat Macedonum agmen. Iis deiectis, Alexander duobus fere millibus Agrianorum sagittariorumque locum capit, phalangi, quam flumen transmittere iusserat, praesidio futurus. Ea re conspecta, universa hostium multitudo iter ad montes arripuit, eo consilio, ut transiecta gravi armatura, extremum agmen, in quo ipse rex transiturus erat, adorissentur. Ille nihil territus, venientes fortiter excipit: simul phalanx sublato clamore, quasi iterum transmissio ante subsidio suis itura, metum incussit hosti. Nam rex, quae evenerunt, futura ratus, praeceperat, ut in adversam ripam delati statim aciem instruerent, laevum cornu, quod a flumine hostibusque propius aberat, in speciem multitudinis quantum possent explicantes. Itaque cum universum exercitum incumbere sibi putarent Taulantii, paullisper retrocesserunt. Id spatium nactus Alexander, suos raptim ad flumen ducit: quo ubi ventum est, ipse inter primos transgreditur; et cum eos, qui agmen clauderant, reversus hostis urgeret, machinis dispositis, quae traus amnem missilia spargerent, eum submovit: simul, qui iam ingressi flumen erant, e mediis aquis tela coniecere. Ita nemine desiderato ceterum iter quietum habuit. Triduum intercesserat, cum *hostes, tanquam fugato Macedone metu vacuos, passim nullo ordine tenere, neque more militari vallum fossamve pro castris habere, neque vigiliis et stationes obire*, nuntiatur. Igitur assumtis sagittariis Agrianisque, et ea Macedonum militum manu, quam Perdiccas et Coenos ducebant, noctu superato flumine, celeriter ad eos contendit, reliquo exercitu sequi iusso. Nec expectato eo, ne occasionem mora consumeret, levis armaturae militem praemittit: mox ipse cum ceteris impetu facto semisonnos et inermes magna strage afficiunt, multos vivos capiunt, reliquos coniciunt in fugam, et ad Taulantiorum usque montes persequun-



tar. Clitus in ea consternatione in oppidum Peliun se recepit: deinde sive munimentis urbis, sive suorum animis diffusus, incensa urbe, in Taulantios exsulatum abiit.

CAP. XIII. Interea per universam Graeciam diffusus rumor, *Alexandrum in Triballis cecidisse*, omnes Macedonicis opibus adversos in spem rerum novandarum erexit. Ea quoque in rebus humanis haud postrèma calamitas est, quod, *utcumque levi auctore*, quae facta optamus, tam enixe creduntur, *quasi veritati vim afferre possit pertinax et impatiens rationis opinio*. Repertus est, qui *se inspiciente circumventum regem*, et, quo minus ambigeretur, *se in ea pugna vulneratum esse*, affirmaret: id pronis auribus acceptum vulgatumque, civitati Thebanorum extremæ calamitatis initium exstitit. Quippe eo nuntio exciti quidam exsulum, quos a Philippo eiectos diximus, ducibus Phoenice et Prothyte, praefectos Macedonum, qui Cadmeam obtinebant, cum nulla doli suspitione extra arcem progressi essent, obruncant: civibus ad speciosum liberandæ patriæ titulum strenue concurrentibus, praesidium obsident; et duplici vallo fossaque, ne commæatus aut auxilia submitti possent, circumdant. Legatis deinde supplicum habitu circum civitates Graeciae missis orabant, *ne deesse vellent indigne ereptam libertatem repetentibus*. Et Demosthenes quidem veteri in Macedonas odio Athenienses permovit, ut auxilia prompte decernerent. Missa tamen non sunt, quia subito Alexandri adventu perculsis exspectanda fortunæ inclinatio videbatur. Demosthenes privatis copiis Thebanos adiuvit, magnamque armorum numerum gratis subministravit, quibus perarmati, qui Philippo adimente sua amiserant, Cadmeæ praesidiariis acriter institerunt. Peloponnesiorum haud invalida manus ad Isthmum convenerat. Ad quos cum Antipater, quem interim, dum

Nesset, Macedoniae praefecerat rex, misisset petatum, ne contra commune Graeciae decretum cum professis Alexandri hostibus consilia miscerent; nihilominus Thebanorum oratores admiserunt. Cumque vulgus militum misericordia permoveretur, dux eorum Astylus, Arcas genere, moras nectebat, non tam incepti difficultate territus, quam per avaritiam, ut a festinantibus et necessitate anxius maius stipendium acciperet. Decem talenta poscebantur: ea cum Thebani non conficerent, a Macedoniae factionis hominibus oblata sunt, ut quiesceret. Ita de Arcadum auxiliis Thebanorum spes in nihilum recidit. Alias tamen ex Peloponneso copias, ne adversus Thebas militarent, pecunia Demosthenes avertit. Namque trecenta talenta a Persis accepisse dicebatur, quibus ad facessendum Alexandro negotium uteretur. His ita nuntiatis, Alexander praeter Eordaeam et Elymiotin, rupesque Stymphaeas et Paryaeas rapit exercitum; septimoque post die, quam a Pelio movisset, Pellenen Thessaliae oppidum pervenit. Post sextum deinde diem in Boeotiam venit: mox Onchestum, sex circiter passuum millibus a Thebis distantem processit. Inter haec Thebani maiore animo, quam consilio, administratis rebus, omnium ignari agebant, necdum intra Pylas esse credebant Macedonum copias: ipsum vero regem adventare, adeo fidem superabat, ut potius alium Alexandrum Aeropi filium exercitui praeesse conderent. Rex, ad fanum Iolai positis castris, quod ante Proetidem portam est, poenitentiae eorum locum dare constituerat; cum illi, eruptione facta, in stationes Macedonum inventi, quosdam interficiunt, alios locum pellunt, donec ipsa iam castra suggestos emissis regis iussu levis armatura reiecit. Postero die ad portas, quibus in Atticam euntibus iter est, promotus exercitus, ut suis in arce conclusis praesto esset, adhuc cunctabatur, et, si poeniteret, erroris veniam ostentabat.

Sed quibus pax placebat, potentia exsulum, eorumque per quos revocati fuerant, opprimebantur: qui, nulli spe salutis reliqua, si Macedones urbe potirentur, patriae ruinis obrui malebant, quam illius incolumitatem suo interitu emere, et ex Boeotarchis nonnullos in consilium traxerant. Quantaque hominum vecordia fuerit, vel hinc cognosci potest, quod Alexandro postulante, *ut defectionis auctores dederent, duobus capitibus omnem civitatis noxam expiaturi, ipsi vicissim Philotam et Antipatrum, principes amicorum regis, deprecari sint ausi, et per praeconem pronuntiare, si qui cum magno rege et Thebanis Graecorum libertatem adversus tyrannum asserere velent, eos apud Thebas perfugium habituros.* Nec tamen Alexandri imperio oppugnata urbs est; sed, ut Ptolemaeus tradidit, (nam quidam aliter narrant) Perdiccas, qui in ea castrorum parte curabat, quae vallo hostium, quo Cadmeam incluserant, obversa erat, non expectato signo impetum in eos fecit: superatoque munimento, manus cum hoste conserere coepit, et Amyntam, qui cum sua cohorte iuxta ipsum tendebat, ut idem auderet, exemplo permovit. Mox Alexander, suis timens, cum tota copiarum mole adfuit, et *leviter armatis perrumpere, suisque auxilio ire iussis, ipsum cum reliquis pro vallo substitit.* Acri conserto proelio Perdiccas, dum interius vallum molitur, graviter sancius pugna effertur; et Cretensium sagittariorum multi, cum Eurybota duce suo cadunt. Thebani percussis instant, et ad Alexandrum refugientes insequuntur. Ibi cum rex instructa phalange dispersos et turbatos hostium ordines invaderet; statim versa pugnae fortuna, tanta Thebanorum trepidatio fuit, ut ne ad portas quidem, per quas in urbem se receperant, occludendas mente competerent: simul, qui Cadmeam tenebant in subiectos arci vicos excurrerunt. Ita nobilissima Graeciae urbs intra eundem diem oppugnata et capta

est. Nullum in ea crudelitatis exemplum praetermissum constat: viros feminasque promiscua strages hausit, nec ab impuberum caede temperatum est. Phocensium Plataeensiumque et Orchomeniorum et Thespiensium ea infamia fuit, quibus olim, dum Thebana res valebat, vicinae civitatis opulenta exitiosa fuerat: Macedones ultra fas belli non saevire. Tandem, *ut caedibus abstinere*, proclamatum est, cum iam sex hominum millia periissent: ceteris captis, ad triginta millia liberorum capitum venierunt. *Ex omni praeda quadringenta et quadraginta talenta reducta fuisse*, Clitarchus tradidit: alii, *ex pretio captivorum id pecuniae effectum*. Centum talenta, quae Thebanis Thessali debebant, Alexander sociis accepto tulit. Pauci, quod bellum dissuasisse constabat, servitutem effugerunt: item sacerdotes, et quorum hospitio rex paterve eius usus esset. Ex reliquis Timoclea nobilis facinoris mercedem, cum praesenti libertate, famam apud posteros tulit. Inter Thracas, qui Alexandro militabant, quidam equitum ductor post vim mulieri illatam, *ubi pretiosissima quaeque oculisset*, minitabundus interrogabat. Illa non tam opum, quam pudoris, damno moesta, avaritiam barbari in occasionem vindictae convertit: ostensoque puteo, in quem mundum suum coniecisse simulabat, hominem cupide eo despicientem subductis pedibus impulit; coniectisque desuper saxis, cum ex angusto profundoque loco ascensum frustra moliretur, obruit. Comprehensa a turmalibus occisi, ad Alexandrum trahitur, ut interfecti ducis poenas daret. Ibi interrogante rege, *quaenam esset, et ob quod delictum adduceretur?* intrepido vultu et voce, *Theagenis, inquit, soror sum, eius, qui pro libertate Graeciae Thebanorum imperator occubuit. Iniuriam meam ulta, castitatis meae praedonem interemi. Cui, si meo supplicio parentari iubeas, scies, honestae mulieri post ex-*

*tortam pudicitiam spiritu nihil vilius esse: quem utcumque expellere festinaveris, sero moriar, pudori patriaeque superstes.* Alexander, cognita causa, *Thracem iure caesum pronuntiavit; neque sibi placere ingenuis mulieribus vim fieri: collaudatamque feminam, cum omnibus, qui cognatione ipsam attingerent, liberam esse iussit; et quo quisque vellet discedendi potestatem fecit.* Pepercit et Pindari posteris, in honorem vatis, qui proavum regis *Alexandrum* carminibus suis inseraerat, *ipsiusque domum cremari vetuit.* Non enim praesentem tantum virtutem adamavit, verum etiam memoriam magnorum virorum reverentia, et progeniem illorum beneficiis prosecutus est. Nam et postea, cum postremo proelio *Darium* vicisset, *Crotoniatis praedae partem misit, quod Xerxis bello, ceteris Graecorum coloniis de Graecia desperantibus, Phayllo duce triremem unam ad Salaminem misissent: et Plataeenses honore donisque affecit, quia maiores eorum Graecis adversus Marathonium proeliantibus agrum suum dono dederant.*

CAP. XIV. Hanc Thebanorum cladem multa ostenta praecesserunt. Tribus ante mensibus, quam Alexander advenisset, in fano Cereris, quae *Thesmophoros* appellatur, conspecta est aranae tela nigra, cum circa tempus *Leuctricae pugnae*, qua res Thebana ad summum felicitatis evecta fuit, candida comparuisset. Ad haec sub adventum Macedonum sudantes in foro statuae, eque lacu apud *Onchestum* tristis mugitus, et prodigioso sanguine fluens *Dirce*, terrere obstinatos poterant, nisi destinatos sorti suae superbia perdidisset. Quippe maiorum gloriam intuentes, a quorum moribus longe recesserant, et in disparibus artibus eandem sibi fortunam polliciti, patriae ruinam acceleraverunt, cum adversus triginta peditum, tria equitum millia, eumque veteranum et toties victorem exercitum, paullo plus decem armatorum millibus

opponere non essent veriti. Ceterum Alexander, urbe capta, ad consilium sociorum retulit, *quomodo ea utendum videretur*. Erant inter eos Phocenses, multique ex Boeotis, quibus antiquissimae cum Thebanis discordiae. gravibus saepe damnis constiterant: neque, dum Thebae starent, aut odiis suis satisfactum, aut securitati prospectum rebantur. Horum auctoritas valuit, ut muri atque aedificia diruerentur, ager arbitrio regis inter victores divideretur. Ita nobilissimam urbem, non hominum modo clarissimorum, verum etiam Deorum natales asserentem sibi, e media Graecia una dies eripuit, postquam octingentos fere annos post oraculum de corvis, eosdem incolas habuisset. Olim enim pulsus a gente Thracum atque Pelasgorum Boeotis edita sors fuerat, *post quartam demum aetatem patrias sedes recepturi, considerent interim, quo loco corvos albos conspicati forent*. Ita cum ad Arnen Thessaliae oppidum venissent, corvis conspectis, quos pueri gypso illeverant, ibi substiterunt. Diruta urbs est ad tibiae cantum, quo modo sexagesimum ante annum Athenas Lysander deleverat. Templis tamen aliisque sacris aedificiis abstineri iussit Alexander, etiam ne quod per incuriam damnum iis daretur, sollicitus. Praeter insitam in Deos venerationem recens religio permoverat, quia militum quosdam, Cabirorum fanum, quod ante urbem est, spoliare aggressos, subita tempestas fulminibus et flamma coelesti consumserat. Relictae sunt etiam effigies statuaeque, Diis, vel hominibus virtute praecellentibus, per loca publica positae. Proditumque est memoriae, fuisse, qui inter consternationem captae direptaeque urbis aurum in sinus aut amicula statuarum abdiderint, idque salvum repererint, cum vigesimo post anno Cassander, Antipatri filius, Thebas instauraret. Quod quidem non tam misericordia in profugos fecisse creditur, quam ut Alexandri, quem oderat, gloriam de-

trectaret. Quamquam autem veterem murorum ambitum urbi restituisset; neque mores antiquos, neque fortunam reddere potuit. Nunquam postea resurrexit, ut convalesceret; sed multis subinde calamitatibus vexata, vix tenuis oppidi speciem ad memoriam nostram retinuit. Poenituisse postea ferunt Alexandrum, quod excisis Thebis velut alterum Graeciae oculum eruisset: utique postquam Cliti caedem, et Macedonum ignaviam, expeditionem in penitiores Indos pertinaciter recusantium, *iram Liberi patris interpretatus est, ob afflictam patriam eiusmodi poenas repetentis*. Et reperti sunt, qui ipsam regis mortem, non sine vindicta Bacchi, ab ebrietate et vino profectam crederent. His ita perpetratis, Athenas misit, nuntiatum, *ut oratores, qui populum adversus Macedonas concitare non desinerent, traderentur; aut si illos amittere gravarentur, eadem contumaciae praemia exspectarent, quorum exemplum in Thebanorum calamitate conspicerent*. Ibi cum Phocion, cuius ob integritatem vitae maxima ad populum auctoritas erat, *non irritandum adolescentis victorisque animum* diceret, hortareturque eos, ad quos periculum maxime pertinebat, *ut Lei et Erechtei filias imitati, spiritum pro patriae salute profunderi ne dubitarent*; Demosthenes, qui nominatim petebatur, surrexit, docuitque, *falli Athenienses, si paucorum deditioe periculo defungi posse crederent: callidos Macedonas eos exposcere, quorum vigilantiam atque virtutem maxime invisam suspectamque haberent: amotis publicae libertatis custodibus, in orbam indefensamque civitatem, tanquam lupos in oves canibus destitutas, impetum facturos esse*. Multa commiserat in Macedonas Demosthenes, ob quae laud in iuria nullum apud eos veniae locum relictum arbitrabatur. Philippo occiso auctor exstiterat, ut Pausaniae sacellum exstrueretur.

apud pulvinaria Deum supplicationes haberentur, aliaque ob insignem laetitiam decerni solita curarentur. Alexandrum alias *puerum*, alias prodigiosae vecordiae vocabulo *Margiten* appellaverat: Persico auro corruptus, omnium fere bellorum, quae contra Alexandrum patremque eius Philippum Graeci depugnaverunt, fax atque concitor fuerat. Attalum, quo gravio-rem adversarium non habuerat Alexander, Athenien- sium societatem pollicitus, ad bellum regi palam in- ferendum extimulaverat. Neque civitas Atheniensium mediocriter deliquerat, detractis Philippi statuis, ea- rumque materia in foedos usus conversa, aliisque ad- missis, quae vulgus imperitum et mobile, nulla futuri cura, ex arbitrio suasuque paucorum animose perpetrat. Sed nihil ex iis, quae prae fracte et contumaciter fece- rant, aequè commovit regem, quam in Thebanos hu- manitas, quos inter patriae ruinam elapsos, contra ipsius edictum receperant, tantum ob eorum vicem doloris prae se ferentes, ut etiam mysteriorum sol- lemnia, quae in honorem Liberi Patris praecipua reli- gione quotannis celebrant, ob publicam moestitiam intermitterent. Verum cupidine belli Persici, condonare Graecis iniurias suas, quam exsequi, malebat. Igitur cum Demades, qui Philippo quoque gratus ac- ceptusque fuerat, preces civitatis ad eum detulisset, Atheniensibus indulset, ut *Demosthene, Lycurgo- que, et aliis, quos depoposcerat, retentis, unum Charidemum in exsilium mitterent*. Ille ad Persas se contulit, magnoque ipsis usui fuit, donec ob liber- tatem linguae Darii inssu interfectus est. Alii quoque non postremi nominis viri, odio regis urbe deserta, ad hostes illius profecti, multum negotii Macedonibus exhibuerunt. Post eum rerum impetum cursumque, nemo supererat in Graecia, qui aut viribus suis post Thebanos, (quorum gravis armatura celebris olim fue- rat) aut occupata Leucadia, munimentis confideret.



Namque Leucadios, situ oppidi, et proviso in longa obsidionem commeatu, feroces, fame domuit; cum expugnatis, quae circa erant, castellis, homines Leucadiam abire passus, adaucta per singulos dies multitudi-  
 nae, omnem eorum penum exhausisset. Igitur ex Peloponneso quoque legationes venerunt, gratulatum, quod confectis ex animi sententia barbaricis bellis, etiam Graecorum quorundam insolentiam et temeritatem castigasset. Arcades, qui Thebanis auxilio futuri se commoverant, duces, quorum instinctu ad eum furorem prolapsi essent, capitis se condemnavisse exponebant: Elei, exsulibus suis reditum concessisse, non ob aliud, nisi quod Alexandro caros accepissent. Et Aetoli excusaverunt, quod in tantis Graeciae turbis, ipsorum quoque gens novorum consiliorum expers non fuisset. Megarenses novi generis honore risum regi, quique circa eum erant, commove-  
 rant, referentes, ob studium et beneficia Alexandri in Graecos, Megarensis populi scito civitatem illi decretam esse: donec intellecto, nemini ad eum diem, excepto Heroule, id honoris habitum, laetus accepit. Ceteris respondit, nihil sibi quiete et incolunitate Graeciae antiquius esse: modo in posterum novis rebus abstinerent, praeteritorum veniam facile concedere. Verum Spartanis maxime diffusus, Philiadae liberos Messenen, unde pulsati fuerant, restituit: Pellenen Achaeorum Chaeroni tradidit: Sicyonem, aliaque Peloponnesi oppida per clientes suos habuit, qui consilia Lacedaemoniorum ex propinquo specularentur. Tot tantisque rebus perficiendis pauci menses suffecerunt: intra quos tam grave atque multiplex bellum levio-  
 re negotio confecit, quam alius paravisset. Ipse quidem eam victoriam celeritati debere confessus, interroganti, quonam maxime modo Graeciam subegisset? Nihil cunctando, respondit

I. FREINSHEMII  
SUPPLEMENTORVM

IN  
Q. CVRTIVM

LIBER IL.

---

CAPVT I.

Persarum ea tempestate Darius rex erat, paullo ante Philippi necem euectus in id fastigium a Bagoa spadone, qui Ocho rege, et deinde filio eius Arse, cum tota eorum domo extinctis, imperium, quod sibi vindicare non poterat, sui beneficii fecit, perennem sibi gratiam pollicitus apud eum, quem tanto munere deuinxisset. Nec tamen indignus ea fortuna Darius apud populares habebatur: nam etiam a gente regia non alienus erat. Quippe Ostanes Ochi patrus Arsanen genuerat, Arsanes Codmannum. Sic enim vocabatur, lum privatus esset; sed in Cyri solium collocatus, more quodam Persarum, eiurato veteri nomine, Darius appellari voluit. Bello quoque spectatus; caeso ex provocatione hoste, cum adversus Cadusios bellum gereret Ochus, magnam virtutis opinionem pepererat. Sic a conditore regni Cyro decimus imperio Persarum praefuit. Nam Ochus Artaxerxem patrem, ille Darium exceperat. Huic Artaxerxes regnum reliquit, Xerxis filius. Xerxes Dario patri successit, qui Hytaspes genitus, post extinctum in Cambyse Cyri sau-

guinem, illustri septem Persarum conspiratione, imperium Magis extorsit. Sub his regibus per ducentos et triginta ferme annos res Persarum mira felicitate floruit: acribus initiis, dum rudis ad voluptates natio pro libertate, gloriaque, et opibus animose dimicabat. Procedente tempore, postquam praemia virtutis adepti videbantur, ipsam posthabuere, non tam suis viribus tuti, quam fama potentiae a maioribus partae, usque divitiarum, quibus haud paullo felicius contra Graecos, quam armis, decertavere. Ad postremum itaque, cum adversus Alexandri vim auro parum proficeretur, omnique externa ope abscedente, sibi met ipsis innitendum esset, animi deliciis et mollitie fracti effeminatique fortunae ruentis impetum non sustinuerunt. Quippe industriam egestas acuit; affluentiam rerum luxus et inertia sequitur. Igitur audito sine Philippi, cuius fortuna et apparatus exterriti fuerant, metu soluti, Alexandri adolescentiam despiciebant; contentum fore arbitrati, si securo Pellae obambulare liceret. Verum cum de hellis ipsius victoriisque alia super alia nuntiarentur; contentum hactenus inveni- nem impensius formidantes, summa cura, ut in bellum atrox atque diuturnum, auxilia comparabant. Et quoniam superiorum proeliorum experimentis impar- em Asiaticum militem Europaeo didicerant, missis in Graeciam conquisitoribus, ad quinquaginta millia egregiae iuventutis mercede conduxerunt. His copiis Memnon Rhodius praetor datus est, qui multis ante bellis fidem virtutemque suam Persis abunde probaverat. Is ad occupandam Cyzicum missus, citatis itineribus, per Phrygiam, qua Troadi committitur, ad Idam montem pervenit, ipso nomine naturam situsque praeferebat: nam condensa arboribus loca *Idas* antiqui dixerunt. Exsurgit iste celsiore cacumine, quam ceteri ad Hellespontum montes. In medio specum habet religioso horrore famam in fabulis nactum, ut ibi

*Dearum formas arbiter Troianus spectasse prae-*  
*dicetur, cum imperio patris expositus, in Ida monte*  
*adolevisset. Eadem Idaeorum Dactylorum patria esse*  
*fertur, qui primi, Magna Matre docente, ambiguum*  
*ferri usum, neque minus utile necessitatis laborisque*  
*solatium, quam acerrimum furoris instrumentum, in-*  
*vexerint vitae. Illud etiam admiratione dignum pro-*  
*ditur, quod circa canis exortum, ventis depressiora*  
*turbantibus, in summo Idaei iugi cacumine quietus*  
*aër est: quodque multa adhuc nocte terris incu-*  
*bante, solem aiunt conspici, non globi figura, sed*  
*in amplissimam latitudinem sparsum, et velut di-*  
*versis ignium agminibus utrumque montis latus*  
*amplexum, coire paullatim, et propinquante iam*  
*luce iugero paullo maius spatium implere, paullo-*  
*que post in solitum orbem collectum destinatum*  
*iter percurrere. Credo, per aërem nocturno gelu ad-*  
*strictum, nullisque ventorum flatibus disiectum, solis*  
*orientis, adhuc imperfecta imagine late sparsa, fallax*  
*oculis miraculum apparere; donec eo paullatim vi ca-*  
*loris absunto dissipatoque, liber ad ipsum sideris or-*  
*bem adspectus permittatur. Nam sereno liquidoque*  
*coelo radii transmittuntur: ubi coactus aër est, sistit*  
*exceptos, et tanquam in speculum incidentes cum*  
*incremento splendoris diffundit. Sub Idae radi-*  
*cibus Cyzicenus ager in Propontidem excurrit:*  
*ipsum oppidum in mediocri insula situm gemino*  
*ponte continenti annectitur. Sed id opus paullo post*  
*Alexander molitus est: sub Memnonis expeditionem*  
*navibus commeabatur. Qui cum Cyzicenos improviso*  
*impetu nequidquam tenuisset, muros gnaviter tuenti-*  
*bus oppidanis; eorum regionem hostiliter populatus,*  
*magnam inde praedam coëgit. Nec a Macedonum du-*  
*cibus cessabatur: Parmenio Grynium Aeolidis oppi-*  
*dum expugnat, incolas servituti addidit: deinde Caicum*  
*annem transgressus, Pitanen adoritur, urbem opu-*

lentam, et duplici portu accipiendis ab Europa copiis opportunam; sed propero adventu Memnonis statim soluta obsidio est. Calas deinde, qui cum modicis Macedonum atque mercenariorum copiis in Troade regerebat, cum Persis proelio certavit: et impar hostium multitudini in Rhoeteum se recepit.

CAP. II. Interea Alexander, constitutis in Graecis rebus, in Macedoniam reversus, *quae tantam bellum molem aggressuro cavenda vel administranda essent*, cum amicis deliberabat. Antipater ac Parmenio aetate et dignitate praecipui obtestabantur, *Ne in uno corpore totius imperii salutem fortunae insidiis exponeret: quin prius operam daret liberis; et incolumitate patriae firmata, ita demum de incremento eius cogitaret.* Quippe praeter Alexandrum nemo ex Philippi sanguine dignus imperio supererat. Cleopatrae sobole per Olympiadem intercepta: Aridaeus sordibus materni generis, et turbata mente Macedoniam dedecere putabatur. Verum ille quietis impatiens, nihil nisi bellum, et ex victoria gloriam assidua cogitationeolvebat. Igitur, *Vos quidem, inquit, ut probos et amantes patriae viros decet, de commodis adversisque illius haud sine causa solliciti estis. Arduum enim, quis neget? opus ordimur, quod semel temere coeptum, si eventus arguat, serae poenitentia nequaquam emendaverit. Nam antequam vela solvamus; navigare velimus, an quiescere, nostra consultatio est: cum ventis fluctibusque nos crediderimus, in ipsorum arbitrio omnis noster cursus erit. Itaque non moleste fero vestram opinionem a sententia mea dissidere; quin potius simplicitatem laudo, vosque precor, ut in iis etiam, de quibus porro referetur, eodem instituto utamini. Amici regum, si qui eo nomine digni sunt, non tam gratiam eorum, quam utilitatem atque decus, in consilio habent. Qui aliter fieri cen-*

*et, quam ipse facturus erat, non instruit consul-  
torem, sed decipit. Ceterum ut et vobis consilii mei  
ratio pateat; certum habeo, nihil minus convenire  
rebus meis, quam dilationem. Omni, quae circa  
Macedoniam colit, barbarie pacata, extinctisque  
Graecorum motibus, fortissimum florentissimum-  
que exercitum otio et desidia dilabi patimur; an  
potius in opulentissimas Asiae regiones inducimus,  
olim possessionem eius spe complexum, et praemia  
laborum, quos diu sub patre meo, deinde nobis im-  
perantibus tertium iam annum exhaustit, ex Per-  
sarum spoliis expetentem? Novum adhuc impe-  
rium Darii est, et interfecto Bagoa, cuius beneficio  
regnat, crudelitatis et ingratitude suspicionem  
apud suos incurrit: quae res optimos eorum, qui  
parent, odio adversus imperantes implent, et ad  
obsequia segniores, aut etiam praefractos reddunt.  
Numquid sedebimus, dum auctoritas eius confirme-  
tur, et rebus domi per otium compositis, ultro bel-  
lum in Macedoniam transferat? Multa celeritatis  
praemia sunt, quae nobis cessantibus ad hostem  
vertinebunt. Magnum in eiusmodi negotiis mo-  
mentum post se trahit prima animorum inclinatio:  
ut illa semper occupanti parata est. Quippe nemo  
unctanter appetit fortioris gratiam: porro fortior  
abebet, qui infert bellum, quam qui excipit.  
Quanto autem existimationis nostrae periculo  
allemus spem eorum, qui adolescentibus nobis  
um honorem deferendum iudicaverunt, quem ma-  
ximus imperator, pater meus, post tot virtutis ex-  
perimenta paullo ante obitum obtinuit? Non enim  
leo Graecorum concilium imperium nobis decre-  
vit, ut in Macedonia desides, et ignavis volupta-  
tibus addicti, iniurias olim et nuper Graeco nomini  
ullas negligeremus: sed ut eorum, quae per sum-  
mam superbiam improbe et petulanter in nos com-*

miserunt, poenas penderent. Quid dicam de  
 Graecorum nationibus, quas late per Asiam diffusa  
 eas impotentium barbarorum intoleranda servitus  
 premit? Equidem quibus nuper precibus, quibusque  
 argumentis causam eorum Delius Ephesius  
 egerit, cum ipsi memineritis, non repetam. Id sane  
 constat, eos omnes, ut primum signa nostra con-  
 spexerint, protinus ad nos esse transituros, et pro-  
 liberatoribus assertoribusque suis adversus gra-  
 iniquosque dominos quodlibet periculum impign-  
 suscepturos. Quamquam quid nostri pariter hosti-  
 umque obliti auxilia circumspicimus adversus  
 gentes, quas etiam paullo lentius vicisse a pudore  
 quam gloria propius abfuerit? Patrum aevo in  
 Asiam profectis Lacedaemoniorum paucis ingentes  
 hostium exercitus frustra restiterunt: Phrygiam,  
 Lydiam, Paphlagoniam, agi ferrique passi; aut  
 quoties vetare voluerunt, ad hostium satietatem  
 caesi sunt: donec a suis revocatus Agesilaus, ob  
 exortos in Graecia tumultus, trepidantibus et con-  
 siliis incertis animi ex tanto terrore recipiendi spa-  
 tium concederet. Paucis ante istum annis vix de-  
 cem Graecorum millia, sine ducibus, sine comite-  
 tu, ex intimis Persici imperii partibus, per tot  
 infestas nationes iter in patriam ferro aperuerunt,  
 cum eos persequeretur universus regis exercitus,  
 quo modo cum Cyro fratre de regno dimicaverat  
 victorque exstiterat: quem illi quidem ubicunque  
 congressum fuderunt fugaveruntque. Nos igitur,  
 quibus universa Graecia tot victoriis edomi-  
 ta paret, qui eorum fortissimos aut in acie cecidi-  
 mus, aut habemus in castris, timebimus scilicet  
 Asiam, quam eorum, quos vicimus, pauci pudendis  
 cladibus affecerunt? Aliis deinde in eandem sen-  
 tentiam adiectis, adeo permovit animos, ut omnibus  
 assentientibus etiam Parmenio, qui maxime bellum

differrī voluerat, maxime accelerandum censeret, ultroque iam Alexandrum hortaretur. Itaque omni cura ad maturandam profectiōem conversa, ad Diū Macedoniae urbem Iovi Olympio sacrum fecit, institutum ab Archelao, qui post Perdiccam Alexandri filium regnavit, Musis quoque ludos scenicos fecit, per novem dies, pro numero Dearum. Post haec convivium summa magnificentia celebratum est, tabernaculo, quod centum lectos caperet, adornato. Ibi cum amicis, ducibusque, et civitatum legatis accubuit. Per exercitum quoque victimas dividi iussit, aliaque praebere, quibus destinatus hilaritati dies festivis epulis, et faustis instantis belli ominibus, transigeretur.

CAP. III. Vere novo, contractis undique copiis, in Asiam transiecit, exercitum robore, quam numero, validiorem ducens. Triginta peditum millia Parmenio ducebat: quorum Macedones tredecim expleverant; quinque erant mercede militantium; ceteram multitudinem socii foederatique miserant. Has copias Illyrū Thracisque et Triballi, ad quinque hominum millia sequebantur, additis mille Agrianorum sagittariis. Equitatum Macedonum mille octingentorum Philotas ducebat, et totidem ex Thessalia Calas: a reliqua Graecia sexcenti omnino equites venerunt, quibus Erigyium praeposuit: agmen ducebat Cassander cum nongentis Thracum atque Paconum antecursoribus. Hunc exercitum, non ultra quam in trigiuta dies proviso com meatu, infinitis barbarorum copiis opponere non dubitavit; virtute suorum fretus, qui vincendo senes facti, robore animorum armorumque usu cuilibet multitudini hostium insuperabiles erant. Antipatro, quem cum duodecim milibus peditum, et mille quingentis equitibus Macedoniae Graeciaeque rebus praefecerat, iniunctum, ut continuos in Europa delectus ageret, quibus adversus proeliorum fatique detrimenta exercitus subiade novaretur. Hoc unum sibi excep-



rat, cum cetera amicis largiretur. Quidquid enim salva maiestate regni abesse poterat, priusquam naves conscenderet, inter suos distribuit. Perdiccas praedium, quod dabatur, non accepit, interrogato rege, *quid tandem sibi ipsi reliqui faceret?* atque illo subiiciente, *spes: Barundem ergo, inquit, et nos participes erimus, qui tuis auspiciis militamus.* Pauci hunc secuti sunt: per ceteros non stetit, quin interrogatus, *ubi thesauri ipsius essent? verè responderet, apud amicos.* Sane de summa rerum alea iacta, non absurde collocasse videtur opes, quas habebat: quippe aut victor multo maiores adepturus erat; aut si victus esset, istas quoque amissurus: atque interim alacrioribus ministris utebatur. Neque multum abscedebat praesentibus necessitatibus, cum agros et praedia, et redditus, quorum dies multo post venturi erant, donaret: pecunia in belli usum seposita, cuius quanto minor copia erat, diligentius administrabatur. Quippe Philippo interfecto, minus sexaginta talentis pecuniae signatae, paucaque ex auro et argento pocula in thesauris eius reperta sunt, cum aeris alieni quingenta ferme talenta relinqueret. Quamquam enim iste rem Macedonicam insignibus incrementis auxisset, auri quoque metallis apud Crenidas, (ipse Philippos appellavit,) ita exultis, ut inde mille talenta annui proventus cogerentur; continuis bellis, neque minus largitionibus, aerarium exhauserat. Macedoniae etiam instaurandae ornandaeque magnos sumtus fecerat, cum pauperrimam accepisset. Ipsum inter initia regni tenuem fuisse, et cum ex quinquaginta drachmis auri peculum haberet, id cubitum euntem capiti subiecisse plerique meminerant. Huius ergo filius bello lacessivit regem Persarum, cui somnum capienti quinque talentorum auri millia pro cervicali, tria argenti pro scabello, sub capite pedibusque lectuli, peculiaribus cubiculis servabantur: quamquam ad paternum aci

alienum octingenta insuper talenta, quae ipse mutuo sumserat, adiecisset; ex quibus vix decima portio supererat. Solvisse autem dicitur Timotheo tibiis concinente, summaque militum alacritate, opes barbarorum, quos oppugnatum irent, certa fiducia sibi destinantium. Hoc modo per lacum, quem a vicini montis nomine *Cerciniten* vocant, ubi classem habebat, in *Strymonem* invectus, *Amphipolin*, et deinde ad ostia *Strymonis* processit: quo trajecto, praeter montem *Pangaeum*, viam ingressus est, quae *Abderam* et *Maronem* ducit. Nam in litore iter facere instituerat, ut navibus suis, quae iuxta ducebantur, praesidio esset, si Persae forte occurrissent; quippe isti tum etiam maris imperium obtinebant. Ipsi enim modica classis; at apud hostes Cypriae Phoeniciaeque naves, assuetique maritimis rebus classarii, et exercitatissimi remiges erant. Nam Macedonia, nuper tentato maris imperio, nondum abundabat navibus; et a sociis maligne praebantur. Etiam Athenienses, cum ab ipsis triremes peterentur, tantum xx miserunt, suggerentibus eorum oratoribus, *periculum esse, ne classe accepta, contra eos, qui misissent, uteretur*. Ex iis locis ad *Hebrum* fluvium contendit: quo haud difficulter transmissio, in *Paeticam Thraciae* regionem pervenit: inde superato amne, quem *Melunem* appellant, vigesimo postquam a domo profectus fuerat die, *Seston* attingit, in extremis continentis finibus *Hellesponto* imminentem, qua angustis fluctibus insinuatum mare *Asiam* ab *Europa* dirimit. Quippe Macedonia *Thraciam* coniunctam habet; quae procurrens in ortum duobus capitibus *Asiam* tangeret, nisi intercedente pelago submoveretur: dextra *Hellespontos* arcet; ulterius *Bosphorus*, quem *Thracium* appellant, *Byzantium* a *Chalcedone* separat. Inter has angustias intercepta *Propontis* iam laxiore spatio iuxta *Bithyniam* et *Ponticas* regiones diffunditur. Infra *Bithyniam* *Mysia* est, dein

studiosior. Cetra usum reperio splendida, galea elegantior cristata, utrinque dependentibus pinnis candore et magnitudine insignibus, thorace lineo duplici. Galeam habebat ferream quidem, sed in purissimi argenti speciem splendoremque politam, Theophili opus. Collare ferreum internitentes gemmae distinguebant. Gladio cingebatur acumine et duritie in paucis notabili; augebatque pretium eius, quod in tanto ferri robore, levis et tractanti habilis erat. Huic armaturae interdum amiculum militare iniiciebat, quod genus tum *Siculum* appellabatur. Ceterum quibusdam horum post id tempus potitus est: nam thorax, quem diximus, inter spolia pugnati ad Issum proelii fuit; gladium Citicorum rex Cyprius dono dedit; Rhodii balteum, quem incomparabili industria conspicuum Helicon fecerat, egregius inter priscos artifices. Neque poenitet talia memorare, quae veteribus scriptoribus digna relatu videbantur; et alioqui magnorum regum dicta factaque, etiam quae leviora haberi solent, non sine fructu aut voluptate recoluntur. Certe arma Alexandri sequens aetas diu venerata est: quibus adeo percipit vetustas, ut ex Romanis imperatoribus alius post subacta Pontica regna chlamyde illius triumphum suum ornaret; alius thoracem Alexandri indutus percurreret pontem, quem aemulatione Darii Xerxisque in pelago struxerat. Post haec Alexander a Minervae fano digressus Arisben processit, ubi castra habebant Macedones, qui cum Parmenione transierant. Postera die praeter Percoten et Lampsacem ad Practium flumen contendit, quod ex Idaeis montibus ortum, Lampsacem Abydenumque agrum interfluit, deinde paulisper ad septemtrionem flexum, in Propontidem exit. Inde Hermodum praetergressus rex, ad Colonas duxit, in mediterraneis Lampsacem situm oppidum. Omnibus istis in deditionem acceptis, (nam et Lampsacem ignoverat) Panegorum misit, qui Priapeno-

rum urbem, quam incolae dedebant, reciperet: Amyntas Arrabaei filius cum quatuor antecursorum turmis, una Apolloniatum, quam Socrates ducebat, speculatum ire iussus; quippe hostes in propinquo versabantur, summa sollicitudine curaque bellum instrumentes. Inter eos rei militaris peritia longe eminebat Memnon. Is magnopere suadebat, ut retrocedentes, omne quod usui hostibus esse posset, longe lateque corrumpere; quidquid in campo herbidum esset, equitatu conculcarent; vicos urbesque incenderent, nihil praeter nudum solum relicturi. Vix unius mensis com meatu instructum verisse Macedonem, deinceps rapto victurum. Ea copia si eripiat, brevi recessurum esse. Ita parvo impendio toti Asiae salutem quaeri. Triste id quidem: sed in omni negotio, ubi periculum immineat, id spectare prudentes, ut quam minimo damno defungantur. Ita medicos, si correpta parte corporis morbum in ceteras transiici videant, unius membri iactura pro reliquo corporis incolumitate pacisci. Neque id sine exemplo facturos Persas. Sic olim Darium regem ipsas illas regiones urbesque vastavisse, ne Scythis isthac transituris receptus esset. At si proelio contenderent, de summa rerum aleam iaci. Pulsis semel Persis, omnem eam oram Alexandri fore: victores nihil amplius habituros. Neque hercule parvum discrimen impendere ob vim Macedonicae phalangis, cui suum peditatum, quamquam numero superiorem, frustra opposituri essent. Ipsius deinde regis praesentiam haud parum valere ad victoriam; stimulari milites spe, pudore, gloria, in conspectu imperatoris dimicantes: quae omnia haberent Macedones; ipsis abesse Darium. Neminem ambigere, quin bellum in aliena terra gerere praestet, quam in sua: id commodum adepturos, si consilium suum secuti de invadenda Ma-

*cedonia cogitarent. Nulli ceterorum ducum grata oratio fuit. Id fortasse Memnoni Rhodio probari posse, cui expediat bellum trahi, quo diutius honoribus, stipendiisque regiis perfrueretur; Persis commissos fidei suae populos prodere pudendum videri: neque apud regem excusari posse, qui longe aliam belli gerendirationem praescripsisset. Quippe Darius, audito, Alexandrum ex Macedonia movisse, literas ad praefectos suos miserat, imperans, ut insanientem Philippi adolescentulum, pueri verbere aetatis et conditionis admonitum, deinde purpurea veste indutum, quamprimum sibi vinctum adducerent: naves ipsius una cum nautis mari demergerent: milites omnes ad ultima maris Erythraei loca deportarent. Adeo prae superbia futuri securus, et ignarus sortis suae, omnem humanae imbecillitatis sensum exuerat, consanguineum Deum se ferens, magis quod potentia non dispar ipsis videretur, quam ob veterem fabulam, qua Persarum reges a Perseo Iovis filio nomen atque genus traxisse ferebatur. Eodem fastu plenam epistolam ad Athenienses paullo ante scribi iusserat, addideratque, quando Macedoniae amicitiam praetulissent, a se deinceps aurum ne peterent: non enim missurum esse, etiam rogantibus.*

CAP. V. At Alexander, cum inter progrediendum agrum a rege Persarum Memnoni dono datum attigisset, maleficio abstinere iubet, colonisque et fructibus parci: callido commento suspectum facturus hominem industrium, et quem ex omnibus hostium ducibus unum non contemneret, si in suas partes transducere nequivisset. Cumque lenitatem regis admirati quidam, acerrimum callidissimumque Macedonum hostem, quamprimum in potestatem reductus esset, interficiendum, atque interim quibus posset cladibus vexandum esse, dicerent: Quin,

inquit, *potius beneficiis supplantamus hominem, et amicum ex inimico facimus, eadem virtute et solertia pro nobis staturum.* Ventum erat in campos Adrasteae, per quae Granicus amnis praecipiti cursu volvitur. Ibi quidam ex speculatoribus, quos cum Hegelochi praemiserat, reversi nuntiant, *Persas instructis ad proelium ordinibus in ulteriore ripa consistere.* Paullisper commoratus, dum de transitu consilium caperet, *duces convocari iubet.* Plerisque *praecipitis et irriti conatus videbatur, fluvium profundum perrumpere, ripam sua natura arduam atque impeditam obtinentibus tot equitum pedumque millibus.* Nec deerant, qui ingererent, *Daesium mensem* (is enim agebatur, Iunio respondens) *infaustum res gerentibus apud Macedonas haberi.* De periculo non anxius, superstitionem haud contemnit: gnarus, quantum in rudibus animis valeret etiam vanae religionis opinio. Igitur edixit, ut repetito prioris mensis nomine, pro Daesio alter Artemisius haberetur. Et quo efficacius confirmarentur attonitae mentes, Aristandrum (nam is forte pro transitu sacrificabat) secreto moneri iubet, *ut excepturam exta manuum inscriberet medicamento, literis inversis, quas impositum iecur recenti adhuc calore attraheret, ectasque exprimeret.* Iis significabatur, *Alexandro victoriam concedere Deos.* Vulgatum id miraculum tanta futuri spe omnes implevit, ut *post haec tam erta coelestis favoris pignora nihil dubitandum proclamarent.* Ita in maximam bene gerendae rei fiduciam astu inducti, victoriam, quia suam esse arbitrantur, rapuerunt. Rex impetu animorum utendum ratus, quamquam monente Parmenione, *ut saltem proximam lucem operiretur,* (iam enim maior diei ars effluerat,) statim transduxit copias, Parmenionis sollicitudinem ioco prosecutus, *erubescendum Helleponto fore, si illo superato rivum hunc transire*

*cunctarentur.* Tredecim equitum turmae cum ipso rege per oblucentes undas vix enisae, priusquam stabile certumque solum attigissent, aut ordines inter transeundum laxatos iustaurassent, circumfuso Persarum equitatu urgebantur. Quippe cum repudiato Memnonis consilio pugnare placuisset, (nam Arsites Phrygiae satrapa, *ne unum quidem tugurium eorum, qui sibi subessent, incendi se passurum*, affirmaverat; inque eius sententiam a ceteris itum erat) ad Granicum amnem cum centum peditum millibus, viginti equitum conederant, flumine pro munimento usuri, et vicissim eam velut Asiae portam venienti Alexandro obseraturi. Cuius adventu cognito, equitatum, in quo robur erat virium, ita collocant, ut contra dextrum Macedonum cornu, quod ipse rex ducebat, (nam sinistrum Parmenioni commiserat,) Memnon cum filiis et Arsane Persa consisterent: in eadem parte Arsites curabat cum Paphlagonum equitum auxiliis: in subsidiis Spithridates erat, gener regis, Libyae Ioniaeque satrapa, Rhoesace fratre et Hyrcanis equitibus comitatus. In dextra acie Rheomithrem duo Medorum millia, totidemque Bactriani sequebantur: medium agmen Pharnaces reginae frater, Arbupalesque Artaxerxis ex Dario nepos, et Mithrobarzanes Cappadociae praetor regebant: iis Niphates Petanesque, cum Arsace et Atizye, variarum gentium turmas applicuerant. Si tum multitudine et loco potiores graviter premebant hostem, acrisque pugna conserebatur, maximo omnium regis periculo, quem armis manuque et imperiis conspicuum plures petebant. Sed tragula quidem, quae in promiscuo pugnae ardore desinentis loricae plicis inciderat, vulnus haud intulit: ceterum a Rhoesace et Spithridate, fortissimis ducum, simul impetitus, extremum discrimen adiit. Dum enim lancea in thorace Spithridatis confracta, conatumque destituente, gladium stringit; frater illius a latere adequitans acina-

cem incauto impingit, tanto nisu, ut cristam galeae et pinnarum alteram decuteret, aciesque gladii summos regis capillos perstringeret. Iamque repetito ictu, qua discussa cassis nudum caput ostendebat, descendere parabat; cum illum Clitus occupat, qui animadverso regis periculo amenti similis advolaverat, interceptumque barbari brachium cum ipso gladio deiicit. Simul Alexandri ense Spithridates occubuit. Nihil tamen segnius repugnabant Persae: donec interitu ducum, quorum plerique iam ceciderant, consternati, et quia iam etiam phalanx Macedonum transierat amnem, equos in fugam averterunt. Neque pedestris acies diu restitit: equitatum suum ad obtinendum hostem satis superque validum arbitrati, potius de praeda, quam de discrimine, cogitabant. Ita subito eventu deprehensorum caedes magis, quam proelium, fuit. Mercenarii tamen, quibus Omars praecerat, occupato quodam tumulo strenne se tuebantur, quia conditionibus in fidem venturos ille non receperat. Ergo Macedonum plures in eo conflictu desiderati sunt, quam equestri proelio ceciderant: ipse quoque rex, dum inter primos impetum in eos facit, tam propinquus discrimini fuit, ut equum, cui tum insidebat, ictu gladii per latus adacto confossum amiserit. Quibus rebus vehementer irritatus, equitatu simul et phalange circumdatos occisione occidit, exceptis duobus fere millibus, qui in deditio-nem venerunt. In universum caesa sunt ex hostibus viginti peditum millia, duo equitum: captorum par ferme numerus fuit. Ex ducibus Memnon effugit, cum Arsace, Rheomithre et Atizye: ceteri honestis vulneribus occubuerunt. Arsites, cum in Phrygiam se recepisset, pudore et poenitentia, quod huius cladis causa non immerito haberetur, sibi manus intulit. Alexander paucos quidem, sed promptissimos, eo proelio perdidit. Triginta admodum pedites, septuaginta quinque equites ceciderant. Igitur ut ostenderet



omnibus in utraque fortuna apud se virtuti praemium fore, superstites Persarum spoliis ditat: occisorum corpora cum armis ceteroque cultu magnifice sepelit: parentibus eorum liberisque vacationem munerum concedit. Vulneratorum etiam cura ambitiose acta est, cum ipse rex obeundo tentoria et inspiciendo singulos sollicitudinem suam pro gregariis etiam militibus ostentaret, ac gravem cuiusque casum munificentia laudibusque aut promissis soleretur. *Quae comitas in omnia deinceps pericula fidissimos ei praestitit: nec quisquam recusavit spiritum pro eo rege profundere, qui neque vitam suorum inopem, neque mortem inhonoratam, pateretur. Insignis prae ceteris honor fuit viginti quinque equitum ex turma amicorum, quos primo statim congressu ex iniquo loco pugnantes multitudo Persarum oppresserat. Nam Lysippo, a quo uno, propter hominis peritiam, in aere fingi voluerat, imperavit, ut equestres ipsis statuas faceret: quas apud Dion Maedoniae oppidum collocatas, post longam aetatem, abolito Macedonum regno, Q. Metellus Romam transtulit. Primum huius victoriae decus p̄enes ipsum regem fuit. Aciem optime instruxerat, observataque loci natura, obliquos per flumen ordines duxerat, ne statim, cum ex aqua evasissent, a Persis invaderentur. Turbatos deinde territosque excitavit, hortatus, ut *saltem semel adhuc strenue adorirentur hostes.* Neque minus manu fortiter usus erat: multos lancea, alios ense confecerat: primique ex hostibus fugam arripuerunt, qui contra ipsum constiterant. Consilium quoque ipsius audaci specie, plus tamen rationis, quam temeritatis, habuit. Pugnaturos adversus hostem novum, numeroque longe superiorem, etiam desperatione armare voluerat, ut praecisam obiectu fluminis fugam conspicati, omnem salutis spem in victoria collocarent. Thessaforum etiam, nam id robor equitatus erat, insignis eo die opera exstitit. Neque ceteri officio*

suo defuerant, praesertim equites: nam equestri potissimum proelio transacta res est, pedites e vestigio cesserunt. Ceterum Alexander Persarum etiam nobilissimos sepulturae tradidit; et quotquot ex Graecis mercenariis hostibus merentes ceciderant: qui autem eorum vivi in potestatem redacti fuerant, eos per Macedoniam in ergastula distribui iussit, quod contra commune Graecorum decretum, pro barbarorum dominatione adversus patriam pugnassent. Thebanos tamen dimisit, qui excisa urbe, ademptis agris necessitate magis, quam sponte, peccassent: iam enim tot illorum calamitatibus expleta odia misericordiae locum fecerant. Post haec de manubiis trecentos clypeos selegit, qui Minervae Atheniensi dedicarentur, superbo eum titulo: *Alexandrum Philippi filium Graecosque, exceptis Lacedaemoniis, de barbaris Asiam incolentibus suspendisse*. Id eo fecerat, ut communicata victoriae laude Graecis ad ceteras belli necessitates obsequentioribus uteretur: simul Lacedaemoniorum contumaciam traducebat, qui seorsum initis consiliis a cetero Graeciae corpore abrupti, tantique decoris expertes mansissent. Neque matris, quam eximia pietate semper coluit, oblitus, pocula, purpuram, aliaque id genus pretiosa spolia, paucis demtis, ad illam transmisit.

CAP. VI. Post hoc proelium denno ad Ilium profectus Alexander, Deae gratias egit, quae gravissimi belli discrimen aditurum, armis et omnibus iuvisset. Quippe superiori tempore cum statim post transmissum Hellespontum eo contendisset, uti supra retulimus, ante fanum Minervae statuam equestrem humi prostratam vidit, Ariobarzani ora referentem, qui Phrygiae quondam satrapa fuerat. Idque omen interpretatus Aristander illustrem ex equestri pugna victoriam promiserat Alexandro, maxime, si haud procul Phrygia dimicaretur: ipsius etiam dextra

*nobilem hostium ducem casurum.* Neque fefellit spem vatis eventus proelii, stratusque regis esse Spiritridates praedictionis fidem implevit. Igitur et templum donariis exquisite coluit, et Ilio, quod tum haud multum supra modici pagi speciem eminebat, nomen urbis addidit: utque id cum dignitate tueretur, reliquit, qui instaurandae eius ampliandaeque curam agerent, liberamque et immunem esse iussit. Cumque delubrum Deae pro religione loci *nimis angustum neglectumque videret, eximium illi templum exstruere* postea statuit. Sed hoc aliaque magnifica meditantem, fatum occupavit; neque successores exsecuti sunt. Ceterum illa victoria totam Asiam cis Taurum et Euphraten aperuit regi. Attoniti insperata clade, non copiis modo, sed et ducibus *amissis, nullam praeterquam in clementia victoris spem habebant; eamque festinata deditioe certatim promereri satagebant.* Phrygiam Arsites voluntario exitu vacuam fecerat: ei Calas Thessalorum ductor praepositur. Ex montanis quoque locis plerique descenderunt, seque et sua dederunt Alexandro. Eos in fidem acceptos domum remisit: Zelitisque ignovit, quos a Persis coactos adversus ipsum militasse cognoverat. Tributum omnibus impositum est, quod Dario pendere consuevissent: idque postea constanter servavit, cum ceteras Asiae regiones subigeret. Omne peregrinum imperium invidiae subiectum esse noverat, etiam cum domestico mitius est: at si vetera subditorum onera novis cumulentur, intolerandum haberi. Igitur monenti cuidam, *longe plus tributorum vectigaliumque ex tanto imperio redigi posse,* respondit, *etiam olitorem se odisse, qui radicibus excinderet olera, quae carpere debuisset.* Dascyleum praesidio Persarum teneri audiverat. Eo Parmenionem misit, quem oppidani statim receperunt, cum audito Macedonum adventu, Persae excessissent. Ipse Sardes processit, caput omnium, quae

praefectis orae maritimae Persarum reges parere iusserant. Iamque haud amplius septuaginta stadiis ab urbe aberat, cum ad eum Mithrenes venit, cui tutelam arcis Sardonianae Darius crediderat, cum principibus Sardonianorum, urbem arcemque, et pecuniam, quae in ea custodiebatur, tradituri. Quibus benigne exceptis, ad Hermum fluvium progreditur, viginti fere stadiis ab urbe distantem. Ibi castris positus, Amyntam Andromenis filium ad recipiendam arcem praemittit. Ea praecipuo loco sita, difficili undequaque aditu, adversus quamcunque vim teneri potuerat, etiamsi murus, qui triplici munimento illam circumibat, abfuisset. Ergo felicitati suae gratulatus, quod amplissimas res animo volentem, arx munitissima longa obsidione non implicasset, Iovi Olympio templum ibi ponere decrevit. Cumque sollicite circumspiceret, quinam locus accipiendae aedi maxime opportunus foret, confestim exorta vehemens tempestas multo imbrem partem arcis perfudit, ubi vetus Lydorum regia fuerat. Eam itaque sedem nutu Deorum destinari credens, *templum ibi constitui iussit*. Arci deinde Pausaniam ex amicorum cohorte praeponit, attributis Argivorum auxiliis; ceteras sociorum copias cum Cala et Alexandro Aeropii filio in Memnonis praefecturam immittit. Vectigalibus tributisque colligendis Niciam quandam praeficit; Asandrum Philotae filium Lydiae, quibus finibus Spithridates tenuisset. Dati ad id equites cum expeditis cohortibus, quot in praesentia suffecturi putabantur. Lydos omnes suis legibus libere uti permittit; et quia Sardonianos Dianae, quam *Coloenam* vocant, cultui deditos cognoverat, illius templo ius asyli gratificatus est. Mithrenem honorifice secum habuit, ut eius exemplo et alios ad prodicionem illiceret: procedente tempore et Armeniam homini regendam commisit. Ceterum repertis in arce libellis, in quibus inter cetera perscriptae erant largitiones, ob bellum Mace-

donibus in Graecia conflandum a satrapis factae, cognovit, Demosthenem eam ob causam magnum auri pondus accepisse; cuius etiam epistolae ibi servabantur. Sed quia pace cum Atheniensibus inita transacta res erat, nihil ea de re palam conquestus est; ceterum intentiore cura agitaandum censuit, quomodo adversus efficacem viri eloquentiam Atheae in officio continerentur, sua defectione universam Graeciam in partem tracturae. Nemo occurrebat Phocione dignior, cuius mira innoecentia, et ob constantiam virtutis honorata paupertas erat. Eum ergo, primum ob usum, deinde ut hominis magnanimitatem multis experimentis cognovit, admiratione virtutis ita coluit, ut cum post eversum Darii imperium animo elatus, neminem iam salute dignaretur, ad quem scribebat, eximium eam honorem duobus tantum, Antipatro et Phocioni, haberit. Constat, huic aliquando centum talenta donomississe regem: deinde optionem fecisse inter quatuor haud ignobiles Asiae urbes unam eligendi. Cius, Elaea, Mylassaque et Gergetho fuere: quidam ultimo loco Patara nominant. At ille nihil horum accepit: sed, ne tanti regis amicitiam fastidiose sprevisse videretur, petiit, ut *Echecratides sophista, et Athenodorus Imbrius, cum Demarato et Spartone Rhodiis*, qui in arce Sardiana captivi tenebantur, *custodia liberarentur*. Sed haec in sequens tempus excurrere. Tum ad Ephesum itum est, quam accepto cladis Persicae nuntio praesidarii deseruerant, duabus Ephesiorum triremibus aucti. Erat inter eos Amyntas Antiochi filius, qui ex Macedonia profugerat, nulla quidem iniuria affectus, sed quod periculum a rege metueret: quem quia invisum exosumque habebat, illius animus ex suo metiebatur. Quarto postquam Sardibus movisset die, Ephesum introiit Alexander; restitutisque exsulibus, qui paucorum dominatione pulsati fuerant, rempublicam populo tradidit. Ille libertatis diu desi-

deratae compos, eos, qui Memnonem advocavissent, quique templum Diauae spoliassent, inque eo Philippi statuum deiecissent, aut Heropythi monumentum effodissent, quod liberatori civitalis in foro positum fuerat, ad supplicium poscit. Ex quibus Pelagon cum fratre Syrphace et patruelibus, ex ipsa aede, in quam confugerant, rapti sunt, statimque lapidibus obruti. Iamque in caedes et iniurias ibatur; cum Alexander, inhibita vulgilitentia, ulterius eo de negotio inquiri, aut cuique molestiam exhiberi vetuit. Id optimis quibusque saluti fuit, quos per causam veri fictive criminis, ipsorum dignitas aut opulentia, furibundae plebis odiis avaritiaeque obiecisset. Inter haec Magnetes et Tralliani legatos mittunt, imperium accepturi. *Eo Parmenione cum quinque peditum millibus, equitibusque ducentis ire iusso, Alcimalum cum paribus fere copiis circum Aeolicas Ionicasque Persici iuris urbes mittit. Utrique iniunctum, ut abolito paucorum dominatu, popularem ubique statum introducerent:* quippe multitudinem suis rebus studere compererat, obque eam rem tyrannos a barbaris impositos, per quos coërceretur. Per eos dies, dum Ephesi commoratur Alexander, ut ex instantibus curis recrearet animum, frequenter in officinam Apellis ventitavit, a quo uno effigiem suam penicillo exprimi volebat, tanto favore complexus, ut dilectissimam pellicum, amore eius deperire sentiens artificem, dono dederit. *Panasta vocabatur, ex Larissa nobili Thessaliae urbe genus ducens: amabatque eam rex ardenti affectu ob formae pulchritudinem, et quoniam adolescenti prima mulierum ad libidinem placuerat. Hoc ut magnanimitatem Alexandri non dedecet, ita non crediderim, in officina imperite multa disserentem ab Apelle mordaci dicitario repressum fuisse.* Nam id neque maiestati tanti regis, neque modestiae pictoris, hominis non stupidi nec indocti, convenisset: et Alexander, liberalibus

studiis ab extrema aetate imbutus, etiam de artibus, quas non calleret, haud inepte iudicare didicerat. Illud propius vero est, quod alii tradiderunt, *quendam ex Ephesiae Dianae sacerdotibus, quos Megabyzos appellari mos erat, reprehensum: cum quidem ei diceret Apelles, quoad tacuisti, aurum hoc atque purpura venerabilem te faciebant imperitis; at nunc de rebus, quas non intelligis, incipientem loqui, etiam pueri rident, qui colores terunt.* In ea urbe longe celeberrimam aedem, ut supra relatum est, Herostratus incenderat. Ea tum summa Ephesiorum cura maximisque impensis instaurabatur. Quorum studiis iuvandis Alexander tributa, quae Persis dare consueverant, Dianae pendi iussit: confirmavitque ius asyli, quod antiquitus etiam Liberum patrem Herculemque servavisse cognoverat; addito etiam spatio, ut quaquaversum in unius stadii amplitudinem extenderetur. Postea quoque, cum Asiam perpacasset, scripsit Ephesiis, *se omnes sumtus, qui in id aedificium facti essent, restitutum; quique porro requirerentur, praebiturum de suo: ita tamen, ut ipsius nomen instaurato operi inscriberetur.* Idque deprecari sunt Ephesii. Quo tempore, quia Alexandro petenti aliquid denegare arduum erat, legatus eorum ad adulationem confugit, qua maxime expugnabilem norat, dixitque, *dedecere culmen ipsius, si Diis aliquid consecraret, cum ipse Deus esset: nam eum honorem ab hominibus haberi potiori naturae.* Ea gloriae contentio inter maximum regem, et unam civitatem fuit. Obtinuerunt Ephesii; et maluerunt ingenti pecunia carere, quam instaurati templi titulo regi cedere. Nam quantos in id opus sumtus contulerint, vel ex una tabula aestimare licet, quam ibi dedicaverunt, viginti talentis auri redemptam. Alexander erat, fulmen tenens, quem inimitabili dexteritate Apelles

expresserat, quatuor tantum coloribus usus, quo maius peritis miraculum esset.

CAP. VII. Sub idem tempus antiqui splendoris sedem Smyrnaei receperunt, postquam Lydorum armis excisa vetere Smyrna, quadringentos per annos vicatim habitavissent. Restituit eam rex viginti ferme stadiis a solo antiquae urbis, somnio monitus. Solebat Alexander, cum a maioribus negotiis vacaret, otium venando eximere. Forte exercito corpore fessus in Pago monte obdormiverat: ibi per quietem visus est audire Nemeses, (quarum in proximo fanum erat,) imperantes, *ut eo ipso loco urbem conderet, inque eam Smyrnaeos deduceret.* Id insomnium mox Clarii Apollinis oraculum confirmavit, Smyrnaeis consentibus *prospere cessuram migrationem promittens.* Ita fundamenta novae urbis imperio regis iacta sunt; absolutae gloriam Antigonus tulit, cum ipsum paullo post Alexander Lydiae Phrygiaeque, et vicinis regionibus, praeposuisset. In Smyrnaeo sinu Clazomenii habitant, qua angustissimum est solum, quod procurrentes in mare terras per sexaginta ferme stadia continenti adnectens, peninsulae speciem efficit. Alterum isthmi latus ex adverso Clazomeniorum Teos occupat. In extremo peninsulae cornu Erythrae sunt, tum quoque fatidicis mulieribus inclytæ: iuxta quas mons altissimus Mimas, insulae Chiorum oppositus mare prospectat; deinde paulatim depressior, haud procul angustiis Clazomeniorum in aequales campos desinit. Eam loci naturam contemplatus Alexander, faucibus intercisis auferre continenti decrevit, ut Erythris et Mimanti mare circumfunderet, ac superiorem inferioremque sinum coniungeret. Id unum regi ex sententia successisse negant, cum ceteros eius conatus fortuna enixe iuaret: abiitque res in religionem, *nec fas esse mortalibus existimatum est, mutare faciem, quam natura locis indiderit:* utique postquam alios



similia molitos ubique successus destituit. Clazomenas  
 tamen, mole duorum stadiorum aggesta, continentū  
 iunxit, quas olim metu Persarum Clazomenii in insu-  
 lam transtulerant. Sed haec quidem opera regis prae-  
 fectis commissa sunt. Ipse sacrificiis Ephesi magnifice  
 celebratis, in honorem Deae cum universo exercitu,  
 qui aderat, in armis decucurrit: postero deinde die  
 cum peditatu, quem secum habebat, assumtis Thra-  
 cum equitibus, et quatuor amicorum turmis, inter quas  
 et regia erat, Miletum contendit. Quippe Hegesistra-  
 tus, praesidii praefectus, literis ad eum missis, spem  
 deditionis fecerat: sed postquam Persarum classem in  
 propinquo versari cognoverat, mutata sententia oppi-  
 dum Dario conservare nitebatur. Nam et commea-  
 tum telorumque, et si qua alia ad tolerandam obsi-  
 dionem requiruntur, magnam habebat copiam, et  
 propugnatorum multitudine abundabat, quia Memnon,  
 cum ex proelio Miletum per fugisset, multis ibi suo-  
 rum relictis praesidium firmaverat. Igitur infesto  
 agmine suggestus, exteriorem urbem, ut ipsi voca-  
 bant, ex itinere cepit: nam oppidani militesque, ne  
 vires spargerent, in interiorem urbem concesserant,  
 auxilium suorum, quod haud procul abesse rebantur,  
 opperituri. Verum vanam expectationem fecit Ma-  
 cedonicae classis adventus, quae Nicanore duce Laden  
 insulam supra Miletum sitam occupavit: deinde cum  
 iam hostium classis ad Mycalen montem haereret,  
 ipsum Milesiorum portum ingressa Persici auxilii  
 spem oppidanis ademit. Neque prohibebant barbari,  
 quamquam numero navium longe praestarent: quippe  
 paullo minus quadringentis habebant, cum Nicanor  
 tantum sexaginta supra centum adduxisset. Interea  
 Glaucippus, princeps civitatis, ad Alexandrum missus,  
 petito, *ut urbem et portus Macedonibus Persisque  
 communes esse pateretur*, triste responsum retule-  
 rat, *Non se venisse in Asiam, ut acciperet, quod*

*alii concederent; sed ut quisque haberet, quod ipse reliquisset: itaque scirent, omnium fortunarum arbitrium meliōri permittendum, aut in proximam lucem de eo certandum esse.* Sed qui in civitate erant, primum invadentium impetum fortiter retulerunt, caesis inter alios duobus Hellenicae filiis, quae nutrix Alexandri fuerat, et Clitum, qui rege servato eximium decus meruit, fratrem habebat. Sed cum dolore iraque incensi hostes machinis admotis magnam murorum partem deiecissent, iamque in oppidum irrupturi viderentur, conspectisque in portu Macedonum triremibus, novus terror ingrueret; pars scutis incubantes in parvam insulam urbi obiacentem enataverunt, alii scaphis conscensis, cum idem molirentur, in ipso portus aditu ab hostium navigiis intercepti sunt. Alexander, oppido in potestatem redacto, contra eos, qui insulam tenebant, naves expediri iussit, quibus impositae prorae scalae ferebantur, ut in abruptam insulae oram, velut in muros hostilis oppidi, transcenderet miles. At cum mercenarios Graecos, qui eo confugerant, quamvis haud plures trecentis essent, ultima pati paratos conspiceret, misertus virorum fortium, et qui pro fide in eos, a quibus conducti erant, haud procul exitio abessent, iis pepercit, et *secum militare* iussit. Barbaros in urbe deprehensos in servitutem redegit: Milesiis, qui superfuerant, libertatem restituit, ob veterem urbis gloriam. Tantum enim aliquando opibus gloriaque Miletus floruerat, ut per vicina maria supra septuaginta colonias deduxerit, multis quoque civibus nobilibus, qui in sacris certaminibus palmam adepti, patriae celebritatem auxerant: nam eiusmodi victoriae, more quodam Graecorum, inter prima virtutis decora censentur. In quem iocatus Alexander, magna multitudine statuarum conspecta, *ubi erant istorum lacerti*, inquit, *cum Persarum iugum recepistis?* quippe vir strenuus, et ad bellandi

usum cuncta referens, ignominiosum ducebat, debitum seriis certaminibus robur ad voluptatem inertis vulgi inani ostentatione consumere. Interea milites, quia vi introitum erat, obvia quaeque diripientes, ad fanum Cereris pervenerant: quod cum exspoliaturi quidam irrupissent, ignis ex penetralibus aedis repente emicans, sacrilegorum oculos exstinxit. Hic etiam progenitorum suorum monumenta Alexander reperit, inspecto fonte, cuius aqua ex ipso scaturiginis labro hausta salsum saporem habet, eadem dulcissima, cum profluxit in rivulos. *Achilleum* Milesii nominant, inque eo frustratum heroem rumor tenuit, cum Strambelum Telamonis filium Lesbii auxilium ferentem oppressisset. Apud Milesios Didymei Apollinis oraculum erat, divitiis famaue celebre. Id tum Seleucus, cuius maximae post Alexandrum opes fuere, de reditu in Macedoniam consuluisse dicitur, et responsum accepisse, ut, *Europa valere iussa, Asiam complecteretur*. Aliud subinde miraculum attentum habuit regem, cuius curiosum ingenium, et cognoscendi avidum, novitate rerum mire afficiebatur. *Amatum a delphine puerum ex Iasso*, quod haud procul Mileto in insula situm oppidum est, acceperat; *eiusque vocem agnovisse piscem, et quoties evocaretur, vehemens cupientem excepisse dorso*. Igitur gratum acceptumque Neptuno hominem interpretatus rex, sacerdotio eius Dei illum praefecit.

CAP. VIII. Occupata hunc in modum Mileto, cum adhuc barbarorum numerosa classis in mari vagaretur, et fiducia multitudinis suae, quodque peritia rei nauticae Macedonas anteiret, hostem ad navale proelium provocaret, obque ipsum urbis portum, in quem naves suas abduxerat rex, frequenter obversaretur; Alexander Philotam cum equitatu et tribus peditum cohortibus ad Mycalen montem mittit, ubi Persicarum navium statio erat, ut exscendere volentes submoveret,

neque aquari lignarive, aut cetera necessaria e terra, petere permetteret. Ea res barbaros in maximas angustias coniecit: obsessis similes liaerebant in portu neque terram ubi volebant capere, aut necessariis rebus refici poterant. Itaque consilio habito, Samum averterunt cursum, petitoque inde com meatu, Miletum reverti ante ostium portus instructa acie constituerunt. Inter haec quinque Persarum naves in portu quodam, qui inter parvam illam iusulam, de qua supra dictum est, et stationem Macedonicae classis medius erat, multa hostium navigia conspicati, plenis velis eo ferebantur: nam maximam sociorum navalium partem ob varios usus abesse coniecerant, vacuarumque navium haud difficilem occupationem fore arbitrabantur. At rex iis, qui aderant, celeriter in decem triremes impositis, *obviam ire hostibus* iubet. Illi tum numero navium, tum inopinata re perterriti, cum ultro se peti conspicerent ab iis, quos imparatos oppressuri venerant, terga vertunt: una tamen navis, quae lassios vehebat, deprehensa est; ceterae velociores ad suam classem effugerunt. Ita nullo eorum, quae intenderant, effecto, Mileto discessum est. Alexander, cum suam classem neque hostili parem, et ad alios usus supervacuum sibi cerneret, multique et graves ad eam sumtus requirerentur, dimittere eam statuit, paucis navium retentis, quibus ad obsidiones urbium machinae tormentaque portarentur. Dissuaserat illud Parmenio, monueratque, ut navali proelio contenderetur. *Macedonibus enim victoribus magnum ad cetera emolumentum accessurum esse: at victos nihil sane amissuros, nam imperium maris iam tum esse penes Persas; et litora facile tutaturos, qui pedestribus copiis plus possent.* Quoque expeditius, quod videbatur, obtineret, idem, qui consilium dederat, *exsequi illud paratum ostendebat, conscensisque navibus, quam rex iussisset, discriminis*

*partem capessere.* Confirmabatur etiam augurio, quod superioribus diebus a tergo regiae classis aquila in litore consistens apparuisset. Contra Alexander falli Parmenionem asseverabat, qui paucas suorum naves tantae hostium multitudini, imperitosque remiges et rudes classiarios, exercitatissimis hominibus, rei que nauticae peritissimis, obiciendos duceret. Se quidem virtuti suorum non diffidere, ceterum scire, illam in navalibus pugnis minimum conferre ad victoriam. Multo enim plura ventorum fluctuumque ludibriis permitti, quae gubernatorum atque remigum peritia vitaret, aut suis partibus opportuna redigeret. Nec in ipsarum navium constructione nihil aut parum situm: ita Macedonum conatus vanos fore, cum eos barbari impune aut eludere, aut etiam, si casus daretur, opprimere possent. Neque vero exiguum id detrimentum futurum. Totam Asiam arrecturam animos, si inter initia belli clades accepta foret. Plerosque mortalium ita comparatos esse, ut eum rerum eventum expectandum putent, quem ex principio successuum spe aut formidine praeceperunt. Et ne de Asia dubitemus, inquit; quis mihi praestabit, Graecos in fide mansuros, si felicitatem illam exspiravisse credant, quam, si verum amamus, unam in nobis reverentur? Plane ad fortunam meam pertinere arbitror, quod aquila pone classem inspecta est, idque boni successus omen accipio: sed hoc manifesto promittit augurium, nos hostium naves e continenti expugnatuuros esse; nam praesaga victoriae ales, non in navibus, sed in litore constitit, nec magis eventum, quam locum ostendit belli. Nam si, ut coepimus, maritimas urbes nostri iuris efficimus, Persarum classis ultro dilabatur: neque enim supplementum, aut com meatus, aut securae etiam stationes in promptu

*erunt; et si haec adimas, quo plus in mari habent virium, eo celerius consumentur. Atque sic implebimus fidem vaticinii, quod aerae tabulae inscriptum nuper ex quodam in Lycia fonte ebullivisse comperimus, instare terminum Persici imperii. Ita dissoluta classe, Pontum adiacentesque Ponto regiones praetoribus suis subiugandas reliquit; ipse institutum iter prosecutus, in Cariam movit: nam eo magnam vim hostium confluisse cognoverat. Quippe Halicarnassus, natura loci munitissima, duplicique arce tuta, spem praebat, Macedonem, torrentis more ruentem, ea urbe tanquam crepidine opposita coerceri posse. Maxima in Memnone spes erat, qui omnia ad ferendam obsidionem opportuna summa cura praeparabat. Nuper enim a Dario maritimae orae totiusque classis praetor creatus erat. Nam homo callidus temporumque prudens, cum se, omnes Persicos duces bellicis artibus superantem, unam ob causam infra meritum honorari intelligeret, quod Graecus genere, et olim Macedonicae regiae hospes de proditione suspectus haberi poterat, uxorem suam liberosque ad Darium misit, quasi de securitate illorum sollicitus, revera ut his velut obsidibus fiduciam regis obligaret. Ceterum Alexander, Cariam introgressus, omnia inter Miletum et Halicarnassum oppida brevi in potestatem redegit. Pleraque enim Graecis incolis habitabantur, quibus immunitatem suasque leges restituere consueverat, ob liberandos eos in Asiam venisse professus. Neque minorem mox a barbaris iniit gratiam, comiter excepta Ada, regii generis muliere, quae iter per ea loca facientem convenerat, illiusque fidem implorans in regnum restitui oraverat. Nam Hecatomnus Cariae rex tres filios habuit, duas filias: ex quibus maximus natus Mausolus Artemisiam duxerat: minor ex sororibus Ada fratri Hidrieo nupsit. Sed Mausolo quidem soror eademque coniux successit, more gentis, quo in*

matrimonium regnumque sociari fas est iisdem parentibus genitos: at postquam Artemisia desiderio defuncti extabuit, Hidrieus regno potitus, et sine sobole mortuus, Adae reliquit imperium. Hanc Pexodarus expulit, qui unus de Hecatombni filiis supererat: et quamquam is decessisset, exclusa manebat, quia Oronobaten, nobilem Persam, Pexodarus generum adsciverat, ut in novo et vi parto imperio illius opibus et gratia protegeretur: atque ille, *extincto socero*, velut dotale regnum retinebat. *Eam iniuriam deplorans* mulier, simul Alindis deditis, (munitissimum id castellum erat,) impetravit, ut nomen filii, quod deferebat, lubens acciperet, strenuamque ei operam ad antiquae dignitatis decus mature recipiendum polliceretur. Neque promisso fides defuit; expugnataque deinde Halicarnasso, totam illi Cariam parere iussit. Interim fama benigne exceptae reginae, per omnem illum tractum diffusa, multas civitates Alexandro conciliavit; nam pleraeque a necessariis aut familiaribus Adae tenebantur: ii per legatos obtulerunt aureas coronas, *futurosque in fide ac potestate regis, et imperata facturos*, promiserunt. Dum haec ita geruntur, exquisitae artis saporisque cibos atque bellaria sollicitè confici curabat Ada, eaque cum ipsis coquis et cupediariis regi dono mittebat, tanquam benemerenti gratiam relatura, si munis armorum fessum fatigatumque Asiatici luxus deliciis exciperet. At ille prudens intemperantiam gulae seria tractanti intempestivam esse, benevolentiae quidem muliebri comiter gratias egit; ceterum *non attinuisse* respondit, *ut pro ipso sollicita esset, meliores habente coquos, quibus ipsum olim paedagogus suus Leonidas instruxisset: ad prandium iter antelucanum, ad coenam frugale prandium.*

CAP. IX. Iam tota ferme Caria in ditionem Alexandri concesserat; sed caput regni Halicarnassus firmo

praesidio tenebatur. Itaque diuturnam obsidionem fore coniectans, *commeatum, et machinas, quae ad oppugnationem pertinerent, navibus eo deportari iubet*: ipse cum pedestri exercitu quinto ab urbe stadio castra communit. Deinde muros adortum iuxta portam, qua Mylassa iter est, improvisa oppidanorum eruptio excepit: sed Macedonibus fortiter conserentibus manum, quibusdam suorum amissis haud magno negotio reiecti sunt. Pauci deinde dies intercesserant, cum Alexander obiecta spe Myndensium oppido per prodicionem potiundi, nocte intempesta cum parte copiarum proficiscitur. Sed nihil quoquam movente, admota gravi armatura murum suffodi imperat: neque enim scalas aut machinas attulerat, cum oppugnandi consilio urbem non accessisset. Et illi quidem, una turrium deiecta, nihil tamen aperuerunt loci, quo intra perumperent. Nam forte ita prociderat turris, ut quam murorum partem stans protexerat, non minus ruina sepiret: civesque summa ope resistebant, et ab Halicarnassensibus adiuvabantur, quos, audito vicinae civitatis periculo, maritimo itinere Memnon submiserat. Ita conatus Macedonum irritus fuit. Alexander, ad obsidionem Halicarnassi reversus, ante omnia fossam, triginta maxime cubitos latam, altam quindecim, quam hostes pro urbe duxerant, expleturus, tres testudines apparat, quibus protectus miles materiam terramque sine noxa congereret. Aequata fossa, *turres machinasque, quibus muri sternuntur, admoveri iussit*. Iamque strata moeniorum parte, qua ruinae viam aperiebant, in urbem penetrare nitebantur; sed hostes, cum ob multitudinem integri subinde fessis succederent, dumque praesentia ad omnia audenda confirmarentur, strenue repugnabant. Luce per varia certamina consumpta, cum diurno labore fatigatos hostes Memnon segnius custodias agere crederet, cum valida manu prorumpit oppido, ignemque operibus iniicit. Sed Macedonibus



ad incendium concurrentibus, cum hi extinguere flammam conarentur, illi auferent, et prohibentibus vim intendant, acriter proelium coortum est. Quippe Macedones robore virtutis et assuetudine periculorum longe praestantes hostibus, numero apparatuque Persarum urgebantur: et quia haud procul muris res gerebatur, ballistis catapultisque per moenia dispositis eximie impetiti, inulta vulnera accipiebant. Atrox inter haec utrinque clamor, hortantium suos, increpantium adversos; tum sauciorum et morientium gemitus, inter nocturnas tenebras omnia terrore tumultuque impleverant: augebantur haec vocibus ceterae multitudinis, quae dum alii pugnant, operi intenta, muris, qui pulsus machinarum corruperant, reparandis occupabatur. Tandem acrius adnisi Macedones hostem intra moenia redegerunt, centum septuaginta interfectis, inter quos et Neoptolemus, qui cum Amynta fratre ad Darium perfugerat, occubuit. Macedonam non quidem ultra sedecim perierunt; sed trecenti ferme vulnerati sunt, quia nocturna pugna fuerat, neque adversus caecos ictus et incidentia temere tela quinquam satis provideri potuerat. Post aliquot deinde dies levis et ludicra res ingenti certamini causam praebuit, orto initio a duobus veteranis ex Perdiccae agmine. Hi contubernales cum essent, unaque genio indulissent, ut fit inter sermones familiares, iactantia militari sua fortia facta vicissim extollentes, altercari coeperant, uter alteri anteferretur; cum alter eorum, *quid inani strepitu verborum foedam honestissimam contentionem?* inquit. *Non cui lingua, sed cui dextra sit melior, hoc agitur. Et adest occasio: ea optime de controversiis nostris iudicabit. Age, si vir es, exeuntem sequere.* Vino et ambitione incaluerant; itaque privato consilio arma capiunt, et ad muros iuxta arcem, quae Mylassis obversa est, excurrunt. Horum temeritate animadversa, statim et

oppido globus hostium effunditur. Illi firmato gradu certamen conserunt, propius incurrentes gladiis excipiunt, in recedentes tela coniciunt. Sed adversus multos, et ex superiore loco dimicantes, haud diu impunita duorum audacia fuisset; nisi conspecto ipsorum periculo, commilitonum pauci primo, deinde alii atque alii laborantibus subvenissent: eodem modo et oppidanis subinde ad locum, ubi pugnabatur, confluentibus. Ita nunc his, nunc illis robore numeroque superioribus, varie pugnatum est: donec Alexander cum manu, quae circa ipsum erat, progressus, metum hostibus incussit, statimque intra munimenta compulsi sunt: nec multum absuit, quin hostes simul irumperent. Forte enim intentis omnibus in ea, quae ante urbem gerebantur, moenia negligenter servari contigerat: et duae turres cum continenti murorum parte crebris arietum ictibus cesserant; tertia quoque, laxata iam et concussa compage, fodientibus haud in longum resistere potuisset. At quia tumultuarium id proelium, neque unversus exercitus instructus fuerat, opportunitas eius rei e manibus amissa est. Alexander, quamquam ea res opinione Graecorum de victoria concedentis videretur, corpora suorum, qui sub ipsis moenibus oppetierant, induciis, postulatis ab hoste repetere, quam inhumata dimittere, maluit. At qui cum Persis erant, Ephialtes et Thrasybulus Athenienses, cum plus apud ipsos odium adversus Macedonas, quam humanitatis ratio, valeret, negabant *indulgendum hoc esse infestissimis hostibus*. Non tamen permoverunt Memnonem, quin *Graecorum moribus indignum esse diceret, sepulturam invidere caesis hostibus*. *Armis et viribus in adversos et obstantes utendum: neque contumeliis pugnandum in eos, quos bonis malisque nostris sua dies exenisset*. Sane praeter alias Memnonis virtutes, etiam noderatio eius insignis fuit. Neque enim per vecor-

diam conviciis insectari hostem pulchrum ducebat; sed virtute et consiliis vires illius animosque contundere. Igitur cum aliquando in agmine quendam ex mercenariis nonnulla contumeliose et petulanter in Alexandrum iacentem audisset, conversa hasta hominem pulsans, *non te conduxisti, inquit, ut malediceret Alexandro, sed ut adversus illum dimicaretis.*

CAP. X. Interea obsessi summo studio securitati suae providentes, pro diruto muro alium interiorem ex cocto latere eduxerunt, non recta regione, sed in nascentis lunae figuram sinuatum: eaque res, cum inter multos distributum munus esset, celerrime confecta est. Hunc murum Alexander postero statim die machinis quassare coepit, quo minore negotio recens adhuc opus labefactaret. In eo labore occupatis Macedonibus, iterum ex urbe valida eruptio facta est: cratiumque, quibus opera tegebantur, nonnihil, et unius turris lignae partem flamma comprehendit. Ne ad cetera opera transiret incendium, Philotas et Hellenicus obstiterunt, quibus in eam diem machinarum custodia cesserat: et Alexander, mature conspectus, tantum trepidationis iniecit hostium animis, ut ommissis facibus, quibus armati procurrerant, quidam etiam arma iacentes, effusa fuga oppidum repeterent. Inde vim facile propellebant, aduti commoditate loci, quem multo aequiorem obtinebant; et quia murus, sicut diximus, ita constructus erat, ut quamcunque partem invasisset hostis, non a fronte tantum, sed ex utroque laterum, missilibus appeti posset. Post haec Persaram duces, cum omnia sibi in dies arctiora esse viderent, constaretque non abscessurum Macedonem, donec urbis potiretur, de summa rerum consilium habebant. Ibi Ephialtes, vir animi corporisque robore in paucis conspicuus, incommoda longa obsidionis disseruit: negabatque *expectandum, donec paullatim accisis viribus exhausti fractique cum ipsa urbe in victo-*

*ris arbitrium concederent; sed dum aliquid virum superasset, cum robore conductitii militis erumpendum, et alacribus animis cum hoste confligendum esse. Consilium suum, qua in speciem audacius esset, eo plus in exsequendo facilitatis habiturum. Hostibus enim alia omnia expectantibus, et adversus casum, de quo nihil dubitarent, imparratis, superfusum iri suos: Neque Memnon, quamquam cauta consilia speciosis praeferre solitus, restitit. Nam etiamsi nihil novaretur, nulla propinqua auxilii spe tristem obsidionis exitum fore prospiciebat; et, ut in tanto discrimine, non inconsultum rebatur, experiri virum acrem, et qui velut instinctu quodam ad extrema audenda ageretur. Igitur Ephialtes, duobus millibus ex omni mercenariorum numero delectis, faces mille parare iubet, primaque luce adesse, et armatos expectare imperium. Coepta die cum Alexander iterum muro lateritio machinas admovisset, instarentque Macedones operi; Ephialtes, porta subito patefacta, dimidium suorum immittit cum facibus; ipse cum ceteris denso agmine subsequitur, ut hostes incendium prohibituos submoveret. Alexander, intellecto quid ageretur, aciem celeriter instruit, subsidia delecto milite firmat. Cumque alios ad extinguendum ignem ire iussisset, in eos, qui cum Ephialte advenerant, impetum facit. At ille insigni corporis robore, quotquot conferre pedem audebant, obtruncans, suos voce, nutu, et inprimis exemplo, ad virtutem animabat. Neque parum molestiae e muris exhibebatur hosti: quippe turren centum cubitorum obsessi crexerant, tormentisque commode dispositis hastas et saxa iaculabantur. Inter haec ex diversa parte urbis (ipsi *Tripylon* vocabant) duce Memnone alius oppidanorum globus, qua minime expectabatur, erupit: tantusque tumultus incessit castris, ut ipse etiam rex consilii incertus efficeretur. Sed animi magnitu-*

dine, et opportunis imperiis omnia pericula propulsa-  
 bat; et fortuna in tempore subvenit. Igitur et qui ma-  
 chinas incenderant, a Macedonibus, qui ibi curabant,  
 quique a rege missi subsidio venerant, cum magna  
 clade repulsi sunt; et Memnonem Ptolemaeus excepit  
 Philippi filius, regii corporis custos, praeter propriam  
 manum Addaei Timandrique cohortibus stipatus: ea-  
 que parte egregie vicerunt Macedones, quamquam  
 Ptolemaeum Addaeumque, et sagittariorum ducem  
 Clearchum cum quadraginta ferme manipularibus  
 amisissent; et hostes cum tanta trepidatione recesser-  
 runt, ut angustum pontem, quem ad fossam superan-  
 dam construxerant, multitudo festinantium ruperit,  
 iis, qui superstiterant, in praecipitium devolutis. Ex qui-  
 bus nonnulli a suis conculcati interierant; alios Ma-  
 cedones ex superiore loco telis confixere. Multi, qui-  
 bus ista calamitas pepercerat, sub ipsa urbis porta ne-  
 cem invenerunt: quippe exterritis omnibus, metuen-  
 tibusque, ne una Macedones irrumperent, porta praepere  
 occlusa magnam oppidanorum partem ad  
 exitium hosti tradidit. Inter haec Ephialtes, non spe  
 magis quam desperatione formidabilis, cum regis fe-  
 rociter dimicabat: et ancipitem fecisset victoriam, ni  
 laborantibus suis seniores Macedonum mature succur-  
 rissent. Ii in castris habebantur immunes operum pe-  
 riculorumque, nisi ubi necessitas exigeret, cum stipen-  
 diis praemiisque nihilominus perfuerentur. Merue-  
 rant eum honorem fortibus factis, et sub superioribus  
 regibus ipsoque Alexandro bellicis laboribus aetate  
 exacta. Ii, cum suos periculis territos detrectare pu-  
 gnam, et receptui locum circumspicere intelligerent,  
 Atharia quodam duce, in primam aciem provolant;  
 accensoque quod elanguerat proelio, iuniores conviciis  
 et pudore flagitii ad resumendos animos compellunt.  
 Ita simul acerrimo nisu incumbunt omnibus, cum  
 emulationem suam hostium damnis exercerent.

momento temporis inclinata fortuna; Ephialtes cum plurimis fortissimisque suorum caesis, reliqui in urbem repulsi sunt. Introierant etiam Macedonum multi, et oppidum vi capiebatur, cum receptui cani rex iussit; sive ut urbi parceret, sive praecipiti iam in vespere die, noctem et occultas ignotis locis insidias metuebat. Hoc proelium praecipuas obsessorum vires consumpsit. Igitur Memnon, re cum Orontobate, qui urbem tenebat, ceterisque ducibus deliberata, nocte intempesta turrim ligneam et porticus, ubi tela servabantur, incendunt, aedificiisque muro vicinis ignem supponunt: quo celeriter concepto, cum et ex porticibus turrique flamma vento agitata accederet, late fuderunt incendium. Oppidanorum militumque validissima pars arcem in insula sitam occupavit; alii in Salmacidem se contulere: alterius arcis id nomen, inditum a fonte, qui ibi est, vulgatissimae famae. Reliquam multitudinemque pretiosas duces avexerunt in Con insulam. Alexander, indicio transfugarum, et obiecta oculis specie, quae in urbe gesta fuissent cognitis, quamquam media nocte, Macedonas *in urbem irrue-  
re, et quos incendium augentes deprehendissent, interficere; si qui domi se continerent, ab eorum caede temperare, iubet.* Luce oborta arces a Persis et mercenariis insessas contemplatus, cum obsidionem earum longi operis futuram suspicaretur, neque pretium putaret, capite gentis expugnato, duabus arcibus assidentem, agendi tempus per otium et inertiam terere, urbem ipsam excindit, arces muro fossaque circumseptas Ptolemaeum observare iubet, quem cum tribus millibus peregrinorum militum, et equitibus ducentis ad Cariam tuendam relinquebat. Is non longo post tempore, copiis cum Asandro Lydiae praetore coniunctis, Orontobatem acie vicit: et Macedonibus ira taedioque diuturnioris morae, oppugnationi acriter

CVRTIVS.

E 2

incumbentibus, arces in potestatem redactae sunt. A rex, Phrygiam continentesque provincias animo complexus, Parmenionem cum amicorum turmis, et auxiliariis equitibus, Thessalisque, quibus Alexander Lyncestes praerat, Sardes mittit, *ut inde in Phrygiam irrueret, venturoque exercitui commeatum et pabulum ex hostico pararet.* Data ad hoc plaustra, quae simul ducerentur. Cum deinde multos Macedonum, paullo ante eam expeditionem ductis uxoribus, desiderium earum impatienter ferre cognovisset; Ptolemaeum Seleuci filium corporis custodem iis praefecit, *domumque deducere* iussit, *cum uxoribus hibernaturos.* Duo quoque ex ducibus, Coenos atque Meleager, ob eandem causam una profecti sunt. Id regi magnae apud milites commendationi fuit, promptioresque deinde eos ad longinquam militiam reddidit, cum sui rationem habitam viderent, sperarentque, deinceps etiam ad suos visendos subinde commeatum impetraturos esse. Ducibus iniunctum est, *ut interim, dum in Macedonia morarentur, strenue delectus agerent; quantasque maximas possent equitum peditumque copias, cum iis, qui tum abibant, sub initium veris adducerent.* Animadverso autem, exercitum Asiaticis moribus infici, magnamque vulgo per castra impudicorum multitudinem haberi, probrosos omnes conqueri iussit, et in parvam quandam Ceramicus sinus insulam seposuit: haesitque infamia loco, et ob eius rei memoriam Cinaedopolis appellatur.

CAP. XI. His ita gestis, insistens consilio suo, ut omni maritima ora sui iuris effecta, classem hostium inutilem redderet, Hypanis receptis, quae arcem tenentes mercenarii dederant, in Lyciam contendit. Ibi pacta cum Telmissensibus amicitia, Xanthoque flumine transmissa, cognominem anni urbem, Pinara-

que et Patara, nobilia iis regionibus oppida, cum aliis minoribus circiter triginta, in fidem accipit: rebusque satis in praesens compositis, in Myliada procedit. Phrygiae maioris portio Mylias est; sed Persarum regibus placuerat Lyciae eam contribui. Eam dum recipit, adfuere Phaselitarum legati, amicitiam orantes, aureamque coronam hospitale donum afferebant: idem petebant multarum urbium oratores ex inferiore Lycia. Itaque rex, praemissis, quibus oppida sua Phaselitae Lyciique traderent, paucis post diebus Phaselin profectus est. Oppugnabant illi tum maxime validum praesidium, quod in ipsorum ditione Pisidae construxerant, multasque inde iniurias intulerant accolis. Id adventu Alexandri brevi captum fuit. Apud Phaselitas plures dies, ut seque et exercitum reficeret, quieti dedit. Invitabat etiam tempus anni; quippe media iam hiems difficiles progredienti vias effecerat. Ibi per hilaritatem et epulas laxato animo, cum statuam Theodecti a civibus suis in foro positam vidisset, ut a coena temulentus surrexerat, saltabundus eo processit, frequentesque ei coronas iniecit. Nam Theodecten, cum Aristotelem una audiret, familiarem gratumque habuerat. Sed otiosos juvenilis animi lusns atrox a Parmenione nuntius cito discussit. Comprenderat ille Persam quendam Asisinem nomine, a rege Dario palam quidem ad Atyziam Phrygiae satrapam missum, sed cum occultis mandatis, *ut Alexandrum Lyncesten captata occasione secreto conveniret, eique, si destinata effecisset, Macedoniae regnum et mille insuper auri talenta polliceretur.* Nam is, cum Amynta transfuga scelesto consilio inito, occidendi regis partes sibi sumserat. Oderat eum tum aliis de causis, tum quod Heromenem et Arrabaeum, fratres huius Alexandri, inter paternae necis conscios supplicio affecisset. Et quamquam ipse poena exem-



tus, multisque postea honoribus ornatus, non simplex beneficium regi deberet; insita animo ferocia et domnandi cupidine nihil nefas putabat, per quod ad regnum via sterneretur. Re in consilium deducta, *facilitatem regis* arguebant amici, *quod hominem in manifesto maleficio deprehensum, non modo punire non sustinuisset; verum etiam praeniis et honoribus auctum optimae equitatus parti praeposuisset. Quem deinceps ei fidum futurum, si praeter impunitatem propior amicitiae gradus, maximae dignitates, honorificae praefecturae, parvicidii merces essent? Igitur mature emendandum, quod nimia lenitate peccatum esset: priusquam ille, consilium emanasse sentiens, Thessalorum mobiles animos ad res novandas induceret. Non contemnendum esse periculum, quo maius ne excogitari quidem possit: neque spernenda Deorum ostenta, qui regem de cavendis insidiis evidenter monuissent.* Nuper enim, dum Halicarnassum obsidens, post longos magnosque labores meridiatione reficitur, hirundo, nota auspicii avis, magno cum garritu circum caput quiescentis volitaverat, et modo in hoc, modo illud lectuli latus se demiserat, turbulentiore solito cantum exorsa. Et rex quidem defatigato corpore non penitus excussit somnum, sed tamen avem continuo strepitu molestam sentiens, manu obiter repulit. Illa adeo non exterrita est, ut etiam in ipsius capite consederit, neque prius strepere desierit, quam ab expectato demum abacta est. Idque sic interpretatus fuerat Aristander, ut *instare periculum diceret ab amico regis; sed insidias in occulto non mansuras. Hoc enim monere naturam avis, quae prae ceteris homini familiaris, eademque supra modum garrula esset.* His itaque diligenter expensis, cum indicium Asisinis cum vatis responso convenire cerueret, me-

minissetque, se matris literis anxie monitum, *ut ab hoc homine sibi caveret*; nihil ultra differendum ratus, quid fieri vellet, Parmenioni significat: nam, ut diximus, cum ipso in Phrygiam iverat Lyncestes Alexander. Sed ne quo casu consilium regis parum in tempore proderetur, literas scribi non placuit; sed per hominem fidum atque honoratum mandata perferri. Electus est Amphoterus Crateri frater: qui cum Macedonicum habitum Phrygio mutasset, assumptis Pergensibus aliquot itineris gnavis, ad Parmenionem occultus penetrat. Ita Alexander comprehenditur: et cum ob veterem suam familiaeque dignitatem et gratiam diu dilatus esset; tertio post anno, dum a Philotae consociis supplicium sumitur, societate criminis, et poena solum in exitium abreptus perit. Regi ex Phaselide moventi, supra detectas insidias propitius numinis favor alio statim beneficio patuit. Parte exercitus ad Pergensium urbem per montes praemissa, ceteros ipse per litus ducebat, qua Climax mons Pamphylio mari imminens, angustam euntibus semitam relinquit, quoties mare tranquillum est; at cum aestus incubuit, fluctibus operitur: idque hieme frequens et prope perpetuum est. At Alexander, nihil aeque ac moram metuens, exercitum per aequa, per iniqua, eodem ardore atque impetu rapiebat. Continui per eos dies austri flaverant, qui mare in litus propellentes, omnia itineris vestigia altis paludibus opplent: assiduae etiam magnaeque pluviae, ut ventis istis spirantibus solet, ruebant. Sed adventante Alexandro subito exortus aquilo coelum purgavit imbribus, undas reiecit in mare, et Macedonibus transitum aperuit. Sic quoque unius diei itinere per incerta vada emergendum fuit, aqua ad umbilicum ferme pertingente. Tantam in periculis Alexandri fiduciam, ut ab ipsius ingenio profectam non dubito; ita frequentibus pro-

digiis et omnibus auctam confirmatamque fuisse crediderim, postquam decreto numinis, clarissimis maximisque rebus se destinari coniecit. Adhuc in Macedonia degenti species humana angustior apparuisse dicitur, monentis, *ut avertendum imperium Persicum quamprimum in Asiam sequeretur*: atque in memoriam insomnii revocatum esse regem, cum in Phoenice res gereret, obvio Iudaeorum sacerdote, in quo recognovit ornatum, quem pridem in obiecta imagine per quietem viderat. Nam inter obsidionem Tyri vicinis regibus populisque deditionem et delectus imperaverat. Sed Iudaei, qui Hierosolyma famosam urbem tenebant, foedus cum Dario causati, Macedonum amicitiam detrectabant. Eam gentis contumaciam puniturus, in Iudaeam infesto agmine perrexit. At Hierosolymitani, ut regis iram lenirent, cum uxoribus liberisque supplices in occursum venientis effunduntur. Sacerdotes primi ibant tenuissima bysso amicti: hos deinde populus candido et ipse vestitu sequebatur. Agmen ducebat Iaddus, summus sacrorum antistes, cum sollemni ornatu. Appropinquantis pompae venustatem speciemque miratus rex, equo desiliens, solus processit, adoratoque Dei nomine, quod aureae laminae insculptum cidaribus pontificia praeferebat, ipsum quoque reverenter salutavit. Improvisa res omnium, qui cum eo advenerant, animos in stuporem dedit. Iudaei ex propinqui exitii metu non in spem incolumitatis modo, sed inopinatae gratiae fiduciam erecti circumibant regem, laudes gratulationemque et vota miscentes. Contra Syrorum reguli, qui ob crebras acerbisque cum Iudaeis similitates Alexandrum secuti fuerant, inimicorum suppliciiis, ut rebantur, infesti animi libidinem expleturi, stupebant, dubii, verane essent, quae intuerentur, an aliquod oculorum ludibrium vana imagine sopitos sensus falleret. Neque minus Mace-

donas insolentia spectaculi suspensos habuit: donec propius accedens Parmenion interrogare ausus est, *quid ita externis caerimoniis honorem deferret, quem a tam foeda gente etiam recipere vix tanto rege dignum esset?* Atque ille insomnium suum retulit. Deinde urbem ingressus, in pulcherrima aede ritu recepto sacrum Deo fecit, et dona templo intulit. Inspexit etiam sacros gentis codices, quibus continebantur diu ante perscripta vaticinia: inter quae Tyrum Macedonibus cessuram, et Persas a Graeco quodam debellatum iri, clare significabatur. Eum se fore interpretatus, Iudaeis concessit, *ut domi forisque suis legibus ritibusque libere uterentur; et quia septimum quemque annum agriculturae exsortem agunt, etiam tributorum ista portione solverentur.* Naturam quoque regionis admiratus, quae aliis fructibus inter praestantissimas dives, opobalsamum sola producit, Andromachum iis regionibus praeposuit. quem Samaritani, perpetui Iudaeorum hostes, paullo post atrociter necaverunt. Sed haec quidem post Tyrum Gazamque expugnatas gesta sunt: nos per occasionem praecepimus.

CAP. XII. Ceterum angustiis ad mare Pamphylium superatis, Alexander Pergis profectus in itinere obvios habuit Aspendiorum legatos ex principibus civitatis. Ii petentes, *ne praesidium recipere cogerentur, quinquaginta talenta in stipendium militum, et quantum equorum tributi nomine regi Persarum alere consueverant,* promiserunt. Inde rex ad Sidetas, qui Melanem amnem accolunt, progressus est; Cumaeorum ex Aeolide genus, sed sermone barbaro: nam Graecus exoleverat, non diuturnitate temporis, ut accidit; verum *maiores suos, ut in eas regiones venerunt, repente oblitos patriae linguae, novam et antea inauditam sonuisse* memorabant. Side re-

cepta, quae Pamphyliae metropolis erat, Syllium ihatum, tutum natura situs oppidum, et tam peregrino milite, quam barbarorum accolentium firma manu egregie munitum. Ea res et quia *Aspendios rebellare* nuntiabatur, avertit iter: Aspendumque ductus est exercitus. Illi, subita Macedonum irruptione territi, desertis quae in plano erant aedificiis, in arcem concessere. Alexander, vacua urbe potitus, sub ipsa arce castra communit; et cum peritissimos architectos haberet, apparatu oppugnationis *obsessos ad pacem prioribus conditionibus repetendam compulit*. Nihil ad maiora properanti optatius accidere potuisset, quam loci haud contemnendi longa obsidione non detineretur; ne tamen impunita defectorum temeritas esset, *potissimos civium obsides tradi, pecuniaeque imperatae nec exsolatae summam duplicari*, praecipit: adiectum est, *ut satrapae, quem Alexander praefecisset, obedirent, annua Macedonibus tributa solverent, et de agro, unde vicinos vi eiecisse arguebantur, iudicio contenderent*. His ita gestis remensus iter, quod ad Pergensium oppidum ferebat, inde perrexit in Phrygiam. Sed per ista loca ducenti superandae erant angustiae, quas iuxta Telmissum, urbem Pisidarum, duo montes ex adverso concurrentes efficiunt, ita strictis faucibus, ut portarum similitudinem referant: easque barbari armata manu utriusque insederant. Alexander in ipso aditu castra poni iubet, ratus, quod evenit, Telmissenses castris locatis periculum differri credentes non diu haesuros in angustis, sed modico in illis relicto praesidio ceteros in urbem recessuros esse. Igitur occasione haud segnitius usus, protinus sagittarios et funditores, quodque ex gravi armatura maxime expeditum erat, inducit; et praesidio barbarorum disturbato, ante ipsam urbem castra collocat. Ibi legatos Selgensium audit, qui ob

vetustas cum vicinis Telmissensibus simultates, quamquam eiusdem nationis essent, amicitiam ac auxilia offerebant regi. Quibus perbenigne exceptis, ne in obsidione unius urbis tempus tereret, Sagalassum castra movit, validam urbem et iuventutis robore firmatam. Cum enim omnes Pisidae bellicosi sint, Sagalassenses prae ceteris pugnaces habentur. Ii, cum etiam a Telmisso foederatae sociaeque copiae venissent, viris magis quam moenibus confisi, in vicino colle instruxerant aciem, et praemissos ab Alexandro velites opportunitate loci adiuti repulerant: sed Agriani resistebant, quis propinqua iam Macedonum phalax, et ante prima signa rex conspectus audaciam addiderat. Maximus militi labor fuit per ardua conniti: postquam aequioribus paullo locis consistere datum est, semerum montanorum vulgus haud aegre disiecere. Ex Macedonum ducibus Cleander desideratus est, cum viginti ferme militibus: barbarorum ad quingentos cecidere; ceteros expedita fuga et locorum notitia protexit. Fugientibus tamen institit rex, contentione, quanta poterat tam grave agmen: eodemque impetu urbs eorum capta est. Per cetera deinde Pisidiae munita loca circumtulit bellum: quorum nonnulla pugnando cepit; alia conditionibus in fidem venerunt. Telmissum expugnatam, ob pertinaciam civium, solo aequavit; populo libertatem ademit; et paullo post cum aliis quibusdam Pisidiae civitatibus, Celaenarum praefecturae contribuit. Pacatis hunc in modum asperimis nationibus, in Phrygiam processit, qua Ascanius lacus est, cuius aqua sua sponte concrescens, necessitate salis e longinquo petendi solvit accolae. Dum ea geruntur, Memnon, suarum partium reliquiis undique collectis, ut inharentem Asiae Alexandrum extorqueret, ad bellum Graeciae Macedoniaeque inferendum cogitationes convertit. Quippe Darius, in hoc uno

CVRTIVS. Ff

spem reponens, qui victoris impetum sua virtute suaque prudentia diutissime ad Halicarnassum moratus esset, summae rerum praefecerat eum, magnamque pecuniae vim transmiserat. Itaque mercenariorum manu quanta poterat conducta, cum trecentarum navium classe libero mari vagabatur; et quae tantis conatibus adversa vel aequa futura essent, sollerti aestimatione pensabat. Interea locis, quae minus anxie custodiebantur, occupatis, (inter quae et *Lampsacus* fuerat,) insulas aggressus est, quibus Macedones, quamquam utrinque continenti potirentur, ob inopiam navium auxilium ferre non poterant. Iuvit consilium ducis animorum mira ubique dissensio; cum aliis ad Alexandrum libertatis auctorem res trahentibus, non deessent, qui Persicis opibus aucti, propriam sub veteribus dominis potentiam, quam liberata republica eandem omnium aequalitatem mallent. Igitur Athenagoras et Apollonides ex Chiorum optimatibus, re cum Phisino Megareoque, et aliis suae factionis hominibus communicata, Memnonem arcessunt. Ita Chius prodicione capitur, et praesidio ibi collocato, urbanarum rerum administratio Apollonidi sociisque traditur. Inde Lesbum petens, Antissam, Pyrrham et Eressum nullo negotio capit; Methymnae Aristonicum tyrannum imponit, totamque insulam, excepta Mityleue nobilissima urbe, in potestatem redigit. Ea multis diebus obsidionem constanter pertulit: nec ab ipso Memnone capta est. Ille enim cum iam magnis operibus urbem circumvallasset, et occluso portu, naviumque stationibus per opportuna loca dispositis, ne qua subsidio venientibus aditus pateret, providisset; pestilenti morbo correptus, praeclaram Persarum spem, irreparabili cum ipsorum damno, deseruit. Sed cum se iam morti vicinum intelligeret, Pharnabazo sororis suae filio, quem Artabazo pepererat, imperium

sum tradidit, donec Darius, re comperta, aliter statueret. Hic cum Autophradate classis praefecto munia partitus, eo tandem obsessos adegit, ut securo praesidii discessu pacto, columnae, quae foederis cum Alexandro leges insculptae erant, subverterent; Darioque fidem polliciti, dimidiam exularem suorum partem reciperent. At Persae non integra fide pactis steterunt; sed introductis in urbem militibus, Lycomedem Rhodium praeesse iusserunt: Diogeni, qui ob studia in Persas exulaverat, patriae tyrannis tradita est. Pecunia deinceps privatim ab opulentissimo quoque per vim ablata: neque eo minus imperatum tributum, quod commune Mitylensaeorum penderet.

---